

तुलसी-ग्रंथावली

दूसरा खंड

काशी-नागरीप्रचारिणी सभा







नागरीप्रचारिणी ग्रंथमाला—३२

तुलसी-ग्रंथावली


दूसरा खंड

संपादक

रामचंद्र शुक्ल

भगवानदीन

व्रजरत्नदास



गोस्वामी तुलसीदास की त्रिशत जयंती के
अवसर पर
काशी-नागरीप्रचारिणी सभा द्वारा प्रकाशित ।

१९८०


पहला संस्करण ३०००]

[मूल्य २॥]

Printed by Bishweshwar Prasad,
at The Indian Press, Ltd., Benares-Branch.

ग्रंथ-सूची


		पृष्ठांक
१ रामलला-नद्वक्	...	१-६
२ वैराग्य-संक्षिपनी	...	७-१६
३ बरवै रामायण	...	१७-२५
४ पार्वती-मंगल	...	२७-४२
५ जानकी-मंगल	...	४३-६३
६ रामाज्ञा-प्रश्न	...	६५-१०२
७ दोहावली	...	१०३-१५४
८ कवितावली	...	१५५-२६५
९ गीतावली	...	२६७-४३३
१० श्रीकृष्ण-गीतावली	...	४३५-४५७
११ विनय-पत्रिका	...	४५८-६००



रामलला-नहछू



रामलला-नहछू



सोहर छंद

आदि सारदा गनपति गौरि मनाइय हो ।
रामलला कर नहछू गाइ सुनाइय हो ॥
जेहि गाये सिधि होय परम निधि पाइय हो ।
कोटि जनम कर पातक दूरि सो जाइय हो ॥ १ ॥
कोटिन्ह बाजन बाजहिं दसरथ के गृह हो ।
देवलोक सब देखहिं आनंद अति हिय हो ॥
नगर सोहावन लागत वरनि न जातै हो ।
कौसल्या के हर्ष न हृदय समातै हो ॥ २ ॥
आले हि वाँस के माँड़व मनिगन पूरन हो ।
मोतिन्ह भालरि लागि चहुँ दिसि भूलन हो ॥
गंगाजल कर कलस तौ तुरित मँगाइय हो ।
जुवतिन्ह मंगल गाइ राम अन्हवाइय हो ॥ ३ ॥
गजमुकुता हीरामनि चौक पुराइय हो ।
देइ सुअरघ राम कहँ लेइ बैठाइय हो ॥
कनकखंभ चहुँ ओर मध्य सिंहासन हो ।
मानिकदीप वराय बैठि तेहि आसन हो ॥ ४ ॥
बनि बनि आवति नारि जानि गृह मायन हो ।
बिहँसत आउ लोहारिनि हाथ बरायन हो ॥
अहिरिनि हाथ दहँडि सगुन लेइ आवइ हो ।
उनरत जोबनु देखि नृपति मन भावइ हो ॥ ५ ॥

रूपसलोनि तँबोलिनि बीरा हाथहि हो ।
 जाकी ओर बिलोकहि मन तेहि साथहि हो ॥
 दरजिनि गोरे गात लिहे कर जोरा हो ।
 केसरि परम लगाइ सुगंधन बोरा हो ॥ ६ ॥
 मोचिनि बदन-सकोचिनि हीरा माँगन हो ।
 पनहि लिहे कर सोभित सुंदर आँगन हो ॥
 बतिया कै सुघरि मलिनिया सुंदर गातहि हो ।
 कनक रतनमनि मौर लिहे मुसुकातहि हो ॥ ७ ॥
 कटि कै छीन बरिनिआँ छाता पानिहि हो ।
 चंद्रवदनि मृगलोचनि सब रसखानिहि हो ॥
 नैन विसाल नडनियाँ भौं चमकावइ हो ।
 देइ गारी रनिवासहि प्रमुदित गावइ हो ॥ ८ ॥
 कौसल्या की जेठि दीन्ह अनुसासन हो ।
 “नहछू जाइ करावहु वैठि सिंहासन हो” ॥
 गोद लिहे कौसल्या बैठी रामहि बर हो ।
 सोभित दूलह राम सीस पर आँचर हो ॥ ९ ॥
 नाडनि अति गुनखानि तौ बेगि बोलाई हो ।
 करि सिंगार अति लोन तौ बिहसति आई हो ॥
 कनक-चुनिन सों लसित नहरनी लिये कर हो ।
 आनंद हिय न समाइ देखि रामहि बर हो ॥ १० ॥
 काने कनक तरीवन, बेसरि सोहइ हो ।
 गजमुकुता कर हार कंठमनि मोहइ हो ॥
 कर कंकन, कटि किंकिनि, नूपुर बाजइ हो ॥
 रानी कै दीन्हौं सारी तौ अधिक बिराजइ हो ॥ ११ ॥
 काहे रामजिउ साँवर, लछिमन गोर हो ।
 कीदहुँ रानि कौसिलहि परिगा भोर हो ॥

राम अहहिं दसरथ कै लछिमन आन क हो ।
 भरत सत्रुहन भाइ तौ श्रीरघुनाथ क हो ॥ १२ ॥
 आजु अवधपुर आनंद नहछू राम क हो ।
 चलहु नयन भरि देखिय सोभा धाम क हो ॥
 अति बड़भाग नउनियाँ छुपे नख हाथ सों हो ।
 नैनन्ह करति गुमान तौ श्रीरघुनाथ सों हो ॥ १३ ॥
 जो पगु नाउनि धोवइ राम धोवावइ हो ।
 सो पगधूरि सिद्ध मुनि दरसन पावइ हो ॥
 अतिसय पुहुप क माल राम-उर सोहइ हो ।
 तिरछी चितवनि आनंद मुनिमुख जोहइ हो ॥ १४ ॥
 नख काटत मुसुकाहिं वरनि नहिं जातहि हो ।
 पदुम-पराग-मनिमानहुँ कोमल गातहि हो ॥
 जावक रचि क अँगुरियन्ह मृदुल सुठारी हो ।
 प्रभु कर चरन पछालि तौ अति सुकुमारी हो ॥ १५ ॥
 भइ निवछावरि बहु विधि जो जस लायक हो ।
 तुलसिदास बलि जाउँ देखि रघुनायक हो ॥
 राजन दीन्हे हाथी, रानिन्ह हार हो ।
 भरि गे रतनपदारथ सूप हजार हो ॥ १६ ॥
 भरि गाड़ी निवछावरि नाऊ लेइ आवइ हो ।
 परिजन करहिं निहाल असीसत आवइ हो ॥
 तापर करहिं सुमौज बहुत दुख खोवहिं हो ।
 होइ सुखी सब लोग अशिक सुख सोवहिं हो ॥ १७ ॥
 गावहिं सब रनिवास देहिं प्रभु गारी हो ।
 रामलला सकुचाहिं देखि महतारी हो ॥
 हिलिमिलि करत सवाँग सभा रसकेलि हो ।
 नाउनि मन हरषाइ सुगंधन मेलि हो ॥ १८ ॥


दूलह कै महतारि देखि मन हरषइ हो ।
 कोटिन्ह दीन्हैउ दान मेघ जनु बरखइ हो ॥
 रामलला कर नहछू अति सुख गाइय हो ।
 जेहि गाये सिधि होइ परम निधि पाइय हो ॥ १६ ॥
 दसरथ राउ सिंहासन बैठि विराजहि हो ।
 तुलसिदास बलि जाहि देखि रघुराजहि हो ॥
 जे यह नहछू गावै गाइ सुनावई हो ।
 अद्धि सिद्धि कल्याण मुक्ति नर पावई हो ॥ २० ॥

२
८

वैराग्य-संदीपिनी

न साख
प्रखिल ज्ञान को

—
व-नर्ण



वैराग्य-संदीपिनी

—:❀:—

दोहा ।

राम वाम दिसि जानकी, लषन दाहिनी ओर ।

ध्यान सकल कल्याणमय, सुरतरु तुलसी तोर ॥ १ ॥

तुलसी मिटै न मोहतम, किये कोटि गुणग्राम ।

हृदयकमल फूलै नहीं, विनु रवि-कुल-रवि राम ॥ २ ॥

सुनत लखत श्रुति नयन विनु, रसना विनु रस लेत ।

वास नासिका विनु लहै, परसै बिना निकेत ॥ ३ ॥

सोरठा ।

अज अद्वैत अनाम, अलख रूप गुणरहित जो ।

मायापति सोइ राम, दासहेतु नरतनु धरेउ ॥ ४ ॥

दोहा ।

तुलसी यह तनु खेत है, मन बच कर्म किसान ।

पाप पुन्य द्वै बीज हैं, बवै सो लवै निदान ॥ ५ ॥

तुलसी यह तनु तवा है, तपत सदा त्रय ताप ।

सांति होहि जब सांतिपद, पावै रामप्रताप ॥ ६ ॥

तुलसी वेद-पुरान-मत, पूरन साख विचार ।


यह विराग-संदीपिनी, अखिल ज्ञान को सार ॥ ७ ॥

(संत-स्वभाव-वर्णन)

दोहा ।

सरल बरन भाषा सरल, सरल अर्थमय मानि ।

तुलसी सरलै संतजन, ताहि परी पहिचानि ॥ ८ ॥



चौपाई ।

अति सीतल अति ही सुखदाई । सम दम रामभजन अधिकाई ॥
जड़ जीवन को करै सचेता । जग माहीं विचरत एहि हेता ॥ ८ ॥

दोहा ।

तुलसी ऐसे कहूँ कहूँ, धन्य धरनि बहु संत ।
परकाजै परमारथी, प्रीति लिये निबहंत ॥ १० ॥
की मुख पट दीन्हें रहै, यथा अर्थ भाषंत ।
तुलसी या संसार में, सो विचारयुत संत ॥ ११ ॥
बोलै वचन विचारि कै, लीन्हें संत सुभाव ।
तुलसी दुख दुर्वचन के, पंथ देत नहिं पाव ॥ १२ ॥
सत्रु न काहू करि गनै, मित्र गनै नहिं काहि ।
तुलसी यह मत संत को, बोलै समता माहि ॥ १३ ॥

चौपाई ।

अति अनन्य गति ईंद्रीजीता । जाको हरि विनु कतहुँ न चीता ॥
मृगतृष्णा सम जग जिय जानी । तुलसी ताहि संत पहिचानी ॥ १४ ॥

दोहा ।

एक भरोसो एक बल, एक आस विस्वास ।
राम-रूप-खाती-जलद, चातक तुलसीदास ॥ १५ ॥
सो जन जगत-जहाज है, जाके राग न दोष ।
तुलसी तृष्णा त्यागि कै, गहेउ सील संतोष ॥ १६ ॥
सील गहनि सबकी सहनि, कहनि हीय मुख राम ।
तुलसी रहिए एहि रहनि, संत जनन को काम ॥ १७ ॥
निज संगी निज सम करत, दुर्जन मन दुख दून ।
मलयाचल हैं संत जन, तुलसी दोषविहून ॥ १८ ॥
कोमल बानी संत की, स्रवै अमृतमय आइ ।
तुलसी ताहि कठोर मन, सुनत मैन होइ जाइ ॥ १९ ॥

अनुभव सुख-उत्पत्ति करत, भवभ्रम धरै उठाइ ।
 ऐसी बानी संत की, जो उर भेदै आइ ॥ २० ॥
 सीतल बानी संत की, ससि हू ते अनुमान ।
 तुलसी कोटि तपनि हरै, जो कोउ धारै कान ॥ २१ ॥
 चौपाई ।

पाप ताप सब सृल नसावै । मोहअंध रविवचन बहावै ॥
 तुलसी ऐसे सदगुरु साधू । वेद मध्य गुन विदित अगाधू ॥ २२ ॥
 देहा ।

तन करि मन करि बचन करि, काहू दूषत नाहिं ।
 तुलसी ऐसे संतजन, रामरूप जग माहिं ॥ २३ ॥
 मुख देखत पातक हरै, परसत कर्म विलाहिं ।
 बचन सुनत मन मोहगत, पुरुष भाग मिलाहिं ॥ २४ ॥
 अति कोमल अरु विमल रुचि, मानस में मल नाहिं ।
 तुलसी रत मन होइ रहै, अपने साहिब माहिं ॥ २५ ॥
 जाके मन ते उठि गई, तिल तिल वृष्णा चाहि ।
 मनसा वाचा कर्मना, तुलसी बंदत ताहि ॥ २६ ॥
 कंचन काँचहि सम गनै, कामिनि काठ पषान ।
 तुलसी ऐसे संतजन, पृथ्वी ब्रह्म समान ॥ २७ ॥
 चौपाई ।

कंचन को मृत्तिका करि मानत । कामिनि काष्ठ सिला पहिचानत ॥
 तुलसी भूलि गयो रस एहा । ते जन प्रगट राम की देहा ॥ २८ ॥
 देहा ।

आकिंचन, इन्द्रियदमन, रमन राम इकतार ।
 तुलसी ऐसे संतजन, बिरले या संसार ॥ २९ ॥
 अहंवाद, 'मैं तैं' नहीं, दुष्टसंग नहीं कोइ ।
 दुख ते दुख नहीं ऊपजै, सुख ते सुख नहीं होइ ॥ ३० ॥

सम कंचन काँचै गिनत, सत्रु मित्र सम दोड़ ।
 तुलसी या संसार में, कहत संतजन सोइ ॥ ३१ ॥
 विरले विरले पाइए, मायात्यागी संत ।
 तुलसी कामी कुटिल कलि, केकी काक अनंत ॥ ३२ ॥
 “मैं तै” मेढ्यो मोहतम, उगो आतम-भानु ।
 संतराज सो जानिए, तुलसी या सहिदानु ॥ ३३ ॥

(संत-महिमा-वर्णन)

सोरठा ।

को बरनै मुख एक, तुलसी महिमा संत की ।
 जिन्हके विमल विवेक, सेष महस न कहि सकत ॥ ३४ ॥
 दोहा ।
 महि पत्री करि सिंधु मसि, तरु लेखनी बनाइ ।
 तुलसी गनपति सों तदपि, महिमा लिखी न जाइ ॥ ३५ ॥
 धन्य धन्य माता पिता, धन्य पुत्रवर सोइ ।
 तुलसी जो रामहिं भजै, जैसेहु कैसेहु होइ ॥ ३६ ॥
 तुलसी जाके बदन ते, धोखेउ निकसत राम ।
 ताके पग की पगतरी, मेरे तनु को चाम ॥ ३७ ॥
 तुलसी भगत सुपच भलो, भजै रैन दिन राम ।
 ऊँचो कुल केहि काम को, जहाँ न हरि को नाम ॥ ३८ ॥
 अति ऊँचे भूधरनि पर, भुजगन के अस्थान ।
 तुलसी अति नीचे सुखद, ऊख अन्न अरु पान ॥ ३९ ॥
 चौपाई ।

अति अनन्य जो हरि को दासा । रटै नाम निसि दिन प्रति खासा ॥
 तुलसी तेहि समान नहिं कोई । हम नीके देखा सब लोई ॥ ४० ॥

जदपि साधु सबही विधि हीना । तद्यपि समता के न कुलीना ॥
यह दिन रैनि नाम उच्चरै । वह नित मान-अग्नि में जरै ॥ ४१ ॥

दोहा ।

दास रता एक नाम सों, उभय लोक सुख त्यागि ।
तुलसी न्यारे हूँ रहै, दहै न दुख की आगि ॥ ४२ ॥

— — —

(शांति-वर्णन)

दोहा ।

रैनि को भूषन इंदु है, दिवस को भूषन भातु ।
दास को भूषन भक्ति है, भक्ति को भूषन ज्ञान ॥ ४३ ॥
ज्ञान को भूषन ध्यान है, ध्यान को भूषन त्याग ।
त्याग को भूषन शांतिपद, तुलसी अमल अदाग ॥ ४४ ॥

चौपाई ।

अमल अदाग शांतिपद सारा । सकल कलेशन करत प्रहारा ॥
तुलसी उर धारै जौ कोई । रहै अनंदसिंधु महुँ सोई ॥ ४५ ॥
विविध-पाप-संभव जो तापा । मिटहि दोष दुख दुसह कलापा ॥
परम सांति सुख रहै समाई । तहुँ उतपात न भेदै आई ॥ ४६ ॥
तुलसी ऐसे सीतल संता । सदा रहै एहि भांति एकंता ॥
कहा करें खल लोग भुजंगा । कीन्ह्यौं गरलसील जो अंगा ॥ ४७ ॥

दोहा ।

अति सीतल अति ही अमल, सकल कामनाहीन ।
तुलसी ताहि अतीत गनि, वृत्ति सांति लयलीन ॥ ४८ ॥

चौपाई ।

जौ कोई कोप भरै मुख बैना । सन्मुख हतै गिरा-शर पैना ॥
तुलसी तऊ लेस रिस नाहीं । सो सीतल कहिए जग माहीं ॥ ४९ ॥

दोहा ।

सात दीप नव खंड लौं, तीनि लोक जग माहिं ।

तुलसी सांति समान सुख, अपर दूसरो नाहिं ॥ ५० ॥

चौपाई ।

जहाँ सांति सतगुरु की दर्ई । तहाँ क्रोध की जर जरि गई ॥

सकल कामबासना बिलानी । तुलसी यहै सांति सहिदानी ॥ ५१ ॥

तुलसी सुखद सांति को सागर । संतन गाथो करन उजागर ॥

तामें तन मन रहै समोई । अहं-अगिनि नहिं दाहै कोई ॥ ५२ ॥

दोहा ।

अहंकार की अगिनि में, दहत सकल संसार ।

तुलसी बाँचै संतजन, केवल सांति-अधार ॥ ५३ ॥

महा सांतिजल परसि कै, सांत भए जन जोइ ।

अहं-अगिनि ते नहिं दर्हैं, कोटि करै जो कोइ ॥ ५४ ॥

तेज होत तन तरनि को, अचरज मानत लोइ ।

तुलसी जो पानी भया, बहुरि न पावक होइ ॥ ५५ ॥

जद्यपि सीतल, सम सुखद, जग में जीवन प्रान ।

तदपि सांतिजल जनि गनौ, पावक तेज प्रमान ॥ ५६ ॥

चौपाई ।

जरै बरै अरु खीभि खिभावै । राग द्वेष महुँ जनम गँवावै ॥

सपनेहु सांति नहीं उन देही । तुलसी जहाँ जहाँ व्रत एही ॥ ५७ ॥

दोहा ।

सोइ पंडित सोइ पारखी, सोई संत सुजान ।

सोई सूर सचेत सो, सोई सुभट प्रमान ॥ ५८ ॥

सोइ ज्ञानी सोइ गुनी जन, सोई दाता ध्यानि ।

तुलसी जाके चित भई, रागद्वेष की हानि ॥ ५९ ॥

चौपाई ।

राग द्वेष की अग्नि बुझानी । काम क्रोध वासना नसानी ॥

तुलसी जबहिं सांति गृह आई । तब उर ही उर फिरी दोहाई ॥ ६० ॥

दोहा ।


फिरी दोहाई राम की, मे कामादिक भाजि ।

तुलसी ज्यों रवि के उदय, तुरत जात तम लाजि ॥ ६१ ॥


यह विराग-संदीपिनी, सुजन सुचित सुनि लेहु ।

अनुचित वचन विचारि कै, जस सुधारि तस देहु ॥ ६२ ॥

— — —



बरवै रामायण



बरवै रामायण

बाल कांड

केस-मुकुत सखि मरकत मनिमय होत ।
हाथ लेत पुनि मुकुता करत उदोत ॥ १ ॥
सम सुवरन सुखमाकर सुखद न थोर ।
सीय अंग, सखि ! कोमल, कनक कठोर ॥ २ ॥
सियमुख सरदकमल जिमि किमि कहि जाइ ।
निसि मलीन वह, निसि दिन यह बिगसाइ ॥ ३ ॥
बड़े नयन, कटि, ध्रुकुटी, भाल विसाल ।
तुलसी मोहत मनहि मनोहर वाल ॥ ४ ॥
चंपक-हरवा अंग मिलि अधिक सोहाइ ।
जानि परै सिय हियरे जव कुँभिलाइ ॥ ५ ॥
सिय तुव अंग-रंग मिलि अधिक उदोत ।
हार बेलि पहिरावौ चंपक होत ॥ ६ ॥
साधु सुसील सुमति सुचि सरल सुभाव ।
राम नीतिरत, काम कहा यह पाव ? ॥ ७ ॥
कुंकुमतिलक भाल, सुति कुंडल लोल ।
काकपच्छ मिलि, सखि ! कस लसत कपोल ॥ ८ ॥
भालतिलक सर, सोहत भौंह कमान ।
मुख अनुहरिया केवल चंद समान ॥ ९ ॥
तुलसी बंक विलोकनि, मृदु मुसुकानि ।
कस प्रभु नयन कमल अस कहैं बखानि ॥ १० ॥

कामरूप सम तुलसी राम सरूप ।
 को कवि समसरि करै परै भवकूप ? ॥ ११ ॥
 चढ़त दसा यह उतरत जात निदान ।
 कहौ न कबहुँ करकस भौंह कमान ॥ १२ ॥
 नित्य नेम-कृत अरुन उदय जव कीन ।
 निरखि निसाकर-नृप-मुख भए मलीन ॥ १३ ॥
 कमठपीठ धनु सजनी कठिन अँदेस ।
 तमकि ताहि ए तोरिहि कहव महेस ॥ १४ ॥
 नृप निरास भए निरखत नगर उदास ।
 धनुष तोरि हरि सब कर हरेउ हरास ॥ १५ ॥
 का घूँघट मुख मूँदहु नबला नारि ?
 चाँद सरग पर सोहत ग्रहि अनुहारि ॥ १६ ॥
 गरब करहु रघुनंदन जनि मन माँह ।
 देखहु आपनि मूरति सिय कै छाँह ॥ १७ ॥
 उठी सखी हँसि मिस करि कहि मृदु वैन ।
 सिय रघुबर के भए उनीदे नैन ॥ १८ ॥
 साँक धनुष, हित सिखन, सकुचि प्रभु लीन ।
 मुदित माँगि इक धनुही नृप हँसि दीन ॥ १९ ॥

अयोध्या कांड

सात दिवस भए साजत सकल बनाउ ।
 का पूछहु सुठि राउर सरल सुभाउ ॥ २० ॥
 राजभवन मुख बिलसत सिय सँग राम ।
 बिपिन चले तजि राज, सुबिधि बड़ बाम ॥ २१ ॥

कोउ कह नरनारायन, हरिहर कोउ ।
 कोउ कह विहरत बन मधु मनसिज दोउ ॥ २२ ॥
 तुलसी भइ मति विथकित करि अनुमान ।
 राम लषन के रूप न देखेउ आन ॥ २३ ॥
 तुलसी जनि पग धरहु गंग महुँ साँच ।
 निगानाँग करि नितहि नचाइहि नाच ॥ २४ ॥
 सजल कठौता कर गहि कहत निषाद ।
 चढ़हु नाव पग धोइ करहु जनि बाद ॥ २५ ॥
 कमल कंटकित सजनी, कोमल पाइ ।
 निसि मलीन, यह प्रफुलित नित दरसाइ ॥ २६ ॥

(वालमीकि-वचन)

द्वै भुज कर हरि रघुवर सुंदर वेष ।
 एक जीभ कर लछिमन दूसर शेष ॥ २७ ॥

अरण्य कांड

वेद-नाम कहि, अँगुरिन खंडि अकास ।
 पठयो सूपनखाहि लषन के पास ॥ २८ ॥
 हेमलता सिय मूरति मृदु मुसुकाइ ।
 हेम हरिन कहँ दीन्हेउ प्रभुहि देखाइ ॥ २९ ॥
 जटा मुकुट कर सर धनु, संग मरीच ।
 चितवनि वसति कनखियनु अँखियनु बीच ॥ ३० ॥

(राम-वाक्य)

कनकसलाक, कला ससि, दीपसिखाउ ।
 तारा सिय कहँ लछिमन मोहि बताउ ॥ ३१ ॥

सीय बरन सम केतकि अति हिय हारि ।
 किहेसि भँवर कर हरवा हृदय विदारि ॥ ३२ ॥
 सीतलता ससि की रहि सब जग छाइ ।
 अगिनि-ताप हूँ तम कह सँचरत आइ ॥ ३३ ॥

किष्किंधा कांड

स्याम गौर दोउ मूरति लखिमन राम ॥
 इनतेँ भइ सित कीरति अति अभिराम ॥ ३४ ॥
 कुजन-पाल गुन-वर्जित, अकुल, अनाथ ।
 कहहु कृपानिधि राउर कस गुनगाथ ॥ ३५ ॥

सुंदर कांड

विरह आगि उर ऊपर जब अधिकाइ ।
 ए अँखियाँ दोउ बैरिनि देहिँ बुझाइ ॥ ३६ ॥
 डहकु न है उजियरिया निसि नहिँ धाम ।
 जगत जरत अस लागु मोहिँ विनु राम ॥ ३७ ॥
 अब जीवन कै है कपि आस न कोइ ।
 कनगुरिया कै मुदरी कंकन होइ ॥ ३८ ॥
 राम-सुजस कर चहुँ जुग होत प्रचार ।
 असुरन कहँ लखि लागत जग अँधियार ॥ ३९ ॥

(कपि-वाक्य)

सिय-वियोग-दुख केहि विधि कहँ बखानि ।
 फूलबान ते मनसिज बेधत आनि ॥ ४० ॥

सरद चाँदनी सँचरत चहुँ दिसि आनि ।
विधुहि जोरि कर विनवति कुलगुरु जानि ॥ ४१ ॥

लंका कांड


विविध वाहिनी बिलसति सहित अनंत ।
जलधि सरिस को कहै राम भगवंत ॥ ४२ ॥

उत्तर कांड


चित्रकूट पयतीर सो सुर-तरु-वास ।
लषन राम सिय सुमिरहु तुलसीदास ॥ ४३ ॥
पय नहाइ फल खाहु, परिहरिय आस ।
सीयराम-पद सुमिरहु तुलसीदास ॥ ४४ ॥
स्वारथ परमारथ हित एक उपाय ।
सीयराम-पद तुलसी प्रेम बढ़ाय ॥ ४५ ॥
काल कराल विलोकहु होइ सचेत ।
रामनाम जपु तुलसी प्रीति समेत ॥ ४६ ॥
संकट सोचविमोचन, मंगलगेह ।
तुलसी रामनाम पर करिय सनेह ॥ ४७ ॥
कलि नहिं ज्ञान, विराग, न जोग-समाधि ।
रामनाम जपु तुलसी नित निरुपाधि ॥ ४८ ॥
रामनाम दुइ आखर हिय हितु जानु ।
राम लषन सम तुलसी सिखब न आनु ॥ ४९ ॥
माय बाप गुरु स्वामि राम कर नाम ।
तुलसी जेहि न सोहाइ ताहि बिधि बाम ॥ ५० ॥

रामनाम जपु तुलसी होइ विसोक ।
 लोक सकल कल्याण, नीक परलोक ॥ ५१ ॥
 तप, तीरथ, मख, दान, नेम, उपवास ।
 सब ते अधिक राम जपु तुलसीदास ॥ ५२ ॥
 महिमा रामनाम कै जान महेस ।
 देत परम पद कासी करि उपदेस ॥ ५३ ॥
 जान आदि-कवि तुलसी नामप्रभाड ।
 उलटा जपत कोल ते भए ऋषिराड ॥ ५४ ॥
 कलसजोनि जिय जानेउ नामप्रतापु ।
 कौतुक सागर सोखेउ करि जिय जापु ॥ ५५ ॥
 तुलसी सुमिरत राम सुलभ फल चारि ।
 बेद पुरान पुकारत, कहत पुरारि ॥ ५६ ॥
 रामनाम पर तुलसी नेह निबाहु ।
 एहि ते अधिक, न एहि सम जीवनलाहु ॥ ५७ ॥
 दोष-दुरित-दुख-दारिद-दाहक नाम ।
 सकल सुमंगलदायक तुलसी राम ॥ ५८ ॥
 केहि गिनती महुँ ? गिनती जस बनघास ।
 राम जपत भए तुलसी तुलसीदास ॥ ५९ ॥
 आगम निगम पुरान कहत करि लीक ।
 तुलसी नाम राम कर सुमिरन नीक ॥ ६० ॥
 सुमिरहु नाम राम कर, सेवहु साधु ।
 तुलसी उतरि जाहु भव उदधि अगाधु ॥ ६१ ॥
 कामधेनु हरिनाम, कामतरु राम ।
 तुलसी सुलभ चारि फल सुमिरत नाम ॥ ६२ ॥
 तुलसी कहत सुनत सब समुझत कोय ।
 बड़े भाग अनुराग राम सन होय ॥ ६३ ॥

एकहि एक सिखावत जपत आप ।
 तुलसी रामप्रेम कर बाधक पाप ॥ ६४ ॥
 मरत कहत सब सब कहैं 'सुमिरहु राम' ।
 तुलसी अब नहिं जपत समुझि परिनाम ॥ ६५ ॥
 तुलसी रामनाम जपु आलस छाँडु ।
 रामविमुख कलिकाल को भयो न भाँडु ॥ ६६ ॥
 तुलसी रामनाम सम मित्र न आन ।
 जो पहुँचाव रामपुर तनु अवसान ॥ ६७ ॥
 नाम भरोस, नाम बल, नाम सनेहु ।
 जनम जनम रघुनंदन तुलसिहि देहु ॥ ६८ ॥
 जनम जनम जहँ जहँ तनु तुलसिहि देहु ।
 तहँ तहँ राम निवाहिव नामसनेहु ॥ ६९ ॥



पार्वती-मंगल



पार्वती-मंगल



बिनइ गुरुहि, गुनिगनहि, गिरिहि, गननाथहि ।
हृदय आनि सियराम धरे धनु भाथहि ॥ १ ॥
गावउँ, गौरि-गिरीस-विवाह सुहावन ।
पापनसावन, पावन, मुनि-मन-भावन ॥ २ ॥
कवितरीति नहिं जानउँ, कवि न कहावउँ ।
शंकर-चरित-सुसरित मनहिं अन्हवावउँ ॥ ३ ॥
पर अपवाद-विवाद-विदूषित वानिहि ।
पावनि करउँ सो गाइ भवेस-भवानिहि ॥ ४ ॥
जय संवत फागुन, सुदि पाँचै, गुरु दिनु ।
अखिनि बिरचेउँ मंगल, सुनि सुख छिनु छिनु ॥ ५ ॥
गुननिधान हिमवान धरनिधर धुरधनि ।
मैना तासु घरनि घर त्रिभुवन तियमनि ॥ ६ ॥
कहहु सुकृत केहि भाँति सराहिय तिन्ह कर ।
लीन्ह जाइ जगजननि जनम जिन्ह के घर ॥ ७ ॥
मंगलखानि भवानि प्रगट जब तैं भइ ।
तब तेँ ऋधि सिधि संपति गिरिगृह नित नइ ॥ ८ ॥
नित नव सकल कल्याण मंगल मोदमय मुनि मानहीं ।
ब्रह्मादि सुर नर नाग अति अनुराग भाग बखानहीं ॥
पितु, मातु, प्रिय परिवार हरषहिं निरखि पालहिं लालहीं ।
सित पाख बाढ़ति चंद्रिका जनु चंद्रभूषण भालहीं ॥ ९ ॥
कुँवरि सयानि बिलोकि मातु पितु सोचहिं ।
गिरिजा-जोग जुरिहि वर अनुदिन लोचहिं ॥ १० ॥

एक समय हिमवान भवन नारद गए ।
 गिरिवर मैना मुदित मुनिहि पूजत भए ॥ ११ ॥
 उमहिं बोलि ऋषिपगन मातु मेलति भइ ।
 मुनिमन कीन्ह प्रनाम, बचन आसिप दइ ॥ १२ ॥
 कुँवरि लागि पितु काँध ठाढ़ि भइ सोहइ ।
 रूप न जाइ वखानि, जान जाइ जोहइ ॥ १३ ॥
 अति सनेह सतिभाय पाँय परि पुनि पुनि ।
 कह मैना मृदु बचन “मुनिय विनती, मुनि ! ॥ १४ ॥
 तुम तिभुवन तिहुँकाल विचारविसारद ।
 पारवती-अनुरूप कहिय वर, नारद” ॥ १५ ॥
 मुनि कह “चौदह भुवन फिरउँ जग जहँ जहँ ।
 गिरिवर सुनिय सरहना राउरि तहँ तहँ ॥ १६ ॥
 भूरि भाग तुम सरिस कतहुँ कोउ नाहिंन ।
 कछु न अगम, सब सुगम, भयो विधि दाहिन ॥ १७ ॥
 दाहिन भए विधि, सुगम सब, सुनि तजहु चित चिंता नई ।
 वर प्रथम बिरवा विरँचि विरचो मंगला मंगलमई ॥
 विधिलोक चरचा चलति राउरि चतुर चतुरानन कही ।
 हिमवानकन्या जोग वर बाउर विबुध वंदित सही ॥ १८ ॥
 मोरेंहु मन अस आव मिलिहि वर बाउर” ।
 लखि नारद-नारदी उमहिं सुख भा उर ॥ १९ ॥
 सुनि सहस्रे परि पाई, कहत भए दंपति—
 “गिरिजहि लागि हमार जिवन सुख संपति ॥ २० ॥
 नाथ ! कहिय सोइ जतन मिटइ जेहि दूषनु ।”
 “दोषदलनु” मुनि कहेउ “बाल विधुभूषनु ॥ २१ ॥
 अवसि होइ सिधि, साहस फलै सुसाधन ।
 कोटि कल्पतरु सरिस संभु-अवराधन ॥ २२ ॥

तुम्हरे आश्रम अबहिँ ईस तप साधहिँ ।

कहिय उमहिँ मनु लाइ जाइ अवराधहिँ” ॥ २३ ॥

कहिँ उपाउ दंपतिहिँ मुदित मुनिवर गए ।

अति सनेह पितु मातु उमहिँ सिखवत भए ॥ २४ ॥

सजि समाज गिरिराज दीन्ह सबु गिरिजहिँ ।

वदति जननि, “जगदीस जुवति जिनि सिरजहिँ” ॥ २५ ॥

जननि-जनक-उपदेस महेसहिँ सेवहिँ ।

अति आदर अनुराग भगति मन भेवहिँ ॥ २६ ॥

भेवहिँ भगति मन, बचन करम अनन्य गति हरचरन की ।

गौरव सनहुँ सँकोच सेवा जाइ केहिँ बिधि वरन की ॥

गुनरूप जावनसीव सुंदरि निरखि छोभ न हर हिए ।

ते धीर अछत विकारहेतु जे रहत मनसिज बस किए ॥ २७ ॥

देव देखि भल समउ मनोज बुलायउ ।

कहेउ करिय सुरकाजु, साजु सजि धायउ ॥ २८ ॥

वामदेव सन काम वाम होइ बरतेउ ।

जग-जय-मद निदरेसि हर, पायेसि फर तेउ ॥ २९ ॥

रति पतिहीन मलीन विलोकि विसूरति ।

नीलकंठ मृदु सील कृपामय मूरति ॥ ३० ॥

आसुतोष परितोष कीन्ह बर दीन्हैउ ।

सिव उदास तजि बास अनत गम कीन्हैउ ॥ ३१ ॥

उमा नेहवस विकल देह सुधि बुधि गइ ।

कलपवेलि बन बढ़त विषम हिम जनु हइ ॥ ३२ ॥

समाचार सब सखिन जाइ घर घर कहे ।

सुनत मातु पितु परिजन दारुन दुख दहे ॥ ३३ ॥

जाइ देखि अति प्रेम उमहिँ उर लावहिँ ।

बिलपहिँ वाम बिधातहिँ दोष लगावहिँ ॥ ३४ ॥

जो न होहि मंगलमग सुर विधि बाधक ।

तौ अभिमत फल पावहिं करि स्रमु साधक ॥ ३५ ॥

साधक कलेस सुनाइ सब गौरिहि निहोरत धाम कों ।

को सुनइ काहि सोहाइ घर, चित चहत चंद्रललाम कों ॥

समुझाइ सबहिं दृढ़ाइ मन, पितु मातु आयसु पाइ कै ।

लागी करन पुनि अगमु तपु, तुलसी कहै किमि गाइ कै ॥ ३६ ॥

फिरेउ मातु पितु परिजन लखि गिरिजापन ।

जैहि अनुरागु लागु, चितु, सोइ हितु आपन ॥ ३७ ॥

तजेउ भोग जिमि रोग, लोग अहिगन जनु ।

मुनि-मनसहु ते अगम तपहि लायउ मनु ॥ ३८ ॥

सकुचहिं बसन बिभूषन परसत जो बपु ।

तेहि सरीर हर-हेतु अरंभेउ बड़ तपु ॥ ३९ ॥

पूजहि सिवहि, समय तिहुँ करहि निमज्जन ।

देखि प्रेम ब्रतु नेमु सराहहिं सज्जन ॥ ४० ॥

नौंद न भूख पियास, सरिस निसि बासरु ।

नयन नीर, मुख नाम, पुलक तनु, हिय हरु ॥ ४१ ॥

कंद मूल फल असन, कबहुँ जल पवनहिं ।

सूखे बेल के पात खात दिन गवनहिं ॥ ४२ ॥

नाम अपरना भयो परन जब परिहरे ।

नवल धवल कल कीरति सकल भुवन मरे ॥ ४३ ॥

देखि सराहहिं गिरजहि मुनिवरु मुनि बहु ।

अस तप सुना न दीख कबहुँ काहू कहूँ ॥ ४४ ॥

काहू न देख्यो कहहिं यह तपु जोगु फल फल चारि का ॥

नहिं जानि जाइ, न कहति, चाहति काहि कुधर-कुमारिका ।

बटुबेष पेषन पेम पन ब्रत नेम ससिसेखर गए ।

मनसहि समरपेउ आपु गिरिजहि, बचन मृदु बोलत भए ॥ ४५ ॥

देखि दसा करुनाकर हर दुख पायउ ।
 मोर कठोर सुभाय, हृदय खसि आयउ ॥ ४६ ॥
 बंस प्रसंसि, मातु पितु कहि सब लायक ।
 अमिअ वचन बटु बोलेउ सुनि सुखदायक ॥ ४७ ॥
 “देवि ! करौं कछु विनय सो विलगु न मानव ।
 कहैं सनेह सुभाय साँच जिय जानव ॥ ४८ ॥
 जनमि जगत जस प्रगटिहु मातु-पिता कर ।
 तीयरतन तुम उपजिहु भव-रतनागर ॥ ४९ ॥
 अगम न कछु जग तुम कहैं, मोहिं अस सूझइ ।
 विनु कामना कलेस कलेस न वृझइ ॥ ५० ॥
 जौ बर लागि करहु तपु तौ लरिकाइय ।
 पारस जौ घर मिलै तौ मेरु कि जाइय ? ॥ ५१ ॥
 मोरे जान कलेस करिय विनु काजहि ।
 सुधा कि रोगिहि चाहहि, रतन कि राजहि ?” ॥ ५२ ॥
 लखि न परेउ तपकारन बटु हिय हारेउ ।
 सुनि प्रिय वचन सखीमुख गौरि निहारेउ ॥ ५३ ॥
 गौरी निहारेउ सखीमुख, रुख पाइ तेहि कारन कहा ।
 “तप करहि हरहितु” सुनि विहँसि बटु कहत “मुखवाई महा ॥
 जेहि दीन्ह अस उपदेस बरेहु कलेस करि बर बावरो ।
 हित लागि कहैं सुभाय सो बड़ विषम वैरी रावरो ॥ ५४ ॥
 कहहु काह सुनि रीझिहु वरु अकुलीनहिं ।
 अगुन अमान अजाति मातु-पितु-हीनहिं ॥ ५५ ॥
 भीख माँगि भव खाहिं, चिता नित सोवहिं ।
 नाचहिं नगन पिसाच, पिसाचिनि जोवहिं ॥ ५६ ॥
 भाँग धतूर अहार, छार लपटावहिं ।
 जोगी, जटिल, सरोष, भोग नहिं भावहिं ॥ ५७ ॥

सुमुखि सुलोचनि ! हर मुखपंच, तिलोचन ।

बामदेव फुर नाम, काम-मद-मोचन ॥ ५८ ॥

एकउ हरहि न बर गुन, कोटिक दूषन ।

नरकपाल, गजखाल, व्याल, विष भूषन ॥ ५९ ॥

कहँ राउर गुन सील सरूप सुहावन ।

कहाँ अमंगल वेषु विशेषु भयावन ॥ ६० ॥

जो सोचहि ससिकलहि सो सोचहि रौरेहि ? ।

कहा मोर मन धरि न बरिय बर बैरेहि ॥ ६१ ॥

हिये हेरि हठ तजहु, हठै दुख पैहहु ।

व्याह-समय सिख मोरि समुझि पछितैहहु ॥ ६२ ॥

पछिताव भूत पिसाच प्रेत जनेत ऐहँ साजि कै ।

जमधार सरिस निहारि सब नर नारि चलिहहिं भाजि कै ॥

गजअजिन दिव्य दुकूल जोरत सखी हँसि मुख मोरि कै ।

कोउ प्रगट कोउ हिय कहिहि 'मिलवत अमिअ माहुर घोरि कै' ॥ ६३ ॥

तुमहि सहित असवार बसह जब होइहहिं ।

निरखि नगर नर नारि विहँसि मुख गोइहहिं ॥ ६४ ॥

बटु करि कोटि कुतर्क जथारुचि बोलइ ।

अचल-सुता-मन-अचल बयारि कि डोलइ ? ॥ ६५ ॥

साँच सनेह साँचि रुचि जो हठि फेरइ ।

सावनसरित मिधुरुख सूप सों घेरइ ॥ ६६ ॥

मनि बिनु फनि, जलहीन मीन तनु त्यागइ ॥

सो कि दोष गुन गनइ जो जेहि अनुरागइ ॥ ६७ ॥

करनकटुक बटु वचन विसिष सम हिय हए ।

अरुन नयन चढ़ि भ्रुकुटि, अधर फरकत भए ॥ ६८ ॥

बोली फिरि लखि सखिहि काँपु तनु थरथर ।

“आलि ! बिदा करु बटुहि बेगि, बड़ बरबर ॥ ६९ ॥

कहूँ तिय होहि सयानि सुनहिं सिख राउरि ? ।
 बैरेहि के अनुराग भइउँ बड़ि वाउरि ॥ ७० ॥
 दोसनिधान, इसानु सत्य सबु भापेउ ।
 मेटि को सकइ सो आँकु जो विधि लिखि राखेउ ॥ ७१ ॥
 को करि वादु विवादु विपादु बढ़ावइ ? ।
 मीठ काह कवि कहहिं जाहि जोइ भावइ ॥ ७२ ॥
 भइ बड़ि बार आलि कहूँ काज सिधारहि ।
 वकि जनि उठहि बहोरि, कुजुगुति सँवारहि ॥ ७३ ॥
 जनि कहहि कछु विपरीत जानत प्रीतिरीति न बात की ।
 सिव-साधु-निंदकु मंद अति जो सुनै सोउ बड़ पातकी ॥
 सुनि वचन सोधि सनेहु तुलसी साँच अविचल पावनो ।
 अए प्रगट करुनासिंधु संकर, भाल चंद्र सुहावनो ॥ ७४ ॥
 सुंदर गौर सरीर भूति भलि सोहइ ।
 लोचन भाल बिसाल बदन मनु मोहइ ॥ ७५ ॥
 सैलकुमारि निहारि मनोहर मूरति ।
 सजल नयन हिय हरषु पुलक तनु पूरति ॥ ७६ ॥
 पुनि पुनि करै प्रनाम, न आवत कछु कहि ।
 “देखौ सपन कि सौँतुख ससिसेखर, सहि !” ॥ ७७ ॥
 जैसे जनमदरिद्र महामनि पावइ ।
 पेखत प्रगट प्रभाउ प्रतीति न आवइ ॥ ७८ ॥
 सफल मनोरथ भयउ, गौरि सोहइ सुठि ॥
 घर ते खेलन मनहुँ अवहिं आई उठि ॥ ७९ ॥
 देखि रूप अनुराग महेस भए बस ।
 कहत वचन जनु सानि सनेह-सुधा-रस ॥ ८० ॥
 “हमहिं आजु लागि कनउड़ काहु न कीन्हेउ ।
 पार्वती तप प्रेम मोल मोहिं लीन्हेउ ॥ ८१ ॥

अब जो कहहु सो करउँ बिलंब न यहि धरि ।”

मुनि महेस मृदु बचन पुलकि पाँयन परि ॥ ८२ ॥

परि पाँय सखिमुख कहि जनायो आप बाप-अधीनता ।

परितोषि गिरिजहि चले बरनत प्रीति नीति प्रवीनता ॥

हर हृदय धरि घर गौरि गवनी, कीन्ह विधि मनभावनो ।

आनंद प्रेम समाज मंगलगान बाजु बधावनो ॥ ८३ ॥

सिव सुमिरे मुनि सात आइ सिरनाइन्हि ।

कीन्ह संभु सनमानु जनमफल पाइन्हि ॥ ८४ ॥

“सुमिरहिँ सुकृत तुम्हहिँ जन तेइ सुकृतीबर ।

नाथ जिन्हहिँ सुधि करिअ तिन्हहिँ सस तेइ, हर !” ॥ ८५ ॥

मुनि मुनिबिनय महेस परम सुख पायउ ।

कथाप्रसंग मुनीसन्ह सकल सुनायउ ॥ ८६ ॥

“जाहुहिमाचल-गेह प्रसंग चलायहु ।

जो मन मान तुम्हार तौ लगन लिखायहु ॥ ८७ ॥

अरुंधती मिलि मैनिहि बात चलाईहि ।

नारि कुसल इहि काजु, काजु बनि आइहि” ॥ ८८ ॥

“दुलहिनि उमा, ईस वर, साधक ए मुनि ।

बनिहि अवसि यहु काज” गगन भइ अस धुनि ॥ ८९ ॥

भयउ अकनि आनंद महेस मुनीसन्ह ।

देहिँ सुलोचनि सगुन कलस लिए सीसन्ह ॥ ९० ॥

सिव सों कहे दिन ठाउँ वहोरि मिलनु जहँ ।

चले मुदित मुनिराज गए गिरिबर पहुँ ॥ ९१ ॥

गिरिगेह गे अति नेह आदर पूजि पहुनाई करी ।

घरबात घरनि समेत कन्या आनि सब आगे धरी ॥

सुख पाइ बात चलाई सुदिनु सोधाइ गिरिहि सिखाइ कै ।

ऋषि साथ प्रातहि चले प्रमुदित ललित लगन लिखाइ कै ॥ ९२ ॥

विप्रवृन्द सन्मानि पृजि कुलगुरु सुर ।

परेउ निसानहिं घाउ, चाउ चहुँ दिसि पुर ॥ ८३ ॥

गिरि, बन, सरित, सिंधु, सर सुनइ जो पायउ ।

सब कहँ गिरिवर-नायक नेवति पठायउ ॥ ८४ ॥

धरि धरि सुंदर वेष चले हरषित हिए ।

कँचन चीर उपहार हार मनिगन लिए ॥ ८५ ॥

कहेउ हरषि हिमवान वितान बनावन ।

हरषित लगीं सुवासिनि मंगल गावन ॥ ८६ ॥

तोरन कलस चँवर धुज विविध बनाइन्हि ।

हाट पटोरन्हि छाये, सफल तरु लाइन्हि ॥ ८७ ॥

गौरी नैहर केहि विधि कहहुँ बखानिय ।

जनु ऋतुराज मनोज-राज रजधानिय ॥ ८८ ॥

जनु राजधानी मदन की विरची चतुर विधि और ही ।

रचना बिचित्र विलोकि लोचन बिथक ठौरहि ठौर ही ॥

यहि भाँति व्याहु समाजु सजि गिरिराजु मगु जोवन लगे ।

तुलसी लगन लै दीन्ह मुनिन्ह महेस आनँद-रँग-मगे ॥ ८९ ॥

वेगि बुलाइ विरंचि वैचाइ लगन तव ।

कहेन्हि 'वियाहन चलहु बुलाइ अमर सब' ॥ १०० ॥

विधि पठे जहँ तहँ सब सिवगन धावन ।

मुनि हरषहिं सुर कहहिं निसान बजावन ॥ १०१ ॥

रचहिं बिमान बनाइ सगुन पावहिं भले ।

निज निज साजु समाजु साजि सुरगन चले ॥ १०२ ॥

मुदित संकल सिवदूत भूतगन गाजहिं ।

सूकर, महिष, खान, खर वाहन साजहिं ॥ १०३ ॥

नाचहिं नाना रंग, तरंग बढ़ावहिं ।

अज, उलूक, वृक नाद गीत गन गावहिं ॥ १०४ ॥

रमानाथ, सुरनाथ, साथ सब सुरगन ।

आए जहँ बिधि संभु देखि हरषे मन ॥ १०५ ॥

मिले हरिहि हर हरषि सुभाखि सुरेसहिं ।

सुर निहारि सनमानेउ, मोदु महेसहिं ॥ १०६ ॥

बहु बिधि बाहन जान बिमान विराजहिं ।

चली बरात निसानु गहागह बाजहिं ॥ १०७ ॥

बाजहिं निसान, सुगान नभ, चढ़ि बसह विधुभूषन चले ।

बरषहिं सुमन जय जय करहिं सुर, सगुन सुभ मंगल भले ॥

तुलसी बराती भूत प्रेत पिसाच पसुपति सँग लसे ।

गजछाल, व्याल, कपालमाल विलोकि बर सुर हरि हँसे ॥ १०८ ॥

बिबुध बेलि हरि कहेउ निकट पुर आयउ ।

आपन आपन साज सबहिं बिलगायउ ॥ १०९ ॥

प्रमथनाथ के साथ प्रमथगन राजहिं ।

विविध भाँति मुख, बाहन, वेष विराजहिं ॥ ११० ॥

कमठ खपर मढि खाल निसान बजावहिं ।

नरकपाल जल भरि भरि पियहिं पियावहिं ॥ १११ ॥

बर अनुहरति बरात बनी हरि हँसि कहा ।

सुनि हिय हँसत महेस, केलि कौतुक महा ॥ ११२ ॥

बड़ बिनोद मग मोद न कछु कहि आवत ।

जाइ नगर नियरानि बरात बजावत ॥ ११३ ॥

पुर खरभर, उर हरषेउ अचलु-अखंडलु ।

परब उदधि उमगेउ जनु लखि विधुमंडल ॥ ११४ ॥

प्रमुदित गे अगवान विलोकि बरातहि ।

भभरे, बनइ न रहत, न बनइ परातहि ॥ ११५ ॥

चले भाजि गज बाजि फिरहिं नहिं फेरत ।

बालक भभरि भुलान फिरहिं घर हेरत ॥ ११६ ॥

दीन्ह जाइ जनवास सुपास किए सब ।

घर घर बालक बात कहन लागे तब ॥ ११७ ॥

“प्रेत बैताल बराती, भूत भयानक ।

बरद चढ़ा बर बाउर, सबइ सुवानक ॥ ११८ ॥

कुसल करइ करतार कहहिं हम साँचिय ।

देखव कोटि वियाह जियत जो वाँचिय” ॥ ११९ ॥

समाचार सुनि सोचु भयउ मन मैनिहिं ।

नारद के उपदेस कवन घर गो नहिं ? ॥ १२० ॥

घरघाल चालक कलहप्रिय कहियत परम परमारथी ।

तैसी बरेखी कीन्ह पुनि मुनिसात स्वारथ सारथी ॥

उर लाइ उमहिं अनेक विधि, जलपति जननि दुख मानई ।

हिमवान कहेउ “इसान महिमा अगम, निगम न जानई” ॥ १२१ ॥

सुनि मैना भइ सुमन, सखी देखन चली ।

जहँ तहँ चरचा चलइ हाट चौहट गली ॥ १२२ ॥

श्रीपति, सुरपति, विबुध बात सब सुनि सुनि ।

हँसहिं कमलकर जोरि, मेरि मुख पुनि पुनि ॥ १२३ ॥

लखि लौकिक गति संभु जानि बड़ सोहर ।

भए सुंदर सतकौटि मनोज मनोहर ॥ १२४ ॥

नील निचोल छाल भइ, फनि मनिभूषन ।

रोम रोम पर उदित रूपमय पृषन ॥ १२५ ॥

गन भए मंगलवेष मदन-मनमोहन ।

सुनत चले हिय हरषि नारि नर जोहन ॥ १२६ ॥

संभु सरद राकेस, नखतगन सुरगन ।

जंनु चकोर चहुँ ओर विराजहिं पुरजन ॥ १२७ ॥

गिरिबर पठए बोलि लगन बेरा भई ।

मंगल अरघ पाँवड़े देत चले लई ॥ १२८ ॥

होहिं सुमंगल सगुन, सुमन वरषहिं सुर ।

गहगहे गान निसान मोद मंगल पुर ॥ १२६ ॥

पहिलिहि पँवरि सुसामध भा सुखदायक ।

इत विधि उत हिमवान सरिस सब लायक ॥ १३० ॥

मनि चामीकर चारु थार सजि आरति ।

रति सिहाहिं लखि रूप, गान सुनि भारति ॥ १३१ ॥

भरी भाग अनुराग पुलकतनु मुदमन ॥

मदनमत्त गजगवनि चलीं वर परिछन ॥ १३२ ॥

बर बिलोकि विधुगौर सु अंग उजागर ।

करति आरती सासु मगन सुखसागर ॥ १३३ ॥

सुखसिंधुमगन उतारि आरति करि निछावरि निरखि कै ।

मगु अरघ बसन प्रसून भरि लेइ चली मंडप हरषि कै ॥

हिमवान दीनहेउ उचित आसन सकल सुर सनमानि कै ।

तेहि समय साज समाज सब राखे सुमंडपु आनि कै ॥ १३४ ॥

अरघ देइ मनिआसन बर बैठायउ ।

पूजि कीन्ह मधुपर्क, अमी अँचवायउ ॥ १३५ ॥

सपत ऋषिन्ह विधि कहेउ, विलंब न लाइय ।

लगन बेर भइ बेगि विधान बनाइय ॥ १३६ ॥

थापि अनल हरवरहि बसन पहिरायउ ।

आनहु दुलहिनि बेगि समउ अब आयउ ॥ १३७ ॥

सखी सुवासिनि संग गौरि सुठि सोहति ।

प्रगट रूपमय मूरति जनु जग मोहति ॥ १३८ ॥

भूषन बसन समय सम सोभा सो भली ।

सुखमा बेलि नवल जनु रूपफलनि फली ॥ १३९ ॥


कहहु काहि पटवरिय गौरि गुनरूपहि ।

सिंधु कहिय केहि भाँति सरिस सर कूपहि ॥ १४० ॥

आवत उमहिं विलोकि सीस सुर नावहिं ।
 भये कृतारथ जनम जानि सुख पावहिं ॥ १४१ ॥
 विप्र वेद धुनि करहिं सुभासिष कहि कहि ।
 गान निसान सुभन भरि अवसर लहि लहि ॥ १४२ ॥
 बर दुलहिनिहि विलोकि सकल मन रहसहिं ।
 साखोच्चार समय सब सुर मुनि विहँसहिं ॥ १४३ ॥
 लोक-वन्द-विधि कीन्ह लीन्ह जल कुस कर ।
 कन्यादान संकल्प कीन्ह धरनिधर ॥ १४४ ॥
 पूजे कुलगुरु देव, कलसु सिल सुभ धरी ।
 लावा होम विधान बहुरि भाँवरि परी ॥ १४५ ॥
 वंदन वंदि, ग्रंथिविधि करि, धुव देखेउ ।
 भा विवाह सब कहहिं जनमफल पेखेउ ॥ १४६ ॥
 पेखेउ जनमफल भा बियाह, उछाह उमगहिं दस दिसा ।
 नीसान गान प्रसून भरि तुलसी सुहावनि सो निसा ॥
 दाइज वसन मनि धेनु धनु हय गय सुसेवक सेवकी ।
 दीन्हिं मुदित गिरिराज जे गिरिजहि पियारी पेव की ॥ १४७ ॥
 बहुरि बराती मुदित चले जनवासहि ।
 दूलह दुलहिनि गे तब हास-अवासहि ॥ १४८ ॥
 रोकि द्वार मैना तब कौतुक कीन्हेउ ।
 करि लहकौरि गौरि हर बड़ सुख दीन्हेउ ॥ १४९ ॥
 जुआ खेलावत गारि देहिं गिरिनारिहि ।
 अपनी ओर निहारि प्रमोद पुरारिहि ॥ १५० ॥
 सखी सुवासिनि, सासु पाउ सुख सब विधि ।
 जनवासहि बर चलेउ सकल मंगलनिधि ॥ १५१ ॥
 भइ जेवनार बहोरि बुलाइ सकल सुर ।
 बैठाए गिरिराज धरम-धरनी धुर ॥ १५२ ॥

परसन लगे सुवार, बिबुध जन सेवहिं ।
 देहिं गारि वर नारि मोद मन भेवहिं ॥ १५३ ॥
 करहिं सुमंगल गान सुघर सहनाइन्ह ।
 जेई चले हरि दुहिन सहित सुर भाइन्ह ॥ १५४ ॥
 भूधर भोर बिदा करि साज सजायउ ।
 चले देव सजि जान निसान बजायउ ॥ १५५ ॥
 सनमाने सुर सकल दीन्ह पहिरावनि ।
 कीन्ह बड़ाई विनय सनेह-सुहावनि ॥ १५६ ॥
 गहि सिवपद कह सासु विनय मृदु मानबि ।
 गौरि-सजीवनि मूरि मोरि जिय जानबि ॥ १५७ ॥
 भेंटि बिदा करि बहुरि भेंटि पहुँचावहि ।
 हुँकरि हुँकरि सु लवाइ धेनु जनु धावहि ॥ १५८ ॥
 उमा मातुमुख निरखि नयन जल मोचहिं ।
 'नारि जनमु जग जाय' सखी कहि सोचहिं ॥ १५९ ॥
 भेंटि उमहिं गिरिराज सहित सुत परिजन ।
 बहु समुझाइ बुझाइ फिरे बिलखित मन ॥ १६० ॥
 संकर गौरि समेत गए कैलासहि ।
 नाइ नाइ सिर देव चले निज बासहि ॥ १६१ ॥
 उमा महेस बियाह-उछाह भुवन भरे ।
 सबके सकल मनोरथ विधि पूरन करे ॥ १६२ ॥
 प्रेमपाट पटडोरि गौरि-हर-गुन मनि ।
 मंगल हार रचेउ कवि मति मृगलोचनि ॥ १६३ ॥
 मृगनयनि विधुबदनी रचेउ मनि मंजु मंगल हार सो ।
 उर धरहु जुवती जन विलोकि तिलोक सोभा-सार सो ॥
 कल्याण काज उछाह व्याह सनेह सहित जो गाइहैं ।
 तुलसी उमा-संकर-प्रसाद प्रमोद मन प्रिय पाइहैं ॥ १६४ ॥

जानकी-मंगल



जानकी-मंगल

मंगल छंद

गुरु गनपति गिरिजापति गौरि गिरापति ।

सारद सेष सुकवि स्मृति संत सरल मति ॥ १ ॥

हाथ जोरि करि विनय सबहि सिर नावौ ।

सीय-रघुवीर-विवाहु यथामति गावौ ॥ २ ॥

सुभ दिन रच्यौ स्वयंवर मंगलदायक ।

सुनत सवन हिय बसहिं सीय-रघुनायक ॥ ३ ॥

देस सुहावन पावन वेद बखानिय ।

भूमितिलक सम तिरहुत त्रिभुवन जानिय ॥ ४ ॥

तहँ बस नगर जनकपुर परम उजागर ।

सीय लच्छि जहँ प्रगटी सब सुखसागर ॥ ५ ॥

जनक नाम तेहि नगर बसै नरनायक ।

सब गुनअवधि, न दूसर पटतर लायक ॥ ६ ॥

भयउ न होइहि, है न, जनक सम नरवइ ।

सीय सुता भै जासु सकल मंगलमइ ॥ ७ ॥

नृप लखि कुँवरि सयानि बोलि गुरु परिजन ।

करि मत रचेउ स्वयंवर सिवधनु धरि पन ॥ ८ ॥

पन धरेउ सिवधनु रचि स्वयंवर अति रुचिर रचना बनी ।

जनु प्रगटि चतुरानन देखाई चतुरता सब आपनी ।

पुनि देस देस सँदेस पठयउ भूप सुनि सुख पावहीं ॥

सब साजि साजि समाज राजा जनक-नगरहिं आवहीं ॥ ९ ॥

रूप सील बय वंस बिरुद बल दल भले ।
 मनहुँ पुरंदरनिकर उतरि अवनी चले ॥ १० ॥
 दानव देव निसाचर किन्नर अहिगन ।
 सुनि धरि धरि नृपवेष चले प्रमुदित मन ॥ ११ ॥
 एक चलहि, एक बीच, एक पुर पैठहि ।
 एक धरहि धनु धाय नाइ सिर बैठहि ॥ १२ ॥
 रंगभूमि पुर कौतुक एक निहारहि ।
 ललकि लोभाहि नयन मन, फेरि न पारहि ॥ १३ ॥
 जनकहि एक सिहाहि देखि सनमानत ।
 बाहर भीतर भीर न बनै बखानत ॥ १४ ॥
 गान निसान कोलाहल कौतुक जहँ तहँ ।
 सीय-वियाह-उछाह जाइ कहि का पहुँ ? ॥ १५ ॥
 गाधिसुवन तेहि अवसर अवध सिधायउ ।
 नृपति कीन्ह सनमान भवन लै आयउ ॥ १६ ॥
 पूजि पहुनई कीन्हि पाइ प्रिय पाहुन ।
 कहेउ भूप “मोहिं सरिस सुकृत किए काहु न” ॥ १७ ॥
 ‘काहु न कीन्हेंउ सुकृत’ सुनि मुनि मुदित नृपहि बखानहीं ।
 महिपाल मुनि को मिलनसुख महिपाल मुनि मन जानहीं ॥
 अनुराग भाग सोहाग सील सरूप बहु भूषन भरीं ।
 हिय हरषि सुतन्ह समेत रानी आइ ऋषिपायन्ह परीं ॥ १८ ॥
 कौसिक दीन्हि असीस सकल प्रमुदित भई ।
 सींची मनहुँ सुधारस कलपलता नई ॥ १९ ॥
 रामहि भाइन्ह सहित जबहिं मुनि जोहेउ ।
 नैन नीर, तनु पुलक, रूप मन मोहेउ ॥ २० ॥
 परसि कमलकर सीस हरषि हिय लावहिं ।
 प्रेमपयोधि-मगन मुनि, पार न पावहिं ॥ २१ ॥

मधुर मनोहर मूरति सादर चाहहिं ।
 बार बार दसरथ के सुकृत सराहहिं ॥ २२ ॥
 राउ कहेउ कर जोरि सुवचन सुहावन ॥
 “भयउँ कृतारथ आजु देखि पद पावन ॥ २३ ॥
 तुम्ह प्रभु पूरनकाम, चारि-फल-दायक ॥
 तेहि ते बूझत काजु डरौं मुनिनायक” ॥ २४ ॥
 कौसिक सुनि नृपवचन सराहेउ राजहि ॥
 धर्मकथा कहि कहेउ गयउ जेहि काजहि ॥ २५ ॥
 जयहिं मुनीस महीसहि काज सुनायउ ॥
 भयउ सनेह-सत्य-वस उतर न आयउ ॥ २६ ॥
 आयउ न उतर वसिष्ठ लखि बहु भाँति नृप समुभायउ ।
 कहि गाधिसुत तपतेज कछु रघुपतिप्रभाउ जनायउ ॥
 धीरजु धरेउ गुरुवचन सुनि कर जोरि कह कोसलधनी ।
 “करुनानिधान मुजान प्रभु सों उचित नहिं विनती घनी ॥ २७ ॥
 नाथ मोहिं बालकन्ह सहित पुर परिजन ।
 राखनहार तुम्हार अनुग्रह घर बन” ॥ २८ ॥
 दीन वचन बहु भाँति भूप मुनि सन कहे ।
 सौँपि राम अरु लखन पाँयपंकज गहे ॥ २९ ॥
 पाइ मातु-पितु-आथसु गुरु पाँयन परे ।
 कटि निपंग पट पीत, करनि सर धनु धरे ॥ ३० ॥
 पुरवासी नृप रानिन संग दिये मन ।
 वेगि फिरेउ करि काज कुसल रघुनंदन ॥ ३१ ॥
 ईस मनाइ असीसहिं जय जस पावहु ।
 न्हात खसै जनि बार, गहरु जनि लावहु ॥ ३२ ॥
 चलत सकल पुरलोग वियोग विकल भए ।
 सानुज भरत सप्रेम राम पाँयन नए ॥ ३३ ॥

होहिं सगुन सुभ मंगल जनु कहि दीन्हैउ ।
 राम लषन मुनि साथ गवन तब कीन्हैउ ॥ ३४ ॥
 स्यामल गौर किसोर मनोहरतानिधि ।
 सुखमा सकल सकेलि मनहुँ विरचे विधि ॥ ३५ ॥
 विरचे विरंचि बनाइ बाँचो रुचिरता रंचौ नहीं ।
 दसचारि भुवन निहारि देखि विचारि नहि उपमा कही ॥
 ऋषि संग सोहत जात मगु छवि बसति सो तुलसी हिए ।
 कियो गमन जनु दिननाथ उत्तर संग मधु माधव लिए ॥ ३६ ॥
 गिरि तरु बेलि सरित सर विपुल विलोकहिं ।
 धावहिं वाल सुभाय, विहंग मृग रोकहिं ॥ ३७ ॥
 सकुचहिं मुनिहिं समीत बहुरि फिरि आवहिं ।
 तोरि फूल फल किसलय माल बनावहिं ॥ ३८ ॥
 देखि विनोद प्रमोद प्रेम कौसिक उर ।
 करत जाहिं धन छाँह, सुमन बरषहिं सुर ॥ ३९ ॥
 बधी ताड़का ; राम जानि सब लायक ।
 विद्या-मंत्र-रहस्य दिए मुनिनायक ॥ ४० ॥
 मग-लोगन्ह के करत सफल मन लोचन ।
 गए कौसिक आस्रमहिं विप्र-भय-मोचन ॥ ४१ ॥
 मारि निसाचर-निकर यज्ञ करवायउ ।
 अभय किए मुनिवृंद जगत जसु गायउ ॥ ४२ ॥
 विप्र साधु सुरकाज महामुनि मन धरि ।
 रामहिं चले लिवाइ धनुषमख मिसु करि ॥ ४३ ॥
 गौतमनारि उधारि पठै पतिधामहिं ।
 जनकनगर लै गयउ महामुनि रामहिं ॥ ४४ ॥
 लै गयउ रामहिं गाधिसुवन बिलोकि पुर हरषे हिए ।
 सुनि राउ आगे लेन आयउ सचिव गुरु भूसुर लिए ॥

नृप गहे पाँय, असीस पाई मान आदर अति किए ।
 अवलोकि रामहिँ अनुभवत मनु ब्रह्मसुख सौगुन दिए ॥ ४५ ॥
 देखि मनोहर मूरति मन अनुरागेड ।
 बँधेड सनेह विदेह, विराग विरागेड ॥ ४६ ॥
 प्रमुदित हृदय सराहत भल भवसागर ।
 जहँ उपजहिँ अस मानिक, बिधि बड़ नागर ॥ ४७ ॥
 पुन्यपयोधि मातुपितु ए सिमु सुरतरु ।
 रूप-सुधा-सुख देत नयन अमरनि बरु ॥ ४८ ॥
 “कोहि सुकृती के कुँवर” कहिय मुनिनायक ।
 “गौर स्याम छविधाम धरे धनुसायक ॥ ४९ ॥
 विषयविमुख मन मोर सेइ परमारथ ।
 इन्हहिँ देखि भयो मगन जानि बड़ स्वारथ” ॥ ५० ॥
 कहेड सप्रेम पुलकि मुनि सुनि, “महिपालक !
 ए परमारथरूप ब्रह्ममय बालक ॥ ५१ ॥
 पूषन-वंस-विभूषन दसरथनंदन ।
 नाम राम अरु लषन सुरारिनिकंदन” ॥ ५२ ॥
 रूप सील वय वंस राम परिपूरन ।
 समुक्ति कठिन पन आपन लाग बिसूरन ॥ ५३ ॥
 लागे बिसूरन समुक्ति पन मन बहुरि धीरज आनि कै ।
 लै चले देखावन रंगभूमि अनेक बिधि सनमानि कै ॥
 कौसिक सराही रुचिर रचना, जनक सुनि हरषित भए ।
 तब राम लषन समेत मुनि कहँ सुभग सिंहासन दए ॥ ५४ ॥
 राजत राजसमाज जुगल रघुकुलमनि ।
 मनहुँ सरदबिधु उभय, नखत धरनीधनि ॥ ५५ ॥
 काकपच्छ सिर, सुभग सरोरुहलोचन ।
 गौर स्याम सत-कोटि-काम-मद-मोचन ॥ ५६ ॥

तिलक ललित सर, भुक्कुटी काम-कमानै ।

स्रवन विभूषन रुचिर देखि मन मानै ॥ ५७ ॥

नासा चिबुक कपोल अधर रद सुंदर ।

वदन सरद-विधु-निंदक सहज मनोहर ॥ ५८ ॥

उर विसाल वृषकंध सुभग भुज अति बल ।

पीत वसन उपवीत, कंठ मुकुताफल ॥ ५९ ॥

कटि निषंग, कर-कमलन्हि धरे धनुसायक ।

सकल अंग मनमोहन जोहन लायक ॥ ६० ॥

राम-लषन-छवि देखि मगन भए पुरजन ।

उर आनंद, जल लोचन, प्रेम पुलक तन ॥ ६१ ॥

नारि परस्पर कहहि देखि दुहुँ भाइन्ह ।

“लहेउ जनम फल आजु जनमि जग आइन्ह ॥ ६२ ॥

जग जनमि लोचनलाहु पाए” सकल सिवहि मनावहीं ।

“वर मिलौ सीतहि साँवरो हम हरषि मंगल गावहीं” ॥

एक कहहि “कुँवर किसोर कुलिस-कठोर सिवधनु है महा ।

किमि लेहि बाल मराल मंदर नृपहि अस काहु न कहा” ॥ ६३ ॥

मे निरास सब भूप विलोकत रामहिं ।

“पन परिहरि सिय देव जनक वर श्यामहिं” ॥ ६४ ॥

कहहि एक “भलि बात, व्याहु भल होइहि ।

वर दुलहिनि लगि जनक अपन पन खोइहि” ॥ ६५ ॥

सुचि सुजान नृप कहहि “हमहिं अस सूझइ ।

तेज प्रताप रूप जहँ तहँ बल बूझइ ॥ ६६ ॥

चितइ न सकहु रामतन, गाल बजावहु ।

विधि बस बलउ लजान, सुमति न लजावहु ॥ ६७ ॥

अवसि राम के उठत सरासन टूटिहि ।

गवनिहि राजसमाज नाक असि फूटिहि ॥ ६८ ॥

कस न पियहु भरि लोचन रूप-सुधा-रसु ।
 करहु कृतारथ जनम, होहु कत नरपसु” ॥ ६६ ॥
 दुहुँ दिसि राजकुमार विराजत मुनिवर ।
 नील पीत पाथोज वीच जनु दिनकर ॥ ७० ॥
 काकपच्छ ऋषि परसत पानि सरोजनि ।
 लाल कमल जनु लालत बालमनोजनि ॥ ७१ ॥
 “मनसिज मनोहर मधुर मूरति कस न सादर जोवहु ।
 विनु काज राजसमाज महँ तजि लाज आपु विगोवहु” ॥
 सिख देई भूपनि साधु भूप अनूप छवि देखन लगे ।
 रघुवंस कैरवचंद चितइ चकोर जिमि लोचन ठगे ॥ ७२ ॥
 पुर-नर-नारि निहारहिं रघुकुलदीपहि ।
 दोसु नेहवस देहिं विदेह महीपहि ॥ ७३ ॥
 एक कहहिं “भल भूप, देहु जनि दूषन ।
 नृप न सोह विनु वचन, नाक विनु भूषन ॥ ७४ ॥
 हमरे जान जनेस बहुत भल कीन्हैउ ।
 पनमिस लोचनलाहु सवन्हि कहँ दीन्हैउ ॥ ७५ ॥
 अस सुकृती नरनाहु जो मन अभिलाषिहि ।
 सो पुरइहि जगदीस पैज पन राखिहि ॥ ७६ ॥
 प्रथम सुनत जो राउ राम-गुन-रूपहि ।
 बोलि व्याहि सिय देत दोष नहिं भूपहिं ॥ ७७ ॥
 अब करि पैज पंच महँ जो पन त्यागै ।
 विधिगति जानि न जाइ, अजसु जग जागै ॥ ७८ ॥
 अजहुँ अवसि रघुनंदन चाप चढ़ाउव ।
 व्याह उछाह सुमंगल त्रिभुवन गाउव” ॥ ७९ ॥
 लागि भरखन्ह भाँकहिं भूपतिभामिनि ।
 कहत वचन रद लसहिं दमक जनु दामिनि ॥ ८० ॥

जनु दमक दामिनि, रूप रति मृदु निदरि सुंदरि सोहहीं ।
 मुनि ढिग देखाए सखिन्ह कुँवर बिलोकि छवि मन मोहहीं ॥
 सियमातु हरषी निरखि सुखमा अति अलौकिक राम की ।
 हिय कहति “कहँ धनु कुँवर कहँ विपरीत गति विधि बाभ की” ॥ ८१ ॥
 कहि प्रिय बचन सखिन्ह सन रानि विसूरति ॥
 “कहाँ कठिन सिवधनुष कहाँ मृदु मूरति ॥ ८२ ॥
 जो विधि लोचनअतिथि करत नहिँ रामहिँ ।
 तौ कोउ नृपहि न देत दोसु परिनामहिँ ॥ ८३ ॥
 अब असमंजस भयउ न कछु कहि आवै” ।
 रानिहि जानि ससोच सखी समुझावै ॥ ८४ ॥
 “देवि ! सोच परिहरिय, हरष हिय आनिय ।
 चाप चढ़ाउव राम बचन फुर मानिय ॥ ८५ ॥
 तीनि काल कर ज्ञान कौसिकहिँ करतल ।
 सो कि स्वयंवर आनहि बालक बिनु बल ?” ॥ ८६ ॥
 मुनिमहिमा सुनि रानिहि धीरजु आयउ ।
 तब सुबाहु-सूदन-जसु सखिन सुनायउ ॥ ८७ ॥
 सुनि जिय भयउ भरोस रानि हिय हरखइ ।
 बहुरि निरखि रघुबरहि प्रेम मन करखइ ॥ ८८ ॥
 नृप रानी पुरलोग रामतन चितवहिँ ।
 मंजु मनोरथ-कलस भरहिँ अरु रितवहिँ ॥ ८९ ॥
 रितवहिँ भरहिँ धनु निरखि छिनु छिनु निरखि रामहिँ सोचहीं ।
 नर नारि हरष-विषाद-वस हिय सकल सिवहिँ सकोचहीं ॥
 तब जनकआयसु पाइ कुलगुरु जानकिहिँ लै आयउ ।
 सिय रूपरासि निहारि लोचनलाहु लोगन्हि पायउ ॥ ९० ॥
 मंगल भूषन बसन मंजु तन सोहहिँ ।
 देखि मृदु महिपाल मोहबस मोहहिँ ॥ ९१ ॥

रूपरासि जेहि ओर सुभाय निहारइ ।
 नील-कमल-सर-श्रेणि मयन जनु डारइ ॥ ६२ ॥
 छिनु सीतहि छिनु रामहि पुरजन देखहि ।
 रूप सील बय वंस विसेप विसेपहि ॥ ६३ ॥
 राम दीख जब सीय, सीय रघुनायक ।
 दोउ तन तकि तकि मयन सुधारत सायक ॥ ६४ ॥
 प्रेम प्रमोद परस्पर प्रगटत गोपहि ।
 जनु हिरदय गुन-ग्राम-श्रुति थिर रोपहि ॥ ६५ ॥
 रामसीय बय, समौ, सुभाय सुहावन ।
 नृप जोवन छवि पुरइ चहत जनु आवन ॥ ६६ ॥
 सो छवि जाइ न बरनि देखि मन मानै ।
 सुधापान करि मूक कि स्वाद बखानै ? ॥ ६७ ॥
 तब बिदेहपन बंदिन्ह प्रगटि सुनायउ ।
 उठे भूप आमरषि सगुन नहि पायउ ॥ ६८ ॥
 नहि सगुन पायउ रहे मिसु करि एक धनु देखन गए ।
 टकटोरि कपि ज्यों नारियरु सिर नाइ सब बैठत भए ॥
 इक करहि दाप, न चाप सज्जनबचन जिमि टारे टरै ।
 नृप नहुष ज्यों सब के विलोक्त बुद्धिबल बरबस हरै ॥ ६९ ॥
 देखि सपुर परिवार जनकहिय हारेउ ।
 नृपसमाज जनु तुहिन वनजवन मारेउ ॥ १०० ॥
 कौसिक जनकहि कहेउ “देहु अनुसासन ।
 देखि भानु-कुल-भानु इसानु-सरासन” ॥ १०१ ॥
 “मुनिबर तुम्हरे बचन मेरु महि डोलहि ।
 तदपि उचित आचरत पाँच भल बोलहि ॥ १०२ ॥
 बानु बानु जिमि गयउ, गवहि दसकंधरु ।
 को अवनीतल इन्ह सम वीरधुरंधरु ॥ १०३ ॥

पारवती-मन सरिस अचल धनुचालक ।

हहिं पुरारि तेउ एक-नारि-व्रत-पालक ॥ १०४ ॥

सो धनु कहि अवलोकन भूप किसोरहि ।

भेद कि सरिस सुमन कनकुलिस कठोरहि ॥ १०५ ॥

रोम रोम छवि निंदति सोम मनोजनि ।

देखिय मूरति, मलिन करिय मुनि सो जनि” ॥ १०६ ॥

मुनि हँसि कहेउ “जनक यह मूरति सो हइ ।

सुमिरत सकृत् मोहमल सकल बिछोहइ ॥ १०७ ॥

सब मल-बिछोहनि जानि मूरति जनक कौतुक देखहू ।

धनुसिंधु नृप-बल-जल बढ़यो रघुवरहि कुंभज लेखहू ॥

मुनि सकुचि सोचहिँ जनक गुरु पद बंदि रघुनंदन चले ।

नहिं हरष हृदय विषाद कछु भए सगुन सुभमंगल भले ॥ १०८ ॥

बरिसन लगे सुमन सुर, दुंदुभि बाजहिं ।

मुदित जनक पुर-परिजन नृप गन लाजहिं ॥ १०९ ॥

महि महिधरनि लषन कह बलहि बढ़ावन ।

राम चहत सिवचापहि चपरि चढ़ावन ॥ ११० ॥

गए सुभाय राम जब चाप समीपहि ।

सोच सहित परिवार विदेह महीपहि ॥ १११ ॥

कहि न सकति कछु सकुचनि, सिय हिय सोचइ ।

गौरि गनेस गिरीसहि सुमिरि सकोचइ ॥ ११२ ॥

होति बिरह-सर-मगन देखि रघुनाथहिं ।

फरकि वाम भुज नयन देहिं जनु हाथहिं ॥ ११३ ॥

धीरज धरति, सगुन बल रहत सो नाहिंन ।

बर किसोर धनु घोर दइउ नहिं दाहिन ॥ ११४ ॥

अंतरजामी राम मरम सब जानेउ ।

धनु चढ़ाइ कौतुकहिं कान लागि तानेउ ॥ ११५ ॥

प्रेम परखि रघुवीर सरासन भंजेउ ।

जनु मृग-राज-किसोर महा गज गंजेउ ॥ ११६ ॥

गंजेउ सो गर्जेउ घोर धुनि सुनि भूमि भूधर लखरे ।

रघुवीर जस-मुकुता विपुल सब भुवन पट्ट पेटक भरे ॥

हित मुदित, अनहित रुदित मुख, छवि कहत कवि धनुजाग की ।

जनु भोर चक्र चकोर कैरव सघन कमल तड़ाग की ॥ ११७ ॥

नभ पुर मंगल गान निसान गहागहे ।

देखि मनोरथ सुरतरु ललित लहालहे ॥ ११८ ॥

तब उपरोहित कहेउ, सखी सब गावत ।

चलीं लेवाइ जानकिहि भा मनभावत ॥ ११९ ॥

कर-कमलनि जयमाल जानकी सोहइ ।

बरनि सकै छवि अनुलित अस कवि को हइ ? ॥ १२० ॥

सीय सनेह-सकुच-बस प्रियतन हेरइ ।

सुरतरु रुख सुरवेलि पवन जनु फेरइ ॥ १२१ ॥

लसत ललित करकमल माल पहिरावत ।

कामफंद जनु चंदहि वनज फँदावत ॥ १२२ ॥

राम-सीय-छवि निरुपम, निरुपम सो दिनु ।

सुखसमाज लखि रानिन्ह आनंद छिनु छिनु ॥ १२३ ॥

प्रभुहि माल पहिराइ जानकिहि लै चली ।

सखी मनहुँ बिधु-उदय मुदित कैरव-कली ॥ १२४ ॥

बरपहिं बिबुध प्रसून हरषि कहि जय जय ।

सुख सनेह भरे भुवन राम गुरु पहिँ गय ॥ १२५ ॥

गए राम गुरु पहिँ, राउ रानी नारि नर आनंद भरे ।

जनु तृषित करि-करिनी-निकर सीतल सुधासागर परे ॥

कौसिकहि पूजि प्रसंसि आयसु पाइ नृप सुख पायऊ ।

लिखि लगन तिलक समाज सजि कुलगुरुहि अवध पठायऊ ॥ १२६ ॥

गुनि गन बोलि कहैउ नृप माँड़व छावन ।
 गावहिं गीत सुवासिनि, बाज बधावन ॥ १२७ ॥
 सीय-राम-हित पूजहिं गौरि गनेसहि ।
 परिजन पुरजन सहित प्रमोद नरेसहि ॥ १२८ ॥
 प्रथम हरदि बेदन करि मंगल गावहिं ।
 करि कुलरीति, कलस थपि तेलु चढ़ावहिं ॥ १२९ ॥
 गे मुनि अवध, बिलोकि सुसरित नहायउ ।
 सतानंद सत-कोटि-नाम-फल पायउ ॥ १३० ॥
 नृप सुनि आगे आइ पूजि सनमानेउ ।
 दीन्ह लगन कहि कुसल राउ हरषानेउ ॥ १३१ ॥
 सुनि पुर भयउ अनंद बधाव वजावहिं ।
 सजहिं सुमंगल कलस बितान बनावहिं ॥ १३२ ॥
 राउ छाँड़ि सब काज साज सब साजहिं ।
 चलेउ बरात बनाइ पूजि गनराजहिं ॥ १३३ ॥
 बाजहिं ढोल निसान सगुन सुभ पाइन्हि ।
 सियनैहर जनकौर नगर नियराइन्हि ॥ १३४ ॥
 नियरानि नगर बरात हरषी लेन अगवानी गए ।
 देखत परस्पर मिलत, मानत, प्रेमपरिपूरन भए ॥
 आनंद पुर कौतुक कोलाहल वनत सो वरनत कहाँ ।
 लै दियो तहँ जनवास सकल सुपास नित नूतन जहाँ ॥ १३५ ॥
 गे जनवासहि कौसिक रामलषन लिए ।
 हरषे निरखि बरात प्रेम प्रमुदित हिए ॥ १३६ ॥
 हृदय लाइ लिए गोद मोद अति भूपहि ।
 कहि न सकहिं सत सेष अनंद अनूपहि ॥ १३७ ॥
 राय कौसिकहि पूजि दान बिप्रन्ह दिए ।
 राम सुमंगल हेतु सकल मंगल किए ॥ १३८ ॥

व्याह-विभूषन-भूषित भूषन-भूषन ।
 विश्वविलोचन, वनजविकासक पूषन ॥ १३८ ॥
 मध्य वरात विराजत अति अनुकूलेउ ।
 मनहुँ काम आराम कल्पतरु फूलेउ ॥ १४० ॥
 पठई भेंट विदेह बहुत बहु भाँतिन्ह ।
 देखत देव सिंहाहिं अनंद वरातिन्ह ॥ १४१ ॥
 वेदविहित कुलरीति कीन्हि दुहुँ कुलगुर ।
 पठई बोली वरात जनक-प्रमुदित उर ॥ १४२ ॥
 जाइ कहेउ “पगु धारिय” मुनि अवधंसहि ।
 चले सुमिरि गुरु गौरि गिरीस गनेसहि ॥ १४३ ॥
 चले सुमिरि गुरु सुर सुमन बरषहि, परे बहु विधि पाँवडें ।
 सनमानि सब विधि जनक दसरथ किए प्रेम कनावडें ॥
 गुन सकल सम समधी परस्पर मिलत अति आनंद लहे ।
 जय धन्य जय जय धन्य धन्य बिलोकि सुर नर मुनि कहे ॥ १४४ ॥
 तीनि लोक अवलोकहि नहिँ उपमा कोउ ।
 दसरथ जनक समान जनक दसरथ दोउ ॥ १४५ ॥
 सजहिँ सुमंगल साज रहस रनिवासहिँ ।
 गान करहिँ पिक्रवैनि सहित परिहासहिँ ॥ १४६ ॥
 उमा रमादिक सुरतिय सुनि प्रमुदित भई ।
 कपट नारि-बर-वेष विरचि मंडप गई ॥ १४७ ॥
 मंगल आरति साजि बरहिँ परिछन चलीं ।
 जनु बिगसीं रवि-उदय कनक-पंकज-कलीं ॥ १४८ ॥
 नख सिख सुंदर रामरूप जब देखहिँ ।
 सब इंद्रिन्ह महुँ इंद्रबिलोचन लेखहिँ ॥ १४९ ॥
 परम प्रीति कुलरीति करहिँ गजगामिनि ।
 नहिँ अघाहिँ अनुराग भाग भरि भामिनि ॥ १५० ॥

नेगचारु कहँ नागरि गहरु लगावहिँ ।

निरखि निरखि आनंद सुलोचनि पावहिँ ॥ १५१ ॥

करि आरती निछावरि बरहिँ निहारहिँ ।

प्रेममगन प्रमदागन तनु न सम्हारहिँ ॥ १५२ ॥

नहिँ तनु सम्हारहिँ, छवि निहारहिँ निमिषरिपु ननु रन जए ।

चक्रवै-लोचन रामरूप-सुराज-सुख भोगी भए ॥

तब जनक सहित समाज राजहि उचित रुचिरासन दए ।

कौंसिक वसिष्ठहि पूजि पूजे राउ दै अंवर नए ॥ १५३ ॥

देत अरघ रघुवीरहि मंडप लै चलीं ।

करहिँ सुमंगल गान उमंगि आनंद अलीं ॥ १५४ ॥

बर विराज मंडप महँ विश्व विमोहइ ।

ऋतु वसंत वनमध्य मदन जनु सोहइ ॥ १५५ ॥

कुल-बिबहार, वेदविधि चाहिय जहँ जस ।

उपरोहित दोउ करहिँ मुदित मन तहँ तस ॥ १५६ ॥

बरहि पूजि नृप दीन्ह सुभग सिंहासन ।

चलीं दुलहिनिहिँ ल्याइ पाइ अनुसासन ॥ १५७ ॥

जुवति जुत्य महँ सीय सुभाइ विराजइ ।

उपमा कहत लजाइ भारती भाजइ ॥ १५८ ॥

दुलह दुलहिनिन्ह देखि नारि नर हरषहिँ ।

छिनु छिनु गान निसान सुमन सुर वरषहिँ ॥ १५९ ॥

लै लै नाउँ सुआसिनि मंगल गावहिँ ।

कुँवर कुँवरि हित गनपति गौरि पुजावहिँ ॥ १६० ॥

अग्नि थापि मिथिलेस कुसोदक लीन्हैउ ।

कन्यादान विधान संकलप कीन्हैउ ॥ १६१ ॥

संकल्प सिय रामहिँ समर्पी सील सुख सोभामई ।

जिमि संकरहि गिरिराज गिरिजा, हरिहि श्री सागर दई ॥

सिंदूरबंदन होम लावा होन लागीं भाँवरी ।

सिलपोहनी करि मोहनी मन हर्यौ मूरति साँवरी ॥ १६२ ॥

यहि विधि भयो विवाह उछाह तिहूँ पुर ।

देहिं असीस मुनीस सुमन बरषहिं सुर ॥ १६३ ॥

मनभावत विधि कीन्ह, मुदित भामिनि भई ।

वर दुलहिनिहि लेवाइ सखी कोहवर गई ॥ १६४ ॥

निरखि निछावरि करहिं वसन मनि छिनु छिनु ।

जाइ न वरनि विनोद मोदमय सो दिनु ॥ १६५ ॥

सियभ्राता के समय भौस तहँ आयउ ।

दुरीदुरा करि नेगु सुनात जनायउ ॥ १६६ ॥

चतुर नारिबर कुँवरिहि रीति सिखावहिं ।

देहिं गारि लहकौरि समौ सुख पावहिं ॥ १६७ ॥

जुआ खेलावत कौतुक कीन्ह सयानिन्ह ।

जीति-हारि-मिस देहिं गारि दुहुँ रानिन्ह ॥ १६८ ॥

सीयमातु मन मुदित उतारति आरति ।

को कहि सकइ अनंद मगन भइ भारति ॥ १६९ ॥

जुवति जूथ रनिवास रहस-वस यहि विधि ।

देखि देखि सिय राम सकल मंगलनिधि ॥ १७० ॥

मंगलनिधान विलोकि लोयन-लाह लूटति नागरी ।

दइ जनक तीनिहु कुँवरि कुँवर विवाहि सुनि आनंदमरी ॥

कल्यान मो कल्यान पाइ बितान छेवि मन मोहई ।

सुरधेनु, ससि, सुरमनि सहित मानहुँ कलपतरु सोहई ॥ १७१ ॥

जनक-अनुज-तनया दुइ परम मनोरम ।

जेठि भरत कहँ व्याहि रूप रति सय सम ॥ १७२ ॥

सिय लघुभगिनि लषन कहँ रूप-उजागरि ।

लषन-अनुज श्रुतिकीरति सब-गुन-आगरि ॥ १७३ ॥

रामविवाह समान व्याह तीनिउ भए ।
 जीवनफल, लोचनफल विधि सब कहँ दए ॥ १७४ ॥
 दाइज भयउ बिबिध बिधि, जाइ न सो गनि ।
 दासी, दास, बाजि, गज, हेम, वसन, मनि ॥ १७५ ॥
 दान मान परमान प्रेम पूरन किए ।
 समधी सहित बरात विनय बस करि लिए ॥ १७६ ॥
 गे जनवासेहि राउ, संग सुत सुतबहु ।
 जनु पाए फल चारि सहित साधन चहुँ ॥ १७७ ॥
 चहुँ प्रकार जेवनार भई बहु भाँतिन्ह ।
 भोजन करत अवधपति सहित बरातिन्ह ॥ १७८ ॥
 देहिँ गारि बर नारि नाम लै दुहुँ दिसि ।
 जेवत बढेउ अनंद, सोहावनि सो निसि ॥ १७९ ॥
 सो निसि सोहावनि, मधुर गावनि, बाजने बाजहिँ भले ।
 नृप कियो भोजन पान, पाइ प्रमोद जनवासहि चले ॥
 नट भाट मागध सूत जाचक जस प्रतापहि बरनहीं ।
 सानंद भूसुर-वृंद मनि गज देत मन करपै नहीं ॥ १८० ॥
 करि करि विनय कछुक दिन राखि बरातिन्ह ।
 जनक कीन्ह पहुनाई अगनित भाँतिन्ह ॥ १८१ ॥
 'प्रात बरात चलिहि' सुनि भूपतिभामिनि ।
 परि न विरहबस नौद, बोति गइ जामिनि ॥ १८२ ॥
 खरभर नगर, नारि नर विधिहि मनावहिं ।
 बार बार ससुरारि राम जेहि आवहिँ ॥ १८३ ॥
 सकल चलन के साज जनक साजत भए ।
 भाइन्ह सहित राम तब भूपभवन गए ॥ १८४ ॥
 सासु उत्तारि आरती करहिं निछावरि ।
 निरखि निरखि हिय हरषहिं मूरति साँवरि ॥ १८५ ॥

माँगेउ विदा राम तब, सुनि करुना भरी ।

परिहरि सकुच सप्रेम पुलकि पायन्ह परी ॥ १८६ ॥

सीय सहित सब सुता सौँपि कर जोरहिं ।

बार बार रघुनाथहिं निरखि निहोरहिं ॥ १८७ ॥

“तात तजिय जनि छोह मया राखबि मन ।

अनुचर जानव राउ सहित पुर परिजन ॥ १८८ ॥

जन जानि करब सनेह, बलि” कहि दीन वचन सुनावहीं ।

अति प्रेम बारहिं बार रानी बालकन्हि उर लावहीं ॥

सिय चलत पुरजन नारि हय गय विहँग मृग व्याकुल भए ।

सुनि विनय सासु प्रबोधि तब रघुवंसमनि पितु पहिं गए ॥ १८९ ॥

परेउ निसानहिं घाउ राउ अवधहिं चले ।

सुरगन वरषहिं सुमन सगुन पावहिं भले ॥ १९० ॥

जनक जानकिहिं भेटि सिखाइ सिखावन ॥

सहित सचिव गुरु बंधु चले पहुँचावन ॥ १९१ ॥

प्रेम पुलकि कह राय “फिरिय अब राजन ॥”

करत परस्पर विनय सकल गुनभाजन ॥ १९२ ॥

कहेउ जनक कर जोरि “कीन्ह मोहिं आपन ॥

रघु-कुल-तिलक सदा तुम्ह उथपनथापन ॥ १९३ ॥

विलग न मानव मोर जो बोलि पठायउँ ॥

प्रभुप्रसाद जस जाति सकल सुख पायउँ” ॥ १९४ ॥

पुनि बसिष्ठ आदिक मुनि बंदि महीपति ॥

गहि कौसिक के पाँय कीन्हि विनती अति ॥ १९५ ॥

भाइन्ह सहित बहेरि विनव रघुबीरहि ॥


गदगद, कंठ नयन जल, उर धरि धीरहि ॥ १९६ ॥

“कृपासिंधु सुखसिंधु सुजान-सिरोमनि ।


तात ! समय सुधि करबि छोह छाड़ब जनि ॥ १९७ ॥

जनि छोह छाँड़व बिनय सुनि रघुबीर बहु बिनती करी ।
 मिलि भेंटि सहित सनेह फिरेउ विदेह मन धीरज धरी ॥
 सो समौ कहत न बनत कछु सब भुवन भरि करुना रहे ।
 तब कीन्ह कोसलपति पयान निसान वाजे गहगहे ॥ १८८ ॥
 पंथ मिले भृगुनाथ हाथ फरसा लिए ।
 डाटहिं आँखि देखाइ कोप दारुन किए ॥ १८९ ॥
 राम कीन्ह परितोष रोष रिस परिहरि ।
 चले सौँपि सारंग सुफल लोचन करि ॥ २०० ॥
 रघुवर-भुज-बल देखि उछाह बरातिन्ह ।
 मुदित राउ लखि सन्मुख विधि सब भाँतिन्ह ॥ २०१ ॥
 एहि विधि व्याहि सकल सुत जग जस छायाउ ।
 मगलोगनि सुख देत अवधपति आयाउ ॥ २०२ ॥
 होहिं सुमंगल सगुन सुमन सुर वरषहिं ।
 नगर कोलाहल भयउ नारि नर हरषहिं ॥ २०३ ॥
 घाट वाट पुर द्वार बजार बनावहिं ।
 बीथी सौँचि सुगंध सुमंगल गावहिं ॥ २०४ ॥
 चौकैँ पूरैँ चारु कलस ध्वज साजहिं ।
 विविध प्रकार गहगहे बाजन बाजहिं ॥ २०५ ॥
 बंदनवार बितान पताका घर घर ।
 रोपैँ सफल सपल्लव मंगल तरुवर ॥ २०६ ॥
 मंगल विटप मंजुल विपुल दधि दूब अछलत रोचना ।
 भरि थार आरति सजहिं सब सारंग-सावक-लोचना ॥
 मन मुदित कौसल्या सुमित्रा सकल भूपति-भामिनी ।
 सजि साजि परिछन चलीं रामहिं मत्त-कुंजरगामिनी ॥ २०७ ॥
 बधुन्ह सहित सुत चारिउ मालु निहारहिं ।
 बारहिं बार आरती मुदित उतारहिं ॥ २०८ ॥




करहिं निछावरि छिनु छिनु मंगल मुद भरी ।
 दुलह दुलहिनिन्ह देखि प्रेम-पय-निधि परीं ॥ २०६ ॥
 देत पाँवड़े अरघ चलीं लै सादर ।
 उमगि चलेउ आनंद भुवन भुईं वादर ॥ २१० ॥
 नारि उहार उधारि दुलहिनिन्ह देखहिं ।
 नैनलाहु लहि जनम सफल करि लेखहिं ॥ २११ ॥
 भवन आनि सनमानि सकल मंगल किए ।
 बसन कनक मनि धेनु दान विप्रन्ह दिए ॥ २१२ ॥
 जाचक कीन्ह निहाल असीसहिं जहँ तहँ ।
 पूजे देव पितर सब राम-उदय कहँ ॥ २१३ ॥
 नेगचार करि दीन्ह सबहि पहिरावनि ।
 समधी सकल सुआसिनि गुरुतिय पावनि ॥ २१४ ॥
 जोरी चारि निहारि असीसत निकसहिं ।
 मनहुँ कुमुद विधु-उदय मुदित मन विकसहिं ॥ २१५ ॥
 विकसहिं कुमुद जिमि देखि विधु भइ अवध सुख सोभामई ।
 एहि जुगुति राजविवाह गावहिं सकल कवि कीरति नई ॥
 उपवीत व्याह उछाह जे सिय राम मंगल गावहीं ।
 तुलसी सकल कल्याण ते नर नारि अनुदिनु पावहीं ॥ २१६ ॥



रामाज्ञा-प्रश्न



रामाज्ञा-प्रश्न



अष्टोत्तर सत कमल फल, मुष्टी तीनि प्रमान ।
सप्त सप्त तजि सेष को, राखै सब बिलगान ॥
प्रथम सर्ग जो सेष रह, दूजे सप्तक होइ ।
तीजे दोहा जानिए, सगुन विचारब सोइ ॥

प्रथम सर्ग

सप्तक-१

बानि बिनायकु अंब रवि, गुरु हर रमा रमेस ।
सुमिरि करहु सब काज सुभ, मंगल देस विदेस ॥ १ ॥
गुरु सरसइ सिंधुरबदन, ससि सुरसरि सुरगाइ ।
सुमिरि चलहु मग मुदित मन, होइहि सुकृत सहाइ ॥ २ ॥

गिरा गौरि गुरु गनप हर, मंगल मंगलमूल ।
 सुमिरत करतल सिद्धि सब, होइ ईस अनुकूल ॥ ३ ॥
 भरत भारती रिपुदवनु, गुरु गनेस बुधवार ।
 सुमिरत सुलभ सुधरम फल, विद्या विनय विचार ॥ ४ ॥
 सुरगुरु गुरु सिय राम गन, राउ गिरा उर आनि ।
 जो कछु करिय सो होइ सुभ, खुलहिं सुमंगल खानि ॥ ५ ॥
 सुक सुमिरि गुरु सारदा, गनपु लषनु हनुमान ।
 करिय काज सबु साजु भल, निपटहि नीक निदान ॥ ६ ॥
 तुलसी तुलसी राम सिय, सुमिरि लषन हनुमान ।
 काजु विचारेहु सो करहु, दिनु दिनु बड़ कल्याण ॥ ७ ॥

सप्तक-२

दसरथ राज न ईति-भय, नहिं दुख दुरित दुकाल ।
 प्रमुदित प्रजा प्रसन्न सब, सब सुख सदा सुकाल ॥ १ ॥
 कौसल्यापद नाइ सिर, सुमिरि सुमित्रापाय ।
 करहु काज मंगल कुसल, विधि हरि संभु सहाय ॥ २ ॥
 विधिवस बन मृगया फिरत, दीन्ह अंध मुनि साप ।
 सो सुनि विपति विषाद बड़, प्रजहि सोकु संताप ॥ ३ ॥
 सुतहित विनती कीन्हि नृप, कुलगुरु कहा उपाड ।
 होइहि भल संतानं सुनि, प्रमुदित कौसलराउ ॥ ४ ॥
 पुत्रजागुं करवाइ ऋषि, राजहि दीन्ह प्रसाद ।
 सकल-सुमंगल-मूल जग, भूसुर-आसिरवाद ॥ ५ ॥
 रामजनम घर घर अवध, मंगल गान निसान ।
 सगुन सुहावन होइ सुत, मंगल-मोद-निधान ॥ ६ ॥
 रामु भरतु सानुज लषन, दसरथ बालक चारि ।
 तुलसी सुमिरत सगुन सुभ, मंगल कहव पचारि ॥ ७ ॥

सप्तक-३

भूप भवन भाङ्ग सहित, रघुवर बाल विनोद ।
 सुमिरत सब कल्याण जग, पग पग मंगल मोद ॥ १ ॥
 करनवेध चूड़ाकरन, श्रीरघुवर-उपवीत ।
 समय सकल कल्याणमय, मंजुल मंगल गीत ॥ २ ॥
 भरत सत्रुसूदन लपन, सहित सुमिरि रघुनाथ ।
 करहु काज सुभ साज सब, मिलहि सुमंगल साथ ॥ ३ ॥
 रासु लपनु कौसिक सहित, सुमिरहु करहु पयान ।
 लच्छि-लाभ जय जगत जसु, मंगल सगुन प्रमान ॥ ४ ॥
 मुनि मखपाल कृपाल प्रभु, चरनकमल उर आनु ।
 तजहु सोच संकट मिटिहि, सत्य सगुन जिय जानु ॥ ५ ॥
 हानि मीचु दारिद दुरित, आदि-अंत-गत बीच ।
 राम विमुख अब आपने, गए निसाचर नीच ॥ ६ ॥
 सिला-साप-मोचन चरन, सुमिरहु तुलसीदास ।
 तजहु सोच संकट मिटिहि, पूजिहि मन कै आस ॥ ७ ॥

सप्तक-४

सीय-स्वयंवर समउ भल, सगुन साध सब काज ।
 कीरति विजय विवाह विधि, सकल सुमंगल साज ॥ १ ॥
 राजत राजसमाज महुँ, राम भंजि भवचाप ।
 सगुन सुहावन लासु बड़, जय पर-सभा प्रताप ॥ २ ॥
 लाभ मोद मंगल अवधि, सिय रघुबीर विवाहु ।
 सकल सिद्धिदायक समउ, सुभ सब काज उछाहु ॥ ३ ॥
 कोसलपालक बाल उर, सिय मेली जयमाल ।
 समउ सुहावन सगुन भल, मुद मंगल सब काल ॥ ४ ॥

हरषि विबुध बरषहिं सुमन, मंगल गान निसान ।
 जय जय रविकुल-कमल-रवि, मंगल-मोद-निधान ॥ ५ ॥
 सतानंद पठये जनक, दसरथ सहित समाज ।
 आये तिरहुति सगुन सुभ, भए सिद्ध सब काज ॥ ६ ॥
 दसरथ पूरन परब-विधु, उदित समय संजेग ।
 जनकनगर सर कुमुदगन, तुलसी प्रमुदित लोग ॥ ७ ॥

सप्तक-५

मन मलीन मानी महिष, कोक कोकनद वृंद ।
 सुहृद समाज चकोर चित, प्रमुदित परमानंद ॥ १ ॥
 तेहि अवसर रावन-नगर, असगुन असुभ अपार ।
 होहिँ हानि-भय-मरन-दुख-सूचक बारहि बार ॥ २ ॥
 मधु माधव दसरथ जनक, मिलव राज ऋतुराज ।
 सगुन सुवन नव दल सुतरु, फूलत फलत सुकाज ॥ ३ ॥
 विनय-पराग सुप्रेम रस, सुमन सुभग संवाद ।
 कुसुमित काज रसाल तरु, सगुन सुकोकिल-नाद ॥ ४ ॥
 उदित भानुकुल-भानु लखि, लुके उलूक नरेस ।
 गए गँवाइ गरुर पति, धनु मिस हये महेस ॥ ५ ॥
 चारि चारु दसरथ कुँवर, निरखि मुदित पुर लोग ।
 कोसलेस मिथिलेस को, समउ सराहन जोग ॥ ६ ॥
 एक बितान विवाहि सब, सुवन सुमंगल रूप ।
 तुलसी सहित समाज सुख, सुकृत-सिंधु दोउ भूप ॥ ७ ॥

सप्तक-६

दाइज भयउ अनेक विधि, सुनि सिहाहिँ दिसिपाल ।
 सुख संपति संतोषमय, सगुन सुमंगल-माल ॥ १ ॥
 वर दुलहिनि सब परसपर, मुदित पाइ मनकाम ।
 चारु चारि जोरी निरखि, दुहुँ समाज अभिराम ॥ २ ॥
 चारिउ छुँवर वियाहि पुर, गवने दसरथ राउ ।
 अए मंजु मंगल सगुन, गुरु-सुर-संभु-पसाउ ॥ ३ ॥
 पंथ परसुधर आगमनु, समय सोच सब काहु ।
 राजसमाज विषाद बड़, भयवस मिटा उछाहु ॥ ४ ॥
 रोष कलुष लोचन भ्रुकुटि, पानि परसु धनु वान ।
 काल कराल विलोकि मुनि, सब समाज बिलखान ॥ ५ ॥
 प्रभुहिँ सौँधि सारंग मुनि, दीन्ह सुआसिरवाद ।
 जय मंगल सूचक सगुन, राम-राम-संवाद ॥ ६ ॥
 अवध अनंद बधावनो, मंगल गान निसान ।
 तुलसी तोरन कलस पुर, चँवर पताक वितान ॥ ७ ॥

सप्तक-७

साजि सुमंगल आरती, रहस विवस रनिवासु ।
 मुदित मातु परिछन चलीं, उमगत हृदय हुलासु ॥ १ ॥
 करहिँ निछावरि आरती, उमगि उमगि अनुराग ।
 वर दुलहिनि अनुरूप लखि, सखी सराहहिँ भाग ॥ २ ॥
 मुदित नगर नर नारि सब, सगुन सुमंगल मूल ।
 जय धुनि मुनि सुर दुंदुभी, बाजहिँ वरषहिँ फूल ॥ ३ ॥
 आए कोसलपाल पुर, कुसल समाज समेत ।
 समउ सुनत सुमिरत सुखद, सकल सिद्धि सुभ देत ॥ ४ ॥

रूप सील बय बंसगुन, सम विवाह भये चारि ।
 मुदित राउ रानी सकल, सानुकूल त्रिपुरारि ॥ ५ ॥
 बिधि हरि हर अनुकूल अति, दसरथ राजहि आजु ।
 देखि सराहत सिद्ध सुर, संपति समउ समाजु ॥ ६ ॥
 सगुन प्रथम उनचास सुभ, तुलसी अति अभिराम ।
 सब प्रसन्न सुर भूमिसुर, गोगन गंगा राम ॥ ७ ॥

द्वितीय सर्ग

सप्तक-१

समय राम-जुवराज कर, मंगल-मोद-निकेतु ।
सगुन सुहावन संपदा, सिद्धि सुमंगल हेतु ॥ १ ॥
सुर-माया-बस कैकयी, कुसमय कीर्ति कुचालि ।
कुटिल नारि मिस होइ छलु, अनभल आजु कि कालि ॥ २ ॥
कुसमय कुसगुन कोटि सम, राम-सीय-वनबास ।
अनरथ अनभल-अवधि जग, जानव सरबस-नास ॥ ३ ॥
सोचत पुर परिजन सकल, विकल राउ रनिवास ।
छल-मलीन मन तीयमिस, विपति विषाद बिनास ॥ ४ ॥
लषन-राम-सिय-वनगमनु, सकल अमंगल मूल ।
सोच पोच संताप बस, कुसमय संसय सूल ॥ ५ ॥
प्रथम बास सुरसरि-निकट, सेवा कीर्ति निषाद ।
कहव सुभासुम सगुन फल, विसमय हरष विषाद ॥ ६ ॥
चले नहाइ प्रयाग प्रभु, लषन सीय रघुराज ।
तुलसी जानव सगुन फल, होइहि साधु समाज ॥ ७ ॥

सप्तक-२

सीय रामु लोने लषनु, तापस-बेष अनूप ।
तप तीरथ जप जाग हित, सगुन सुमंगल रूप ॥ १ ॥
सीता लषन समेत प्रभु, जमुना उत्तरि नहाइ ।
चले सकल संकट समन, सगुन सुमंगल पाइ ॥ २ ॥

अवध सोक-संताप बस, बिकल सकल नर नारि ।
 बाम विधाता राम बिनु, माँगत मीचु पुकारि ॥ ३ ॥
 लषन सीय रघुवंसमनि, पथिक पाय उर आनि ।
 चलहु अगम मग सुगम सुभ, सगुन सुमंगल खानि ॥ ४ ॥
 ग्राम-नारि-नर मुदित मन, लषन राम सिय देखि ।
 होइ प्रीति पहिचान बिनु, मान विदेस बिसेषि ॥ ५ ॥
 वन मुनिगन रामहि मिलहिँ, मुदित सुकृत फल पाइ ।
 सगुन सिद्ध साधक दरस, अभिमत होइ अघाइ ॥ ६ ॥
 चित्रकूट पयतीर प्रभु, बसे भानुकुल-भानु ।
 तुलसी तप जप जोग हित, सगुन सुमंगल जानु ॥ ७ ॥

सप्तक-३

हंसवंस-अवतंस जब, कीन्ह वास पय पास ।
 तापस साधक सिद्ध मुनि, सब कहँ सगुन सुपास ॥ १ ॥
 बटप बेलि फूलहिँ फलहिँ, जल थल विमल बिसेषि ।
 मुदित किरात बिहंग मृग, मंगल-मूरति देखि ॥ २ ॥
 सोँचति सीय सरोज-कर, वये बटप बट बेलि ।
 समउ सुकालु किसानहित, सगुन सुमंगल केलि ॥ ३ ॥
 हय हाँके फिरि दखिन दिसि, हेरि हेरि हिहिनात ।
 भये निषाद विषाद-वस, अवध सुमंतहि जात ॥ ४ ॥
 सचिव सोच व्याकुल सुनत, असगुन अवध प्रवेस ।
 समाचार सुनि सोकबस, माँगी मीचु नरेस ॥ ५ ॥
 राम राम कहि राम सिय, रामसरन भये राउ ।
 सुमिरहु सीता राम अब, नाहिँन आन उपाउ ॥ ६ ॥
 रामविरह दसरथमरनु, मुनि मन अगम सुमीचु ।
 तुलसी मंगल मरन-तरु, सुचि सनेह जल सींचु ॥ ७ ॥

सप्तक-४

धीर वीर रघुवीर प्रिय, सुमिरि समीरकुमार ।
 अगम सुगम सब काज करु, करतल सिद्धि विचार ॥ १ ॥
 सुमिरि सत्रुसूदन-चरन, सगुन सुमंगल मानि ।
 परपुर वाद-विवाद-जय, जूझ जुआ जय जानि ॥ २ ॥
 सेवक सखा सुबंधु हित, सगुन विचार विसेषि ।
 भरत नाम गुनगन विमल, सुमिरि सत्य सब लेषि ॥ ३ ॥
 साहिब समरथ सीलनिधि, सेवत सुलभ सुजान ।
 राम सुमिरि सेइय सुप्रभु, सगुन कहव कल्याण ॥ ४ ॥
 सुकृत-सील-सोभा-अवधि, सीय सुमंगल खानि ।
 सुमिरि सगुन तियधरम हित, कहव सुमंगल जानि ॥ ५ ॥
 ललित लषनमूरति हृदय, आनि धरे धनुवान ।
 करहु काज सुभ सगुन सब, मुद मंगल कल्याण ॥ ६ ॥
 रामनाम पर रामते, प्रीति प्रतीति भरोस ।
 सो तुलसी सुमिरत सकल, सगुन सुमंगल कोस ॥ ७ ॥

सप्तक-५

गुरु आयसु आए भरत, निरखि नगर-नर-नारि ।
 सानुज सोचत पोच बिधि, लोचन मोचत बारि ॥ १ ॥
 भूप-मरन प्रभु-बन-गवनु, सब बिधि अवध अनाथ ।
 रोवत समुझि कुमातु-कृत, मौंजि हाथ धुनि माथ ॥ २ ॥
 बेद-बिहित पितु-करम करि, लिये संग सब लोग ।
 चले चित्रकूटहि भरत, व्याकुल राम-बियोग ॥ ३ ॥
 रामदरसु हिय हरषु बड़, भूपति मरन विषादु ।
 सोचत सकल समाज सुनि, राम-भरत-संबादु ॥ ४ ॥

सुनि सिष आसिष, पाँवरी, पाइ, नाइ पद माथ ।
 चले अवध संतापवस, बिकल लोग सब साथ ॥ ५ ॥
 भरत-नेम त्रत धरम सुभ, रामचरन-अनुराग ।
 सगुन समुझि साहस करिय, सिद्ध होइ जप जाग ॥ ६ ॥
 चित्रकूट सब दिन बसत, प्रभुसिय लषन समेत ।
 रामनाम-जप जापकहि, तुलसी अभिमत देत ॥ ७ ॥

 सप्तक-६

पय पावनि, बनभूमि भलि, सैल सुहावन पीठ ।
 रागिहि सीठ विसेपि थलु, विषय-विरागिहि मीठ ॥ १ ॥
 फटिक-सिला मंदाकिनी, सिय-रघुवीर-बिहार ।
 रामभगत हित सगुन सुभ, भूतल भगतिभँडार ॥ २ ॥
 सगुन सकल-संकट-समन, चित्रकूट चलि जाहु ।
 सीता-राम-प्रसाद सुभ, लघु साधन बड़ लाहु ॥ ३ ॥
 दिये अत्रितिय जानकिहि, बसन बिभूषन भूरि ।
 रामकृपा संतोष सुख, होहिं सकल दुख दूरि ॥ ४ ॥
 काककुचालि, विराधवध, देह तजी सरभंग ।
 हानि-मरन-सूचक सगुन, अनरथ-असुभ-प्रसंग ॥ ५ ॥
 राम लषन मुनिगन मिलन, मंजुल मंगल-मूल ।
 सत समाज तब होइ जब, रमा राम अनुकूल ॥ ६ ॥
 मिले कुंभसंभव मुनिहि, लषन सीय रघुराज ।
 तुलसी साधु-समाज-सुख, सिद्ध दरस सुभ काज ॥ ७ ॥

 सप्तक-७

सुनि मुनि आयसु प्रभु कियो, पंचवटी बसबास ।
 भइ महि पावनि परसि पद, भा सब भाँति सुपास ॥ १ ॥

सरित सरोवर सजल सब, जलज विपुल बहुरंग ।
 समउ सुहावन सगुन सुभ, राजा प्रजा प्रसंग ॥ २ ॥
 विटप बेलि फूलहिं फलहिं, सीतल सुखद समीर ।
 मुदित बिहँग मृग मधुप गन, वनपालक दोउ वीर ॥ ३ ॥
 मोदाकर गोदावरी, विपिन सुखद सब काल ।
 निर्भय मुनि जप तप करहिं, पालक राम कृपाल ॥ ४ ॥
 भेंट गीध रघुराज सन, दुहुँ दिसि हृदय हुलासु ।
 सेवक पाइ सुसाहिवहि, साहिव पाइ सुदासु ॥ ५ ॥
 पढ़हिं पढ़ावहिं मुनितनय, आगम निगम पुरान ।
 सगुन सुविद्या लाभहित, जानब समय समान ॥ ६ ॥
 निजकर सींचति जानकी, तुलसी लाइ रसाल ।
 सुभ दूती उनचास भलि, वरषा कृपी सुकाल ॥ ७ ॥

तृतीय सर्ग

सप्तक-१

दंडकवन पावन-करन, चरन-सरोज प्रभाउ ।
ऊसर जामहिं, खल तरहिं, होई रंक ते राउ ॥ १ ॥
कपटरूप मन-मलिन गइ, सूपनखा प्रभु पास ।
कुसंगुन कठिन कुनारि-कृत, कलह कलुष उपहास ॥ २ ॥
नाक कान बिनु विकल भइ, विकट कराल कुरूप ।
कुसंगुन, पाउ न देव मग, पग पग कंटक कूप ॥ ३ ॥
खर दूषन देखी दुखित, चले साजि सब साज ।
अनरथ असंगुन अघ असुभ, अनभल अखिल अक्राज ॥ ४ ॥
कटु कुठाय करटा रटहिं, फेकरहिं फेरु कुभांति ।
नीच निसाचर मीचु-बस, अनी मोहमद माति ॥ ५ ॥
राम-रोष-पावक प्रबल, निसिचर सलभ समान ।
लरत परत जरि जरि मरत, भये भसम जगु जान ॥ ६ ॥
सीता लषन समेत प्रभु, सोहत तुलसीदास ।
हरषत सुर वरषत सुमन, संगुन सुमंगल बास ॥ ७ ॥

सप्तक-२

सुभट सहस चौदह सहित, भाइ कालवस जानि ।
सूपनखा लंकहि चली, असुभ अमंगल-खानि ॥ १ ॥
बसन सकल सोनित-समल, विकट बदन गत गात ।
रोवति रावन की सभा, तात मात, हा ! आत ॥ २ ॥

काल कि मूरति कालिका, कालराति विकराल ।
 बिनु पहिचाने लंकपति, सभा समय तेहि काल ॥ ३ ॥
 सूपनखा सब भाँति गत, असुभ अमंगल-मूल ।
 समय साढ़साती सरिस, नृपहि प्रजहि प्रतिकूल ॥ ४ ॥
 बरबस गवनत रावनहिं, असगुन भए अपार ।
 नीचु गनत नहिं मीचुबस, मिलि मारीच विचार ॥ ५ ॥
 इत रावन, उत राम-कर, मीचु जानि मारीच ।
 कपट कनक-मृग-वेष तव, कीन्ह निसाचर नीच ॥ ६ ॥
 पंचवटी बट विटपतर, सीता लषन समेत ।
 सोहत तुलसीदास प्रभु, सकल सुमंगल देत ॥ ७ ॥

सप्तक-३

मायामृग पहिचानि प्रभु, चले सीयरुचि जानि ।
 बंचक चोर प्रपंचकृत, सगुन कहव हितहानि ॥ १ ॥
 सीयहरन अवसर सगुन, भय संसय संताप ।
 नारि काजहित निपट गत, प्रगट पराभव पाप ॥ २ ॥
 गीधराज रावन समर, घायल बीर विराज ।
 मूर सुजसु संग्राम महि, मरनु सुसाहिव काज ॥ ३ ॥
 राम लषनु बन बन विकल, फिरत सीय सुधि लेत ।
 सूचत सगुन विषादु बड़, असुभ अरिष्ट अचेत ॥ ४ ॥
 रघुबर विकल विहंग लखि, सो बिलोकि दोउ वीर ।
 सिय सुधि कहि 'सिय राम' कहि, तजी देह मतिधीर ॥ ५ ॥
 दसरथ ते दसगुन भगति, सहित तासु करि काज ।
 सोचत बंधुसमेत प्रभु, कृपासिंधु रघुराज ॥ ६ ॥
 तुलसी सहित सनेह नित, सुमिरहु सीताराम ।
 सगुन सुमंगल सुभ सदा, आदि मध्य परिनाम ॥ ७ ॥

सप्तक-४

सकल काज सुभ समउ भल, सगुन सुमंगल जानु ।
 कीरति विजय विभूति भलि, हिय हनुमानहिं आनु ॥ १ ॥
 सुमिरि सत्रुसूदन चरन, चलहु करहु सब काज ।
 सत्रु-पराजय निज विजय, सगुन सुमंगल साज ॥ २ ॥
 भरत नाम सुमिरत मिटहिं, कपट कलेस कुचालि ।
 नीति प्रीति परतीति हित, सगुन सुमंगल सालि ॥ ३ ॥
 रामनाम कलि कामतरु, सकल सुमंगल कंद ।
 सुमिरत करतल सिद्धि जग, पग पग परमानंद ॥ ४ ॥
 सीताचरन प्रनामु करि, सुमिरि सुनामु सनेम ।
 सुतिय होहिं पतिदेवता, प्राननाथ प्रिय प्रेम ॥ ५ ॥
 लषन ललित मूरति मधुर, सुमिरहु सहित सनेह ।
 सुख संपति कीरति विजय, सगुन सुमंगल गेह ॥ ६ ॥
 तुलसी तुलसी मंजरी, मंगल मंजुल मूल ।
 देखत सुमिरत सगुन सुभ, कलपलता फल फूल ॥ ७ ॥

सप्तक-५

खलबल अंध कबंध बस, परे सुबंधु समेत ।
 सगुन सोच संकट कहव, भूत प्रेत दुख देत ॥ १ ॥
 पाई नीच सुमीचु भलि, मिटा महामुनि साप ।
 बिहँगमरन, सिय सोचु मन, सगुन सभय संताप ॥ २ ॥
 कहि सबरी सब सीय-सुधि, प्रभु सराहि फल खात ।
 सोच समय संतोष सुनि, सगुन सुमंगल बात ॥ ३ ॥
 पवनसुवन सन भेंट भइ, भूमिसुता सुधि पाइ ।
 सोचविमोचन सगुन सुभ, मिला सुसेवक आइ ॥ ४ ॥

राम लखन हनुमान मन, दुहुँ दिसि परम उछाहु ।
मिला सुसाहिब सेवकहि, प्रभुहि सुसेवक लाहु ॥ ५ ॥
कीन्ह सखा सुग्रीव प्रभु, दीन्हि बाहँ रघुबीर ।
सुभ सनेह हित सगुन फल, मिटइ सोच भयभीर ॥ ६ ॥
बली बालि बलसालि दलि, सखा कीन्ह कपिराज ।
तुलसी राम कृपालु को, विरद गरीबनेवाज ॥ ७ ॥

सप्तक—६

बंधुविरोध न कुसल कुल, कुसगुन कोटि कुचालि ।
रावनरवि को राहु सो, भयो कालवस बालि ॥ १ ॥
कीन्ह वास वरषा निरखि, गिरिवर सानुज राम ।
काज विलंबित सगुन फल, होइहि भल परिनाम ॥ २ ॥
सीय-सोध कपि भालु सब, विदा किये कपिनाथ ।
जतन करहु आलस तजहु, नाइ रामपद माथ ॥ ३ ॥
हनूमान हिय हरषि तब, राम जोहारे जाइ ।
मंगलमूरति मारुतिहि, सादर लीन्ह बुलाइ ॥ ४ ॥
डाँटे वानर भालु सब, अवधि गये बिन काज ।
जो आइहि सो कालवस, कोपि कहा कपिराज ॥ ५ ॥
जान-सिरोमनि जानि जिय, कपि बल-बुद्धि-निधानु ।
दीन्हि मुद्रिका मुदित प्रभु, पाइ मुदित हनुमानु ॥ ६ ॥
तुलसी करतल सिद्धि सब, सगुन सुमंगल साज ।
करि प्रनाम रामहिँ चलहु, साहस सिद्ध सुकाज ॥ ७ ॥

सप्तक—७

नाथ हाथ माथे धरेउ, प्रभु-मुँदरी मुहँ मेलि ।
चलेउ सुमिरि सारंगधर, आनिहि सिद्धि सकेलि ॥ १ ॥

संग नील नल कुसुद गद, जामवंतु जुवराज ।
 चले रामपद नाइ सिर, सगुन सुमंगल साज ॥ २ ॥
 पैठि बिबर मिलि तापसिहि, अचइ पानि, फलु खाइ ।
 सगुन सिद्ध साधक दरस, अभिमत होइ अघाइ ॥ ३ ॥
 बनचर बिकल बिषाद-बस, देखि उदधि अवगाह ।
 असमंजस बड़ सगुन गत, बिधिवस होइ निवाह ॥ ४ ॥
 सब सभीत संपाति लखि, हहरे हृदय हरास ।
 कहत परस्पर गीध-गति, परिहरि जीवन-आस ॥ ५ ॥
 नव तनु पाइ देखाइ प्रभु, महिमा कथा सुनाइ ।
 धरहु धीर साहसु करहु, मुदित सीय-सुधि पाइ ॥ ६ ॥
 तुलसी रामप्रभाउ कहि, मुदित चले संपाति ।
 सुभ तीसर उनचास भल, सगुन सुमंगल पाँति ॥ ७ ॥

चतुर्थ सर्ग

सप्तक—१

रामजनम सुभ सगुन भल, सकल सुकृत सुखसार ।
पुत्रलाभ कल्याण बड़, मंगलचारु विचार ॥ १ ॥
दसरथ कुलगुरु की कृपा, सुतहित जाग कराइ ।
पायस पाइ विभाग करि, रानिन्ह दीन्ह बुलाइ ॥ २ ॥
सब सगरभ सोहहिं सदन, सकल सुमंगलखानि ।
तेज प्रताप प्रसन्नता, रूप न जाहिं बखानि ॥ ३ ॥
देखि सुहावन सपन सुभ, सगुन सुमंगल पाइ ।
कहहिं भूप सन मुदित मन, हर्ष न हृदय समाइ ॥ ४ ॥
सपन सगुन सुनि राउ कह, कुलगुरु-आसिरवाद ।
पूजिहि सब मनकामना, संकर गौरिप्रसाद ॥ ५ ॥
मास पाख तिथि जोग सुभ, नखत लगन ग्रह बार ।
सकल सुमंगल मूल जग, राम लीन्ह अवतार ॥ ६ ॥
भरत लषन रिपुदवन सब, सुवन सुमंगल मूल ।
प्रगट भये नृप सुकृतफल, तुलसी विधि अनुकूल ॥ ७ ॥

सप्तक—२

घर घर अवध बधावने, मुदित नगर-नर-नारि
बरषि सुमन हरषहिं विबुध, विधि त्रिपुरारि मुरारि ॥ १ ॥
मंगलगान निसान नभ, नगरमुदित नरनारि ।
भूप-सुकृत-सुरतरु निरखि, फरे चारु फल चारि ॥ २ ॥
पुत्रकाज कल्याण नृप, दिये दान बहु भाँति ।
रहस विबस रनिवास सब, मुद मंगल दिन राति ॥ ३ ॥

अनुदिन अवध बधावने, नित नव मंगल मोद ।
 मुदित मातु पितु लोग लखि, रघुबर बालविनोद ॥ ४ ॥
 करनबेध चूड़ाकरन, लौकिक वैदिक काज ।
 गुरु-आयसु भूपति करत, मंगल साज समाज ॥ ५ ॥
 राज-अजिर राजत रुचिर, कोसलपालक बाल ।
 जानु-पानि-चर चरित बर, सगुन सुमंगल माल ॥ ६ ॥
 लहे मातु पितु भागवस, सुत जग जलधि ललाम ।
 पुत्र-ल्लाम-हित सगुन सुभ, तुलसी सुमिरहु राम ॥ ७ ॥

 सप्तक—३

बाल बिभूषन बसन धर, धूरि-धूसरित अंग ।
 बालकेलि रघुबर करत, बालबंधु सब संग ॥ १ ॥
 राम भरत लछिमन ललित, सत्रुसमन सुभ नाम ।
 सुमिरत दसरथसुवन सब, पूजिहि सब मनकाम ॥ २ ॥
 नाम ललित, लीला ललित, ललित रूप रघुनाथ ।
 ललित बसन, भूषन ललित, ललित अनुज-सिसु साथ ॥ ३ ॥
 सुदिन साधि मंगल किये, दिये भूप व्रतबंध ।
 अवध बधाव बिलोकि सुर, बरषत सुमन सुगंध ॥ ४ ॥
 भूपति भूसुर भाट नट, जाचक पुर-नर-नारि ।
 दिये दान सनमानि सब, पूजे कुल-अनुहारि ॥ ५ ॥
 सखी सुआसिनि बिप्रतिय, सनमानी सब राय ।
 ईस मनाय असीस सुभ, देहिँ सनेह सुभाय ॥ ६ ॥
 रामकाज कल्यान सब, सगुन सुमंगल मूल ।
 चिरजीवहु तुलसीस सब, कहि सुर बरषहिँ फूल ॥ ७ ॥

सप्तक—४

रामजनम सुभकाज सब, कहत देवऋषि आइ
 सुनि सुनि मन हनुमान के, प्रेम उमँग न अमाइ ॥ १ ॥
 भरतु स्यामतन राम सम, सब गुन रूपनिधान ।
 सेवक सुखदायक सुलभ, सुमिरत सब कल्याण ॥ २ ॥
 ललित लाहु लोने लषनु, लोयन-लाहु निहारि ।
 सुत ललाम लालहु ललित, लेहु ललकि फल चारि ॥ ३ ॥
 मंगलमूरति मोदनिधि, मधुर मनोहर वेष ।
 राम-अनुग्रह पुत्रफल, होइहि सगुन बिसेष ॥ ४ ॥
 सोधत मख महि जनकपुर, सीय सुमंगलखानि ।
 भूपति पुन्य-पयोधि जनु, रमा प्रगट भइ आनि ॥ ५ ॥
 नाम सत्रुसृदन सुभग, सुखमा-सील-निकेत ।
 सेवत सुमिरत सुलभ सुख, सकल सुमंगल देत ॥ ६ ॥
 बालक कोसलपाल के, सेवकपाल कृपाल ।
 तुलसी मनमानस बसत, मंगल मंजु मराल ॥ ७ ॥

सप्तक—५

जनकनंदिनी जनकपुर, जब ते' प्रगटीं आइ ।
 तब ते' सब सुख संपदा, अधिक अधिक अधिकाइ ॥ १ ॥
 सीय स्वयंवर जनकपुर, सुनि सुनि सकल नरेस ।
 आए साज समाज सजि, भूषन वसन सुदेस ॥ २ ॥
 चले मुदित कौसिक अवध, सगुन सुमंगल साथ ।
 आए सुनि सनमानि गृह, आने कोसलनाथ ॥ ३ ॥
 सादर सोरह भाँति नृप, पूजि पहुनई कीन्हि ।
 बिनय बड़ाई देखि मुनि, अभिमत आसिष दीन्हि ॥ ४ ॥

मुनि माँगे दसरथ दिये, रामु लखनु दोउ भाइ ।
 पाइ सगुन फल सुकृत-फल, प्रमुदित चले लेवाइ ॥ ५ ॥
 स्यामल गौर किसोर बर, धरे तून धनुबान ।
 सोहत कौसिक सहित मग, मुद मंगल कल्याण ॥ ६ ॥
 सैल सरित सर बाग बन, मृग बिहंग बहुरंग ।
 तुलसी देखत जात प्रभु, मुदित गाधिसुत संग ॥ ७ ॥

सप्तक—६

लेत बिलोचन-लाभु सब, बड़भागी मगलोग ।
 रामकृपा दरसनु सुगम, अगम जाग जप जोग ॥ १ ॥
 जलदछाँह मृदु मग अवनि, सुखद पवन अनुकूल ।
 हरषत बिबुध बिलोकि प्रभु, बरषत सुरतरु-फूल ॥ २ ॥
 दले मलिन खल, राखि मख, मुनि सिष आसिष दीन्हि ।
 विद्या विस्वामित्र सब, सुथल समरपित कीन्हि ॥ ३ ॥
 अभय किए मुनि राखि मखु, धरे बान धनु भाथ ।
 धनु मख कौतुक जनकपुर, चले गाधिसुत साथ ॥ ४ ॥
 गौतमतिय-तारन चरन, कमल आनि उर देषु ।
 सकल सुमंगल सिद्धि सब, करतल सगुन विसेषु ॥ ५ ॥
 जनक पाइ प्रिय पाहुने, पूजे पूजन जोगु ।
 बालक कोसलपाल के, देखि मगन पुरलोगु ॥ ६ ॥
 सनमाने आने सदन, पूजे अति अनुराग ।
 तुलसी मंगल सगुन सुभ, भूरि भलाई भाग ॥ ७ ॥

सप्तक—७

कौसिक देखन धनुष मख, चले संग दोउ भाइ ।
 कुँवर निरखि पुर नारि नर, मुदित नयनफल पाइ ॥ १ ॥

भूपसभा भवचाप दलि, राजत राजकिसोर ।
 सिद्धि सुमंगल सगुन सुभ, जय जय जय सब ओर ॥ २ ॥
 जयमय मंजुल माल उर, मंगलमूरति देषि ।
 गान निसान प्रसून भरि, मंगल मोद विसेषि ॥ ३ ॥
 समाचार सुनि अवधपति, आए सहित समाज ।
 प्रीति परस्पर मिलत मुद, सगुन सुमंगल साज ॥ ४ ॥
 गान निसान वितान वर, विरचे विविध विधान ।
 चारि विवाह उछाह बड़, कुसल काज कल्याण ॥ ५ ॥
 दाइज पाइ अनेक विधि, सुत सुतवधुन समेत ।
 अवधनाथु आए अवध, सकल सुमंगल लेत ॥ ६ ॥
 चौथ चाह उनचास पुर, घर घर मंगलचार ।
 तुलसिहि सब दिन दाहिने, दसरथ राजकुमार ॥ ७ ॥

पंचम सर्ग

सप्तक—१

रामनाम कलि कामतरु, रामभगति सुरधेनु ।
सगुन सुमंगल मूल जग, गुरु-पद-पंकज-रेनु ॥ १ ॥
जलधि-पार मानस अगम, रावन-पालित लंक ।
. सोच विकल कपि भालु सब, दुहुँ दिसि संकट संक ॥ २ ॥
जामवंत हनुमंत बलु, कहा पचारि पचारि ।
राम सुमिरि साहसु करिय, मानिय हिये न हारि ॥ ३ ॥
रामकाज लागि जनमु जग, सुनि हरषे हनुमान ।
होइ पुत्र फलु सगुन सुभ, राम भगतु बलवान ॥ ४ ॥
कहत उछाहु बड़ाइ कपि, साथी सकल प्रबोधि ।
लागत रामप्रसाद मोहिं, गोपद सरिस पयोधि ॥ ५ ॥
राखि तोषि सवु साथ सुभ, सगुन सुमंगल पाइ ॥
कूदि कुधर चढ़ि आनि उर, सीय सहित दोउ भाइ ॥ ६ ॥
हरषि सुमन बरषत बिबुध, सगुन सुमंगल होत ।
तुलसी प्रभु लंघेउ जलधि, प्रभुप्रताप करि पोत ॥ ७ ॥

सप्तक—२

राहुमातु माया-मलिन, मारी मारुतपूत ।
समय सगुन मारग मिलहिं, छल मलीन खल धूत ॥ १ ॥
पूजा पाइ मिनाक पहिं, सुरसा कपि संबादु ।
मारग अगम सहाय सुभ, होइहि रामप्रसादु ॥ २ ॥

लंका लोलुप लंकिनी, काली काल कराल ।
 काल करालहि दीन्ह बलि, कालरूप कपिकाल ॥ ३ ॥
 मसकरूप दसकंधपुर, निसि कपि घर घर देषि ।
 सीय बिलोकि असोक तर, हरष विषाद बिसेषि ॥ ४ ॥
 फरकत मंगल अंग सिय, बाम बिलोचन बाहु ।
 त्रिजटा सुनि कह सगुन फल, प्रिय सँदेस बड़ लाहु ॥ ५ ॥
 सगुन समुझि त्रिजटा कहति, सुनु, सिय ! अबहीं आजु ।
 मिलिहि रामसेवक कहिहि, कुसल लपनु रघुराजु ॥ ६ ॥
 तुलसी प्रभु गुनगन बरनि, आपनि बात जनाइ ।
 कुसल खेम सुग्रीवपुर, राम लपनु दोउ भाइ ॥ ७ ॥

सप्तक—३

सुरुष जानकी जानि कपि, कहै सकल संकेत ।
 दीन्ह मुद्रिका, लीन्ह सिय, प्रीति प्रतीति समेत ॥ १ ॥
 पाइ नाथ कर मुद्रिका, सियहिय हरष विषादु ।
 प्राननाथ प्रिय सेवकहि, दीन्ह सुआसिरबाहु ॥ २ ॥
 नाथ-सपथ पन रोपि कपि, कहत चरन सिरु नाइ ।
 नहिं बिलंब, जगदंब ! अब, आइ गये दोउ भाइ ॥ ३ ॥
 समाचार कहि सुनत प्रभु, सानुज सहित सहाय ।
 आए अब रघुवंसमनि, सोचु परिहरिय माय ॥ ४ ॥
 गए सोच संकट सकल, भए सुदिन जिय जानु ।
 कौतुक सागर सेतु करि, आये कृपानिधानु ॥ ५ ॥
 सकुल सदल जमराजपुर, चलन चहत दसकंधु ।
 काल न देखत कालबस, बीस-बिलोचन-अंशु ॥ ६ ॥
 आसिष आयसु पाइ कपि, सीयचरनु सिर नाइ ।
 तुलसी रावन-बाग-फल, खात बराइ बराइ ॥ ७ ॥

सप्तक—४

सूर-सिरोमनि साहसी, सुमति समीरकुमार ।
 सुमिरत सब सुख संपदा, मुद-मंगल-दातार ॥ १ ॥
 सत्रुसमन पद-पंकरुह, सुमिरि करहु सब काज ।
 कुसल खेम कल्यान सुभ, सगुन सुमंगल साज ॥ २ ॥
 भरत भलाई की अवधि, सील सनेह निधान ।
 धरम भगति भायप समय, सगुन कहब कल्यान ॥ ३ ॥
 सेवकपाल कृपालचित, रविकुल-कैरवचंद ।
 सुमिरि करहु सब काज सुभ, पग पग परमानंद ॥ ४ ॥
 सियपद सुमिरि सुतीय हित, सगुन सुमंगल जान ।
 स्वामि सोहागिल, भाग बड़, पुत्रकाजु कल्यान ॥ ५ ॥
 लछिमन पदपंकज सुमिरि, सगुन सुमंगल पाइ ।
 जय विभूति कीरति कुसल, अभिमत लाभु अघाइ ॥ ६ ॥
 तुलसी कानन कमलवन, सकल सुमंगल बास ।
 राम-भगति-हित सगुन सुभ, सुमिरत तुलसीदास ॥ ७ ॥

सप्तक—५

रूख निपातत, खात फल, रत्नक अन्न निपाति ।
 कालरूप विकराल कपि, सभय निसाचर जाति ॥ १ ॥
 बन उजारि जारेउ नगर, कूदि कूदि कपिनाथ ।
 हाहाकार पुकार सब, आरत मारत माथ ॥ २ ॥
 पूँछ बुताइ प्रबोधि सिय, आइ गहे प्रभु पाय ।
 खेम कुसल जय जानकी, जय जय जय रघुराय ॥ ३ ॥
 सुनि प्रमुदित रघुवंसमनि, सानुज सेन समेत ।
 चले सकल मंगल सगुन, बिजय सिद्धि कहि देत ॥ ४ ॥

रामपयान निसान नभ, बाजहिं गाजहिं बीर ।
 सगुन सुमंगल समर जय, कीरति कुसल सरीर ॥ ५ ॥
 कृपासिंधु प्रभु सिंधु सन, माँगेउ पंथु न देत ।
 बिनय न मानहिं जीव जड़, डाटे नवहिं अचेत ॥ ६ ॥
 लाभु लाभु लोवा कहत, छेमकरी कह छेम ।
 चलत विभीषन सगुन सुनि, तुलसी पुलकत पेम ॥ ७ ॥

सप्तक—६

पाहि पाहि असरन-सरन, प्रनतपाल रघुराज ।
 दियो तिलक लंकेसु कहि, राम गरीबनेवाज ॥ १ ॥
 लंक असुभ चरचा चलति, हाट, बाट, घर, घाट ।
 रावन सहित समाज अब, जाइहि बारह बाट ॥ २ ॥
 ऊकपात, दिक्कदाह दिन, फेकरहिं खान सियार ।
 उदित केतु, गतहेतु महि, कंपति बारहिं बार ॥ ३ ॥
 रामकृपा कपि भालु करि, कौतुक सागर सेतु ।
 चले पार वरपत विबुध, सुमन सुमंगल हेतु ॥ ४ ॥
 नीच निसाचर मीचु-बस, चले साजि चतुरंग ।
 प्रभु-प्रताप-पावक प्रबल, उड़ि उड़ि परत पतंग ॥ ५ ॥
 साजि साजि बाहन चलहिं, जातुधानु बलवानु ।
 असगुन असुभ न गनहिं गत, आइ कालु नियरानु ॥ ६ ॥
 लरत भालु कपि सुभट सब, निदरि निसाचर घोर ।
 सिर पर समरथ राम सो, साहिब, तुलसी तोर ॥ ७ ॥

सप्तक—७

मेघनादु, अतिकाय भट, परे महोदर खेत ।
 रावन भाइ जगाइ तब, कहा प्रसंगु अचेत ॥ १ ॥

उठि बिसाल बिकराल बड़, कुंभकरनु जमुहान ।
 लखि सुदेस कपि भालु दल, जनु दुकाल समुहान ॥ २ ॥
 राम स्याम बारिद सघन, वसन सुदामिनि माल ।
 वरषत सर हरषत बिबुध, दला दुकालु दयाल ॥ ३ ॥
 राम रावनहि परसपर, होति रारि रन घोर ।
 लरत पचारि पचारि भट, समर सोर दुहुँ ओर ॥ ४ ॥
 बीस बाहु, दस सीस दलि, खंडखंड तनु कीन्ह ।
 सुभट सिरोमनि लंकपति, पाछे पाउ न दीन्ह ॥ ५ ॥
 बिबुध बजावत दुंदुभी, हरषत वरषत फूल ।
 राम विराजत जीति रन, सुर सेवक अनुकूल ॥ ६ ॥
 लंका थापि बिभीषनहिं, बिबुध वसाइ सुबास ।
 तुलसी जय मंगल कुसल, सुभ पंचम उनचास ॥ ७ ॥

षष्ठ सर्ग

सप्तक—१

रघुवर-आयसु अमरपति, अमिय सींचि कपि भालु ।
सकल जिआये सगुन सुभ, सुमिरहु राम कृपालु ॥ १ ॥
सादर आनी जानकी, हनूमान प्रभु पास ।
प्रीति परस्पर समउ सुभ, सगुन सुमंगल बास ॥ २ ॥
सीता-सपथ प्रसंग सुभ, सीतल भयउ कृसानु ।
नेम प्रेम व्रत धरम हित, सगुन सुहावनु जानु ॥ ३ ॥
सनमाने कपि भालु सब, सादर साजि बिमानु ।
सीय सहित, सानुज, सदल, चले भानुकुल-भानु ॥ ४ ॥
हरषत सुर, वरषत सुमन, सगुन सुमंगल गान ।
अवधनाथु गवने अवध, खेम कुसल कल्याण ॥ ५ ॥
सिंधु, सरोवर, सरित, गिरि, कानन, भूमिविभाग ।
राम दिखावत जानकिहि, उमगि उमगि अनुराग ॥ ६ ॥
तुलसी मंगल सगुन सुभ, कहत जोरि जुग हाथ ।
हंस-वंस-अवतंस जय, जय जय जानकिनाथ ॥ ७ ॥

सप्तक—२

अवध अनंदित लोग सब, व्योम बिलोकि बिमानु ।
मनहुँ कोकनद कोक मन, मुदित उदित लखि भानु ॥ १ ॥
मिले गुरुहि, जन, परिजनहिं, भेंटत भरत सप्रीति ।
लषणु राम सिय कुसल पुर, आए रिपु रन जीति ॥ २ ॥

उदबस अवध अनाथ सब, अंबदसा दुख देखि ।
 राम लषणु सीता सकल, विकल विषाद बिसेखि ॥ ३ ॥
 मिलीं मातु, हित, मीत, गुरु, सनमाने सब लोग ।
 सगुन समय बिसमय हरष, प्रिय संयोग वियोग ॥ ४ ॥
 अमर अनंदित, मुनि मुदित, मुदित भुवन दसचारि ।
 घर घर अवध बधावने, मुदित नगर-नर-नारि ॥ ५ ॥
 सुदिन सोधि गुरु बेदविधि, कियो राज-अभिषेक ।
 सगुन सुमंगल सिद्धि सब, दायक दोहा एक ॥ ६ ॥
 भाँति भाँति उपहार लेइ, मिलत जुहारत भूप ।
 पहिराए सनमानि सब, तुलसी सगुन अनूप ॥ ७ ॥

 सप्तक-३

जयधुनि गान निसान सुर, वरषत सुरतरु फूल ।
 भये रामु राजा अवध, सगुन सुमंगल मूल ॥ १ ॥
 भालु, बिभीषन कीसपति, पूजे सहित समाज ।
 भली भाँति सनमानि सब, बिदा किये रघुराज ॥ २ ॥
 रामराज संतोष सुख, घर, बन सकल सुपास ।
 तरु सुरतरु, सुरधेनु महि, अभिमत भोग बिलास ॥ ३ ॥
 रामराज सब काज कहँ, नीक एक ही आँक ।
 सकल सगुन मंगल कुसल, होइहि बारु न बाँक ॥ ४ ॥
 कुंभकरन रावन सरिस, मेघनाद से वीर ।
 ढहे समूल बिसाल तरु, कालनदी के तीर ॥ ५ ॥
 सकुल सदल रावन सरिस, कत्रलित काल कराल ।
 सोच पोच असगुन असुभ, जाय जीव जंजाल ॥ ६ ॥
 अविचल राज बिभीषनहिं, दीन्ह राज रघुराज ।
 अजहुँ बिराजत लंक पर, तुलसी सहित समाज ॥ ७ ॥

सप्तक-४

मंजुल मंगल मोदमय, मूरति मारुतपूत ।
 सकल सिद्धि कर-कमल-तल, सुमिरत रघुवर-दूत ॥ १ ॥
 सगुन समय सुमिरत सुखद, भरत-आचरनु चारु ।
 स्वामिधरम व्रत पेम हित, नेम निवाह निहारु ॥ २ ॥
 ललित लपन-लघु-बंधु पद, सुखद सगुन सब काहु ।
 सुमिरत सुभ कीरति विजय, भूमि ग्राम गृह लाहु ॥ ३ ॥
 रामचंद्र-मुख-चंद्रमा, चित चकोर जव होइ ।
 रामराज सब काज सुभ, समउ सुहावन सोइ ॥ ४ ॥
 भूमिनंदिनी-पद-पटुम, सुमिरत सुभ सब काज ।
 वरषा भलि, खेती सुफल, प्रमुदित प्रजा सुराज ॥ ५ ॥
 सेवक, सखा, सुबंधु हित, नाइ लपनुपद माथु ।
 कीजिय प्रीति प्रतीति सुभ, सगुन सुमंगल साथु ॥ ६ ॥
 रामनाम रति नाम गति, राम नाम विस्वास ।
 सुमिरत सुभ मंगल कुसल, तुलसी तुलसीदास ॥ ७ ॥

सप्तक-५

बिप्र एक बालक मृतक, राखेउ रामदुआर ।
 दंपति बिलपत सोक अति, आरत करत पुकार ॥ १ ॥
 राम सोच संकोच सब, सचिव बिकल संताप ।
 बालक-मीचु अकाल भइ, रामराज केहि पाप ॥ २ ॥
 विबुध विमल बानी गगन, हेतु प्रजा अपचारु ।
 रामराज परिनाम भल, कीजिय बेगि बिचारु ॥ ३ ॥
 कोसलपाल कृपालु चित, बालक दीन्ह जिआइ ।
 सगुन कुसल कल्याण सुभ, रोगी उठै नहाइ ॥ ४ ॥

बालकु जिया बिलोकि सब, कहत उठा जनु सोइ ।
 सोच-विमोचन सगुन सुभ, रामकृपा भल होइ ॥ ५ ॥
 सिला सुतिय भइ, गिरि तरे, मृतक जिये जग जान ।
 राम-अनुग्रह सगुन सुभ, सुलभ सकल कल्याण ॥ ६ ॥
 केवट निसिचर विहँग मृग, किये साधु सनमानि ।
 तुलसी रघुबर की कृपा, सगुन सुमंगलखानि ॥ ७ ॥

सप्तक—६

रामराज राजत सकल, धरम-निरत नरनारि ।
 राग न रोष न दोष दुख, सुलभ पदारथ चारि ॥ १ ॥
 बग उलूक भगरत गये, अवध जहाँ रघुराउ ।
 नीक सगुन, बिबरिहि भगर, होइहि धरम निआउ ॥ २ ॥
 जती-खान संबाद सुनि, सगुन कहब जिय जानि ।
 हंस-बंस-अवतंस-पुर, बिलग होत पय पानि ॥ ३ ॥
 राम कुचरचा करहि सब, सीतहि लाइ कलंक ।
 सदा अभागी लोग जग, कहत सकोचु न संक ॥ ४ ॥
 सती-सिरोमनि सीय तजि, राखि लोगरुचि राम ।
 सहे दुसह दुख सगुन गत, प्रियबियोगु परिनाम ॥ ५ ॥
 वरन-धरम आस्रम-धरम, निरत सुखी सब लोग ।
 रामराज मंगल सगुन, सुफल जाग जप जोग ॥ ६ ॥
 बाजिमेध अगनित किए, दिए दान बहु भाँति ।
 तुलसी राजा राम जग, सगुन सुमंगल पाँति ॥ ७ ॥

सप्तक—७

असमंजसु बड़ सगुन गत, सीता-राम-वियोग ।
 गवन बिदेस, कलेस कलि, हानि, पराभव, रोग ॥ १ ॥

मानिय सिय अपराध बिनु, प्रभु परिहरि पछतात ।
 रुचै समाज न राजसुख, मन मलीन, कृस गात ॥ २ ॥
 पुत्र-लाभ, लव-कुस-जनम, सगुन सुहावन होइ ।
 समाचार मंगल कुसल, सुखद सुनावइ कोइ ॥ ३ ॥
 रामसभा लव-कुस ललित, किए राम-गुन-गान ।
 राज-समागम सगुन सुभ, सुजस लाभ सनमान ॥ ४ ॥
 बालमीकि लव-कुस सहित, आनी सिय सुनि राम ।
 हृदय हरषु जानव प्रथम, सगुन सोक परिनाम ॥ ५ ॥
 अन्तरथ असगुन अति असुभ, सीता-अवनि-प्रवेसु ।
 समय सोक, संताप, भय, कलह, कलंक कलेसु ॥ ६ ॥
 सुभग सगुन उनचास रस, रामचरितमय चारु ।
 राम-भगत हित सफल सब, तुलसी विमल विचार ॥ ७ ॥

सप्तम सर्ग

सप्तक—१

राम लषनु सानुज भरत, सुमिरत सुभ सब काज ।
साहित प्रीति प्रतीति हित, सगुन सकल सुभ काज ॥ १ ॥
सुख-मुद-मंगल-कुमुद-विधु, सगुन-सरोरुह-भानु ।
करहु काज सब सिद्धि सुभ, आनि हिये हनुमान ॥ २ ॥
राजकाज, मनि, हेम, हय, रामरूप रविवार ।
कहव नीक जयलाभ सुभ, सगुन समय अनुहार ॥ ३ ॥
रस गोरस खेती सकल, विप्र-काज सुभ साज ।
राम-अनुग्रह सोमदिन, प्रमुदित प्रजा सुराज ॥ ४ ॥
मंगल मंगल भूमिहित, नृपहित जय संग्राम ।
सगुन विचारब समय सम, करि गुरुचरन प्रनाम ॥ ५ ॥
विपुल बनिज, विद्या, वसन, बुध बिसेषि गृहकाजु ।
सगुन सुमंगल कहव सुभ, सुमिरि सीय रघुराजु ॥ ६ ॥
गुरुप्रसाद मंगल सकल, रामराज सब काज ।
जज्ञ, विवाह-उद्धाह, व्रत, सुभ तुलसी सब साज ॥ ७ ॥

सप्तक—२

सुक सुमंगल काज सब, कहव सगुन सुभ देखि ।
जंत्र मंत्र मनि औषधी, सहसा सिद्धि बिसेषि ॥ १ ॥
रामकृपा थिर काज सुभ, सनि-बासर विस्त्राम ।
लोह, महिष, गज, बनिज भल, सुख सुपास गृह ग्राम ॥ २ ॥
राहु केतु उलटे चलहि, असुभ अमंगल मूल ।
रुंड मुंड पाषंड-प्रिय, असुर अमर प्रतिकूल ॥ ३ ॥

समउ राहु रवि-गहनु-मत, राजहिं प्रजहिं कलेंस ।
 सगुन सोच संकट विकट, कलह कलुष दुख देस ॥ ४ ॥
 राहु सोम संगमु विषमु, असगुन उदधि अगाधु ।
 ईति भीति खल दल प्रबल, सीदहिं भूसुर साधु ॥ ५ ॥
 सात पाँच ग्रह एक थल; चलहिं बाम गति धाम ।
 राज बिराजिय समउ-गत, सुभहित सुमिरहु राम ॥ ६ ॥
 खेती वनि विद्या वनिज, सेवा सिलिप सुकाज ।
 तुलसी सुरतरु सरिस सब, सुफल राम के राज ॥ ७ ॥

सप्तक—३

सुधा, साधु, सुरतरु, सुमन, सुफल सुहावनि बात ।
 तुलसी सीतापति-भगति, सगुन सुमंगल सात ॥ १ ॥
 सिद्ध सभागम संपदा, सदन सरीर सुपास ।
 सीतानाथ-प्रसाद सुभ, सगुन सुमंगल बास ॥ २ ॥
 कौसल्या कल्यानमय, मूरति करत प्रनामु ।
 सगुन सुमंगल काज सुभ, कृपा करहिं सियरासु ॥ ३ ॥
 सुमिरि सुमित्रा नाम जग, जे तिय लेहिँ सुनेम ।
 सुवन लखन रिपुदवनु से, पावहिँ पति-पद-प्रेम ॥ ४ ॥
 दसरथ नाम सुकामतरु, फलइ सकल कल्यान ।
 धरनि धाम धन धरम सुख, सुत गुन रूप-निधान ॥ ५ ॥
 कलह कपट कलि कैकई, सुमिरत काज नसाइ ।
 हानि मीचु दारिद दुरित, असगुन असुभ अघाइ ॥ ६ ॥
 राम बाम दिसि जानकी, लषनु दाहिनी ओर ।
 ध्यान सकल कल्यानमय, सुरतरु तुलसी तोर ॥ ७ ॥

सप्तक-४

मध्यम दिन, मध्यम दसा, मध्यम सकल समाज ।
 नाइ माथ रघुनाथपद, जानब मध्यम काज ॥ १ ॥
 हित पर बढ़इ बिरोधु जब, अनहित पर अनुराग ।
 रामबिमुख बिधि बामगत, सगुन अचाइ अभाग ॥ २ ॥
 कृपनु देइ, पाइय परो, विन साधन सिधि होइ ।
 सीतापति सनमुख समुझि, जो कीजिय सुभ सोइ ॥ ३ ॥
 पहिले हित परिनामगत, बीच बीच भल पोच ।
 सगुन कहव अस रामगति, कहवि समेत सकोच ॥ ४ ॥
 रमा रमापति गौरि हरु, सीताराम सनेहु ।
 दंपति-हित, संपति सकल, सगुन सुमंगल गेहु ॥ ५ ॥
 प्रीति प्रतीति न रामपद, बड़ी आस, बड़ लोभ ।
 नहिं सपनेहुँ संतोष सुख, जहाँ तहाँ मन छोभ ॥ ६ ॥
 पय नहाइ, फल खाइ, जपु, रामनाम षट मास ।
 सगुन सुमंगल सिद्धि सब, करतल तुलसीदास ॥ ७ ॥

सप्तक-५

बड़ कलेस कारज अलप, बड़ी आस, लहु लाहु ।
 उदासीन सीतारामन, समय सरिस निरबाहु ॥ १ ॥
 दस दिसि दुख दारिद दुरित, दुसह दसा दिन दोष ।
 फेरे लोचन राम अब, सनमुख साज सरोष ॥ २ ॥
 खेती बनिज न, भीख भलि, अफल उपायकदंब ।
 कुसमय जानब, बाम बिधि, रामनाम अवलंब ॥ ३ ॥
 पुरुषारथ स्वारथ सकल, परमारथ परिनाम ।
 सुलभ सिद्धि सब सगुन सुभ, सुमिरत सीताराम ॥ ४ ॥

भागु भाग तजि भालथलु, आलस ग्रसे उपाउ ।
 असुभ असंगल सगुन सुनि, सरन राम के आउ ॥ ५ ॥
 गइ वरपा करषक विकल, सूखत सालि सुनाज ।
 कुसमउ कुसगुन कलहं कलि, प्रजहि कलेसु कुराज ॥ ६ ॥
 तुलसी तुलसी राम सिय, सुमिरहु लपन समेत ।
 दिन दिन उदउ अनंद अब, सगुन सुमंगल देत ॥ ७ ॥

सप्तक-६


उदबस अवध नरेस विनु, देस दुखी नर नारि ।
 राजभंग कुसमाज बड़, गत ग्रह-चालि विचारि ॥ १ ॥
 अवध-प्रवेस अनंदु बड़, सगुन सुमंगल माल ।
 राम-तिलक-अवसर कहव, सुख संतोष सुकाल ॥ २ ॥
 राम-राज-बाधक विबुध, कहव सगुन सति भाउ ।
 देखि देवकृत दोष दुख, कीजिय उचित उपाउ ॥ ३ ॥
 मंद मंथरा मोहवस, कुटिल कैकई कीन्ह ।
 ब्याधि विपति सब देवकृत, समय सगुन कहि दीन्ह ॥ ४ ॥
 रामबिरह दसरथ दुखित, कहति कैकई काकु ।
 कुसमय जाय उपाय सब, केवल करमबिपाकु ॥ ५ ॥
 लखन राम सिय बसत बन, बिरह-विकल पुरलोग ।
 समय सगुन कह करमवस, दुख सुख जोग बियोग ॥ ६ ॥
 तुलसी लाइ रसाल तरु, निज कर सींचति सीय ।
 कृषी सफल भल सगुन सुभ, समउ कहव कमनीय ॥ ७ ॥

सप्तक-७

सुदिन साँझ पोथी नेवति, पूजि प्रभात सप्रेम ।
 सगुन बिचारब चारुमति, सादर सत्य सनेम ॥ १ ॥

मुनि गनि, दिन गनि, धातु गनि, दोहा देखि विचारि ।
 देस, करम, करता, बचन, सगुन समय अनुहारि ॥ २ ॥
 सगुन सत्य ससि नयन गुन, अवधि अधिक नयवान ।
 होइ सुफल सुभ जासु जसु, प्रीति प्रतीति प्रमान ॥ ३ ॥
 गुरु गनेस हरु गौरि सिय, राम लषनु हनुमानु ॥
 तुलसी सादर सुमिरि सब, सगुन विचार विधानु ॥ ४ ॥
 हनुमान सानुज भरत, राम सीय डर आनि ।
 लषन सुमिरि तुलसी कहत, सगुन विचारु बखानि ॥ ५ ॥
 जो जेहि काजहि अनुहरइ, सो दोहा जब होइ ।
 सगुन समय सब सत्य सब, कहव रामगति गोइ ॥ ६ ॥
 गुन विस्वास, विचित्र मनि, सगुन मनोहर हारु ।
 तुलसी रघुवर-भगत-डर, बिलसत विमल विचारु ॥ ७ ॥

दोहावली



दोहावली

—:❀:—

दोहा

राम वाम दिसि जानकी लषन दाहिनी ओर ।
ध्यान सकल कल्याणमय सुरतरु तुलसी तोर ॥ १ ॥
सीता लषनु समेत प्रभु, सोहत तुलसीदास ।
हरषत सुर, वरषत सुमन सगुन सुमंगलवास ॥ २ ॥
पंचवटी बटवटप-तरु सीता-लषन-समेत ।
सोहत तुलसीदास प्रभु सकल सुमंगल देत ॥ ३ ॥
चित्रकूट सब दिन बसत, प्रभु सिय-लषन-समेत ।
रामनाम-जप जापकहि तुलसी अभिमत देत ॥ ४ ॥
पय अहार फल खाइ जपु रामनाम षट मास ।
सकल सुमंगल सिद्धि सब करतल तुलसीदास ॥ ५ ॥
रामनाम-मनि-दीप धरु जीह-देहरी-द्वार ।
तुलसी भीतर बाहिरौ जौ चाहसि उजियार ॥ ६ ॥
हिय निर्गुन नयनन्हि सगुन रसना राम सुनाम ।
मनहुँ पुरट-संपुट लसत, तुलसी ललित ललाम ॥ ७ ॥
सगुन ध्यान रुचि सरस नहिं, निर्गुन मन ते दूरि ।
तुलसी सुमिरहु राम को नाम सजीवन-मूरि ॥ ८ ॥
एक छत्र, इक मुकुटमनि, सब बरनन पर जोउ ।
तुलसी रघुबर-नाम के बरन बिराजत दोउ ॥ ९ ॥
रामनाम को अंक है सब साधन है सूत ।

अंक गये कछु हाथ नहिँ अंक रहे दसगून ॥ १० ॥
 नाम राम को कलपतरु कलि कल्यान-निवास ।
 जो सुमिरत भयो भाग तेँ तुलसी तुलसीदास ॥ ११ ॥
 रामनाम जपि जीह जन भए सुकृत सुखसालि ।
 तुलसी इहाँ जो आलसी गयो आजु की कालि ॥ १२ ॥
 नाम गरीबनिवाज को राज देत जन जानि ।
 तुलसी मन परिहरत नहिँ घुरबिनिआ की वानि ॥ १३ ॥
 कासी बिधि बसि तनु तजै हठि तन तजै प्रयाग ।
 तुलसी जो फल सो सुलभ रामनाम-अनुराग ॥ १४ ॥
 मीठो अरु कठवति भरो रौताई अरु खेम ।
 स्वारथ परमारथ सुलभ रामनाम के प्रेम ॥ १५ ॥
 रामनाम सुमिरत सुजस भाजन भए कुजाति ।
 कुतरुक सुरपुर-राजमग लहत भुवन-बिख्याति ॥ १६ ॥
 स्वारथ सुख सपनेहुँ अगम परमारथ न प्रवेस ।
 रामनाम सुमिरत मिटहि तुलसी कठिन कलेस ॥ १७ ॥
 'मोर मोर' सब कहँ कहसि तू को ? कहु निज नाम ।
 कै चुप साधहि सुनि समुझि कै तुलसी जपु राम ॥ १८ ॥
 हम लखि लखहि हमार, लखि हम हमार के बीच ।
 तुलसी अलखहि का लखहि ? रामनाम जपु नीच ॥ १९ ॥
 रामनाम-अवलंब बिनु परमारथ की आस ।
 वरषत बारिद-बूँद गहि चाहत चढ़न अकास ॥ २० ॥
 तुलसी हठि हठि कहत नित चित सुनि हित करि मानि ।
 लाभ राम सुमिरत बड़ो बड़ी बिसारे हानि ॥ २१ ॥
 बिगरी जनम अनेक की सुधरै अबहीं आजु ।
 होहि राम को, नाम जपु तुलसी तजि कुसमाजु ॥ २२ ॥

प्रीति प्रतीति सुरीति सों रामनाम जपु राम ।
 तुलसी तेरो है भलो आदि मध्य परिनाम ॥ २३ ॥
 दंपति-रस रसना, दसन परिजन, बदन सुगेह ।
 तुलसी हरहित बरन सिसु संपति सहज सनेह ॥ २४ ॥
 वरषाऋतु रघुपति-भगति तुलसी सालि सुवास ।
 रामनाम बर बरन जुग सावन भादौ मास ॥ २५ ॥
 रामनाम नर-केसरी कनककसिपु कलिकालु ।
 जापकजन पहाद जिमि पालहिं दलि सुरसाल ॥ २६ ॥
 रामनाम कलि कामतरु सकल सुमंगल कंद ।
 सुमिरत करतल सिद्धि सब पग पग परमानंद ॥ २७ ॥
 रामनाम कलि कामतरु रामभगति सुरधेनु ।
 सकल सुमंगल मूल जग गुरुपद-पंकज-रेनु ॥ २८ ॥
 जथा भूमि सब बीज मैं नखत-निवास अकास ।
 रामनाम सब धरम में जानत तुलसीदास ॥ २९ ॥
 सकल कामनाहीन जे रामभगति-रसलीन ।
 नामप्रेम-पीयूष-हृद तिनहुँ किए मन मीन ॥ ३० ॥
 ब्रह्मराम ते नाम बड़ बरदायक बरदानि ।
 रामचरित सतकोटि महुँ लिय महेस जिय जानि ॥ ३१ ॥
 सवरी गीध सुसेवकनि सुगति दीन्ह रघुनाथ ।
 नामु उधारे अमित खल बेद-विदित गुनगाथ ॥ ३२ ॥
 रामनाम पर राम तेँ प्रीति प्रतीति भरोस ।
 सो तुलसी सुमिरत सकल सगुन-सुमंगल-कोस ॥ ३३ ॥
 लंक विभीषन, राज कपि पति मारुति, खग मीच ।
 लही राम सों नामरति चाहत तुलसी नीच ॥ ३४ ॥
 हरन अमंगल अध अखिल करन सकल कल्यान ।

रामनाम नित कहत हर गावत वेद पुरान ॥ ३५ ॥
 तुलसी प्रीति प्रतीति सों रामनाम-जप-जाग ।
 किए होय बिधि दाहिने देइ अभागोहि भाग ॥ ३६ ॥
 जल थल नभ गति अमित अति, अग जग जीव अनेक ।
 तुलसी तोसे दीनकहँ रामनाम-गति एक ॥ ३७ ॥
 राम भरोसो, राम बल, रामनाम विस्वास ।
 सुमिरत सुभ मंगल कुसल माँगत तुलसीदास ॥ ३८ ॥
 रामनाम रति, राम गति, रामनाम विस्वास ।
 सुमिरत सुभ मंगल कुसल, दुहुँ दिसि तुलसीदास ॥ ३९ ॥
 रसना साँपनि, बदन बिल, जे न जपहिँ हरिनाम ।
 तुलसी प्रेम न राम सों ताहि बिधाता बाम ॥ ४० ॥
 हिय फाटहु, फूटहु नयन, जरउ सो तन केहि काम ।
 द्रवहिँ, स्रवहिँ, पुलकहिँ नहीँ तुलसी सुमिरत राम ॥ ४१ ॥
 रामहिँ सुमिरत, रन भिरत, देत, परत गुरु पाय ।
 तुलसी जिनहिँ न पुलक तनु ते जग जीवत जाय ॥ ४२ ॥

सोरठा

हृदय सो कुलिस समान जो न द्रवहि हरिगुन सुनत ।
 कर न रामगुन-गान जीह सो दादुरजीह सम ॥ ४३ ॥
 स्रवै न सलिल सनेह तुलसी सुनि रघुवीर-जस ।
 ते नयना जनि देहु, राम करहु बरु आँधरो ॥ ४४ ॥
 रहै न जल भरि पूरि, राम! सुजस सुनि रावरो ।
 तिन आँखिन में धूरि भरि भरि मूठी मेलिए ॥ ४५ ॥
 बारक सुमिरत तोहिँ होहिँ तिनहिँ सन्मुख सुखद ।
 क्यों न सँभारहि मोहिँ, दयासिंधु दसरथ के ? ॥ ४६ ॥
 साहिव होत सरोष सेवक को अपराध सुनि ।
 अपने देखे दोष सपनेहु राम न उर धरेउ ॥ ४७ ॥

दोहा

तुलसी रामहिं आपु तेँ सेवक की रुचि मीठि ।
 सीतापति से साहिबहि कैसे दीजै पीठि ॥ ४८ ॥
 तुलसी जाके होयगी अंतर बाहिर दीठि ।
 सो कि कृपालुहि देइगो केवटपालहि पीठि ? ॥ ४९ ॥
 प्रभु तरुतर, कपि डार पर, ते किए आपु समान ।
 तुलसी कहूँ न राम सों साहिब सीलनिधान ॥ ५० ॥
 रे मन ! सबसों निरस द्वै सरस राम सों हेहि ।
 अलौ सिखावन देत है निसि दिन तुलसी तोहि ॥ ५१ ॥
 हरो चरहिँ, तापहिँ बरत, फरे पसारहिँ हाथ ॥
 तुलसी स्वारथमीत सब, परमारथ रघुनाथ ॥ ५२ ॥
 स्वारथ सीताराम सों, परमारथ सियराम ।
 तुलसी तेरो दूसरे द्वार कहाँ कहु काम ॥ ५३ ॥
 स्वारथ परमारथ सकल सुलभ एक ही ओर ।
 द्वार दूसरे दीनता उचित न तुलसी तोर ॥ ५४ ॥
 तुलसी स्वारथ रामहित, परमारथ रघुबीर ।
 सेवक जाके लषन से पवनपूत रनधीर ॥ ५५ ॥
 ज्यों जग बैरी मीन को, आपु सहित, बिनु बारि ।
 त्यों तुलसी रघुबीर बिनु गति आपनी विचारि ॥ ५६ ॥
 रामप्रेम बिनु दूबरो, रामप्रेम ही पीन ।
 रघुबर कबहुँक करहुगे, तुलसी ज्यों जल मीन ॥ ५७ ॥
 राम सनेही, राम गति, रामचरन-रति जाहि ।
 तुलसी फल जग-जनम को दियो बिधाता ताहि ॥ ५८ ॥
 आपु आपने तेँ अधिक जेहि प्रिय सीताराम ।
 तेहिके पग की पानहीं तुलसी तनु को चाम ॥ ५९ ॥

स्वारथ-परमारथ-रहित सीताराम-सनेह ।
 तुलसी सो फल चारि को फल-हमार मत एह ॥ ६० ॥
 जे जन रूखे विषयरस, चिकने रामसनेह ।
 तुलसी ते प्रिय राम को, कानन बसहिं कि गेह ॥ ६१ ॥
 जथा लाभ संतोष सुख, रघुवर-चरन-सनेह ।
 तुलसी जौ मन खूँद सम कानन बसहु कि गेह ॥ ६२ ॥
 तुलसी जौपै राम सोँ, नाहिंन सहज सनेह ।
 मूँड़ मुड़यो बादि ही, भाँड़ भयो तजि गेह ॥ ६३ ॥
 तुलसी श्रीरघुवीर तजि करै भरोसो और ।
 सुख संपति की का चली नरकहु नाहीं ठौर ॥ ६४ ॥
 तुलसी परिहरि हरि हरहि पाँवर पूजहिं भूत ।
 अंत फजीहति होहिंगे गनिका के से पूत ॥ ६५ ॥
 सेए सीताराम नहिं, भजे न शंकर गौरि ।
 जनम गँवायो बादि ही परत पराई पौरि ॥ ६६ ॥
 तुलसी हरि अपमान तेँ होइ अकाज समाज ।
 राज करत रज मिलि गए सदल, सकुल कुरुराज ॥ ६७ ॥
 तुलसी रामहिं परिहरे निपट हानि सुनु ओम् ।
 सुरसरिगत सोई सलिल, सुरा सरिस गंगोम् ॥ ६८ ॥
 राम दूरि माया बढ़ति, घटति जानि मन माँह ।
 भूरि होति रवि दूरि लखि सिर पर पगतर छाँह ॥ ६९ ॥
 साहिब सीतानाथ सोँ जब घटिहै अनुराग ।
 तुलसी तबहीं भाल तेँ भभरि भागिहै भाग ॥ ७० ॥
 करिहौ कोसलनाथ तजि जबहि दूसरी आस ।
 जहाँ तहाँ दुख पाइहौ तब हीं तुलसीदास ॥ ७१ ॥

६२-खूँद = घोड़े की उछल कूद की चाल ।

६८-ओम् = ओम्ना । गंगोम् = गंगोदक, गंगाजल ।

बिंध न ई^३ धन पाइए, सायर जरै न नीर ।
 परै उपास कुबेरघर जो विपच्छ रघुवीर ॥ ७२ ॥
 बरषा को गोबर भयौ, को चहै, को करै प्रीति ?
 तुलसी तू अनुभवहि अब राम-विमुख की रीति ॥ ७३ ॥
 सबहि समरथहि सुखद प्रिय, अच्छम प्रिय हितकारि ।
 कबहुँ न काहुहि राम प्रिय तुलसी कहा विचारि ॥ ७४ ॥
 तुलसी उद्यम करम जुग जब जेहि राम सुडीठि ।
 होइ सुफल सोइ, ताहि सब सनमुख, प्रभु तन पीठि ! ॥ ७५ ॥
 प्रेम-कामतरु परिहरत, सेवत कलितरु ठूँठ ।
 खारथ परमारथ चहत, सकल मनोरथ भूँठ ॥ ७६ ॥
 निज दूषनु, गुन राम के समुझे तुलसीदास ।
 होय भलो कलिकाल हू उभय लोक अनयास ॥ ७७ ॥
 कै तोहिं लागहिं राम प्रिय, कै तू प्रभु प्रिय होहि ।
 दुई महँ रुचै जो सुगम सो कीबे तुलसी तोहि ॥ ७८ ॥
 तुलसी दुई महँ एक ही खेल, छाँड़ि छल, खेल ।
 कै करु ममता राम सों, कै ममता परहेलु ॥ ७९ ॥
 निगम अगम, साहेब सुगम, राम साँचिली चाह ।
 अंबु असन अवलोकियत सुलभ सबै जग माह ॥ ८० ॥
 सनमुख आवत पथिक ज्यों दिए दाहिनी बाम ।
 तैसोइ होत सु आपको, त्यों ही तुलसी राम ॥ ८१ ॥
 राम-प्रेम-पथ पेषिये दिये विषय तनु पीठि ।
 तुलसी केंचुरि परिहरे होत साँपहुँ डीठि ॥ ८२ ॥
 तुलसी जौलों विषय की, मुधा माधुरी मीठि ।
 तौलों मुधा सहस्र सम रामभगति सुठि सीठि ॥ ८३ ॥

७९-परहेलु = तिरस्कार कर ।

८३-मुधी = व्यर्थ । सीठि = सीठी, नीरस ।

जैसो तैसो रावरो केवल कोसलपाल ।
 तौ तुलसी को है भलो तिहूँ लोक तिहूँ काल ॥ ८४ ॥
 है तुलसी के एक गुन अवगुननिधि कहैं लोग ।
 भलो भरोसो रावरो राम रीझिबे जोग ॥ ८५ ॥
 प्रीति राम सों, नीतिपथ चलिय राग रिस जीति ।
 तुलसी संतन के मते इहै भगति की रीति ॥ ८६ ॥
 सत्य बचन, मानस विमल, कपटरहित करतूति ।
 तुलसी रघुबर सेवकहि, सकै न कलियुग धूति ॥ ८७ ॥
 तुलसी सुखी जो राम सों, दुखी सो निज करतूति ।
 करम बचन मन ठीक जेहि तेहि न सकै कलि धूति ॥ ८८ ॥
 नातो नाते राम के, रामसनेह सनेहु ।
 तुलसी माँगत जोरि कर जनम जनम सिव देहु ॥ ८९ ॥
 सब साधन को एक फल, जेहि जान्यो सोइ जान ।
 ज्यों ल्यों मन-मंदिर बसहिं राम धरे धनु बान ॥ ९० ॥
 जौ जगदीस तौ अति भलो, जौ महीस तौ भाग ।
 तुलसी चाहत जनम भरि रामचरन-अनुराग ॥ ९१ ॥
 परहुँ नरक, फलचारि-सिसु, मीच डाँकिनी खाउ ।
 तुलसी राम सनेह को, जो फल सो जरि जाउ ॥ ९२ ॥
 हित सों हित, रति राम सों, रिपु सों बैर बिहाउ ।
 उदासीन सब सों सरल, तुलसी सहज सुभाउ ॥ ९३ ॥
 तुलसी ममता राम सों, समता सब संसार ।
 राग न रोष न दोष दुख, दास भये भवपार ॥ ९४ ॥
 रामहिं डरु, करु राम सों ममता, प्रीति, प्रतीति ।
 तुलसी निरुपधि राम को भये हारेहु जीति ॥ ९५ ॥
 तुलसी राम कृपालु सों कहि सुनाउ गुन दोष ।

होय दूबरी दीनता, परम पीन संतोष ॥ ८६ ॥
 सुमिरन सेवा राम सों, साहब सों पहिचानि ।
 ऐसेहु लाभ न ललक जो तुलसी नित हित हानि ॥ ८७ ॥
 जाने जानन जोइये, विनु जाने को जान ? ।
 तुलसी यह सुनि समुझि हिय आनु धरे धनुवान ॥ ८८ ॥
 करमठ कठमलिया कहैं, ज्ञानी ज्ञानबिहीन ।
 तुलसी त्रिपथ विहाय गो रामदुआरे दीन ॥ ८९ ॥
 बाधक सब सब के भए, साधक भए न कोइ ।
 तुलसी राम कृपालु तैं भलो होइ सो होइ ॥ १०० ॥
 संकरप्रिय मम द्रोही, सिवद्रोही मम दास ।
 ते नर करहिं कलपभरि घोर नरक महँ वास ॥ १०१ ॥
 बिलग बिलग सुख संग दुख, जनम मरन सोइ रीति ।
 रहियत राखे राम के, गए ते उचित अनीति ॥ १०२ ॥
 जाय कहव करतूति विनु, जाय जोग विनु छेम ।
 तुलसी जाय उपाय सब विना रामपद-प्रेम ॥ १०३ ॥
 लोग भगन सब जोग ही, जोग जाय विनु छेम ।
 त्यों तुलसी के भावगनु रामप्रेम विनु नेम ॥ १०४ ॥
 राम निकाई रावरी है सब ही को नीक ।
 जो यह साँची है सदा तौ नीको तुलसीक ॥ १०५ ॥
 तुलसी राम जो आदर्यो खोटो खरो खरोइ ।
 दीपक काजर सिर धर्यो, धर्यो सु धर्यो धरोइ ॥ १०६ ॥
 तनु विचित्र, कायर बचन, अहि अहार, मन घोर ।
 तुलसी हरि भए पच्छधर, ताते कह सब मोर ॥ १०७ ॥
 लहै न फूटी कौड़िहू, को चाहै, केहि काज ?
 सो तुलसी महँगो कियो राम गरीबनिवाज ॥ १०८ ॥

घर घर माँगे दूक, पुनि भूपनि पूजे पाय ।
 जे तुलसी तब राम बिनु, ते अब राम सहाय ॥ १०६ ॥
 तुलसी राम सुदीठि तेँ निबल होत बलवान ।
 बैर बालि सुग्रीव के कहा कियो हनुमान ? ॥ ११० ॥
 तुलसी रामहु तेँ अधिक रामभक्त जिय जान ।
 अनिया राजा राम भे, धनिक भए हनुमान ॥ १११ ॥
 कियो सुसेवक-धरम कपि, प्रभु कृतज्ञ जिय जानि ।
 जोरि हाथ ठाढ़े भए वरदायक वरदानि ॥ ११२ ॥
 भगत-हेतु भगवान प्रभु राम धरेउ तनुभूप ।
 किए चरित पावन परम प्राकृत-नर-अनुरूप ॥ ११३ ॥
 ज्ञान-गिरा-गोतीत, अज, माया-गुन-गोपार ।
 सोइ सच्चिदानंदघन करत चरित्र उदार ॥ ११४ ॥
 हिरन्याक्ष भ्राता सहित, मधुकैटभ बलवान ।
 जेहि मारे सोइ अवतरे कृपासिंधु भगवान ॥ ११५ ॥
 सुद्ध सच्चिदानंदमय कंद भानु-कुलकेतु ।
 चरित करत नर अनुहरत संसृति-सागरसेतु ॥ ११६ ॥
 बाल-बिभूषन बसन वर, धूरि-धूसरित अंग ।
 बालकेलि रघुवर करत, बाल-बंधु सब संग ॥ ११७ ॥
 अनुदिन अवध बधावने, नित नव मंगल मोद ।
 मुदित मातु-पितु लोग लखि रघुवर बाल-बिनोद ॥ ११८ ॥
 राज-अजिर राजत रुचिर कोसलपालक-बाल ।
 जानु-पानि-चर चरित वर, सगुन-सुमंगल-माल ॥ ११९ ॥
 नाम ललित, लीला ललित, ललित रूप रघुनाथ ।
 ललित बसन, भूषन ललित, ललित अनुज सिसु साथ ॥ १२० ॥
 राम, भरत, लछिमन ललित, सत्रुसमन सुभनाम ।
 सुमिरत दसरथ-सुवन सब पूजहिँ सब मनकाम ॥ १२१ ॥

बालक कोसलपाल के सेवकपाल कृपाल ।
 तुलसी मन-मानस बसत मंगल मंजु मराल ॥ १२२ ॥
 भगत, भूमि, भूसुर, सुरभि, सुर हित लागि कृपाल ।
 करत चरित धरि मनुज-तनु, सुनत मिटहि जगजाल ॥ १२३ ॥
 निज इच्छा प्रभु अवतरइ सुर, महि, गो, द्विज, लागि ।
 सगुन-उपासक संग तहँ रहे मोक्ष सब त्यागि ॥ १२४ ॥
 परमानंद कृपायतन, मन परिपूरन-काम ।
 प्रेमभगति अनपायनी देहु हमहिं श्रीराम ॥ १२५ ॥
 बारि मथे घृत होइ बरु सिकता तेँ बरु तेल ।
 बिनु हरि-भजन न भव तरिय, यह सिद्धांत अपेल ॥ १२६ ॥
 हरिभाया-कृत दोष गुन बिनु हरिभजन न जाहिं ।
 भजिय राम सब काम तजि अस विचारि मन माहिं ॥ १२७ ॥
 जो चेतन कहँ जड़ करइ, जड़हि करइ चैतन्य ।
 अस समर्थ रघुनाथकहि भजहिं जीव ते धन्य ॥ १२८ ॥
 श्रीरघुवीर-प्रताप तेँ सिधु तरे पाषाण ।
 ते मतिमंद जे राम तजि भजहिं जाय प्रभु आन ॥ १२९ ॥
 लव निमेष परमान जुग, वरष कलप सर चंड ।
 भजहि न मन तेहि राम कहँ काल जासु कोदंड ॥ १३० ॥
 तब लागि कुसल न जीव कहँ, सपनेहुँ मन बिस्वाम ।
 जब लागि भजत न राम कहँ सोकधाम तजि काम ॥ १३१ ॥
 बिनु सतसंग न हरिकथा, तेहि बिनु मोह न भाग ।
 मोह गए बिनु रामपद होय न दृढ़ अनुराग ॥ १३२ ॥
 बिनु बिस्वास भगति नहिं, तेहि बिनु द्रवहिं न राम ।
 रामकृपा बिनु सपनेहुँ जीव न लह बिस्वाम ॥ १३३ ॥

सोरठा

अस विचारि मन धीर तजि कुतर्क संसंय सकल ।
 भजहु राम रघुबीर करुनाकर सुंदर सुखद ॥ १३४ ॥
 भाववस्य भगवान, सुखनिधान करुनाभवन ।
 तजि ममता, मद, मान, भजिय सदा सीतारमन ॥ १३५ ॥
 कहहि विमलमति संत, बेद पुरान विचारि अस ।
 द्रवै जानकीकंत, तब छूटै संसारदुख ॥ १३६ ॥
 विनु गुरु होइ कि ज्ञान, ज्ञान कि होइ विराग विनु ?
 गावहिं बेद पुरान, सुख कि लहिय हरिभगति विनु ? ॥ १३७ ॥

दोहा

रामचंद्र के भजन विनु जो चहै पद निर्वाण ।
 ज्ञानवंत अपि सोइ नर पसु विनु पूँछ विखान ॥ १३८ ॥
 जरउ सो संपति, सदन, सुख, सुहृद, मातु, पितु, भाइ ॥
 सनमुख होत जो रामपद करइ न सहज सहाइ ॥ १३९ ॥
 सेइ साधु गुरु, समुझि, सिखि, रामभगति थिरताइ ।
 लरिकार्ई को पैरिबो तुलसी बिसरि न जाइ ॥ १४० ॥
 सबै कहावत राम के, सबहि राम की आस ।
 राम कहैं जेहि आपनो, तेहि भजु तुलसीदास ॥ १४१ ॥
 जेहि सरीर रति राम सों सोइ आदरै सुजान ।
 रुद्रदेह तजि नेह-बस बानर भे हनुमान ॥ १४२ ॥
 जानि रामसेवा सरस, समुझि करब अनुमान ।
 पुरुखा ते सेवक भए, हर ते भे हनुमान ॥ १४३ ॥
 तुलसी रघुवर-सेवकहि खल डाटत मन माखि ।
 बाजराज के बालकहि लवा दिखावत आँखि ॥ १४४ ॥
 रावनरिपु के दास ते कायर करहिं कुचालि ।
 खर दूषन मारीच ज्यों, नीच जाहिंगे कालि ॥ १४५ ॥

पुन्य, पाप, जस, अजस, कै भावी भाजन भूरि ।
 संकट तुलसीदास को राम करहिंगे दूरि ॥ १४६ ॥
 खेलत बालक व्याल सँग, मेलत पावक हाथ ।
 तुलसी सिसु पितु-मातु ज्यों राखत सिय रघुनाथ ॥ १४७ ॥
 तुलसी दिन भल साहु कहँ, भली चोर कहँ राति ।
 निसि बासर ताकहँ भलो मानै राम-इताति ॥ १४८ ॥
 तुलसी जाने सुनि समुझि कृपासिंधु रघुराज ।
 मँहगे मनि कंचन किए, सौधे जग, जल नाज ॥ १४९ ॥
 सेवा, सील, सनेह, बस करि, परिहरि प्रिय लोग ।
 तुलसी ते सब राम सों सुखद सुजोग वियोग ॥ १५० ॥
 चारि चहत मानस अगम, चनक चारि को लाहु ।
 चारि परिहरे चारि को दानि चारि चख चाहु ॥ १५१ ॥
 सूधे मन, सूधे बचन, सूधी सब करतूति ।
 तुलसी सूधी सकल बिधि रघुबर-प्रेम-प्रसूति ॥ १५२ ॥
 वेष बिसद, बोलनि मधुर, मन कटु, करम मलीन ।
 तुलसी राम न पाइए भए विषय-जल-मीन ॥ १५३ ॥
 बचन-वेष तेँ जो बनै सो बिगरै परिनाम ।
 तुलसी मन तेँ जो बनै बनी बनाई राम ॥ १५४ ॥
 नीच मीचु लै जाइ जो राम-रजायसु पाइ ।
 तो तुलसी तेरो भलो, नतु अनभलो अघाइ ॥ १५५ ॥
 जातिहीन, अध-जनम महि, मुकुत कीनि असि नारि ।
 महामंद मन सुख चहसि ऐसे प्रभुहि बिसारि ? ॥ १५६ ॥
 बंधु-बधू-रत कहि कियो बचन निरुत्तर बालि ।
 तुलसी प्रभु सुग्रीव की चितइ न कछू कुचालि ॥ १५७ ॥

१४८—इताति = इताग्रत, अनुशासन, आज्ञा ।

१४९—सौधे = स्वर्ध, सस्ते ।

बालि बली बलसालि दलि सखा कीन्ह कपिराज ।

तुलसी राम कृपालु को विरद गरीबनिवाज ॥ १५८ ॥

कहा विभीषन लै मिलो, कहा विगार्यो बालि ?

तुलसी प्रभु सरनागतहि, सब दिन आए पालि ॥ १५९ ॥

तुलसी कोसलपाल सो, को सरनागत-पाल ?

भज्यो विभीषन बंधु-भय, भज्यो दारिद-काल ॥ १६० ॥

कुलिसहु चाहि कठोर अति, कोमल कुसुमहु चाहि ।

चित खगेस अस रामकर, समुझि परै कहु काहि ? ॥ १६१ ॥

बलकल भूषन, फल असन, तन सज्या, दुम प्रीति ।

तिन्ह समयन लंका दई, यह रघुवर की रीति ॥ १६२ ॥

जो संपति सिव रावनहिं दीन्हि दिए दस माथ ।

सोइ संपदा विभीषनहिं सकुचि दीन्हि रघुनाथ ॥ १६३ ॥

अविचल राज विभीषनहिं दीन्ह राम रघुराज ।

अजहुँ विराजत लंक पर तुलसी सहित समाज ॥ १६४ ॥

कहा विभीषन लै मिल्यो, कहा दियो रघुनाथ ।

तुलसी यह जाने बिना मूढ़ मीजिहैं हाथ ॥ १६५ ॥

बैरिवंधु निसिचर अधम, तज्यो न भरे कलंक ।

भूटे अघ सिय परिहरी तुलसी साइँ ससंक ॥ १६६ ॥

तेहि समाज कियो कठिन पन जेहि तौल्यो कैलास ।

तुलसी प्रभु-महिमा कहैं, सेवक को विस्वास ॥ १६७ ॥

सभा सभासद निरखि पट पकरि, उठायो हाथ ।

तुलसी कियो इगारहौँ बसनवेष जदुनाथ ॥ १६८ ॥

१६१—चाहि = अपेक्षा । उससे (बढ़कर) ।

१६८—इगारहौँ = दस अवतारों के अतिरिक्त ग्यारहवाँ वस्त्र का रूप ।

त्राहि तीन कह्यो द्रौपदी तुलसी राजसमाज ।
 प्रथम बड़े पट, विय विकल, चहत चकित निज काज ॥ १६६ ॥
 सुखजीवन सब कोउ चहत, सुखजीवन हरिहाथ ।
 तुलसी दाता माँगनेउ देखियत अबुध अनाथ ॥ १७० ॥
 कृपिन देइ, पाइय परो, बिनु साधे सिधि होइ ।
 सीतापति सनमुख समुझि जो कीजै सुभ सोइ ॥ १७१ ॥
 दंडकवन-पावन-करन चरन-सरोज प्रभाउ ।
 ऊसर जामहि, खल तरहि, होइ रंक ते राउ ॥ १७२ ॥
 विन ही ऋतु तरुवर फरत, सिला द्रवति जलजोर ।
 राम लषन सिय करि कृपा जब चितवत जेहि ओर ॥ १७३ ॥
 सिला सु तिय भइ, गिरि तरे, मृतक जिए जग जान ।
 राम-अनुग्रह सगुन सुभ, सुलभ सकल कल्याण ॥ १७४ ॥
 सिलासाप-भोचन चरन सुमिरहु तुलसीदास ।
 तजहु सोच, संकट मिटिहिं, पूजिहि मन की आस ॥ १७५ ॥
 मुए जिआए भालु कपि, अवध विप्र को पृत ।
 सुमिरहु तुलसी ताहि तू जाको मारुति दूत ॥ १७६ ॥
 काल करम गुन दोष जग जीव तिहारे हाथ ।
 तुलसी रघुवर रावरो, जान जानकीनाथ ॥ १७७ ॥
 रोगनिकर तनु, जरठपनु, तुलसी संग कुलोग ।
 रामकृपा लै पालिये, दीन पालिवे जोग ॥ १७८ ॥
 मो सम दीन न, दीनहित तुम समान रघुबीर ।
 अस विचारि, रघुवंसमनि, हरहु बिषम भवभीर ॥ १७९ ॥
 भवभुवंग तुलसी नकुल, डसत ज्ञान हरि लेत ।
 चित्रकूट इक औषधी, चितवत होत सचेत ॥ १८० ॥

हैहुँ कहावत, सब कहत, राम सहत उपहास ।
 साहब सीतानाथ से, सेवक तुलसीदास ॥ १८१ ॥
 रामराज राजत सकल धरम-निरत नर-नारि ।
 राग न रोष न दोष दुख, सुलभ पदारथ चारि ॥ १८२ ॥
 रामराज संतोष सुख, घर बन सकल सुपास ।
 तरु सुरतरु, सुरधेनु महि, अभिमत भोग विलास ॥ १८३ ॥
 खेती, बनि, विद्या, बनिज, सेवा, सिलिपि सुकाज ।
 तुलसी सुरतरु सरिस सब सुफल राम के राज ॥ १८४ ॥
 दंड जतिन कर, भेद जहँ नरतक नृत्य समाज ।
 जीतहु मनहिँ सुनिय अस, रामचंद्र के राज ॥ १८५ ॥
 कोपे सोच न पोच कर, करिय निहोरन काज ।
 तुलसी परमिति प्रीति की रीति राम के राज ॥ १८६ ॥
 मुकुर निरखि मुख रामभू, गनत गुनहिँ दै दोष ।
 तुलसी से सठ सेवकनि लखि जनि परहि सरोष ॥ १८७ ॥
 सहसनाम मुनि-भनित सुनि, तुलसी-वल्लभ नाम ।
 सकुचत हिय हँसि, निरखि सिय धरमधुरंधर राम ॥ १८८ ॥
 गौतम-तिय-गति सुरति करि नहिँ परसति पग पानि ।
 हिय हरषे रघुवंसमनि प्रीति अलौकिक जानि ॥ १८९ ॥
 तुलसी विलसत नखत निसि सरद-सुधाकर साथ ।
 मुकुता भालरि भलक जनु रामसुजस-सिसुहाथ ॥ १९० ॥
 रघुपति कीरति-कामिनी क्यों कहै तुलसी दास ?
 सरद-अकास प्रकास ससि चारु चिबुक-तिल जासु ॥ १९१ ॥
 प्रभु गुनगन भूषन बसन, बिसद विसेष सुदेस ।
 राम-सुकीरति-कामिनी, तुलसी करतब केस ॥ १९२ ॥
 रामचरित राकेसकर सरिस सुखद सब काहु ।
 सज्जन-कुमुद चकौर चित, हित विसेष बड़ लाहु ॥ १९३ ॥

रघुवरकीरति सज्जननि सीतल, खलनि सुताति ।
 ज्यों चकोर-चय चक्कवनि तुलसी चाँदनि राति ॥ १८४ ॥
 रामकथा मंदाकिनी, चित्रकूट चित चारु ।
 तुलसी सुभग सनेह बन, सिय-रघुवीर-विहार ॥ १८५ ॥
 खाम-सुरभि-पय विसद अति, गुनद करहिं तेहि पान ।
 गिरा ग्राम्य सियराम जस गावहिं सुनहिं सुजान ॥ १८६ ॥
 हरि-हर-जस सुर-नर-गिरहु, बरनहिं सुकवि-समाज ।
 हाँड़ी हाटक घटित चरु राँधे खाद सुनाज ॥ १८७ ॥
 तिल पर राखेउ सकल जग, विदित, विलोकत लोग ।
 तुलसी महिमा राम की कौन जानिवे जोग ? ॥ १८८ ॥

सोरठा

राम ! स्वरूप तुम्हार बचन अगोचर बुद्धिपर ।
 अविगत अकथ अपार, नेति नेंति नित निगम कह ॥ १८९ ॥

दोहा

मायाजीव, सुभाव, गुन, काल करम, महदादि ।
 ईस-अंक ते बढत सब ईस-अंक विनु बादि ॥ २०० ॥
 हित उदास रघुवर-विरह, विकल सकल नर-नारि ।
 भरत लषन-सियगति समुझि प्रभु-चख सदा सुवारि ॥ २०१ ॥
 सीय, सुमित्रासुवन-गति, भरत-सनेह सुभाउ ।
 कहिवे को सारद सरस, जनिवे को रघुराउ ॥ २०२ ॥
 जानी राम, न कहि सके भरत लषन सियप्रीति ।
 सो सुनि गुनि तुलसी कहत, हठ सठता की रीति ॥ २०३ ॥
 सब बिधि समरथ सकल कह, सहि साँसति दिन राति ।
 भलो निवाहेउ सुनि समुझि स्वामिधर्म सब भाँति ॥ २०४ ॥
 भरतहि होइ न राजमद, विधि-हरि-हर-पद पाइ ।
 कबहुँक काँजी सीकरनि छीरसिंधु बिनसाइ ॥ २०५ ॥

संपति चकई, भरत चक, मुनि आयसु खिलवार ।
 तेहि निसि आस्रम-पीजरा राखे भा भिनुसार ॥ २०६ ॥
 सधन चोर मग मुदित मन धनी गही ज्यों फेंट ।
 त्यों सुग्रीव विभीषनहिं भई भरत की भेंट ॥ २०७ ॥
 राम सराहे, भरत उठि मिले राम सम जानि ।
 तदपि विभीषन कीसपति, तुलसी, गरत गलानि ॥ २०८ ॥
 भरत स्यामतन रामसम, सब गुन रूप-निधान ।
 सेवक-सुखदायक सुलभ, सुमिरत सब कल्याण ॥ २०९ ॥
 ललित लषन मूरति मधुर सुमिरहु सहित सनेह ।
 सुख-संपति-कीरति-विजय-सगुन-सुमंगल-गेह ॥ २१० ॥
 नाम सत्रुसूदन सुभग, सुखमासील-निकेत ।
 सेवत सुमिरत सुलभ सुख, सकल सुमंगल देत ॥ २११ ॥
 कौसल्या कल्याणमयि मूरति करत प्रनाम ।
 सगुन सुमंगल काज सुभ, कृपा करहिं सियराम ॥ २१२ ॥
 सुमिरि सुमित्रानाम जग जे तिय लेहिं सनेम ।
 सुवन लषन रिपुदवन से, पावहिं पति-पद-प्रेम ॥ २१३ ॥
 सीता-चरन प्रनाम करि, सुमिरि सुनाम सनेम ।
 होहिं तीय पतिदेवता, प्राननाथ प्रिय प्रेम ॥ २१४ ॥
 तुलसी केवल कामतरु रामचरित-आराम ।
 कलितरु कपि निसिचर कहत, हमहिं किए विधि बाम ॥ २१५ ॥
 मातु सकल, सानुज भरत, गुरु पुरलोग सुभाउ ।
 देखत देख न कैकइहि लंकापति कपिराउ ॥ २१६ ॥
 सहज सरल रघुबर बचन, कुमति कुटिल करि जान ।
 चलै जोंक जल वक्रगति जद्यपि सलिल समान ॥ २१७ ॥
 दसरथ नाम सुकामतरु, फलइ सकल कल्याण ।
 धरनि, धाम, धन, धरमसुत, सदगुन रूपनिधान ॥ २१८ ॥

तुलसी जान्यो दसरथ हि 'धरमु न सत्य समान' ।
 राम तजे जेहि लागि, बिनु राम परिहरै प्रान ॥ २१६ ॥
 रामविरह दसरथ-मरन, मुनिमन अगम सु मीचु ।
 तुलसी मंगल-मरन-तरु, सुचि सनेह-जल सींचु ॥ २२० ॥

सोरठा

जीवन मरन सुनाम जैसे दसरथ राय को ।
 जियत खिलाये राम, रामविरह तनु परिहरेड ॥ २२१ ॥

दोहा

प्रभुहि बिलोकत गोदगत, सिय-हित घायल नीच ।
 तुलसी पाई गीधपति मुकुति मनोहर मीच ॥ २२२ ॥
 विरत, करमरत, भगत, मुनि, सिद्ध, ऊँच अरु नीचु ।
 तुलसी सकल सिहात मुनि गीधराज की मीचु ॥ २२३ ॥
 मुए, मरत, मरिहैं सकल घरी पहर के बीच ।
 लही न काहू आजु लौं गीधराज की मीच ॥ २२४ ॥
 मुये मुकुत, जीवत मुकुत, मुकुत मुकुतहूँ बीच ।
 तुलसी सबही ते' अधिक गीधराज की मीच ॥ २२५ ॥
 रघुवर विकल विहंग लखि, सो बिलोकि दोड बीर ।
 सिय-मुधि कहि, सियराम कहि देह तजी मतिधीर ॥ २२६ ॥
 दसरथ ते' दसगुन भगति सहित तासु कर काजु ।
 सोचत बंधु समेत प्रभु, कृपासिंधु रघुराजु ॥ २२७ ॥
 केवट निसिचर विहंग मृग किये साधु सनमानि ।
 तुलसी रघुवर की कृपा सकल सुमंगलखानि ॥ २२८ ॥
 मंजुल मंगल मोदमय मूरति मारुतपूत ।
 सकल सिद्धि कर-कमल-तल सुमिरत रघुवर-दूत ॥ २२९ ॥
 धीर, बीर, रघुबीर-प्रिय, सुमिरि समीरकुमार ।
 अगम सुगम सब काज करु, करतल सिद्धि बिचार ॥ २३० ॥

सुख-मुद-मंगल-कुमुद-विधु, सुगुन-सरोरुह-भानु ।
 करहु काज सब सिद्धि सुभ आनि हिये हनुमान ॥ २३१ ॥
 सकल काज सुभ समउ भल, सगुन सुमंगल जानु ।
 कीरति विजय विभूति भलि, हिय हनुमानहि आनु ॥ २३२ ॥
 सूर-सिरोमनि, साहसी, सुमति समीरकुमार ।
 सुमिरत सब सुख-संपदा-मुदमंगल-दातार ॥ २३३ ॥
 तुलसी-तनु सर, सुख-जलज, भुज-रुज गज बरजोर ।
 दलत दयानिधि देखिए कपि केसरीकिसोर ॥ २३४ ॥
 भुज-तरु-कोटर रोग-अहि बरबस कियो प्रवेस ।
 विहंगराज-बाहन तुरत काढ़िय, मिटइ कलेश ॥ २३५ ॥
 बाहु-बिटप सुख-विहंग-थलु लगी कुपीर कुआगि ।
 रामकृपा जल सींचिये, बेगि दीनहित लागि ॥ २३६ ॥

सोरठा

मुकुति जनम महि जानि, ज्ञानखानि, अघहानिकर ।
 जहँ बस संभु भवानि सो कासी सेइय कस न ? ॥ २३७ ॥
 जरत सकल सुरवृंद, विषम गरल जेहि पान किय ।
 तेहि न भजसि मति मंद, को कृपालु संकर सरिस ? ॥ २३८ ॥

दोहा

वासर ढासनि के ढका, रजनी चहुँ दिसि चोर ।
 संकर निज पुर राखिए चितै सुलोचन-कोर ॥ २३९ ॥
 अपनी बीसी आपुही पुरिहि लगाये हाथ ।
 केहि विधि बिनती बिस्व की करौं बिस्व के नाथ ॥ २४० ॥
 और करै अपराध कोउ, और पाव फल-भोग ।
 अति बिचित्र भगवंतगति, कोउ न जानिबे जोग ॥ २४१ ॥

प्रेमसरीर प्रपंच-रुज, उपजी अधिक उपाधि ।
 तुलसी भली सुवैदर्षि बेगि बाँधिये व्याधि ॥ २४२ ॥
 हम हमार आचार बड़, भूरि भार धरि सीस ।
 हठि सठ परबस परत जिमि कीर, कोस-कृमि, कीस ॥ २४३ ॥
 केहि भग प्रविसति जाति केहि कहु दर्पन में छाँह ।
 तुलसी त्यां जग-जीवगति करी जीव के नाँह ॥ २४४ ॥
 सुखसागर सुखनींदबस, सपने सब करतार ।
 माया मायानाथ की को जग जाननहार ? ॥ २४५ ॥
 जीव सोव सम सुख सयन, सपने कछु करतूति ।
 जागत दीन मलीन सोइ विकल विषाद विभूति ॥ २४६ ॥
 सपने होइ भिखारि नृप, रंक नाकपति होइ ।
 जागे लाभ न हानि कछु, तिमि प्रपंच जिय जोइ ॥ २४७ ॥
 तुलसी देखत, अनुभवत, सुनत न समुझत नीचु ।
 चपरि चपेटे देत नित केस गहे कर मीचु ॥ २४८ ॥
 करम खरी कर, मोह थल, अंक चराचर-जाल ।
 हनत गुनत, गनि गुनि हनत जगत ज्योतिषी-काल ॥ २४९ ॥
 कहिवे कहँ रसना रची, सुनिवे कहँ किय कान ।
 धरिवे कहँ चित हित सहित परमारथहि सुजान ॥ २५० ॥
 ज्ञान कहै अज्ञान विनु, तम विनु कहै प्रकास ।
 निरगुन कहै जो सगुन विनु सो गुरु, तुलसी दास ॥ २५१ ॥
 अंक अगुन, आखर सगुन सामुझि उभय प्रकार ।
 खोए राखे आपु भल, तुलसी चारु विचार ॥ २५२ ॥
 परमारथ-पहिचानि-मति लसति विषय लपटानि ।
 निकसि चिता तें अधजरति, मानहुँ सती परानि ॥ २५३ ॥
 सीस उधारन किन कहेउ, बरजि रहे प्रिय लोग ।
 घरही सती कहावती, जरती नाह-वियोग ॥ २५४ ॥

खरिया, खरी, कपूर सब, उचित न, पिय ! तियत्याग ।
 कै खरिया मोहिं मेलि, कै विमल विवेक विराग ॥ २५५ ॥
 घर कीन्हें घर जात है, घर छाँड़े घर जाइ ।
 तुलसी घर बन बीच ही राम-प्रेमपुर छाइ ॥ २५६ ॥
 दिए पीठि पाछे लगै, सनमुख होत पराय ।
 तुलसी संपति छाँह ज्यों, लखि दिन बैठि गँवाय ॥ २५७ ॥
 तुलसी अदभुत देवता आसादेवी नाम ।
 सेए सोक समर्पई, विमुख भए अभिराम ॥ २५८ ॥
 सोई सेँवर तेइ सुवा, सेवत सदा बसंत ।
 तुलसी महिमा मोह की सुनत सराहत संत ॥ २५९ ॥
 करत न समुझत भूठ-गुन, सुनत होत मतिरंक ।
 पारद प्रगट प्रपंचमय, सिद्धिउँ नाउँ कलंक ॥ २६० ॥
 ज्ञानी, तापस, सूर, कवि, कोविद गुनआगार ।
 केहि कै लोभ विडंवना कीन्हि न यहि संसार ? ॥ २६१ ॥
 श्रीमद बक्र न कीन्ह केहि, प्रभुता बधिर न काहि ।
 मृगनयनी के नयनसर, को अस लाग न जाहि ? ॥ २६२ ॥
 व्यापि रहेउ संसार महँ माया कटक प्रचंड ।
 सेनापति कामादि भट, दंभ, कपट पाषंड ॥ २६३ ॥
 तात तीन अति प्रबल खल, काम क्रोध अरु लोभ ।
 मुनि विज्ञान-धाम मन, करहिं निमिष महँ छोभ ॥ २६४ ॥
 लोभ के इच्छा दंभ बल, काम के केवल नारि ।
 क्रोध के परुष बचन बल मुनिवर कहाँहि बिचारि ॥ २६५ ॥
 काम क्रोध लोभादि मद, प्रबल मोह के धारि ।
 तिन्हमहँ अति दारुन दुखद मायारूपी नारि ॥ २६६ ॥
 काह न पावक जाति सक; का न समुद्र समाइ ।

२६०-कलंक = कजली जो पारा सिद्ध होने पर बैठ जाती है ।

का न करै अबला प्रबल, केहि जग काल न खाइ ? ॥ २६७ ॥
 जनम-पत्रिका बरति कै देखहु मनहिं विचारि ।
 दारुन बैरी मीचु के बीच विराजति नारि ॥ २६८ ॥
 दीपसिखा सम जुवति-तन, मन जनि होसि पतंग ।
 भजहि राम तजि काममद, करहि सदा सतसंग ॥ २६९ ॥
 काम-क्रोध-मद-लोभरत, गृहासक्त दुखरूप ।
 ते किमि जानहिं रघुपतिहिं, मूढ़ परे भवकूप ॥ २७० ॥
 अहगृहीत पुनि बातवस, तेहि पुनि वीछी मार ।
 ताहि पियाई बारुनी, कहहु कौन उपचार ? ॥ २७१ ॥
 ताहि कि संपति सगुन सुभ, सपनेहु मन विस्लाम ।
 भूतद्रोहरत, मोहवस, रामविमुख, रतकाम ॥ २७२ ॥
 कहत कठिन, समुझत कठिन, साधत कठिन विवेक ।
 होइ धुनाच्छरण्याय जौ, पुनि प्रत्यूह अनेक ॥ २७३ ॥
 खल प्रबोध, जगसोध, मन को निरोध, कुल सोध ।
 करहिं ते फोकट पचि मरहिं, सपनेहु सुख न सुबोध ॥ २७४ ॥

सोरठा

कोउ विस्लाम कि पाव, तात, सहज संतोष बिनु ?
 चलै कि जल बिनु नाव, कोटि जतन पचि पचि मरिय ? ॥ २७५ ॥
 सुर नर मुनि कोउ नाहिं जेहि न मोह माया प्रबल ।
 अस विचारि मन माहिं भजिय महा मायापतिहि ॥ २७६ ॥

दोहा

एक भरोसो, एक बल, एक आस बिस्वास ।
 एक राम-घनस्याम हित चातक तुलसीदास ॥ २७७ ॥

२६८—जन्मकुंडली में छुट्टा, सातवाँ और आठवाँ स्थान क्रमशः शत्रु, स्त्री और मृत्यु का माना जाता है ।

जौ घन बरषै समय सिर, जौ भरि जनम उदास ।
 तुलसी या चित चातकहि तऊ तिहारी आस ॥ २७८ ॥
 चातक तुलसी के मते स्वातिहु पियै न पानि ।
 प्रेमवृषा बाढ़ति भली, घटे घटैगी आनि ॥ २७९ ॥
 रटत रटत रसना लटी, वृषा सूखि गे अंग ।
 तुलसी चातक-प्रेम को नित नूतन रुचिरंग ॥ २८० ॥
 चढ़त न चातक-चित कबहुँ प्रिय पयोद के दोख ।
 तुलसी प्रेमपयोधि की ताते नाप न जोख ॥ २८१ ॥
 बरषि परुष पाहन पयद पंख करौ टुक टुक ।
 तुलसी परी न चाहिये चतुर चातकहि चूक ॥ २८२ ॥
 उपल बरषि गरजत तरजि, डारत कुलिस कठोर ।
 चितव कि चातक मेघ तजि कबहुँ दूसरी ओर ? ॥ २८३ ॥
 पवि, पाहन, दामिनि, गरज, भरि, भ्रकोर खरि खीझि ।
 रोष न प्रीतम-दोष लखि, तुलसी, रागहि रीझि ॥ २८४ ॥
 मान राखिबो, माँगिबो, पिय सों नित नव नेहु ।
 तुलसी तीनिउ तब फवै, जौ चातक मत लेहु ॥ २८५ ॥
 तुलसी चातक ही फवै मान राखिबो प्रेम ।
 बक्र बुंद लखि स्वातिहू निदरि निबाहत नेम ॥ २८६ ॥
 तुलसी चातक माँगनो एक, सबै घन दानि ।
 देत जो भूभाजन भरत, लेत जो घूंटक पानि ॥ २८७ ॥
 तीनि लोक तिहुँ काल जस चातक ही के माथ ।
 तुलसी जासु न दीनता सुनी दूसरे नाथ ॥ २८८ ॥
 प्रीति पपीहा पयद की प्रगट नई पहिचानि ।
 जाचक जगत कनाउड़ो, कियो कनौड़ो दानि ॥ २८९ ॥

नहिं जाचत, नहिं संग्रही, सीस नाइ नहिं लेइ ।
 ऐसे मानी माँगनेहि को बारिद बिन देइ ? ॥ २६० ॥
 को को न ज्यायो जगत में जीवन-दायक दानि ।
 भयो कनौड़ो जाचकहि पयद प्रेम पहिचानि ॥ २६१ ॥
 साधन साँसति सब सहत, सबहिं सुखद फल लाहु ।
 तुलसी चातक जलद की रीझि-बूझि बुध काहु ॥ २६२ ॥
 चातक जीवन-दायकहि, जीवन समय सुरीति ।
 तुलसी अलख न लखि परै चातक प्रीति प्रतीति ॥ २६३ ॥
 जीव चराचर जहँ लगे है सबको हित मेह ।
 तुलसी चातक मन बस्यो घन सों सहज सनेह ॥ २६४ ॥
 डोलत विपुल बिहंग बन, पियत पोषरिन बारि ।
 सुजस-धवल, चातक नवल ! तुही भुवन दसचारि ॥ २६५ ॥
 सुख-मीठे, मानस-मलिन कोकिल मोर चकोर ।
 सुजस-धवल, चातक नवल ! रह्यो भुवन भरि तोर ॥ २६६ ॥
 बास, बेष, बोलनि, चलनि मानस मंजु मराल ।
 तुलसी चातक-प्रेम की कीरति विसद विसाल ॥ २६७ ॥
 प्रेम न परखिय परुषपन, पयद-सिखावन एह ।
 जग कह चातक पातकी, ऊसर बरसै मेह ॥ २६८ ॥
 होइ न चातक पातकी, जीवनदानि न मूढ़ ।
 तुलसी गति प्रह्लाद की समुझि प्रेम पथ गूढ़ ॥ २६९ ॥
 गरज आपनी सबन को, गरज करत उर आनि ।
 तुलसी चातक चतुर भो जाचक जानि सुदानि ॥ ३०० ॥
 चरग चंगुगत चातकहि नेम प्रेम की पीर ।
 तुलसी परबस हाड़ पर परिहै पुहुमीनीर ॥ ३०१ ॥
 बध्यो बधिक पर्यो पुन्यजल, उलटि उठाई चोच ।
 तुलसी चातक प्रेमपट मरतहु लगी न खोच ॥ ३०२ ॥

अंड फोरि कियो चेदुवा, तुष पर्यो नीर निहारि ।
 गहि चंगुल चातक चतुर डार्यो बाहिर बारि ॥ ३०३ ॥
 तुलसी चातक देत सिख सुतहि बार ही बार ।
 तात न तर्पन कीजिये बिना बारिधर-धार ॥ ३०४ ॥

सोरठा

जियत न नाई नारि चातक धन तजि दूसरहि ।
 सुरसरि हू को बारि मरत न माँगेउ अरध जल ॥ ३०५ ॥
 सुन रे तुलसीदास, प्यास पपीहहि प्रेम की ।
 परिहरि चारिउ मास, जो अँचवै जल स्वाति को ॥ ३०६ ॥
 जाचै बारहमास, पियै पपीहा स्वातिजल ।
 जान्यो तुलसीदास, जोगवत नेही मेह-मन ॥ ३०७ ॥

देहा

तुलसी के मत चातकहि केवल प्रेमपियास ।
 पियत स्वातिजल जान जग, जाचक बारह मास ॥ ३०८ ॥
 आलबाल मुकुताहलनि हिय, सनेह-तरु-मूल ।
 होइ हेतु चित चातकहि, स्वाति-सलिल अनुकूल ॥ ३०९ ॥
 बिवि रसना, तनु स्याम है, वंक चलनि, विषखानि ।
 तुलसी जस खवननि सुन्यो सीस समरप्यो आनि ॥ ३१० ॥
 उष्णकाल अरु देह खिन, मगपंथी, तन ऊख ।
 चातक बतियाँ ना रुचीँ अन जल सींचे रूख ॥ ३११ ॥
 अन जल सींचे रूख की छाया तेँ वरु घाम ।
 तुलसी चातक बहुत हैं यह प्रवीन को काम ॥ ३१२ ॥
 एक अंग जो सनेहता निसि दिन चातकनेह ।
 तुलसी जासों हित लगै वहि अहार, वहि देह ॥ ३१३ ॥

३०५—नारि = नार, गरदन ।

३११—ऊख = तपा हुआ । उष्ण । अन = अन्य, दूसरा ।

आपु व्याध को रूप धरि, कुहो कुरंगहि राग ।
 तुलसी जो मृगमन मुरै परै प्रेमपट दाग ॥ ३१४ ॥
 तुलसी मनि निज दुति फनिहि व्याधहि देउ दिखाइ ।
 बिछुरत होइ न आँधरो ताते प्रेम न जाइ ॥ ३१५ ॥
 जरत तुहिन लखि वनजवन रवि दै पीठि पराउ ।
 उदय विकस, अथवत सकुच, मिटै न सहज सुभाउ ॥ ३१६ ॥
 देउ आपने हाथ जल मीनहिँ माहुर घोरि ।
 तुलसी जियै जो वारि विनु तौ तु देहि कवि खोरि ॥ ३१७ ॥
 मकर, उरग, दादुर, कमठ जलजीवन जलगेह ।
 तुलसी एकै मीन को है साँचिलो सनेह ॥ ३१८ ॥
 तुलसी मिटै न मरि मिटेहु साँचो सहज सनेह ।
 मोरसिखा विनु मूरि हू पलुहत गरजत मेह ॥ ३१९ ॥
 सुलभ प्रीति प्रीतम सबै कहत, करत सब कोइ ।
 तुलसी मीन पुनीत ते त्रिभुवन बड़ो न कोइ ॥ ३२० ॥
 तुलसी जप तप नेम व्रत सब सब ही ते होइ ।
 लहै बड़ाई देवता इष्टदेव जब होइ ॥ ३२१ ॥
 कुदिन हिनू सो हित सुदिन, हित अनहित किन होइ ।
 ससिछवि हर रविसदन तउ मित्र कहत सब कोइ ॥ ३२२ ॥
 कौ लघु कै बड़ मीत भल, सम सनेह दुख सोइ ।
 तुलसी ज्यों धृत मधु सरिस मिले महाविष होइ ॥ ३२३ ॥
 मान्य मीत सौं सुख चहै सो न छुवै छलछाँह ।
 ससि, त्रिसंकु, कैकेइ गति लखि तुलसी मन माँह ॥ ३२४ ॥
 कहिय कठिन कृत कोमलहु हित हठि होइ सहाइ ।
 पलक पानि पर ओढ़िअत समुझि कुघाइ सुघाइ ॥ ३२५ ॥

३१४—कुहो = (चाहे) मारे ।

३१९—मोरसिखा = मयूरसिखा नाम की घास या बूटी जो बरसात
 आते ही पनप जाती है । इसमें जड़ नहीं होती । पलुहना = पनपना ।

तुलसी बैर सनेह दोउ रहित बिलोचन चारि ।
 सुरा सेवरा आदरहिं, निंदहिं सुरसरि-बारि ॥ ३२६ ॥
 रुचै माँगनेहि माँगिबो, तुलसी दानिहि दानु ।
 आलस, अनख न आचरज, प्रेमपिहानी जानु ॥ ३२७ ॥
 अमिय गारि गारेउ गरल, गारि कीन्ह करतार ।
 प्रेम बैर की जननि जुग, जानहिं बुध, न गँवार ॥ ३२८ ॥
 सदा न जे सुमिरत रहहिं, मिलि न कहहिं प्रिय बैन ।
 तेपै तिन्हके जाहिं घर जिनके हिये न नैन ॥ ३२९ ॥
 हित पुनीत सब स्वारथहि, अरि असुद्ध बिनु चाँड़ ।
 निज मुख मानिक सम दसन, भूमि परते हाड़ ॥ ३३० ॥
 माखी, काक, उलूक, बक, दादुर से भए लोग ।
 भले ते सुक, पिक, मोर से, कोउ न प्रेमपथ जोग ॥ ३३१ ॥
 हृदय कपट, बर वेष धरि, वचन कहैं गढ़ि छोलि ।
 अब के लोग मयूर ज्यों, क्योँ मिलिए मन खोलि ॥ ३३२ ॥
 चरन चोँच लोचन रँगौ, चलै मराली चाल ।
 छीर-नीर-विवरन समय बक उघरत तेहि काल ॥ ३३३ ॥
 मिलै जो सरलहि सरल ह्वै, कुटिल न सहज बिहाइ ।
 सो सहेतु, ज्यों बक्रगति व्याल न बिलै समाइ ॥ ३३४ ॥
 कृसधन सखहि न देव दुख, मुयहु न माँगव नीच ।
 तुलसी सज्जन की रहनि पावक पानी बीच ॥ ३३५ ॥
 संग सरल कुटिलहि भए हरि हर करहिं निबाहु ।
 ग्रह गनती गनि चतुर बिधि कियो उदर-बिनु राहु ॥ ३३६ ॥
 नीच निचाई नहिं तजै सज्जन हू के संग ।
 तुलसी चंदन-बिटप बसि बिनु विष भये न भुअंग ॥ ३३७ ॥

भलो भलाई पै लहै, लहै निचाई नीचु ।
 सुधा सराहिय अमरता, गरल सराहिय मीचु ॥ ३३८ ॥
 मिथ्या माहुर सज्जनहि, खलहि गरल सम साँच ।
 तुलसी छुवत पराइ ज्यों पारद पावक-आँच ॥ ३३९ ॥
 संत-संग अपवर्गकर, कामी भवकर पंथ ।
 कन्हहि साधु, कवि, कोविद, स्तुति, पुरान, सदग्रंथ ॥ ३४० ॥
 सुकृत न सुकृती परिहरै, कपट न कपटी नीच ।
 मरत सिखावन देइ चले गीधराज मारीच ॥ ३४१ ॥
 सुजन, सुतरु, वन, ऊष सम; खल, टंकिका, रुखान ।
 परहित अनहित लागि सब साँसति सहत समान ॥ ३४२ ॥
 पियहिँ सुमनरस अलि बिटप, काटि कोल फल खात ।
 तुलसी तरुजीवी जुगल, सुमति कुमति की बात ॥ ३४३ ॥
 अवसर कौड़ी जो चुकै बहुरि दिए का लाख ?
 दुइज न चंदा देखिये, उदौ कहा भरि पाख ॥ ३४४ ॥
 ज्ञान अनभले को सबहि, भले भलेहू काउ ।
 सींग, सूँड, रद, लूम, नख करत जीव जड़ घाउ ॥ ३४५ ॥
 तुलसी जगजीवन अहित, कतहुँ कोउ हित जानि ।
 सोषक भानु कृसानु महि पवन, एक घनदानि ॥ ३४६ ॥
 सुनिय सुधा देखिय गरल, सब करतूति कराल ।
 जहँ तहँ काक उलूक बक, मानस सकृत मराल ॥ ३४७ ॥
 जलचर, थलचर, गगनचर, देव, दनुज, नर, नाग ।
 उत्तम मध्यम अधम खल, दस गुन बढ़त विभाग ॥ ३४८ ॥
 बलि मिस देखे देवता, कर मिस मानवदेव ।
 मुए मार सुविचार-हत स्वारथ-साधन एव ॥ ३४९ ॥

३४२—वन = कपास ।

३४६—मानवदेव = राजा ।

सुजन कहत भल पोच पथ, पापि न परखै भेद ।
 करमनास सुरसरित मिस विधि निषेध बढ वेद ॥ ३५० ॥
 मनि भाजन मधु, पारई पूरन अमी निहारि ।
 का छाँड़िय का संग्रहिय कहहु विवेक विचारि ॥ ३५१ ॥
 उत्तम मध्यम नीच गति पाहन, सिकता, पानि ।
 प्रीति परिच्छा तिहुँन की; बैर वितिक्रम जानि ॥ ३५२ ॥
 पुन्य, प्रीति, पति, प्रापतिउ, परमारथ-पथ पाँच ।
 लहहिं सुजन, परिहरहिं खल, सुनहु सिखावन साँच ॥ ३५३ ॥
 नीच निरादर ही सुखद, आदर सुखद बिसाल ।
 कदली बदली बिटप गति, पेखहु पनस रसाल ॥ ३५४ ॥
 तुलसी अपनो आचरन भलो न लागत कासु ।
 तेहि न बसात जो खात नित लहसुनहू को बासु ॥ ३५५ ॥
 बुध सो विवेकी विमलमति जिनके रोष न राग ।
 सुहृद सराहत साधु जेहि तुलसी ताको भाग ॥ ३५६ ॥
 आपु आपु कहँ सब भलो, अपने कहँ कोइ कोइ ।
 तुलसी सबकहँ जो भलो, सुजन सराहिय सोइ ॥ ३५७ ॥
 तुलसी भलो सुसंग ते, पोच कुसंगति होइ ।
 नाउ, किन्नरी, तीर, असि लोह बिलोकहु लोइ ॥ ३५८ ॥
 गुरु-संगति गुरु होइ सो, लघु-संगति लघु नाम ।
 चार पदारथ में गनै नरकद्वार हू काम ॥ ३५९ ॥
 तुलसी गुरु लघुता लहत लघु-संगति परिनाम ।
 देवी देव पुकारियत नीच नारिनर-नाम ॥ ३६० ॥

३५१—मधु=मद्य । पारई=मिट्टी का कटोरा । परई ।

३५२—पत्थर पर की, बालू पर की और पानी पर की लकीर की सी प्रीति क्रम से उत्तम, मध्यम और नीच हैं । बैर का क्रम इसका उलटा है ।

३५४—बिसाल = बड़ा ।

तुलसी किये कुसंग-थिति होहिँ दाहिने बाम ।
 कहिँ सुनि सकुचिय सूम खल गत हरि-शंकर-नाम ॥ ३६१ ॥
 बसि कुसंग चह सुजनता ताकी आस निरास ।
 तीरथहू को नाम भो 'गया' मगह के पास ॥ ३६२ ॥
 राम-कृपा तुलसी सुलभ गंग सुसंग समान ।
 जो जल परै जो जन मिलै कीजै आपु समान ॥ ३६३ ॥
 ग्रह, भेषज, जल, पवन, पट पाइ कुजोग सुजोग ।
 होइ कुवस्तु सुवस्तु जग, लखेहिँ सुलच्छन लोग ॥ ३६४ ॥
 जनम जोग में जानियत, जग विचित्र गति देखि ।
 तुलसी आखर, अंक, रस, रंग विभेद विसेखि ॥ ३६५ ॥
 आखर जोरि विचार करु, सुमति अंक लिखि लेखु ।
 जोग-कुजोग-सुजोग-मय जगगति समुझि विसेखु ॥ ३६६ ॥
 करु विचार, चलु सुपथ, भल आदि मध्य परिनाम ।
 उलटे जपे 'जरा मरा,' सूधे 'राजा राम' ॥ ३६७ ॥
 होइ भले के अनभलो, होइ दानि के सूम ।
 होइ कुपूत सुपूत के, ज्यों पावक में धूम ॥ ३६८ ॥
 जड़ चेतन गुन-दोष-मय विख कीन्ह करतार ।
 संत हंस गुन गहहिँ पय परिहरि बारि-विकार ॥ ३६९ ॥

सोरठा

पाट कीट तें होइ, ताते पाटंबर रुचिर ।
 कृमि पालै सब कोइ परम अपावन प्रान सम ॥ ३७० ॥

दोहा

जो जो जेहि जेहि रसमगन तहँ सो मुदित मन मानि ।
 रसगुन-दोष विचारिबो रसिकरीति पहिचानि ॥ ३७१ ॥
 सम प्रकास तम पाख दुहुँ, नामभेद विधि कीन्ह ।
 ससि पोषक सोषक समुझि जग जस अपजस दीन्ह ॥ ३७२ ॥

लोक वेद हूँ लौं दगो नाम भले को पोच ।
 धर्मराज जम, गाज पवि कहत सकोच न सोच ॥ ३७३ ॥
 विरुचि परखिए सुजन जन, राखि परखिये मंद ।
 बड़वानल सोषत उदधि, हरष बढ़ावत चंद ॥ ३७४ ॥
 प्रभु सनमुख भए नीच नर निपट होत विकराल ।
 रवि-रुख लखि दरपन फटिक उगिलत ज्वालाजाल ॥ ३७५ ॥
 प्रभु-समीप-गत सुजन जन होत सुखद सुबिचारि ।
 लवन-जलधि-जीवन जलद, बरषत सुधा सुबारि ॥ ३७६ ॥
 नीच निरावहिं निरस तरु, तुलसी सींचहिं ऊख ।
 पोषत पयद समान सब विष पियूष के रूख ॥ ३७७ ॥
 बरषि बिख हरषित करत, हरत ताप अघ प्यास ।
 तुलसी दोष न जलद को जो जल जरै जबास ॥ ३७८ ॥
 अमरदानि, जाचक मरहिं, मरि मरि फिरि फिरि लोहिं ।
 तुलसी जाचक पातकी दातहि दूषन देहिं ॥ ३७९ ॥
 लखि गयंद लै चलत भजि खान सुखानो हाड़ ।
 गज-गुन, मोल, अहार, बल, महिमा जान कि राड़ ? ॥ ३८० ॥
 कै निदरहु कै आदरहु सिंहहिं खान सियार ।
 हरष विषाद न केसरिहि कुंजर-गंजनिहार ॥ ३८१ ॥
 ठाढ़ो द्वार न दै सकैं तुलसी जे नर नीच ।
 निंदहिं बलि हरिचंद को 'का कियो करन दधीच ?' ॥ ३८२ ॥
 ईस-सीस बिलसत विमल, तुलसी तरल तरंग ।
 खान सरावग के कहे लघुता लहै न गंग ॥ ३८३ ॥
 तुलसी देवल देव को लागे लाख करोरि ।
 काक अभागे हगि भरयो महिमा भई कि थोरि ? ॥ ३८४ ॥

३७३—दगो = अंकित है, प्रसिद्ध है ।

३७४—विरुचि = अपनी रुचि या प्रसन्नता से जो देखते ही हो ।

३८०—राड़ = जड़, दुष्ट ।

निज गुन घटत न नागनग परखि परिहरत कोल ।
 तुलसी प्रभु भूषन किए गुंजा बढे न मोल ॥ ३८५ ॥
 राकापति षोडस उबहिँ, तारागन समुदाइ ।
 सकल गिरिन दब लाइए बिनु रवि राति न जाइ ॥ ३८६ ॥
 भलो कहै बिन जानेहू, बिनु जाने अपवाद ।
 ते नर गादुर जानि जिय करिय न हरष विषाद ॥ ३८७ ॥
 पर-सुख-संपति देखि सुनि जरहिँ जे जड़ बिनु आगि ।
 तुलसी तिनके भाग ते चलै भलाई भागि ॥ ३८८ ॥
 तुलसी जे कीरति चहहिँ पर की कीरति खोइ ।
 तिनके मुँह मसि लागिहै, मिटिहि न मरिहूँ धोइ ॥ ३८९ ॥
 तनु, गुन, धन, महिमा, धरम, तेहि बिनु जेहि अभिमान ।
 तुलसी जियत विडंबना, परिनामहु गत जान ॥ ३९० ॥
 सासु, ससुर, गुरु, मातु, पितु, प्रभु भयो चहै सब कोइ ।
 हेनो दूजी ओर को, सुजन सराहिय सोइ ॥ ३९१ ॥
 सठ सहि साँसति पति लहत, सुजन कलेस न काय ।
 गढ़ि गुढ़ि पाहन पूजिए, गंडकि-सिला सुभाय ॥ ३९२ ॥
 बड़े विबुध-दरबार तैं भूमि-भूप-दरबार ।
 जापक पूजक पेखियत, सहत निरादर भार ॥ ३९३ ॥
 बिनु प्रपंच छल भीख भलि, लहिय न दिए कलेस ।
 बावन-बलि सों छल कियो, दियो उचित उपदेस ॥ ३९४ ॥
 भलो भले सों छल किए जनम कनौड़ो होइ ।
 श्रीपति सिर तुलसी लसति, बलि-बावनगति सोइ ॥ ३९५ ॥
 विबुध-काज बावन बलिहिँ छलो, भलो जिय जानि ।
 प्रभुता तजि बस भे, तदपि मन की गइ न गलानि ॥ ३९६ ॥
 सरल-बक्रगति पंचग्रह, चपरि न चितवत काहु ।

तुलसी सृधे सूर ससि, समय बिडंबित राहु ॥ ३६७ ॥
 खल-उपकार विकार-फल तुलसी जान जहान ।
 मेंदुक मर्कट बनिक बक कथा सत्य-उपखान ॥ ३६८ ॥
 तुलसी खल-बानी मधुर सुनि समुझिय हिय हेरि ।
 रामराज बाधक भई मूढ़ मंथरा चेरि ॥ ३६९ ॥
 जोक सृधिमन कुटिलगति, खल विपरीत विचार ।
 अनहित सोनित सोष सो, सो हित सोषनहार ॥ ४०० ॥
 नीच गुडी ज्यों जानिबो, सुनि लखि तुलसीदास ।
 ढीलि दिये गिरि परत महि, खँचत चढ़त अकास ॥ ४०१ ॥
 भरदर बरषत कोससत बचै जे बूढ़ बराइ ।
 तुलसी तेउ खल-बचन-सर हये, गएँ न पराइ ॥ ४०२ ॥
 पेरत कोल्हू मेलि तिल तिली सनेही जानि ।
 देखि प्रीति की रीति यह, अब देखिबी रिसान ॥ ४०३ ॥
 सहवासी काचो गिलहि, पुरजन पाक-प्रवीन ।
 कालछेप केहि मिलि करहि तुलसी खग मृग मीन ? ॥ ४०४ ॥
 जासु भरोसे सोइए राखि गोद में सीस ।
 तुलसी तासु कुचाल तेँ रखवारो जगदीस ॥ ४०५ ॥
 मार खोज लै सौँह करि, करि मत, लाज न त्रास ।
 मुए नीच ते मीच विनु जे इनके बिस्वास ॥ ४०६ ॥
 परद्रोही, परदार-रत, परधन, पर-अपवाद ।
 ते नर पाँवर पापमय देह धरे मनुजाद ॥ ४०७ ॥
 बचन बेष क्योँ जानिए मन मलीन नर नारि ।
 सूपनखा, मृग, पृतना, दसमुख प्रमुख विचारि ॥ ४०८ ॥

३६७—चपरि = तेजी से, सहसा ।

३६८—सत्य-उपखान = सत्योपाख्यान नाम का ग्रंथ ।

४०६—मार = मारते हैं ।

हँसनि, मिलनि, बोलनि मधुर, कटु करतव मन माँह ।
 छुवत जो सकुचै सुमति सो तुलसी तिन्हकी छाँह ॥ ४०६ ॥
 कपटसार सूची सहस, बाँधि वचन-परवास ।
 कियो दुराड चहै चातुरी सो सठ तुलसीदास ॥ ४१० ॥
 वचन विचार अचार तन, मन, करतव छल छूति ।
 तुलसी क्यों सुख पाइए अंतर्जामिहि धूति ? ॥ ४११ ॥
 सारदूल को खाँग कर, कूकर की करतूति ।
 तुलसी तापर चाहिए कीरति विजय विभूति ॥ ४१२ ॥
 बड़े पाप बाढ़े किए, छोटे किए लंजात ।
 तुलसी तापर सुख चाहत, विधि सों बहुत रिसात ॥ ४१३ ॥
 देस-काल-करता-करम-वचन-विचार-विहीन ।
 ते सुरतरु-तर दारिदी, सुरसरि-तीर मलीन ॥ ४१४ ॥
 साहसही, कै कोपवस किए कठिन परिपाक ।
 सठ संकट-भाजन भए हठि कुजाति कपि काक ॥ ४१५ ॥
 राज करत विनु काजही करै कुचालि कुसाज ।
 तुलसी ते दसकंध ज्यों जइहैं सहित समाज ॥ ४१६ ॥
 राज करत विनु काज ही ठटहि जे कूर कुठाट ।
 तुलसी ते कुरुराज ज्यों जइहैं बारहबाट ॥ ४१७ ॥
 सभा सुजोधन की सकुनि, सुमति सराहन जोग ।
 द्रोण विदुर भीषम हरिहि कहैं प्रपंची लोग ॥ ४१८ ॥
 पांडुसुवन की सदसि ते, नीको रिपु हित जानि ।
 हरि हर सम सब मानियत, मोह ज्ञान की बानि ॥ ४१९ ॥
 हित पर बढ़ै बिरोध जब, अनहित पर अनुराग ।
 राम-विमुख विधि बामगति, सगुन अघाय अभाग ॥ ४२० ॥
 सहज सुहृद गुरु स्वामि सिख जो न करै सिर मानि ।

सो पछिताइ अघाइ उर, अवसि होइ हितहानि ॥ ४२१ ॥
 भरुहाए नट भाँट के चपरि चढ़े संग्राम ।
 कै वै भाजे आइहैं, कै बाँधे परिनाम ॥ ४२२ ॥
 लोकरीति फूटी सहै, आँजी सहै न कोइ ।
 तुलसी जो आँजी सहै सो आँधरो न होइ ॥ ४२३ ॥
 भागे भल, आड़ेहु भलो, भलो न धाले घाउ ।
 तुलसी सबके सीस पर रखवारो रघुराउ ॥ ४२४ ॥
 सुमति विचारहिं, परिहरहिं दल-सुमनहु संग्राम ।
 सकुल गए, तनु विनु भए, साखी जादौ काम ॥ ४२५ ॥
 कलह न जानब छोट करि, कलह कठिन परिनाम ।
 लगति अगिनि लघु नीचगृह जरत धनिक-धन धाम ॥ ४२६ ॥
 छमा रोष के दोष गुन सुनि मनु ! मानहिं सीख ।
 अविचल श्रीपति हरि भए, भूसुर लहै न भीख ॥ ४२७ ॥
 कौरव पांडव जानिए क्रोध छमा के सीम ॥
 पाँचहि मारि न सौ सके, सयो सँहारे भीम ॥ ४२८ ॥
 बोल न मोटे मारिये, मोटी रोटी मारु ।
 जीति सहस सम हारिबो, जीते हारि निहारु ॥ ४२९ ॥
 जो परि पायँ मनाइए तासों रूठि विचारि ।
 तुलसी तहाँ न जीतिये जहँ जीतेहु हारि ॥ ४३० ॥
 जूझे ते भल बूझिबो, भली जीति तँ हारि ।
 डहके ते डहकाइबो भलो, जो करिय विचारि ॥ ४३१ ॥
 जा रिपु सों हारेहु हँसी, जिते पाप परितापु ।
 तासों रारि निवारिए, समय सँभारिय आपु ॥ ४३२ ॥
 जो मधु मरै न मारिये माहुर देइ सो काउ ।
 जग जिति हारे परसुधर, हारि जिते रघुराउ ॥ ४३३ ॥

वैर-मूल-हर हित-वचन, प्रेममूल उपकार ।
 दो'हा' सुभ-संदोह सो, तुलसी किये विचार ॥ ४३४ ॥
 रोष न रसना खोलिए, बरु खेलिय तरवारि ।
 सुनत मधुर, परिनाम हित, बोलिय वचन विचारि ॥ ४३५ ॥
 मधुर वचन कटु बोलिबो, विनु स्म भाग अभाग ।
 कुहू कुहू कलकंठ रव, काका कररत काग ॥ ४३६ ॥
 पेट न फूलत विनु कहे, कहत न लागै ढेर ।
 सुमति विचारे बोलिये समुझि कुफेर सुफेर ॥ ४३७ ॥
 छिद्यो न तरुनि-कटाछ सर, करेउ न कठिन सनेहु ।
 तुलसी तिनको देह को जगत कवच करि लेहु ॥ ४३८ ॥
 सूर समर करनी करहिं, कहि न जनावहिं आपु ।
 विद्यमान रन पाय रिपु कायर करहिं प्रलापु ॥ ४३९ ॥
 वचन कहे अभिमान के पारथ पेपत सेतु ।
 प्रभुतिय लूटत नीच भर जय न, मीचु तेहि हेतु ॥ ४४० ॥
 राम लषन विजयी भए बनहु गरीबनिवाज ।
 मुखर बालि रावन गए घर ही सहित समाज ॥ ४४१ ॥
 खग मृग मीत पुनीत किय, बनहु राम नयपाल ।
 कुमति बालि दसकंठ घर सुहृद बंधु कियो काल ॥ ४४२ ॥
 लखै अघानो भूख ज्यों, लखै जीति मैं हारि ।
 तुलसी सुमति सराहिए, मग पग धरै विचारि ॥ ४४३ ॥
 लाभ समय को पालिबो, हानि समय की चूक ।
 सदा विचारहिँ चारुमति सुदिन कुदिन दिन दूक ॥ ४४४ ॥

४३४—दो'हा' = 'हा हा' अर्थात् हा हा खाना; विनती करना ।

४४०—एक बार समुद्र में बँधे सेतु को देख अर्जुन ने हनुमान से गर्व से कहा, "मैं तो बाणों का पुल बाँध सकता था ।" अर्जुन ने पुल बाँधा, पर वह हनुमान जी के पैर रखते ही बैठ गया ।

४४४—दूक = दोनों ।

सिंधुतरन कपि गिरिहरन काज साईँ हित दोउ ।
 तुलसी समयहि सब बड़ो, बूझत कहूँ कोउ कोउ ॥ ४४५ ॥
 तुलसी मीठी अमी तेँ माँगी मिलै जो मीच ।
 सुधा सुधाकर समय विनु कालकूट तेँ नीच ॥ ४४६ ॥
 तुलसी असमय के सखा धीरज, धरम, विवेक ।
 साहित, साहस, सत्यव्रत, राम-भरोसा एक ॥ ४४७ ॥
 समरथ कोउ न राम सौँ, तीय-हरन अपराधु ।
 समयहि साधे काज सब, समय सराहहिँ साधु ॥ ४४८ ॥
 तुलसी तीरहु के चले समय पाइवी थाह ।
 धाइ न जाइ थहाइवी सर सरिता अवगाह ॥ ४४९ ॥
 तुलसी जसि भवितव्यता तैसी मिलै सहाय ।
 आपु न आवै ताहि पै, ताहिं तहाँ लै जाय ॥ ४५० ॥
 कै जूझिबो कै बूझिबो, दान कि काय-कलेस ।
 चारि चारु परलोक-पथ, जथाजोग उपदेस ॥ ४५१ ॥
 पात पात को सींचिबो न करु सरग-तरु हेत ।
 कुटिल कटुक फर फरैगो तुलसी करत अचेत ॥ ४५२ ॥
 गठिवंध तेँ परतीति बड़ि, जेहि सब को सब काज ।
 कहव थोर समुझव बहुत, गाड़े बढ़त अनज ॥ ४५३ ॥
 अपना ऐपन निजहथा, तिय पूजहिँ निज भीति ।
 फलै सकल मनकामना, तुलसी प्रीति प्रतीति ॥ ४५४ ॥
 बरषत करषत आपु जल, हरषत अरघनि भांनु ।
 तुलसी चाहत साधु सुर सब सनेह सनमानु ॥ ४५५ ॥
 सुति-गुन कर-गुन, पु-जुग-मृग हय, रेवती, सखाउ ।
 देहि लेहि धन धरनि धरु, गएहु न जाइहि काउ ॥ ४५६ ॥

ऊगुन पूगुन वि अज कृ म, आ भ अ मू गुनु साथ ।
 हरो धरो गाढो दियो धन फिर चढ़ै न हाथ ॥ ४५७ ॥
 रवि हर दिसि गुन रस नयन, मुनि प्रथमादिक बार ।
 तिथि सब-काज-नसावनी, होइ, कुजोग विचार ॥ ४५८ ॥
 ससि सर नव दुइ छ दस गुन, मुनिफल वसु हर भातु ।
 मेषादिक क्रम तेँ गनहि घात चंद्र जिय जानु ॥ ४५९ ॥
 नकुल सुदरसन दरसनी, छेमकरी चक चाप ।
 दस दिसि देखत सगुन सुभ, पूजहि मन अभिलाष ॥ ४६० ॥
 सुधा साधु सुरतरु सुमन, सुफल सुहावनि बात ।
 तुलसी सीतापति भगति सगुन सुमंगल सात ॥ ४६१ ॥

शतभिक् ।

कर-गुन = हस्त से तीन नक्षत्र अर्थात् हस्त, चित्रा और स्वाती ।
 पु-जुग = दोनों पु अर्थात् 'पु' से आरंभ होनेवाले पुण्य और पुनर्वसु ।
 सखा = अनुराधा । स्वात्यादित्य ऋदुद्विदेव गुरुभे कर्णलयाश्चे चरे ।
 ४५७—उ-गुन = उत्तराफाल्गुनी, उत्तराषाढ, उत्तराभाद्रपद ।
 पूगुन = पूर्वाफाल्गुनी, पूर्वाषाढ, पूर्वाभाद्रपद ।
 वि = विशाखा । अज = रोहिणी । कृ = कृत्तिका । म = मघा । आ =
 आर्द्रा । भ = भरणी । अ = अश्लेषा । मू = मूल ।

तीक्ष्ण मिश्र ध्रुवोऽग्रैर्यत् द्रव्यंदत्तं निवेशितं ।

प्रयुक्तंच, विनष्टंच, विष्टयांपाते च नाप्यते ॥

४५८—रवि = द्वादशी । हर = एकादशी । दिसि = दसमी । गुन = तीज ।
 रस = षष्ठी । नयन = दूज । मुनि = सप्तमी—ये यदि क्रम से रवि
 सोम, मंगल, बुध, गुरु, शुक्र और शनि को पढ़ें तो ।

४५९—चंद्रमा को इन इन स्थानों पर घातक समझो—

मेष का १, वृष का २, मिथुन का ३, कर्क का २, सिंह का ६, कन्या का
 १०, तुला का ३, वृश्चिक का ७, धन का ४, मकर का ६, कुंभ का ११,
 मीन का १२ ।

४६०—सुदरसन = मछली ! दरसनी = दर्पण । चक = चक्रवाक ।

भरत सत्रुसुदन लषन सहित सुमिरि रघुनाथ ।
 करहु काज सुभ साज सब, मिलिहि सुमंगल साथ ॥ ४६२ ॥
 राम लषन कौसिक सहित सुमिरहु करहु पथान ।
 लच्छिलाभ लै जगत जसु, मंगल सगुन प्रमान ॥ ४६३ ॥
 अतुलित महिमा बंद की तुलसी किए विचार ।
 जो निंदत निंदित भयो विदित बुद्ध अवतार ॥ ४६४ ॥
 बुध किसान सर-वेद निज मते खेत सब सींच ।
 तुलसी कृषि लखि जानिबो उत्तम, मध्यम, नीच ॥ ४६५ ॥
 सहि कुबोल, साँसति सकल, अँगइ अनट अपमान ।
 तुलसी धरम न परिहरिय, कहि करि गए सुजान ॥ ४६६ ॥
 अनहित-भय परहित किये, पर-अनहित हितहानि ।
 तुलसी चारु विचार भल, करिय काज सुनि जानि ॥ ४६७ ॥
 पुरुषारथ, पूरब करम, परमेस्वर परधान ।
 तुलसी पैरत सरित ज्यों सबहि काज अनुमान ॥ ४६८ ॥
 चलब नीतिमग, रामपग नेह निबाहब नीक ।
 तुलसी पहिरिय सो बसन जो न पखारे फीक ॥ ४६९ ॥
 दोहा चारु विचारु चलु परिहरि बाद विवाद ।
 सुकृत-सीवँ, स्वारथ-अवधि, परमारथ-मरजाद ॥ ४७० ॥
 तुलसी सो समरथ सुमति, सुकृती, साधु, सयान ।
 जो विचारि व्यवहरइ जग, खरच लाभ अनुमान ॥ ४७१ ॥
 जाय जोग जग छेम बिनु, तुलसी के हित राखि ।
 बिनु उपराध भृगुपति, नहुष, वेनु, वृकासुर साखि ॥ ४७२ ॥
 बढ़ि प्रतीति गठिबंध तेँ, बड़ो जोग तेँ छेम ।
 बड़ो सुसेवक साँइ तेँ, बड़ो नेम तेँ प्रेम ॥ ४७३ ॥

सिष्य, सखा, सेवक, सचिव, सुतिय सिखावन साँच ।
 सुनि समुझिय, पुनि परिहरिय परमनरंजन पाँच ॥ ४७४ ॥
 नगर, नारि, भोजन, सचिव, सेवक, सखा, अगार ।
 सरस, परिहरे रंगरस निरस विषाद विकार ॥ ४७५ ॥
 तूठहिं निज रुचि काज करि, रूठहिं काज विगारि ।
 तीय, तनय, सेवक, सखा, मन के कंटक चारि ॥ ४७६ ॥
 दीरघ रोगी, दारिदी, कटुबच लोलुप लोग ।
 तुलसी प्रान समान तउ होहिं निरादर-जोग ॥ ४७७ ॥
 पाही खेती, लगनवट, ऋन कुव्याज, मग-खेत ।
 बैर बड़े सोँ आपने, किये पाँच दुख-हेत ॥ ४७८ ॥
 धाय लगे लोहा ललकि खँचि लेइ नइ नीचु ।
 समरथ पापी सोँ वयर, जानि विसाही मीचु ॥ ४७९ ॥
 सोचिय गृही जो मोहवस, करै कर्मपथ-त्याग ।
 सोचिय जती प्रपंच-रत, विगत विवेक विराग ॥ ४८० ॥
 तुलसी स्वारथ सामुहो, परमारथ तनु पीठि ।
 अंध कहै दुख पाइहै, डिठियारो केहि डीठि ? ॥ ४८१ ॥
 विनु आँखिन की पानहीं पहिचानत लखि पाय ।
 चारि नयन के नारि नर सूझत मीचु न माय ॥ ४८२ ॥
 जौपै मूढ़ उपदेस के हेते जोग जहान ।
 क्यों न सुजोधन बोध कै आए स्यामसुजान ? ॥ ४८३ ॥

सोरठा

फूलै फरै न बेत, जदपि सुधा बरषहिं जलद ।
 मूरुखहृदय न चेत, जो गुरु मिलैं विरंचि सिव ॥ ४८४ ॥

४७८-पाही खेती = जिस गाँव में बसे हों उससे दूर दूसरे गाँव में खेती ।
 लगनवट = प्रेम ।

४७९-मछली और कटिया का दृष्टांत ।

दोहा

रीझि आपनी बूझिपर, खीझि^०विचार-विहीन ।
 ते उपदेस न मानहीं मोह-महोदधि-मीन ॥ ४८५ ॥
 अनसमुझे अनुसोचनो, अवसि समुझिए आपु ।
 तुलसी आपु न समुझिए पलपल पर परितापु ॥ ४८६ ॥
 कूप खनत मंदिर जरत, आए धारि बबूर ।
 बवहिं, नवहिं निज काज सिर, कुमति-सिरोमनि कूर ॥ ४८७ ॥
 निडर ईस तें बीसकै बीसबाहु सो होइ ।
 गयो गयो कहैं सुमति सब, भयो कुमति कह कोइ ॥ ४८८ ॥
 जो सुनि समुझि अनीतिरत, जागत रहै जु सोइ ।
 उपदेसिबो जगाइबो तुलसी उचित न होइ ॥ ४८९ ॥
 बहु मुख, बहु रुचि, बहु बचन, बहु अचार व्यवहार ।
 नको भलो मनाइबो यह अज्ञान अपार ॥ ४९० ॥
 लोगनि भलो मनाव जो भलो हेन की आस ।
 करत गगन को गेंडुआ सो सठ तुलसीदास ॥ ४९१ ॥
 अपजस-जोग कि जानकी, मनिचोरी की कान्ह ? ।
 तुलसी लोग रिझाइबो करषि कातिबो नान्ह ॥ ४९२ ॥
 तुलसी जुपै गुमान को होतो कछू उपाउ ।
 तौ कि जानिकिहि जानि जिय परिहरते रघुराउ ? ॥ ४९३ ॥

४८७—आए धारि बबूर बवहिं = कहावत अर्थात् जब सेना ने गढ़ घेर लिया तब चारों ओर रोक के लिए चले बबूल बाने ।

४८८—बीसकै = बीस बिस्वे, निश्चय ।

४९१—गेंडुआ = तकिया ।

४९२—नान्ह = महीन ।

४९३—गुमान = बुरी धारणा, बदगुमानी, लोकापवाद ।

माँगि मधुकरी खात ते, सोवत गोड़ पसारि ।
 पाय-प्रतिष्ठा बढ़ि परी, ताते बाढ़ो रारि ॥ ४६४ ॥
 तुलसी भेड़ो की धँसनि जड़-जनता-सनमान ।
 उपजतही अभिमान भो, खोवत मूढ़ अपान ॥ ४६५ ॥
 लही आँखि कव आँधरे, बाँझ पूत कव ल्याय ।
 कव कोढ़ी काया लही ? जग बहराइच जाइ ॥ ४६६ ॥
 तुलसी निरभय होत नर सुनियत सुरपुर जाइ ।
 सो गति देखियत अछत तनु, सुख संपति गति पाइ ॥ ४६७ ॥
 तुलसी तोरत तीरतरु, वकहित हंस विडारि ।
 बिगत-नलिन-अलि, मलिन जल, सुरसरिहू बढ़ियारि ॥ ४६८ ॥
 अधिकारी बस औसरा भलेउ जानिवे मंद ।
 सुधासदन बसु, बारहें, चउथे चउथिउ चंद ॥ ४६९ ॥
 त्रिविध एक विधि प्रभु-अनुग अवसर करहिं कुठाट ।
 सूधे टेढ़े, सब विषम, सब महुँ बारहवाट ॥ ५०० ॥
 प्रभु तें प्रभु-गन दुखद लखि प्रजहिं सँभारै राउ ।
 कर तें होत कृपान को कठिन घोर घन घाउ ॥ ५०१ ॥
 व्यालहु तें विकराल बड़ व्यालफेन जिय जानु ।
 वहि को खाए मरत है, वह खाये विनु प्रानु ॥ ५०२ ॥

४६४-खात ते = खाते थे ।

४६६-बहराइच में सालार मसऊद गाजी (गाजी मिर्या) की दरगाह है जहाँ कई हज़ार यात्री जाया करते हैं। यह महमूद गज़नवी का भानजा था जो महमूद के कन्नौज से आगे न बढ़ने पर भी गाजी होने के हौसले से अवध की ओर कुछ सेना ले कर आया। वहाँ श्रावस्ती (आधु० सहेतमहेत जो बलरामपुर के पास है) के जैन राजा सुहृददेव के हाथ से मारा गया।

४६९-चउथिउ = आदौं सुदी चौथ का चंद्रमा ।

५०२-वहि के खाए = उसके काटने से ।

कारन ते कारज कठिन, होइ दोष नहिं मोर ।
 कुलिस अस्थि ते, उपल तें लोह कराल कठोर ॥ ५०३ ॥
 काल बिलोकत ईस-रुख, भानु काल-अनुहारि ।
 रविहि राउ, राजहि प्रजा, बुध व्यवहरहिं विचारि ॥ ५०४ ॥
 जथा अमल पावन पवन पाइ कुसंग सुसंग ।
 कहिय कुवास सुवास तिमि काल महीस-प्रसंग ॥ ५०५ ॥
 भलेहु चलत पथ पोच भय, नृप-नियोग नय नेम ।
 सुतिय सुभूपति भूषियत लोह-सँवारित हेम ॥ ५०६ ॥
 माली भानु किसान सम नीतिनिपुन नरपाल ।
 प्रजा-भागवस होहिंगे कबहुँ कबहुँ कलिकाल ॥ ५०७ ॥
 वरषत हरषत लोग सब, करषत लखै न कोइ ।
 तुलसी प्रजा-सुभाग ते भूप भानु सो होइ ॥ ५०८ ॥
 सुधा सुनाज, कुनाज पल, आम असन सम जानि ।
 सुप्रभु प्रजाहित लेहि कर सामादिक अनुमानि ॥ ५०९ ॥
 पाके, पकये विटप-दल उत्तम मध्यम नीच ।
 फल नर लहैं, नरेस ल्यों करि विचार मन बीच ॥ ५१० ॥
 रीम्नि खीम्नि गुरु देत सिख, सखा सुसाहिब साधु ।
 तोरि खाय फल होइ भल, तरु काटे अपराधु ॥ ५११ ॥
 घरनि-धेनु चारितु चरत, प्रजा सुबच्छ पेन्हाइ ।
 हाथ कछू नहिं लागिहै किए गोड़ की गाइ ॥ ५१२ ॥
 चढ़े बधूरे चंग ज्यों, ज्ञान ज्यों सोक-समाज ।
 करम, धरम, सुख संपदा ल्यों जानिबे कुराज ॥ ५१३ ॥

५०६—सुधा = दूध रस आदि पीने के उत्तम पदार्थ ।

५१२—चारितु = चारा । गोड़ की करना = दूध दूहते समय गाय के पैर बाँधना ।

कंटक करि करि परत गिरि साखा सहस खजूरि ।
 मरहिं कुनृप करि करि कुनय सौं कुचालि भव भूरि ॥ ५१४ ॥
 काल तोपची, तुपक महि, दारू-अनय कराल ।
 पाप पलीता, कठिन गुरु गोला पुहुमीपाल ॥ ५१५ ॥
 भूमि रुचिर रावन-सभा, अंगद-पद महिपाल ।
 धरम राम, नय सीय बल अचल होत सुभ काल ॥ ५१६ ॥
 प्रीति-रामपद, नीतिरति, धरम प्रतीति सुभाइ ।
 प्रभुहि न प्रभुता परिहरै कबहुँ वचन मन काइ ॥ ५१७ ॥
 कर के कर, मन के मनहिं, वचन वचन गुन जानि ।
 भूपहि शूलि न परिहरै विजय विभूति सयानि ॥ ५१८ ॥
 गोली बान सुमंत्र सर समुझि उलटि मन देखु ।
 उत्तम मध्यम नीच प्रभु वचन विचारि विसेखु ॥ ५१९ ॥
 सत्रु सयानो सलिल ज्यों राख सीस रिपुनाड ।
 बूझत लखि, पग डगत लखि, चपरि चहुँ दिसि धाड ॥ ५२० ॥
 रैयत, राज-समाज, घर, तन, धन, धरम, सुबाहु ।
 शांत सुसचिवन सौंपि सुख बिलसहि नित नरनाहु ॥ ५२१ ॥
 सुखिया मुख सो चाहिये, खान पान को एक ।
 पालै पोषै सकल अँग तुलसी सहित विवेक ॥ ५२२ ॥
 सेवक कर पद नयन से, मुख सो साहिव होइ ।
 तुलसी प्रीति कि रीति सुनि सुकवि सराहहिं सोइ ॥ ५२३ ॥
 मंत्री, गुरु अरु बैद जो प्रिय बोलहिं भय आस ।
 राज, धरम, तन तीनि कर होइ बेगिही नास ॥ ५२४ ॥
 रसना मंत्री, दसन जन, तोष पोष निज काज ।
 प्रभु-कर सेन पदादिका, बालक राज-समाज ॥ ५२५ ॥

५१६—बान = बाना, फेंक कर मारा जानने वाला अस्त्र ।

५२१—सुबाहु = सेना ।

लकड़ी डौआ करछुली सरस काज अनुहारि ।
 सुप्रभु संग्रहहिं परिहरहिं सेवक सखा विचारि ॥ ५२६ ॥
 प्रभु समीप छोटे, बड़े, निबल, होत बलवान ।
 तुलसी प्रगट विलोकिये कर अँगुली अनुमान ॥ ५२७ ॥
 साहब तेँ सेवक बड़ो जो निज धरम सुजान ।
 राम बाँधि उतरे उदधि, लाँधि गए हनुमान ॥ ५२८ ॥
 तुलसी भल बरतरु बढ़त, निज मूलहिं अनुकूल ।
 सबहि भाँति सब कहँ सुखद दलनि-फलनि-बिनु फूल ॥ ५२९ ॥
 सधन, सगुन, सधरम, सगन, सबल सुसाँई महीप ।
 तुलसी जे अभिमान बिनु ते त्रिभुवन के दीप ॥ ५३० ॥
 तुलसी निज करतूति बिनु मुक्त जात जब कोइ ।
 गयो अजामिल लोकहरि, नाम सक्यो नहिं धोइ ॥ ५३१ ॥
 बड़ो गहे ते होत बड़, ज्यों बावन-कर-दंड ।
 श्रीप्रभु के संग सों बड़ो, गयो अखिल ब्रह्मंड ॥ ५३२ ॥
 तुलसी दान जो देत हैं जल में हाथ उठाय ।
 प्रतिप्राही जीवै नहीं, दाता नरकै जाय ॥ ५३३ ॥
 आपन छोड़ो साथ जब ता दिन हितू न कोइ ।
 तुलसी अंबुज अंबु-बिन तरनि तासु रिपु होइ ॥ ५३४ ॥
 उरबी परि कुलहीन होइ, ऊपर कलाप्रधान ।
 तुलसी देखु कलापगति, सोधन-धन पहिचान ॥ ५३५ ॥

५३३—जल में हाथ उठाय = गंगा में खड़े होकर जो गंगापुत्र आदि को दान दिया जाता है वह ऐसा ही है जैसा जल में मछली पकड़ने के लिए फेंका हुआ चारा जिसे लेनेवाला भी मर जाता है और देनेवाला भी नरक में जाता है ।

तुलसी संगति पोच की सुजनहिं होति मदानि ।
 ज्यों हरि रूप सुताहि तेँ कीन जुहारी आनि ॥ ५३६ ॥
 कलि-कुचालि सुभमति-हरनि, सरलै दंडै चक्र ।
 तुलसी यह निहचय भई, बाढ़ि लेति नव वक्र ॥ ५३७ ॥
 गोखग, खेखग, बारिखग तीनों माहिं बिसेक ।
 तुलसी पीवै, फिरि चलै, रहै फिरै सँग एक ॥ ५३८ ॥
 साधन-समय, सुसिद्धि लहि, उभय मूल अनुकूल ।
 तुलसी तीनिउ समय सम ते महि मंगल-मूल ॥ ५३९ ॥
 मातु-पिता-गुरु-खामि-सिख सिरधरि करहिं सुभाय ।
 लहेउ लाभ तिन जनम कर, न तरु जनम जग जाय ॥ ५४० ॥
 अनुचित उचित विचार तजि, जे पालहिं पितुबैन ।
 ते भाजन सुख सुजस के, बसहिं अमरपति-ऐन ॥ ५४१ ॥

सोरठा

सहज अपावनि नारि, पति सेवत सुभगति लहै ।
 जस गावत झुति चारि, अजहुँ तुलसिका हरिहि प्रिय ॥ ५४२ ॥

दोहा

सरनागत कहँ जे तजहिं, निज अनहित अनुमानि ।
 ते नर पाँवर पापमय, तिनहिं विलोकत हानि ॥ ५४३ ॥

५३६—मदानि=कल्याणदायिनी । ज्यों...आनि = भक्तमाल में कथा है कि एक बड़ई ने काठ के दो हाथ जोड़ कर विष्णु का रूप बनाया और एक राजकन्या पर मोहित होकर उससे विवाह कर लिया । एक बार कन्या के पिता पर कोई आपत्ति आई । उसने अपनी कन्या से अपने पति विष्णु से सहायता माँगने के लिए कहा । अपने रूप की मर्यादा का ध्यान करके विष्णु ने सबमुच रक्षा की ।

५३७—चक्र=राजचक्र, अर्थात् राजा अपने राजपुरुषों के सहित । बाढ़ि लेति नव = नित नई नई बढ़ती है । वक्र = वक्रता ।

तुलसी तृन जल-कूल को निरधन, निपट निकाज ।
 कै राखै, कै सँग चलै, बाँह गह्वे की लाज ॥ ५४४ ॥
 रामायन-अनुहरत सिख जग भयो भारत रीति ।
 तुलसी सठ की को सुनै ? कलि-कुचालि पर प्रीति ॥ ५४५ ॥
 पात पात कै सींचिबो, बरी बरी कै लोन ।
 तुलसी खोटे चतुरपन कलि डहके कहु को न ? ॥ ५४६ ॥
 प्रीति, सगाई, सकल गुन, बनिज, उपाय अनेक ।
 कल बल छल कलिमल-मलिन डहकत एकहि एक ॥ ५४७ ॥
 दंभ सहित कलिधरम सब, छल-समेत व्यवहार ।
 स्वारथ-सहित सनेह सब, रुचि-अनुहरत अचार ॥ ५४८ ॥
 चोर, चतुर, बटपार, नट, प्रभुप्रिय भँडुआ, भंड ।
 सब-भच्छक परमारथी, कलि सुपंथ पाषंड ॥ ५४९ ॥
 असुभ बेष भूषन धरै, भच्छ अभच्छ जे खाहिं ।
 ते जोगी, ते सिद्ध नर, पूजित कलिजुग माहिं ॥ ५५० ॥

सोरठा

जे अपकारी चार, तिनकर गौरव, मान्य तेइ ।
 मन बच करम लवार ते बकता कलिकाल महँ ॥ ५५१ ॥
 दोहा

ब्रह्म-ज्ञान बिनु नारि-नर कहहिं न दूसरि बात ।
 कौड़ी लागि ते मोहबस करहिं विप्र-गुरु-घात ॥ ५५२ ॥
 बादहिं सूद्र द्विजन सन “हम तुम तँ कछु घाटि ? ।
 जानहिं ब्रह्म सो विप्रवर”, आँखि दिखावहिं डाँटि ॥ ५५३ ॥
 साखी सबदी दोहरा, कहि कहिनी उपखान ।
 भगति निरूपहिं भगत कलि, निंदहिं वेद पुरान ॥ ५५४ ॥
 स्मृति-संमत हरि-भक्तिपथ, संजुत-विरति-विवेक ।
 तेहि परिहरिहिं विमोहबस, कल्पहिं पंथ अनेक ॥ ५५५ ॥

सकल धरम विपरीत कलि, कल्पित कोटि कुपंथ ।
 पुन्य पराय पहार बन, दुरे पुरान सुभ ग्रंथ ॥ ५५६ ॥
 धातुवाद, निरुपाधि वर, सदगुरु-लाभ, सुमीत ।
 देव-दरस कलिकाल में पोथिन दुरे सभीत ॥ ५५७ ॥
 सुर-सदननि तीरथ, पुरिन, निपट कुचालि कुसाज ।
 मनहुँ मवासे मारि कलि राजत सहित समाज ॥ ५५८ ॥
 गोंड गँवार नृपाल महि, यमन महा-महिपाल ।
 साम न दाम न भेद कलि, कैवल दंड कराल ॥ ५५९ ॥
 फोरहिं सिल लोढ़ा सदन लागे अदुक पहार ।
 कायर कूर कुपूत कलि घर घर सहस डहार ॥ ५६० ॥
 प्रगट चारि पद धरम के, कलि महुँ एक प्रधान ।
 येन केन विधि दीन्है ही दान करै कल्याण ॥ ५६१ ॥
 कलिजुग सभ जुग आन नहिं, जो नर कर विस्वास ।
 गाइ रामगुन-गन विमल भव तर विनहिं प्रयास ॥ ५६२ ॥
 सवन घटहु, पुनि दृग घटहु, घटहु सकल बल देह ।
 इते घटे घटिहै कहा जो न घटै हरि-नेह ? ॥ ५६३ ॥
 तुलसी पावस के समय धरी कोकिलन मौन ।
 अब तौ दादुर बोलिहैं, हमैं पूछिहै कौन ? ॥ ५६४ ॥
 कुपथ कुतर्क कुचालि कलि, कपट दंभ पाषंड ।
 दहन रामगुन-ग्राम जिमि ईधेन अनल प्रचंड ॥ ५६५ ॥

सोरठा

कलि पाषंड-प्रचार, प्रबल पाप पाँवर पतित ।
 तुलसी उभय आधार, रामनाम, सुरसरि-सलिल ॥ ५६६ ॥

५५७—धातुवाद=रसायन ।

५५८—मवासे मारि=क़िळा बाँध कर ।

५६०—डहार=डाढनेवाले । तंग करनेवाले ।

दोहा

रामचंद्र-मुख-चंद्रमा चित चकोर जब होइ ।
 रामराज सब काज सुभ समय सुहावन सोइ ॥ ५६७ ॥
 बीज राम-गुनगन, नयन जल, अंकुर पुलकालि ।
 सुकृती-सुतन सुखेत बर, बिलसत तुलसी सालि ॥ ५६८ ॥
 तुलसी सहित सनेह नित सुमिरहु सीताराम ।
 सगुन सुमंगल सुभ सदा आदि मध्य परिनाम ॥ ५६९ ॥
 पुरुषारथ स्वारथ सकल, परमारथ परिनाम ।
 सुलभ सिद्धि सब साहिबी सुमिरत सीताराम ॥ ५७० ॥
 मनिमय दोहा दीप जहँ, उरघर प्रगट प्रकास ।
 तहँ न मोह भय-तम तमी, कलि कज्जली विलास ॥ ५७१ ॥
 का भाषा का संस्कृत, प्रेम चाहिये साँच ।
 काम जु आवै कामरी, का लै करै कुमाच ॥ ५७२ ॥
 मनि मानिक महँगे किए, सहँगे तृन जल नाज ।
 तुलसी एतो जानिये राम गरीब-नेवाज ॥ ५७३ ॥

कवितावली

लिपि

कवितावली

—:❀:—

बालकांड

अवधेस के द्वारे सकारे गई, सुत गोद कै भूपति लै निकसे ।
अवलोकिहों सोच विमोचन को ठगि सी रही, जे न ठगे धिक से ॥
तुलसी मनरंजन रंजित अंजन नयन सु खंजन-जातक से ।
सजनी ससि में समसील उभै नवनील सरोरुह से विकसे ॥१॥
पग नूपुर औ पहुँची करकंजनि, मंजु बनी मनिमाल हिये ।
नवनील कलेवर पीत भँगा भलकै, पुलकै नृप गोद लिये ॥
अरविंद सो आनन, रूपमरंद अनंदित लोचन-भृंग पिये ।
मन माँ न बस्यो अस बालक जौ तुलसी जग में फल कौन जिये ? ॥२॥
तन की दुति स्याम सरोरुह, लोचन कंज की मंजुलताई हरै ।
अति सुंदर सोहत धूरि भरे, छवि भूरि अनंग की दूरि धरै ॥
दमकै दंतियाँ दुति दामिनि ज्यों, किलकै कल बाल-विनोद करै ।
अवधेस के बालक चारि सदा तुलसी-मन मंदिर में विहरै ॥३॥
कवहूँ ससि माँगत आरि करै, कवहूँ प्रतिविंब निहारि डरै ।
कवहूँ करताल बजाइ कै नाचत, मातु सबै मन मोद भरै ॥
कवहूँ रिसिआइ कहैं हठि कै, पुनि लेत सोई जेहि लागि अरै ।
अवधेस के बालक चारि सदा तुलसी-मन मंदिर में विहरै ॥४॥
बर दंत की पंगति कुंदकली, अधराधर-पद्मव खोलन की ।
चपला चमकै घन बीच जगै छवि मोतिन माल अमोलन की ॥

घुँघुरारी लटै लटकै मुख ऊपर, कुंडल लोल कपोलन की ।
 निवछावरि प्रान करै तुलसी, बलि जाउँ लला इन बोलन की ॥५॥
 पदकंजनि मंजु बनी पनहीं, धनुहीं सर पंकजपानि लिये ।
 लरिका सँग खेलत डोलत हैं सरजूतट चौहट हाट हिये ॥
 तुलसी अस बालक सों नहिं नेह कहा जप जोग समाधि किये ? ।
 नर ते खर सूकर खान समान, कहौ जग में फल कौन जियें ॥६॥
 सरजू बर तीरहि तीर फिरै रघुवीर, सखा अरु वीर सबै ।
 धनुहीं कर तीर, निषंग कसे कटि, पीत दुकूल नवीन फवै ॥
 तुलसी तेहि औसर लावनिता दस, चारि, नौ, तीनि, इकीस सबै ।
 मति-भारति पंगु भई जो निहारिं, बिचारि फिरी उपमा न पवै ॥७॥

कवित्त

छोनी में के छोनीपति छाजै जिन्हैं छत्रछाया
 छोनी छोनी छाये छिति आए निमिराज के ।
 प्रबल प्रचंड बरिबंड बर वेष बपु
 बरवे को बोले बयदेही बरकाज के ॥
 बोले बंदी बिरुद बजाइ बर बाजनेऊ,
 बाजे बाजे वीर बाहु धुनत समाज के ।
 तुलसी मुदित मन पुरनर-नारि जेते
 बारबार हेरै मुख औध-मृगराज के ॥८॥

७—दस, चारि.....सबै = दस गुण माधुर्य के (रूप, लावण्य, सौंदर्य, माधुर्य, सौकुमार्य, यौवन, सुगंध, सुबेश, आग्य, स्वच्छता, बज्जलता) । चार गुण प्रताप के (ऐश्वर्य, वीर्य, तेज, बल) । ऐश्वर्य के नौ गुण (अदभुता, वियतात्मता, वशीकरण, वाग्मिष्व, सर्वज्ञता, सहनन, स्थिरता, वदान्यता) । सहज या प्रकृति के तीन गुण (सौम्यता, रमण, व्यापकता) । यश के २१ गुण (सुशीलता, वात्सल्य, सुलभता, गंभीरता, क्षमा, दया, करुणा, आर्द्राव, उदारता, आर्जव, शरण्यत्व, सौहार्द, चातुर्य, प्रीतियालब, कृतज्ञता, ज्ञान, नीति, लोकप्रियता, कुलीनता, अनुराग, निर्वहणता) ।

सीय के खयंवर समाज जहाँ राजनि को,
 राजनि के राजा महाराजा जानै नाम को ?
 पवन, पुरंदर, कृसानु, भानु, धनद से,
 गुण के निधान रूपधाम सोम काम को ? ॥
 बान बलवान जातुधानप सरीखे सूर
 जिन्हके गुमान सदा सालिम संग्राम को ।
 तहाँ दसरथ के समर्थ नाथ तुलसी के
 चपरि चढ़ायो चाप चंद्रमा-ललाम को ॥६॥
 मथनमहन पुरदहन गहन जानि
 आनि कै सबै को सारु धनुष गढ़ायो है ।
 जनक सदसि जेते भले भले भूमिपाल
 किए बलहीन, बल आपनो बढ़ायो है ॥
 कुलिस कठोर कूर्म पीठ तें कठिन अति,
 हठि न पिनाक काहू चपरि चढ़ायो है ।
 तुलसी सो राम के सरोज-पानि परसत ही,
 दूख्यो मानों बारे ते पुरारि ही पढ़ायो है ॥१०॥

छप्पय

डिगति उर्वि अति गुर्वि, सर्व पन्वै समुद्र सर ।
 व्याल बधिर तेहि काल, विकल दिगपाल चराचर ॥
 दिगयंद लरखरत, परत दसकंठ मुखभर ।
 सुरविमान हिमभानु भानु संघटित परस्पर ॥
 चौंके विरंचि संकर सहित, कोल कमठ अहि कलमल्यौ ।
 ब्रह्मांड खंड कियो चंड धुनि जबहि राम सिवधनु दल्यौ ॥११॥

६—सालिम = दड़, अविचलित । चंद्रमा-ललाम = चंद्रभूषण, शिव ।

११—हिमभानु = चंद्रमा ।

घनाचरी

लोचनाभिराम घनस्याम रामरूप सिसु,
 सखी कहैं सखी सों तू प्रेमपय पालि, री !
 बालक नृपालजू के ख्याल ही पिनाक तोरयो,
 मंडलीक-मंडली-प्रताप-दाप दालि री ॥
 जनक को, सिया को, हमारो, तेरो, तुलसी को,
 सब को भावतो हैहैं मैं जो कह्यो कालि री ।
 कौसिला की कोखि पर तोषि तन बारिये री,
 राय दसरत्थ की बलैया लीजै आलि री ॥१२॥
 दूब दधि रोचना कनकथार भरि भरि,
 आरती सँवारि बर नारि चलीं गावतीं ।
 लीन्हें जयमाल करकंज सोहैं जानकी के,
 “पहिराओ राधोजू को” सखियाँ सिखावतीं ॥
 तुलसी मुदितमन जनक नगरजन,
 भाँकती भरोखे लागीं सोभा रानी पावतीं ।
 मनहुँ चकोरी चारु बैठी निज निज नीड़
 चंद की किरन पीवें, पलकैं न लावतीं ॥१३॥
 नगर निसान बर बाजै, व्योम दुंदुभी,
 विमान चढ़ि गान कै कै सुरनारि नाचहीं ।
 जय जय तिहूँ पुर, जयमाल रामउर,
 बरषै सुमन सुर, रुरे रूप राचहीं ॥
 जनक को पन जयौ, सब को भावतो भयो,
 तुलसी मुदित रोम रोम मोद माचहीं ।
 साँवरो किसोर, गोरी सोभा पर वृण तोरि
 “जोरी जियौ जुग जुग” सखीजन जाँचहीं ॥१४॥

भले भूप कहत भले भदेस भूपनि सों
 “लोक लखि बोलिऐ पुनीत रीति मारखी” ।
 जगदंबा जानकी, जगतपितु रामभद्र,
 जानि जिय जेवो जो न लागै मुँह कारखी ॥
 देखे हैं अनेक व्याह, सुने हैं पुरान वेद,
 वृष्णे हैं सुजान साधु नर नारि पारखी ।
 ऐसे सम समधी समाज ना विराजमान,
 राम से न बर, दुलही न सीय सारखी ॥१५॥
 बानी विधि गौरी हर सेसद्व. गनेस कही,
 सही भरी लोमस भुसुंडि बहुबारिखो ।
 चारिदस भुवन निहारि नर नारि सब,
 नारद को परदा न नारद सो पारिखो ॥
 तिन कही जग में जगमगति जोरी एक,
 दूजो को कहैया औ सुनैया चषचारिखो ।
 रमा रमारमन, सुजान हनुमान कही,
 “सीय सी न तीय न पुरुष राम सारिखो” ॥१६॥

सवैया

दूलह श्री रघुनाथ बने, दुलही सिय सुंदर मंदिर माहीं ।
 गावति गीत सबै मिलि सुंदरि, वेद जुवा जुरि विप्र पढ़ाहीं ॥
 राम को रूप निहारति जानकी कंकन के नग की परछाहीं ।
 याते सबै सुधि भूलि गई, कर टेकि रही पल टारति नाहीं ॥१७॥

कवित्त

भूपमंडली प्रचंड चंडीस-कोदंड खंड्यौ
 चंड बाहुदंड जाको ताही सों कहतु हैं ।
 कठिन कुठार धार धारिबे की धीरताहि,
 बीरता बिदित ताकी देखिए चहतु हैं ॥

तुलसी समाज राज तजि सो विराजै आजु,
 गाज्यौ मृगराज गजराज ज्यों गहतु हौं ।
 छोनी में न छाँड्यौ छप्यौ छोनिप को छोना छोटी,
 छोनिप-छपन बाँको बिरुद बहतु हौं ॥१८॥
 निपट निदरि बोले बचन कुठारपानि,
 मानि त्रास औनिपन मानौ मौनता गही ।
 रोषे माषे लषन अकनि अनखौहीं बातैं,
 तुलसी विनीत बानी विहँसि ऐसी कही ॥
 “सुजस तिहारो भरो भुवननि, भृगुनाथ !
 प्रगट प्रताप आपु कहौ सो सबै सही ।
 धूठ्यौ सो न जु रैगो सरासन महेसजू को,
 रावरी पिनाक मैं सरीकता कहा रही” ? ॥१९॥

सवैया

गर्भ के अर्भक काटन को पटु धार कुठार कराल है जाको ।
 सोई हैं बूझत राजसभा ‘धनु को दल्यौ’ ? हैं दलिहैं बल ताको ॥
 लघु आनन उत्तर देत बड़ो, लरिहै मरिहै करिहै कछु साको ।
 गोरों गरुर गुमान भरो कहौ कौसिक छोटी सो ढोटी है काको” ॥२०॥

घनाचरी

मख राखिबे के काज राजा मेरे संग दये,
 जीते जातुधान जे जितैया बिबुधेस के ।
 गौतम की तीय तारी, मेटे अघ भूरि भारी,
 लोचन अतिथि भए जनक जनेस के ॥
 चंड बाहुदंड बल चंडीस-कोदंड खंड्यौ,
 व्याही जानकी, जीते नरेस देस देस के ।

१९—अकनि = सुनकर । सरीकता = शिरकत, साम्रा, बराबरी ।

२०—साका करना = अद्भुत कर्म करके स्थायी कीर्ति प्राप्त करना ।

साँवरे गोरे सरीर, धीर महा बीर दोऊ,

नाम राम लषन, कुमार कोसलेस के ॥२१॥

सवैया

काल कराल नृपालन के धनुभंग सुने फरसा लिए धाए ।

लक्खन राम विलोकि सप्रेम, महा रिसि ते फिरि आँखि दिखाए ॥

धीर-सिरोमनि वीर बड़े, बिनयी, बिजयी रघुनाथ सुहाए ।

लायक है भृगुनायक सो धनुसायक सौंपि सुभाय सिधाए ॥२२॥

— — —

अयोध्या कांड

२२

सवैया

कीर के कागर ज्यों नृपचीर बिभूषन, उप्पम अंगनि पाई ।
 औध तजी मगवास के रूख ज्यों, पंथ के साथी ज्यों लोग-लुगाई ॥
 सँग सुवंधु, पुनीत प्रिया मनो धर्म क्रिया धरि देह सुहाई ।
 राजिवलोचन राम चले तजि बाप को राज बटाऊ की नाई ॥१॥
 कागर-कीर ज्यों भूषन चीर सरीर लख्यो तजि नीर ज्यों काई ।
 मातु पिता प्रिय लोग सवै सनमानि सुभाय सनेह सगाई ॥
 संग सुभाषिनि भाइ भलो, दिन द्वै जनु औध हुते पहुनाई ।
 राजिवलोचन राम चले तजि बाप को राज बटाऊ की नाई ॥२॥

धनाचारी

सिथिल सनेह कहै कौसिला सुमित्राजू सों,
 मैं न लखी सौति, सखी ! भगिनी ज्यों सेई है ।
 कहैं मोहिं मैया, कहैं “मैं न मैया भरत की;
 बलैया लैहैं, मैया ! तेरी मैया कैकेयी है” ॥
 तुलसी सरल भाय रघुराय माय मानी,
 काय मन बानी हूँ न जानी कै मतेई है ।
 बाम विधि मेरो सुख सिरिससुमन सम
 ताको छल-छुरी कोह-कुलिस लै टेई है ॥३॥
 “कीजै कहा, जीजी जू !” सुमित्रा परि पायँ कहै
 “तुलसी सहावै विधि सोई सहियतु है ।

१—कागर = पंख ।

२—धर्म, क्रिया = धर्म और कर्म ।

३—मतेई = बिमाता, सौतेली माँ ।

रावरो सुभाव राम-जन्म ही तेँ जानियत,
 भरत की मातु को कि ऐसो चहियतु है ? ॥
 जाई राजघर, व्याहि आई राजघर माहँ,
 राज-पूत पाए हूँ न सुख लहियतु है ।
 देह सुधागेह ताहि मृगहू मलीन कियो,
 ताहु पर बाहु बिनु राहु गहियतु है” ॥४॥

सवैया

नाम अजामिल से खलकोटि अपार नदी भव बूड़त काढ़े ।
 जो सुमिरे गिरि-मेरु सिला-कन, होत अजाखुर वारिधि बाढ़े ॥
 तुलसी जेहि के पदपंकज तेँ प्रगटी तटिनी जो हरै अघ गाढ़े ।
 सो प्रभु स्वै सरिता तरिवे कहँ माँगत नाव करारे द्वै ठाढ़े ॥५॥
 एहि घाट तेँ थोरिक दूर अहै कटि लौं जल-थाह देखाइहौं जू ।
 परसे पगधूरि तरै तरनी, घरनी घर क्यों समुझाइहौं जू ? ॥
 तुलसी अवलंब न और कछू, लरिका केहि भाँति जिआइहौं जू ? ।
 बरु मारिए मोहिँ, बिना पग धोए हौं नाथ न नाव चढ़ाइहौं जू ॥६॥
 रावरे दोष न पायँन को, पगधूरि को भूरि प्रभाउ महा है ।
 पाहन तेँ बन-बाहन काठ को कोमल है, जल खाइ रहा है ॥
 पावन पायँ पखारि कै नाव चढ़ाइहौं, आयसु होत कहा है ? ।
 तुलसी सुनि केवट के बर बैन हँसे प्रभु जानकी ओर हहा है ॥७॥

घनाचरी

पात भरी सहरी, सकल सुत बारे बारे,
 केवट की जाति कछू वेद ना पढ़ाइहौं ।

४—सुधागेह = (१) चंद्रमा, (२) कहते हैं कि कैकेयी के मुख में अमृत था ।

५—स्वै = सोई, वही ।

७—बन-बाहन = नाव ।

सब परिवार मेरो याही लागि, राजा जू !

हैं दीन बित्तहीन कैसे दूसरी गढ़ाइहैं ? ॥

गौतम की घरनी ज्यों तरनी तरैगी मेरी,

प्रभु सों निषाद हूँकै बाद न बढ़ाइहैं ।

तुलसी के ईस राम रावरे सों साँची कहैं,

बिना पग धोए नाथ नाव न चढ़ाइहैं ॥८॥

जिनको पुनीत बारि धारे सिर पै पुरारि,

त्रिपथगामिनि-जसु वेद कहै गाइ कै ।

जिनको जोगींद्र मुनिवृंद देव देह भरि

करत बिरांग जप जोग मन लाइ कै ॥

तुलसी जिनकी धूरि परसि अहल्या तरी,

गौतम सिधारे गृह गौनो सो लिवाइ कै ।

तेई पायँ पाइकै चढ़ाइ नाव धोए बिनु

खवैहैं न पठावनी कै हूँहैं न हँसाइ कै ? ॥९॥

प्रभुरुख पाइ कै बोलाइ बाल घरनिहिँ

बंदि कै चरन चहुँ दिसि बैठे घेरि घेरि ।

छोटो सो कठौता भरि आनि पानी गंगाजू को

धोइ पाँय पीयत पुनीत बारि फेरि फेरि ॥

तुलसी सराहैं ताको भाग सानुराग सुर,

बरषै सुमन जय जय कहैं टेरी टेरी ।

बिबुध-सनेह-सानी बानी असयानी सुनी,

हँसे राघौ जानकी लषन तन हेरि हेरि ॥१०॥

सवैया

पुर तेँ निकसी रघुबीर-बधू, धरि धीर दये मग में डग द्वै ।

भल्लकीँ भरि भाल कनी जल की, पुट सूखि गए मधुराधर वै ॥

फिरि ब्रूभति हैं “चलनो अब केतिक, पर्णकुटी करिहौ कित है ?” ।
 तिय की लखि आतुरता पिय की अँखियाँ अति चारु चलीं जल चवै ॥११॥
 “जल को गए लखन हैं लरिका, परिलौ, पिय ! छाँह घरीक है ठाढ़े ।
 पोछि पसेउ बयारि करौं, अरु पायँ पखारिहैं भूभुरि डाढ़े” ॥
 तुलसी रघुवीर प्रिया स्रम जानि कै बैठि विलंब लौं कंटक काढ़े ।
 जानकी नाह को नेह लख्यौ, पुलको तनु, बारि विलोचन बाढ़े ॥१२॥
 ठाढ़े हैं नौ द्रुम डार गहे; धनु कांधे धरे, कर सायक लै ।
 विकटी अ्रुकुटी बड़री अँखियाँ, अनमोल कपोलन की छवि है ॥
 तुलसी असि मूरति आनि हिये जड़ डारिहैं प्राण निछावरि कै ।
 लम-सीकर साँवरि देह लसै मनो रासि महा तम तारक मै ॥१३॥

घनाचरी

जलजनयन, जलजानन, जटा है सिर,
 जोवन उमंग अंग उदित उदार हैं ।
 साँवरे गोरे के बीच भामिनी सुदामिनी सी,
 मुनिपट धरे, उर फूलनि के हार हैं ॥
 करनि सरासन सिलीमुख, निषंग कटि,
 अतिही अनूप काहू भूप के कुमार हैं ।
 तुलसी बिलोकि कै तिलोक के तिलक तीन,
 रहे नरनारि ज्यों चितेरे चित्रसार हैं ॥ १४ ॥

* लाला लूकनजाल की छपाई प्रति में इसके आगे यह सवैया और है—
 जलसूखि गए रसनाधर मंजुल कंज से लोचन चारु सुवै ।
 करुनानिधि कंत तुरंत कह्यौ कि ‘दुर’त महावन है इतवै’ ?
 सरसीरुह-लोचन मोचत नीर चितै रघुनायक सीय पै है ।
 “अब हीं बन, भामिनि ! पृथ्वि हौ तजि कोसलराज पुरी दिन द्वै ।
 इस सवैया में कहीं ‘तुलसी’ शब्द नहीं आया है, इससे संदेह है ।

१२—भूभुरि = गरम धूल ।

१४—चितेरा = चित्र ।

आगे सोहै साँवरो कुँवर, गोरो पाछे पाछे,
 आछे मुनि बेष धरे लाजत अनंग हैं ।
 बान बिसिषासन, बसन बन ही के कटि
 कसे हैं बनाइ, नीके राजत निषंग हैं ॥
 साथ निसिनाथमुखी पाथनाथ-नंदिनी सी,
 तुलसी बिलोके चित लाइ लेत संग हैं ।
 आनंद उमंग मन, जोवन उमंग तन,
 रूप की उमंग उमगत अंग अंग हैं ॥ १५ ॥

कवित्त

सुंदर बदन, सरसीरुह सुहाए नैन,
 मंजुल प्रसून माथे मुकुट जटनि के ।
 अंसनि सरासन लसत, सुचि कर सर,
 तून कटि, मुनिपट लूटक पटनि के ॥
 नारि मुकुमारि संग जाके अंग उबटि कै
 बिधि विरचे वरूथ विद्युतछटनि के ।
 गोरे को बरन देखे सोनो न सलोने लागै,
 साँवरे बिलोके गर्व घटत घटनि के ॥ १६ ॥
 बल्कल बसन, धनुबान पानि, तून कटि,
 रूप के निधान, घन-दामिनी-बरन हैं ।
 तुलसी सुतीय संग सहज सुहाए अंग,
 नवल कवैल हू ते कोमल चरन हैं ॥
 औरै सो बसंत, औरै रति, औरै रतिपति,
 मूरति बिलोके तन मन के हरन हैं ।

१५-बनाइ = अच्छी तरह, खूब ।

१६-लूटक पटनि के = वस्त्रों की शोभा को लूटने या हरनेवाले । घटनि = घटाओं ।

तापस वेपै बनाइ, पथिक पथै सुहाइ

चले लोक-लोचननि सुफल करन हैं ॥ १७ ॥

सवैया

बनिता बनी स्यामल गौर के बीच, विलोकहु, री सखी ! मोहिँ सी है ।

मग जोग न, कोमल क्यों चलिहैं ? सकुचात मही पदपंकज छूँ ॥

तुलसी सुनि ग्रामबधू विथकीं, पुलकीं तन औ चले लोचन चवै ।

सब भाँति मनोहर मोहन रूप, अनूप हैं भूप के बालक द्वै ॥१८॥

साँवरे गोरे सलोलने सुभाय, मनोहरता जिति मैं लियो है ।

बान कमान निषंग कसे, सिर सोहैं जटा, मुनिवेष कियो है ॥

संग लिये विधु-बैनी बधू रति को जेहि रंचक रूप दियो है ।

पाँयन तौ पनहीं न, पयादेहि क्यों चलि हैं ? सकुचात हियो है ॥१९॥

रानी मैं जानी अजानी महा, पवि पाहन हूँ ते कठोर हियो है ।

राज हु काज अकाज न जान्यो, कछो तिय को जिन कान कियो है ॥

ऐसी मनोहर मूरति ये, बिछुरे कैसे प्रीतम लोग जियो है ? ।

आँखिन में, सखि ! राखिबे जोग, इन्हैं किमि कै बनवास दियो है ? ॥२०॥

सीस जटा, उर बाहु विसाल, विलोचन लाल, तिरीछीसी भाँहैं ।

तून सरासन बान धरे, तुलसी बन-मारग में सुठि सोहैं ॥

सादर बारहिं बार सुभाय चितै तुम त्यों हमरो मन मौहैं ।

पृच्छति ग्रामबधू सियों “कहौ साँवरे से, सखि रावरे को हैं ?” ॥२१॥

सुनि सुंदर बैन सुधारस-साने, सयानी हैं जानकी जानी भली ।

तिरछे करि नैन दै सैन तिन्हैं समुझाइ कछू मुसुकाइ चली ॥

तुलसी तेहि औसर सोहैं सबै अबलोकति लोचन-लाहु अली ।

अनुराग-तड़ाग में भानु उदै बिगसीं मनो मंजुल कंज-कली ॥ २२ ॥

धरि धीर कहैं “चलु देखिय जाइ जहाँ सजनी रजनी रहिहैं ।

१९—विधुबैनी = चंद्रवदनी ।

२१—त्यों = तन, और ।

कहिहै जग पोच, न सोच कछु, फल लोचन आपन तौ लहिहैं ॥
 सुख पाइहैं कान सुने बतियाँ, कल आपुस में कछु पै कहिहैं ॥
 तुलसी अति प्रेम लगीं पलकै, पुलकीं लखि राम हिये महिहैं ॥२३॥
 पद कोमल, स्यामल गौर कलेवर, राजत कोटि मनोज लजाए ।
 कर बान सरासन, सीस जटा, सरसीरुह लोचन सोन सुहाए ॥
 जिन देखे, सखी ! सत भायहु तैं तुलसी तिन तौ मन फेरि न पाए ।
 यहि मारग आजु किसोर बधू बिधुवैनी समेत सुभाय सिधाए ॥२४॥
 मुखपंकज, कंज बिलोचन मंजु, मनोज-सरासन सी बनी भौहैं ।
 कमनीय कलेवर, कोमल स्यामल गौर किसोर, जटा सिर सोहैं ॥
 तुलसी कटि तून, धरे धनु बान, अचानक दीठि परी तिरछोहैं ।
 केहि भाति कहैं, सजनी ! तोहि सों मृदु मूरति द्वै निवसीं मन मोहैं ॥२५॥
 प्रेम सों पीछे तिरीछे प्रियाहि चितै चितु दै, चले लै चित चोरे ।
 स्याम सरीर पसेऊ लसै, हुलसै तुलसी छवि सो मन मोरे ॥
 लोचन लोल चलैं भ्रुकुटी, कल काम-कमानहु सो वृन तोरे ।
 राजत राम कुरंग के संग, निषंग कसे, धनु सों सर जोरे ॥२६॥
 सर चारिक चारु बनाइ कसे कटि, पानि सरासन सायक लै ।
 बन खेलत राम फिरैं मृगया, तुलसी छवि सो बरनै किमि कै ? ॥
 अवलोकि अलौकिक रूप मृगी मृग चौंकि चकैं चितवै चित दै ।
 न डगैं, न भगैं जिय जानि सिलीमुख पंच धरं रतिनायक है ॥२७॥
 बिन्ध्य के बासी उदासी तपोव्रतधारी महा विनु नारि दुखारे ।
 गौतमतीय तरी, तुलसी, सो कथा सुनि भे मुनिवृंद सुखारे ॥
 लैहैं सिला सब चंद्रमुखी परसे पद-मंजुल-कंज तिहारे ।
 कीन्हैं भली रघुनायकजू करुना करि कानन को पगु धारे ॥२८॥

२३—महि = मह, में ।

२४—सोन = शोण, लाल ।

२७—सिलीमुख पंच = चार तूनीर में और एक हाथ में ।

अरण्य कांड

पंचवटी बर पर्नकुटी तर बैठे हैं राम सुभाय सुहाए ।

सोहै प्रिया, प्रिय बंधु लसै, तुलसी सब अंग घने छविछाए ॥

देखि शृगा शृगनैनी कहे प्रिय बैन, ते प्रीतम के मन भाए ।

हेमकुरंग के संग सरासन सायक लै रघुनायक धाए ॥ १ ॥

जब अंगदादिन की मति गति मंद भई,
 पवन के पृत को न कूदिये को पलु गो ।
 साहसी है सैल पर सहसा सकेलि आइ
 चितवत चहुँ ओर, औरन को कलु गो ॥
 तुलसी रसातल को निकसि सलिल आयो,
 कोल कलमल्यो, अहि कमठ को बलु गो ।
 चारिहु चरन के चपेट चाँपे चिपिटि गो,
 उचके उचकि चारि अंगुल अचलु गो ॥ १ ॥

१-सकेलि = क्रीड़ा सहित, खेल ही खेल में ।

बासव बरुन विधि बन तेँ सुहावनो,
 दसानन को कानन वसंत को सिंगारु सो ।
 समग्र पुराने पात परत डरत बांत,
 पालत, ललात रति मार को बिहारु सो ॥
 देखे बर बापिका तडाग बाग को बनाव
 रागवस भो विरागी पवनकुमार सो ।
 सीय की दसा विलोकि विटप असोक तर,
 तुलसी विलोक्यो सो तिलोक सोक-सारु सो ॥१॥
 माली मेघमाल बनपाल विकराल भट
 नीके सब काल सींचै सुधासार नीर को ।
 मेघनाद तेँ दुलारो प्रान तेँ पियारो बाग,
 अति अनुराग जिय जातुधान धीर को ॥
 तुलसी सो जानि सुनि, सीय को दरस पाइ
 पैठो बाटिका बजाइ बल रघुवीर को ।
 बिद्यमान देखत दसानन को कानन सो
 तहस-नहस कियो साहसी समीर को ॥ २ ॥
 बसन बटोरि बोरि बोरि तेल तमीचर
 खोरि खोरि धाइ आइ बाँधत लँगूर हैं ।
 तैसो कपि कौतुकी डरात ढोलो गात कै कै,
 लात के अघात सहै जी में कहै 'कूर हैं' ॥
 बाल किलकारी कै कै, तारी दै दै गारी देत,
 पाछे लागे बाजत निसान ढोल तूर हैं ।

बालधी बढन लागी, ठौर ठौर दीन्हों आगि,
 बिंध की दवारि, कैधों कोटिसत सूर हैं ॥ ३ ॥
 लाइ लाइ आगि भागे बाल-जाल जहाँ तहाँ,
 लघु है निबुकि गिरिमेरु तेँ विसाल भो ।
 कौतुकी कपीस कूदि कनककँगूरा चढ़ि,
 रावन भवन जाइ ठाढ़ो तेहि काल भो ॥
 तुलसी बिराज्यो व्योम बालधी पसारि भारी,
 देखे हहरात भट काल तेँ कराल भो ।
 तेज को निधान मानो कोटिक कृसानु भानु,
 नख बिकराल, मुख तैसो रिस-लाल भो ॥ ४ ॥
 बालधी विसाल बिकराल ज्वाल-जाल मानों,
 लंक लीलिवे को काल रसना पसारी है ।
 कैधों व्योमबीथिका भरे हैं भूरि धूमकेतु,
 बीररस बीर तरवारि सी उधारी है ॥
 तुलसी सुरेस-चाप, कैधों दामिनी कलाप,
 कैधों चली मेरु तेँ कृसानु-सरि भारी है ।
 देखे जातुधान जातुधानी अकुलानी कहैं
 “कानन उजारयौ अब नगर प्रजारी है” ॥ ५ ॥
 जहाँ तहाँ बुबुक बिलोकि बुबुकारी देत
 “जरत निकेत धात्रो धात्रो लागि आगि रे ।
 कहाँ तात, मात, भ्रात, भगिनी, भामिनी, भाभी,
 ढोटे छोटे छोहरा अभागे भोरे भागि रे ॥
 हाथी छोरो, घोरा छोरो, महिष बृषभ छोरो,
 छेरी छोरो, सोवै सो जगावो जागि जागि रे” ॥

तुलसी विलोकि अकुलानी जातुधानी कहैं,
 “बार बार कह्यो पिय कपि सों न लागि रे !” ॥ ६ ॥

देखि ज्वालजाल, हाहाकार दसकंध सुनि
 कह्यो ‘धरो धरो’ धाए वीर बलवान हैं ।
 लिये सूल, सेल, पास, परिघ, प्रचंड दंड,
 भाजन सनीर, धीर धरे धनुवान हैं ॥

तुलसी समिध सौंज लंक-जज्ञकुंड लखि,
 जातुधान पुंगीफल, जव, तिल, धान हैं ।
 सुना सो लँगूल बलमूल, प्रतिकूल हवि
 खाहा महा हाँकि हाँकि हुनै हनुमान हैं ॥ ७ ॥

गोज्यो कपि गाज ज्यों, विराज्यो ज्वालजाल-जुत,
 भाजे वीर धीर, अकुलाइ उठ्यो रावनो ।
 ‘धाओ धाओ धरो’ सुनि धाए जतुधानधारि,
 बारिधारा उलदै जलद ज्यों न सावनो ।

लपट भूपट भहराने, हहराने बात
 भहराने भट परयो प्रबल परावनो ।
 ढकनि ढकेलि पेलि सचिव चले लै ठेलि,
 “नाथ न चलैगो बल अनल भयावनो” ॥ ८ ॥

बड़ो विकराल बेष देखि, सुनि सिंहनाद,
 उठ्यो मेघनाद सविषाद कहै रावनो ।
 बेग जीत्यो मारुत, प्रताप मारतंड कोटि,
 कालरु करालता बड़ाई जीतो बावनो ।

तुलसी सयाने जातुधान पछिताने मन,
 “जाको ऐसो दूत सो साहब अबै आवनो ॥”

काहे की कुसल रोषे राम बामदेवहू के,
 विषम बली सेां बादि बैर को बढ़ावने ॥ ८ ॥
 'पानी पानी पानी' सब रानी अकुलानी कहैं,
 जाति हैं परानी, गति जानि गजचालि है ।
 बसन विसारैं, मनि भूषन सँभारत न,
 आनन सुखाने कहैं “क्योंहूँ कोऊ पालिहै ?”
 तुलसी मँदोवै मींजि हाथ, धुनि माथ कहै
 “काहू कान कियो न मैं कह्यो कतेो कालि है” ॥
 बापुरो विभीषन पुकारि बार बार कहां,
 “बानर बड़ी बलाइ घने घर घालिहै” ॥ १० ॥
 कानन उजारयो तौ उजारयो न बिगारेउ कछू,
 वानर बिचारो वाँधि आन्यो हठि हार सेां ।
 निपट निडर देखि काहू ना लख्यो विसेषि,
 दीन्हो ना छुड़ाइ कहि कुल के कुठार सेां ।
 छोटे औ बड़े मेरे पूतऊ अनेरे सब,
 साँपनि सेां खेलैं, मेलैं गरे छुराधार सेां” ॥
 तुलसी मँदोवै रोइ रोइ कै बिगोवै आपु,
 “बार बार कह्यो मैं पुकारि दाढ़ीजार सेां” ॥ ११ ॥
 रानी अकुलानी सब डाढ़त परानी जाहिँ,
 सकैं ना विलोकि बेष केसरीकुमार को ।
 मींजि मींजि हाथ, धुनै माथ दसमाथ-तिय,
 तुलसी तिलौ न भयो बाहिर अगार को ।
 सब असबाब डाढ़ो, मैं न काढ़ो तैं न काढ़ो,
 जिय की परी सँभार, सहन भँडार को ? ।

१०—मँदोवै = मँदोदरी ।

११—हार = बन । अनेरे = व्यर्थ, निकम्मे । बिगोवै = बिहीन दशा करती है

स्त्रीभक्ति मँदोवै सविषाद देखि मेघनाद,
 “बयो लुनियत सब याही दाढ़ीजार को” ॥ १२ ॥
 रावन की रानी जातुधानी बिलखानी कहैं
 “हा हा ! कोऊ कहै बीसबाहु दसमाथ सों ।
 काहे मेघनाद, काहे काहे, रे महोदर ! तू
 धीरज न देत, लाइ लेत क्यों न हाथ सों ? ॥
 काहे अतिकाय, काहे काहे रे अकंपन !
 अभागे तिय त्यागे भौंड़े भागे जात साथ सों ? ।
 तुलसी बढ़ाय बादि साल तेँ विसाल बाहैं,
 याही बल, बालिसो ! विरोध रघुनाथ सों !” ॥ १३ ॥
 हाट, बाट, कोट ओट, अट्टनि, अगार, पैरि,
 खोरि खोरि दौरि दौरि दीन्ही अति आगि है ।
 आरत पुकारत, सँभारत न कोऊ काहू,
 व्याकुल जहाँ सों तहाँ लोग चले भागि हैं ॥
 बालधी फिरावै बार बार झहरावै, झरै
 बूँदिया सी, लंक पधिलाइ पाग पागिहै ।
 तुलसी बिलोकि अकुलानी जातुधानी कहैं
 “चित्रहू के कपि सों निसाचर न लागिहै” ॥ १४ ॥
 ‘लागि लागि आगि,’ भागि भागि चले जहाँ तहाँ,
 धीय को न माय, बाप पूत न सँभारहीं ।
 छूटे बार, बसन उवारे, धूमधुंधअंध ;
 कहैं बारे बूढ़े ‘बारि बारि’ बार बारहीं ॥
 हय हिहिनात भागे जात, घहरात गज,
 भारी भीर ठेलि पेलि रौंदि खौंदि डारहीं ।
 नाम लै चिलात, बिललात अकुलात अति

“तात तात ! तौंसियत, भौंसियत भारहीं” ॥१५॥

लपट कराल ज्वालजालमाल दहूँ दिसि,

धूम अकुलाने पहिचानै कौन काहि रे ?

पानी को ललात, विललात, जरे गात जात,

“परे पाइमाल जात, “भ्रात ! तू निबाहि रे ॥

प्रिया तू पराहि, नाथ नाथ ! तू पराहि, बाप,

बाप ! तू पराहि, पूत पूत ! तू पराहि रे” ।

तुलसी विलोकि लोग व्याकुल विहाल कहैं

“लेहि दससीस अब बीस चख चाहि रे” ॥१६॥

बीथिका बजार प्रति, अटनि अगार प्रति,

पँवरि पगार प्रति बानर विलोकिए ।

अध ऊर्द्ध बानर, बिदिसि दिसि बानर है,

मानहु रह्यो है भरि बानर तिलोकिए ॥

मूँदे आँखि हीय में, उघारे आँखि आगे ठाढ़े,

धाइ जाइ जहाँ तहाँ और कोऊ को किए ? ।

“लेहु अब लेहु, तब कोऊ न सिखाओ मानो,

सोई सतराइ जाइ जाहि जाहि रोकिए” ॥१७॥

एक करै धौज, एक कहै काढ़ौ सौँज,

एक औँजि पानी पी कै कहै ‘बनत न आवनो’ ।

एक परे गाढ़े, एक डाढ़त हीं काढ़े, एक

देखत हैं ठाढ़े, कहैं ‘पावक भयावनो’ ॥

तुलसी कहत एक “नीके हाथ लाए कपि,

अजहूँ न छाँड़ै बाल गाल को बजावनो ।

१५-तौंसियत = तपे जाते हैं ।

१६-पाइमाल जात = पामाल होते हैं, नष्ट हुए जाते हैं ।

१७-सतराइ जाइ = चिढ़ जाता था ।

“धात्रो रे, बुभ्रात्रो रे कि बावरे है रावरे, या
 औरै आगि लागी, न बुभ्रावै सिंधु सावनो” ॥१८॥
 कोपि दसकंध तब प्रलयपयोद बोले,
 रावनरजाइ धाइ आए जूथ जोरि कै ।
 कह्यो लंकपति “लंक बरत बुताओ बेगि,
 वानर बहाइ मारौ महा बारि बोरि कै” ॥
 “भले नाथ ! ” नाइ माथ चले पाथप्रदनाथ,
 वरपैँ मुसलधार बार बार घोरि कै ॥
 जीवन तेँ जागी आगी, चपरि चौगुनी लागी,
 तुलसी भभरि मेघ भागे मुख मोरि कै ॥१९॥
 इहाँ ज्वाल जरे जात, उहाँ ग्लानि गरे गात,
 सूखे सकुचात सब कहत पुकार हैं ।
 “जुग-घट भानु देखे, प्रलय-कृसानु देखे,
 सेषमुखअनल विलोके बार बार हैं ॥
 तुलसी सुन्यो न कान सलिल सर्पी समान,
 अति अचरज कियो केसरीकुमार है” ।
 बारिद बचन सुनि धुनैँ सीस सचिवन्ह,
 कहैं “दससीसईसबामताबिकार है” ॥२०॥
 “पावक, पवन, पानी, भानु, हिमवान, जम,
 काल, लोकपाल मेरे डर डाँवाडोल हैं ।
 साहिब महेंस सदा, संकित रमेस मोहिँ,
 महातपसाहस विरंचि लीन्हे मोल हैं ॥
 तुलसी तिलोक आजु दूजो न बिराजै राजा.

१८-धौज = दौड़ धूप । सौंज = सामान । औंजि = ऊमस से घबराकर ।

१९-घोरि कै = गरज कर । जीवन = जाल ।

२०-सर्पी = घृत, बी ।

बाजे बाजे राजनि के बेटा बेटा ओल हैं ।
 को है ईस नाम ? को जो बाम होत मोहू सो को ?
 मालवान ! रावरे के बावरे से बोल हैं” ॥२१॥
 “भूमि भूमिपाल, व्यालपालक पताल, नाकपाल,
 लोकपाल जेते सुभट समाज हैं ।
 कहै मालवान “जातुधानपति रावरे को
 मनहूँ अकाज अनै ऐसो कौन आज है ? ॥
 रामकोह-पावक, समीरसीयखास, कीस-
 ईस-बामता बिलोकु, बानर को व्याज है ।
 जारत प्रचारि फेरि फेरि सो निसंक लंक,
 जहाँ बाँको बीर तोसो सूर सिरताज है” ॥२२॥
 पान, पकवान विधि नाना को, सँधानो, सीधो,
 विविध विधान धान बरत बखारहीं ।
 कनककिरीट कोटि, पलँग, पेटारे, पीठ
 काढ़त कहार, सब जरे भरे भारही ॥
 प्रबल अनल बाढ़ै, जहाँ काढ़ै तहाँ डाढ़ै,
 भूपट लपट भरै भवन भँडारही ।
 तुलसी अगार न पगार न बजार बच्यां,
 हाथी हथिसार जरे, घोरे घोरसारहीं ॥२३॥
 हाट बाट हाटक पिधिलि चलो धी सो घनो,
 कनक-कराही लंक तलफति ताय सों ।

२१- हिमवान = चंद्रमा । ओल = किसी का अपने किसी प्रिय प्राणी को दूसरे के पास इसलिए रख छोड़ना कि यदि वह प्रतिज्ञा न पूरी करे तो दूसरा उस प्राणी के साथ जो चाहे सो करे ।

२३-सँधाना = अचार, चटनी । २४-पीठ = पाठा, पीढ़ा, काष्ठासन । पगार = प्राकार, चारदीवारी ।

नाना पकवान जातुधान बलवान सब,
 पागि पागि ढेरी कीन्ही भली भाँति भाय सों ॥
 पाहुने कृसानु पवमान सों परोसो,
 हनुमान सनमानि कै जेंवाये चित चाय सों ।
 तुलसी निहारि अगिनारि दै दै गारि कहैं,
 “बावरे सुरारि वैर कीन्हों रामराय सों” ॥२४॥
 रावन सो राजरोग बाढ़त विराटउर,
 दिन दिन विकल सकलसुखराँक सो ।
 नाना उपचार करि हारे सुर सिद्ध मुनि,
 होत न विसोक, ओत पावै न मनाक सो ॥
 राम की रजाय तँ रसायनी समीरसूनु
 उतरि पयोधिपार सोधि सरवाक सो ।
 जातुधान बुट, पुटपाक लंक जातरूप,
 रतन जतन जारि कियो है मृगांक सो ॥२५॥
 जारि बारि कै विधूम, बारिधि बुताइ लूम,
 नाइ माथो, पगनि भो ठाढ़ो कर जोरि कै ।
 “मातु ! कृपा कीजै, सहदानी दीजै” सुनि सीय
 दीन्हों है असीस चारु चूड़ामनि छोरि कै ॥
 “कहा कहौं, तात ! देखे जात ज्यों विहात दिन,
 बड़ी अवलंब ही सो चले तुम तोरि कै” ।
 तुलसी सनीर नैन, नेह सों सिथिल बैन,
 विकल विलोकि कपि कहत निहोरि कै ॥ २६ ॥
 “दिवस छ सात जात जानिबे न, मातु धरु
 धीर, अरि अंत की अवधि रही थोरिकै ।

२५-ओत=बीमारी में कुछ आराम, चैन । मनाक=घोड़ा । बुट=बूटी ।

२६-सहदानी=पहचान का चिह्न, निशान । अवलंब ही=अवलंब थी ।

बारिधि बँधाय सेतु ऐहँ भानुकुलकेतु,

सानुज कुसल कपिकटक बटोरि कै" ॥

बचन बिनीत कहि सीता को प्रबोध करि,

तुलसी त्रिकूट चढ़ि कहत डफोरि कै ।

“जै जै जानकीस दससीसकरिकेसरी”

कपीस कूद्यो बातघात बारिधि हलोरि कै ॥ २७ ॥

साहसी समीरसूनु नीरनिधि लंघि, लखि

लंक सिद्धिपीठ निसि जागो है मसान सो ।

तुलसी विलोकि महा साहस प्रसन्न भई

देवी सिय सारिणी, दियो है बरदान सो ॥

बाटिका उजारि, अच्छ-धारि मारि, जारि गढ़,

भानुकुलभानु को प्रतापभानु भानु सो ।

करत बिसोक लोककोकनद, कोक-कपि,

कहै जामवंत आयो आयो हनुमान सो ॥ २८ ॥

गगन निहारि, किलकारी भारी सुनि,

हनुमान पहिचानि भये सानंद सचेत हैं ।

बूढ़त जहाज बच्चो पथिकसमाज, मानो

आजु जाये जानि सब अंकमाल देत हैं ॥

“जै जै जानकीस, जै जै लषन कपीस” कहि

कूदैं कपि कौतुकी, नचत रेत रेत हैं ।

अंगद मयंद नल नील बलसील महा,

बालधी फिरावै, मुख नाना गति लेत हैं ॥ २९ ॥

२७—डफोरि कै = हाँक देकर, ललकार कर ।

२८—धारि = समूह, सेना ।

२९—बालधी = पूँछ, दुम ।

आयो हनुमान प्रानहेतु, अंकमाल देत,
 लेत पगधूरि एक चूमत लँगूल हैं ।
 एक बूझै बार बार सीय समाचार कहे,
 पवनकुमार भो विगतस्रमसूल हैं ॥
 एक भूखे जानि आगे आने कंद मूल फल,
 एक पूजे बाहुबल तोरि मूल फूल हैं ।
 एक कहैं तुलसी 'सकल सिधि ताके जाके
 कृपापाथनाथ सीतानाथ सानुकूल हैं ॥ ३० ॥
 सीय को सनेहसील, कथा तथा लंक की
 चले कहत चाय सों, सिरानो पथ छन में ।
 कह्यो जुवराज बोलि बानर समाज "आजु,
 खाहु फल" सुनि पेलि पैठे मधुवन में ॥
 मारे बागवान, ते पुकारत देवान गे,
 'उजारे बाग अंगद'; दिखाएघाय तन में ।
 कहैं कपिराज "करि काज आये कीस,
 तुलसीस की सपथ महामोद मेरे मन में ॥ ३१ ॥
 नगर कुबेर को सुमेरु की बराबरी,
 बिरंचि बुद्धि को बिलास लंक निरमान भो ।
 ईसहि चढ़ाय सीस बीसबाहु बीर तहाँ,
 रावन सो राजा रजतेज को निधान भो ॥
 तुलसी त्रिलोक की समृद्धि सौज संपदा
 सकेलि चाकि राखी रासि, जाँगर जहान भो ।

तीसरे उपास बनवास सिंधुपास सो

समाज महाराज जू को एक दिन दान भो ॥ ३२ ॥

३२—चाकि राखी = अन्न की राशि को जैसे किसान गोबर की रेखा से घेर देते हैं (जिसमें चुराने से पता चल जाय) उसी प्रकार उसने घेर रक्खा ।
जागर = अन्न झाड़ा हुआ डंठल ।

लंका कांड

बड़े विकराल भालु, वानर विसाल बड़े,
 तुलसी बड़े पहार लै पयोधि तोपिहैं ।
 प्रबल प्रचंड वरिवंड बाहुदंड खंड,
 मंडि मेदिनी को मंडलीक-लीक लोपिहैं ।
 लंकदाहु देखे न उछाहु रह्यो काहुन को,
 कहैं सब सचिव पुकारि पाँव रोपि हैं ॥
 “बाचिहै न पाछे त्रिपुरारि हू मुरारिहू के,
 को है रन रारि को जौं कोसलेस कोपिहैं ?” ॥ १ ॥
 त्रिजटा कहत बार बार तुलसीस्वरी सों,
 “राघौ बान एक ही समुद्र सातौ सोपिहैं ।
 सकुल सँघारि जातुधानधारि, जंबुकादि
 जोगिनीजमाति कालिकाकलाप तोषिहैं ॥
 राज दै निवाजिहैं बजाइ कै भीषनै,
 बजेंगे व्योम बाजने विबुध प्रेम पोषिहैं ।
 कौन दसकंध, कौन मेघनाद बापुरो,
 को कुंभकर्न कीट जब राम रन रोषिहैं” ॥ २ ॥
 बिनय सनेह सों कहति सीय त्रिजटा सों
 “पाये कछु समाचार आरजमुवन के ?” ।
 “पाये जू! बँधायो सेतु, उतरे कटक कुलि,
 आये देखि देखि दूत दारुन दुवन के ॥
 बदनमलीन बलहीन दीन देखि मानौ
 मिटे घटे तमीचरतिमिर भुवन के ।

लोकपतिसोककोक, मूँदे कपि-कोकनद,
दंड दूँ रहे हैं रघु आदित उवन के” ॥ ३ ॥

भूलना

सुभुज मारीच खर त्रिसिर दूषन बालि
दलत जेहि दूसरो सर न साँध्यो ।
आनि परबाम विधिबाम तेहि राम सौं
सकत संग्राम दसकंध काँध्यो ॥
समुझि तुलसीस कपिकर्म घर घर घेरु,
विकल सुनि सकल पाथोधि बाँध्यो ।
बसत गढ़ लंक लंकेस नायक अछत
लंक नहिं खात कोउ भात राँध्यो ॥ ४ ॥

सवैया

विस्वजयी भृगुनायक से विनु हाथ भये हनि हाथ-हजारी ।
बातुल मातुल की न सुनी सिख, का तुलसी कपि लंक न जारी ? ॥
अजहूँ तौ भलो रघुनाथ मिले, फिरि बूझिहै को गज कौन गजारी ।
कीर्त्ति बड़ो, करतूति बड़ो जन, बात बड़ो, सो बड़ोई बजारी ॥५॥
जब पाहन भे बनबाहन से, उतरे बनरा 'जय राम' रहे ।
तुलसी लिये सैल-सिला सब सोहत, सागर ज्यों बलबारि बड़े ॥
करि कोप करें रघुवीर को आयसु, कौतुक ही गढ़ कूदि चढ़े ।
चतुरंग चमू पल में दलि कै रन रावन राढ़ के हाड़ गढ़े ॥ ६ ॥

घनाचरी

विपुल बिसाल बिकराल कपि भालु मानौ
काल बहु बेध धरे धाये किये करषा ।

३—लोक पति-सोक-कोक = सशोक-लोकपति-कोक ।

५—कीर्त्ति बड़ो = कीर्त्ति में बड़ा ।

६—रहे = रटा, बोले ।

लिये सिला सैल, साल ताल औ तमाल तोरि
 तोपैं तोयनिधि, सुर को समाज हरषा ॥
 डगे दिगकुंजर, कमठ कोल कलमले,
 डोले धराधर-धारि, धराधर धरषा ।
 तुलसी तमकि चलैं, राघौ की सपथ करैं,
 को करै अटक कपि-कटक अमरषा ? ॥ ७ ॥
 आए मुक सारन बोलाए, ते कहन लागे,
 पुलक सरीर सेना करत फहम ही ।
 महाबली बानर बिसाल भालु काल से
 कराल हैं, रहे कहाँ, समाहिंगे कहाँ मही' ।
 हँस्यो दसमाथ रघुनाथ को प्रताप सुनि,
 तुलसी दुरावै मुख सूखत सहमही ॥
 राम के बिरोधे बुरो विधि हरि हरहू को,
 सबको भलो है राजा राम के रहम ही ॥ ८ ॥
 'आयो आयो आयो सोई बानर बहोरि,' भयो
 सोर चहुँ ओर लंका आए जुबराज के ।
 एक काढै सौज, एक धौज करै कहा ह्वैहै,
 'पोच भई महा' सोच सुभट समाज के ॥
 गाज्यो कपिराज रघुराज की सपथ करि,
 मूँदे कान जातुधान मानो गाजे गाज के ।
 सहमि सुखात बातजात की सुरति करि,
 लवा ज्यों लुकात तुलसी भूपेते बाज के ॥ ९ ॥
 तुलसीस-बल रघुवीर जू के बालिसुत
 बाहि न गनत, बात कहत करेरी सी ।

७—धराधर = (१) पर्वत (२) शेष । धरषा = धर्षित हुआ ।

९—बातजात = हनुमान् ।

“बखसीस ईस जू की खीस होत देखियत,
रिस काहें लागति कहत हैं तो तेरी सी ।

चढ़ि गढ़ मढ़ दढ़ कोट के कँगूरे कोपि,
नेकु धका दैहैं डैहैं डेलन की डेरी सी ॥

सुनु दसमाथ ! नाथ-साथ के हमारे कपि
हाथ लंका लाइहैं तो रहैगी हथेरी सी ॥ १० ॥

दूषन विराध खर त्रिसिर कबंध बधे,
तालऊ दिसाल बेधे, कौतुक है कालि को ।

एक ही विसिष बस भयो वीर बाँकुरो जो,
तोहू है विदित बल महाबली बालि को ॥

तुलसी कहत हित, मानतो न नेकु संक,
मेरो कहा जैहै, फल पैहै तू कुचालि को ।

वीर-करि-केसरी कुठारपानि मात्नी हारि,
तेरी कहा चली, बिड ! तो सो गनै घालि को ॥ ११ ॥

सवैया

तोसों कहैं दसकंधर रे, रघुनाथ-बिरोध न कीजिय वारे ।
बालि बली खरदूषन और अनेक गिरे जे जे भीति में दारे ॥
ऐसिय हाल भई तोहिं धौं, नतु लै मिलु सीय चहै सुख जौ रे ।
राम के रोष न राखि सकैं तुलसी विधि, श्रीपति, संकर सौ रे ॥ १२ ॥
तू रजनीचरनाथ महा, रघुनाथ के सेवक को जन हैं हैं ।
बलवान है खान गली अपनी, तोहिं लाज न गाल बजावत सौहैं ।

१०—खीस होत = नष्ट होती । मढ़ = मंडप । हाथ की हथेरी सी = समथल, सपाट ।

११—कुठारपानि = परशुराम । बिड = बिट, नीच, खल । घालि गनै = घलुए या पसंगे बराबर समकृता है । कुछ समकृता है ।

१२—धौं = ज़ोर देने के लिये प्रयुक्त शब्द, तो ।

वीस भुजा दससीस हरौं न डरौं प्रभु आयसुभंग ते जौ हैं ।
 खेत में केहरि ज्यों गजराज दलौं दल बालि को बालक तौ हैं ॥ १३ ॥
 कोसलराज के काज हैं आज त्रिकूट उपारि लै वारिधि बोरौं ।
 महाभुज-दंड द्वै अंडकटाह चपेट की चोट चटाक दै फोरौं ॥
 आयसुभंग ते जौ न डरौं सब मीजि सभासद सेनित खोरौं ।
 बालि को बालक जौ तुलसी दसहूमुख केरन में रद तोरौं ॥ १४ ॥
 अति कोप सों रोप्यो है पाँव सभा, सब लंक ससंकित सोर मचा ।
 तमके धननाद से धीर पचारि कै, हारि निसाचर सैन पचा ॥
 न टरै पग मेरुहु तें गरु भो, सो मनो महि संग विरंचि रचा ।
 तुलसी सब सूर सराहत हैं “जगमें बलसालि है बालि-बचा” ॥ १५ ॥

घनाचरी

रोप्यो पाँव पैज कै विचारि रघुवीरबल,
 लागे भट सिमिटि न नेकु टसकतु है ।
 तज्यो धीर धरनि, धरनिधर धसकत,
 धराधर धीर भार सहि न सकतु है ॥
 महाबली बालि को दबत दलकतु भूमि,
 तुलसी उछरि सिंधु मेरु मसकतु है ।
 कमठ कठिन पीठि, घटा परो मंदर को,
 आयो सोई काम, पै करेजो कसकतु है ॥ १६ ॥

भूलना

कनकगिरिसंग चढ़ि देखि मर्कट कटक,
 बदति मंदोदरी परम भीता ।

१४—खोरौं = स्नान करूँ, नहाऊँ ।

१६—घटा = लगातार बहुत दिनों तक दाब पड़ते रहने से कड़ा पड़ा हुआ चमड़ा जिसमें वेदना कम होती है । घट्टा ।

“सहसभुज-मत्त-गजराज-रनकेसरी

परसुधर-गर्व जेहि देखि बीता ॥

दास तुलसी समरसूर कोसलधनी

ख्याल ही बालि बलसालि जीता ।

रे कंत ! तून दंत गहि सरन श्रीराम कहि,

अजहुँ यहि भाँति लै सौंपु सीता ॥१७॥

रे नीच ! मारीच बिचलाइ, हति ताड़का

भंजि सिवचाप सुख सबहि दीन्ह्यो ।

सहस-दसचारि खल सहित खर दूषनहि,

पठै जमधाम, तैं तउ न चीन्ह्यो ॥

मैं जु कहौं कंत सुनु संत भगवंत सौं,

बिमुख ह्वै बालि फल कौन लीन्ह्यो ? ।

बीस भुज सीस दस खीस गए

तबहिँ जब ईस के ईस सों बैर कीन्ह्यो ॥ १८ ॥

बालि दलि काल्हि जलजान पाषाण क्रिय,

कंत ! भगवंत तैं तउ न चीन्हे ।

बिपुल बिकराल भट भालु कपि काल से,

संग तरु तुंग गिरिसृंग लीन्हे ॥

आइगे कोसलाधीस तुलसीस जेहि

छत्रमिस मौलि दस दूरि कीन्हे ।

ईस-बकसीस जनि खीस करु ईस ! सुनु,

अजहुँ कुल कुसल बैदेहि दीन्हे ॥ १९ ॥

सैन के कपिन को को गनै अरुंदै,

महाबलबीर हनुमान जानी ।

भूलि है दसदिसा सेस पुनि डोलिहैं

कोपि रघुनाथ जब बान तानी ॥
 बालिहू गर्व जिय माहिँ ऐसो कियो,
 मारि दहपट कियो जम की घानी ।
 कहति मंदोदरी सुनहि, रावन ! मतो,
 बेगि लै देहि वैदेहि रानी । २० ॥
 गहन उज्जारि पुरजारि सुत मारि तव,
 कुसल गो कीस बरबेर- जाको ।
 दूसरो दूत पन रोपि कोप्यो सभा,
 खर्व कियो सर्व को गर्व थाको ॥
 दास तुलसी सभय बदति मयनंदिनी,
 मंदमति कंत ! सुनु मंत म्हाको ।
 तौलौं मिलु बेगि नहिँ जौलौं रन रोष भयो,
 दासरथि वीर विरुदैत बाँको ॥ २१ ॥

घनाक्षरी

कानन उजारि, अच्छ मारि, धारि धूरि कीन्हीं,
 नगर प्रजार्यो सो बिलोक्यो बल कीस को ।
 तुम्हैं विद्यमान जातुधान मंडली में कपि
 कोपि रोप्यो पाँउ, सो प्रभाव तुलसीस को ॥
 कंत ! सुनु मंत, कुल अंत किये अंत हानि,
 हातो कीजै हीय तेँ भरोसो भुज बीस को ।
 तौलौं मिलु बेगि जौलौं चाप न चढ़ायो राम,
 रोषि बान काढ़्यो न दलैया दससीस को ॥ २२ ॥

२०—दहपट कियो = ध्वस्त किया ।

२१—बरबेर = बड़े शरीरवाला । थाको = (१) तुम्हारा वा (२) ढीलापड़ा । म्हाको = मेरा ।

२२—हातो कीजै = दूर दीजिए ।

पवन को पूत देखौ दूत बीर बाँकुरो जो
 बंक गढ़ लंक सो ढका ढकेलि ढाहिगो ॥
 बालि बलसालि को, सो काल्हि दाप दलि, कोपि
 रोअ्यो पाँउ, चपरि चमू को चाउ चाहिगो ।
 सोई रघुनाथ कपि साथ पाथनाथ बाँधि,
 आए नाथ ! भागे तँ खिरिखेह खाहिगो ॥
 तुलसी गरव तजि, मिलिवे को साज सजि,
 देहि सीय नतौ, पिय ! पाइमाल जाहिगो ॥ २३ ॥
 उदधि अपार उतरत नहिं लागी बार,
 केसरीकुमार सो अदंड कैसो डाँड़िगो ।
 बाटिका उजारि अच्छ रच्छकनि मारि, अट
 भारी भारी रावरे के चाउर से काँड़िगो ॥
 तुलसी तिहारे बिद्यमान जुवराज आजु,
 कोपि पाँव रोपि, बस कै छोहाइ छाँड़िगो ।
 कहे की न लाज, पिय ! अजहूँ न आए बाज,
 सहित समाज गढ़ राड़ि कै सो भाँड़िगो ॥ २४ ॥
 जाके रोष दुसह त्रिदोष दाह दूरि कीन्है,
 पैयत न छत्रीखोज खोजत खलक में ।
 महिषमती को नाथ साहसी सहसबाहु
 समर समर्थ, नाथ ! हेरिए हलक में ॥
 सहित समाज महाराज सो जहाजराज
 बूड़ि गयो जाके बलबारिधिछलक में ।
 दूटत पिनाक के मनाक बाम राम से, ते
 नाक बिनु भये भृगुनायक पलक में ॥ २५ ॥

२३—खिरिखेह = खरोच कर ।

२४—खलक = [अ० खलक] संसार । हलक = [अ० हलक] कंड
 अर्थात् हृदय । नाक = प्रतिष्ठा ।

कीन्हों छोनी छत्री बिनु, छोनिपछपनहार
 कठिन कुठारपानि बीर बानि जानि कै ।
 परम कृपाल जो नृपाल लोकपालन पै,
 जब धनु हाई ह्वै मन अनुमानि कै ॥
 नाक में पिनाक मिस वामता विलोकि राम
 रोक्क्यो परलोक, लोक भारी भ्रम भानि कै ।
 नाइ दस माथ सहि, जोरि बीस हाथ, पिय !
 मिलिए पै नाथ रघुनाथ पहिचानि कै ॥ २६ ॥
 कह्यो मत मातुल विभीषनहु बार बार,
 आँचर पसारि पिय पाँइ लै लै हैं परी ।
 विदित विदेहपुर, नाथ ! भृगुनाथगति,
 समय सयानी कीन्ही जैसी आइ गौं परी ॥
 बायस, विराध, खर, दूषन, कबंध, बालि,
 वैर रघुबीर के न पूरी काहु की परी ।
 कंत बीस लोचन विलोकिए कुमंत-फल,
 ख्याल लंका लाई कपि राँड की सी भोपरी ॥ २७ ॥

सवैया

राम सो साम किये नित है हित, कोमल काज न कीजिए टाँटे ।
 आपनि सूझि कहौं, पिय ! बूझिए, जूझिबे जोग न ठाहर नाटे ॥
 नाथ ! सुनी भृगुनाथकथा, बलि बालि गए चलि बात के साँटे ।
 भाइ विभीषन जाइ मिल्यो प्रभु आइ परे सुनी सायर-काँटे ॥ २८ ॥
 पालिबे को कपि-भालु-चमू जमकाल करालहु को पहरी है ।
 लंक से बंक महागढ़ दुर्गम ढाहिबे दाहिबे को कहरी है ॥

२६—पै = अवश्य, निश्चय । हाई ह्वै = दूटेगा ।

२७—लाई = जलाई ।

२८—साँटे = पकड़े रहने से । सायर = सागर । काँटे = किनारे, तट पर ।

तीतर-तोम तमीचर-सेन समीर को सूनु बड़ो बहरी है ॥
नाथ भलो रघुनाथ मिले, रजनीचर-सेन हिये हहरी है ॥ २६ ॥

घनाचरी

रोष्यो रन रावन, बोलाए वीर बानइत,
जानत जे रीति सब संजुग समाज की ।
चली चतुरंग चमू, चपरि हने निसान,
सेना सराहन जोग रातिचर-राज की ॥
तुलसी विलोकि कपि भालु किलकत,
ललकत लखि ज्यों कँगाल पातरी सुनाज की ।
राम रुख निरखि हरषे हिय हनुमान,
मानों खेलवार खोली सीसताज बाज की ॥ ३० ॥
साजिकै सनाह गजगाह सउछाह दल,
महाबली धाये बीर जातुधान धीर के ।
इहाँ भालु बंदर बिसाल मेरु मंदर से,
लिये सैल साल तोरि नीरनिधि-तीर के ॥
तुलसी तमकि ताकि भिरे भारी जुद्ध क्रुद्ध,
सेनप सराहैं निज निज भट भीर के ।
रंडन को झुंड भूमि भूमि झुकरे से नाचै,
समर सुमार सूर मारे रघुवीर के ॥ ३१ ॥

सवैया

तीखे तुरंग कुरंग सुरंगनि साजि चढ़े छँटि छैल छबीले ।
भारी गुमान जिन्हें मन में, कबहूँ न भये रन में तनु ढीले ॥

२६—कहरी = [अ० कहर] क्रोधो, आफत दानेवाला । बहरी = एक प्रकार का शिकारी पक्षी ।

३१—सनाह = कवच । गजगाह = भूल, पाखर । झुकरे से = झुंमलाए से । सुमार सूर = चुने हुए वीर ।

तुलसी गज से लखि केहरि लौं भूपटे पटके सब सूर सलीले ।
 भूमि परे भट घूमि कराहत, हाँकि हने हनुमान हठीले ॥३२॥
 सूर सजोइल साजि सुबाजि, सुसेल धरे बगमेल चले हैं ।
 भारी भुजा भरी, भारी सरीर, बली विजयी सब भाँति भले हैं ॥
 तुलसी जिन्हें धाये धुकै धरनीधर, धौर धकानि सों मेरु हले हैं ।
 ते रन-तीर्थनि लखन-लाखन-दानि ज्यों दारिद दावि दले हैं ॥३३॥
 गहि मंदर बंदर आलु चले सो मनो उनये घन सावन के ।
 तुलसी उत झुंड प्रचंड झुके, भूपटै भट जे सुरदावन के ॥
 विरुझे विरुदैत जे खेत अरे, न टरे हठि वैर बढ़ावन के ।
 रन मारि मची उपरी उपरा, भले वीर रघुपति रावन के ॥३४॥
 सर तोमर सेल समूह पँवारत, मारत वीर निसाचर के ।
 इत ते तल ताल तमाल चले, खर खंड प्रचंड महीधर के ॥
 तुलसी करि केहरि-नाद भिरे, भट खग खगे खपुवा खरके ।
 नख दंतन सों भुजदंड विहंडत, मुंड सों मुंड परे भर के ॥३५॥
 रजनीचर मत्तगयंद-घटा विघटै मृगराज के साज लरै ।
 भूपटै, भट कोटि मही पटकै, गरजै रघुवीर की सौंह करै ॥
 तुलसी उत हाँक दसानन देत, अचेत भे वीर को धीर धरै ? ।
 विरुझो रन मारुत को विरुदैत, जो कालहु काल सो बूझि परै ॥३६॥
 जे रजनीचर वीर बिसाल कराल बिलोकत काल न खाए ।
 ते रन रौर कपीस-किसोर बड़े बरजोर परे फँग पाए ॥
 लूम लपेटि अकास निहारि कै हाँक हठी हनुमान चलाए ।
 सूखि गे गात चले नभ जात, परे अम-वातन भूतल आए ॥३७॥

३२—सलीले = लीला से, खेल में ।

३५—खपुवा = भगोड़े भरती के, निकम्मे । खगे = घँसे ।

३६—साज = समान, तरह ।

३७—फँग = फंदा, पंजा । अम-वातन = चक्र में ।

जो दससीस महीधर-ईस को, बीस भुजा खुलि खेलनहारो ।
 लोकप दिग्गज दानव देव सबै सहमैं सुनि साहस भारो ॥
 बोर बड़ो बिरुदैत बली, अजहूँ जग जागत जासु पँवारो ।
 सो हनुमान हनीमुठिका, गिरिगो गिरिराज ज्यों गाज को मारो ॥३८॥
 दुर्गम दुर्ग पहार तें भारे प्रचंड महा भुजदंड बने हैं ।
 लक्ख में पक्खर तिकखन तेज जे सूर समाज में गाज गने हैं ॥
 ते बिरुदैत बली रन-बाँकुरे हाँकि हठी हनुमान हने हैं ।
 नाम लै राम दिखावत बंधु को, घूमत घायल घाय घने हैं ॥३९॥

घनाचरी

हाथिन सों हाथी मारे, घोड़े घोड़े सों सँहारे;
 रथनि सों रथ बिदरनि बलवान की ।
 चंचल चपेट चोट चरन चकोट चाहैं,
 हहरानी फौजें भहरानी जातुधान की ॥
 बारबार सेवक-सराहना करत राम,
 तुलसी सराहै रीति साहेब सुजान की ।
 लाँबी लुम लसत लपेटि पटकत भट,
 देखौ देखौ, लखन ! लरनि हनुमान की ॥४०॥
 दबकि दबारे एक, बारिधि में बोरे एक,
 मगन मही में एक गगन उड़ात हैं ।
 पकरि पछारे कर चरन उखारे एक,
 चीरि फारि डारे, एक मींजि मारे लात हैं ॥
 तुलसी लखत राम-रावन विबुध, विधि,
 चक्रपानि, चंडीपति, चंडिका सिहात हैं ।

३८—पँवारा = लंबी कथा, वीर गाथा ।

३९—पक्खर = लड़ाई की झूल, कवच ।

बड़े बड़े बानइत वीर बलवान बड़े,
 जातुधान जूथप निपाते वातजात हैं ॥४१॥
 प्रबल प्रचंड वरिवंड बाहुदंड वीर,
 धाये जातुधान हनुमान लियो घेरि कै ।
 महाबल-पुंज कुंजरारि ज्यों गरजि भट
 जहाँ तहाँ पटके लँगूर फेरि फेरि कै ॥
 मारे लात, तोरे गात, भागे जात, हाहा खात,
 कहैं 'तुलसीस राखि राम की सौं' टेरि कै ।
 ठहर ठहर परे कहरि कहरि उठै,
 हहरि हहरि हर सिद्ध हँसे हेरिकै ॥ ४२ ॥
 जाकी बाँकी वीरता सुनत सहमत सूर,
 जाकी आँच अबहूँ लसत लंक लाह सी ।
 सोई हनुमान बलवान बाँके बानइत,
 जाहि जातुधान-सेना चले लेत थाह सी ॥
 कंफत अकंपन, सुखाय अतिकाय काय,
 कुंभऊकरन आइ रह्यो पाइ आह सी ।
 देखे गजराज मृगराज ज्यों गरजि धायो
 वीर रघुवीर को समीरसूनु साहसी ॥ ४३ ॥
 भूलना
 मत्तभट-मुकुट-दसकंध-साहस-सइल-
 सृंग-विहरनि जनु बज्रटाँकी ।
 दसन धरि धरनि चिक्करत दिग्गज कमठ,
 सेष संकुचित, संकित पिनाकी ॥
 चलित महि मेरु, उच्छलित सायर सकल,
 बिकल बिधि बधिर दिसि विदिसि भाँकी ।

रजनिचर-घरनि घर गर्भ-अर्भक स्रवत

सुनत हनुमान को हाँक बाँकी ॥ ४४ ॥

कौन की हाँक पर चौंक चंडीस बिधि,

चंडकर शक्ति फिरि तुरँग हाँके ।

कौन के तेज बलसीम भट भीम से

भीमता निरखि कर नयन ढाँके ॥

दास तुलसीस के विरुद बरनत विदुष,

वीर विरुदैत वर वैरि धाँके ।

नाक नरलोक पाताल कोउ कहत किन

कहाँ हनुमान से वीर वाँके ॥ ४५ ॥

जातुधानावली-मत्त-कुंजर-घटा

निरखि मृगराज जनु गिरि तें दृष्ट्यो ।

बिकट चटकन चपट, चरन गहि पटक महि,

निघटि गए सुभट, सत सब को छूट्यो ॥

दास तुलसी परत धरनि, धरकत झुकत,

हाट सी उठति जंयुकनि लूट्यो ।

धीर रघुवीर को वीर रन-बाँकुरो

हाँकि हनुमान कुलि कटक कूट्यो ॥ ४६ ॥

छप्पय

कतहुँ बिटप भूधर उपारि परसेन वरक्खत ।

कतहुँ बाजि सों बाजि, मदि^१ गजराज, करक्खत ॥

चरन चोट चटकन चकोट अरि उर सिर बज्जत ।

बिकट कटक बिहरत वीर बारिद जिमि गज्जत ॥

लँगूर लपेटत पटकि भट, 'जयति राम जय' उच्चरत ।

तुलसीस पवननंदन अटल जुद्ध क्रुद्ध कौतुक करता ॥ ४७ ॥

घनाचरी

अंग अंग दलित ललित फूले किंसुक से,
 हने भट लाखन लपन जातुधान के ।
 मारि कै पछारे कै उपारि भुजदंड चंड,
 खंड खंड डारे ते विदारे हनुमान के ॥
 कूदत कबंध के कदंब वंश सी करत,
 धावत दिखावत हैं लाघौ राघौ बान के ।
 तुलसी महेस, विधि, लोकपाल, देवगन
 देखत विमान चढ़े कौतुक मसान के ॥ ४८ ॥
 लोथिन सों लोहू के प्रवाह चले जहाँ तहाँ,
 मानहुँ गिरिन गेरु-भरना भरत हैं ।
 सोनित सरित घोर, कुंजर करारे भारे,
 कूल तँ समूल वाजि-विटप परत हैं ॥
 सुभट सरीर नीरचारी भारी भारी तहाँ,
 सूरनि उछाह, कूर कादर डरत हैं ।
 फेरि फेरि फेरु फारि फारि पेट खात,
 काक कंक-बालक कोलाहल करत हैं ॥ ४९ ॥
 ओभरी की भोरी काँधे, आँतनि की सेल्ही बाँधे,
 मूँड़ के कमंडलु, खपर किये कोरि कै ।
 जोगिनी झुटुंग झुंड झुंड बनी तापसी सी
 तीर तीर बैठीं सो समरसरि खेरि कै ॥
 सोनित सों सानि सानि गूदा खात सतुआ से,
 प्रेत एक पियत बहेरि घोरि घोरि कै ।

तुलसी बैताल भूत साथ लिए भूतनाथ

हेरि हेरि हँसत हैं हाथ हाथ जोरि कै ॥५०॥

सवैया

राम-सरासन तैं चले तीर, रहे न सरीर, हड़ावरि फूटी ।

रावन धीर न पीर गनी, लखि लै कर खप्पर जोगिनि जूटी ॥

सोनित छींटी-छटानि-जटे तुलसी प्रभु सोहैं, महाछवि छूटी ।

मानौ मरकत-सैल बिसाल में फैलि चली बर वीरबहूटी ॥५१॥

घनाचरी

मानी मेघनाद सोैं प्रचारि भिरे भारी भट,

आपने अपन पुरुषारथ न ढोल की ।

घायल लषनलाल लखि बिलखाने राम,

भई आस सिथिल जगन्निवास-दील की ॥

भाई को न मोह, छोह सीय को न, तुलसीस

कहैं “मैं विभीषन की कछु न सबील की” ।

लाज बाँह बोले की, नेवाजे की सँभार सार,

साहेब न राम से, बलैया लेउँ सील की ॥५२॥

सवैया

कानन बास, दसानन सो रिपु, आननश्री ससि जीति लियो है ।

बालि महाबलसालि दल्यो, कपि पालि, विभीषन भूप किया है ॥

तीय हरी, रन बंधु परगौ, पै भरयो सरनागत-सोच हियो है ।

बाँह-पगार उदार कृपालु, कहाँ रघुवीर सो वीर बियो है ? ॥५३॥

५०—कोरि कै = खुरच कर गड़ढा कर के । खोरि कै = नहा करके ।
 झुड़ंग = एक प्रकार की योगिनी ।

५२—दील = दिल, मन । सबील = प्रदंघ । बाहँ बोले की = शरण
 में लेने की ।

५३—बियो = दूसरा ।

लीन्हो उखारि पहार बिसाल, चल्यो तेहि काल, बिलंब न लायो ।
 मारुतनंदन मारुत को, मन को, खगराज को वेग लजायो ॥
 तीखी तुरा तुलसी कहतो, पै हिये उपमा को समाड न आयो ।
 मानो प्रतच्छ परव्वत की नभ लीक लसी कपि यों धुकि धायो ॥५४॥

घनाचरी

चल्यो हनुमान सुनि जातुधान कालनेमि
 पठयो, सो सुनि भयो, पायो फल छलि कै ।
 सहसा उखारो है पहार बहु जोजन को,
 रखवारे मारे भारे भूरि भट दलि कै ॥
 वेग बल साहस सराहत कृपानिधान,
 भरत की कुसल अचल ल्यायो चलि कै ।
 हाथ हरिनाथ के विकाने रघुनाथ जनु,
 सीलसिंधु तुलसीस भलो मान्यो भलि कै ॥५५॥
 बापु दियो कानन, भो आनन सुमानन सो,
 बैरी भो दसानन सो, तीय को हरन भो ।
 बालि बलसालि दलि, पालि कपिराज को,
 विभीषन नेवाजि, सेतुसागर तरन भो ॥
 घोर रारि हेरि त्रिपुरारि विधि हारे हिये,
 घायल लखन वीर बानर बरन भो ।
 ऐसे सोक में तिलोक कै विसोक पलही में,
 सबही को तुलसी को साहिब सरन भो ॥५६॥

सवैया

कुंभकरन्न हन्यो रन राम, दल्यो दसकंधर, कंधर तोरे ।
 पृषन-बंस-विभूषन-पृषन तेज प्रताप गरे अरि-ओरे ॥

५४—धुकि = झपटकर, भोंके से चलकर ।

५५—हरिनाथ = कपिपति, हनुमान

देव निसान बजावत गावत, सावँत गो, मनभावत भो रे ! ।

नाचत बानर भालु सबै तुलसी कहि “हारे ! हहा भइया, हो रे ! ॥५७॥

घनाचरी

मारे रन रातिचर, रावन सकुल दल,

अनुकूल देव मुनि फूल वरषतु हैं ।

नाग नर किन्नर विरंचि हरि हर हेरि,

पुलक सरीर, हिये हेतु, हरषतु हैं ॥

वाम ओर जानकी कृपानिधान के बिराजैं,

देखत विषाद मिटे मोद करषतु हैं ।

आयसु भो लोकनि सिधारे लोकपाल सबै,

तुलसी निहाल कै कै दियो सरषतु हैं ॥५८॥

५७—ओरे = ओले । सावँत = सामंतपना, अधीनता ।

५८—सरखत = परवाना ।

उत्तर कांड ।

सवैया

बालि से वीर विदारि सुकंठ थप्यो, हरषे सुर बाजने वाजे ।
 पल में दल्यो दासरथी दसकंधर, लंक विभीषन राज विराजे ॥
 राम सुभाव सुने तुलसी हुलसे अलसी, हम से गलगाजे ।
 कायर कूर कपूतन की हृद तेउ गरीबनेवाज नेवाजे ॥ १ ॥
 वेद पढ़ैं विधि संभु सभित, पुजावन रावन सों नित आवैं ।
 दानव देव दयावने दीन दुखी दिन दूरिहि तैं सिर नावैं ॥
 ऐसेउ भाग भगे दसभाल तैं जो प्रभुता कवि कोविद गावैं ।
 राम से वाम भए तेहि वामहि वाम सबै सुख संपति लावैं ॥ २ ॥
 वेद-विरुद्ध, मही मुनि साधु ससोक किए, सुरलोक उजारो ।
 और कहा कहैं तीय हरी, तबहुँ करुनाकर कोप न धारो ॥
 सेवक-छोह तैं छाँड़ी छमा, तुलसी लख्यो राम सुभाव तिहारो ।
 तौलों न दाप दल्यो दसकंधर जौलों विभीषन लात न मारो ॥ ३ ॥
 सोक-समुद्र निमज्जत काढ़ि कपीस कियो जग जानत जैसो ।
 नीच निसाचर बैरी को बंधु विभीषन कीन्ह पुरंदर कैसो ॥
 नाम लिए अपनाइ लियो, तुलसी सोँ कहौ जग कौन अनैसो ।
 आरत-आरति-भंजन राम, गरीबनेवाज न दूसर ऐसो ॥ ४ ॥
 मीत पुनीत कियो कपि भालु को, पाल्यो ज्यों काहु न बाल तनूजो ।
 सज्जन-सीव विभीषन भो, अजहुँ बिलसै बर बंधु-बधू जो ॥
 कोसलपाल बिना तुलसी सरनागतपाल कृपालु न दूजो ।
 कूर कुजाति कुपूत अधी सब की सुधरै जो करै नर पूजो ॥ ५ ॥

तीय-सिरोमनि सीय तजी जेहिं पावक की कलुषाई दही है ।
 धर्म-धुरंधर बंधु तज्यो, पुरलोगनि की बिधि बोलि कही है ॥
 कीस निसाचर की करनी न सुनी, न बिलोकी, न चित्त रही है ।
 राम सदा सरनागत की अनखौहीं अनैसी सुभाय सही है ॥ ६ ॥
 अपराध अगाध भए जन ते अपने उर आनत नाहिं न जू ।
 गनिका गज गीध अजामिल के गनि पातक-पुंज सिराहिं न जू ॥
 लिए बारक नाम सुधाम दियो जिहि धाम महामुनि जाहिं न जू ।
 तुलसी भजु दीनदयालुहि रे, रघुनाथ अनाथहि दाहिं न जू ॥ ७ ॥
 प्रभु सत्य करी प्रह्लाद-गिरा, प्रगटे नरकेहरि खंभ महाँ ।
 भूखराज ग्रस्यो गजराज, कृपा ततकाल, विलंब कियो न तहाँ ॥
 सुर साखी दै राखी है पांडुबधू पट लूटत, कोटिक भूप जहाँ ।
 तुलसी भजु सोच-विमोचन को, जन को पन राम न राख्यो कहँ ॥ ८ ॥
 नरनारि उधारि सभा मँहँ होंत दियो पट, सोच हरयो मन को ।
 प्रह्लाद-विषाद-निवारन, बारन-तारन, मीत अकारन को ॥
 जो कहावत दीनदयालु सही, जेहि भार सदा अपने पन को ।
 तुलसी तजि आन भरोस भजे भगवान भलो करिहँ जन को ॥ ९ ॥
 ऋषिनारि उधारि, कियो सठ केवट मीत, पुनीत सुकीर्ति लही ।
 निज लोक दियो सबरी खग को, कपि थाप्यो सो मालुम है सब ही ॥
 दससीस-बिरोध सभीत बिभीषन भूप कियो जग लीक रही ।
 करुनानिधि को भजु रे तुलसी, रघुनाथ अनाथ के नाथ सही ॥ १० ॥
 कौसिक विप्रबधू मिथिलाधिप के सब सोच दले पल माँहँ ।
 बालि-दसानन-बंधु कथा सुनि सत्रु सुसाहिब-सीलसराहँ ॥
 ऐसी अनूप कहँ तुलसी रघुनायक की अगुनी गुन-गाहँ ।
 आरत दीन अनाथन को रघुनाथ करें निज हाथ की छाहँ ॥ ११ ॥

६—नरनारि = अर्जुन की स्त्री द्रौपदी ।

११—गुन-गाहँ = गुण गाथाएँ ।

तेरे बेसाहे बेसाहत औरनि, और बेसाहि कै बेचनहारे ।
 व्योम रसातल भूमि भरे नृप कूर कुसाहिव सेँ तिहुँ खारे ॥
 तुलसी तेहि सेवत कौन मरै ? रज तेँ लघु को करे मेरु तेँ भारे ? ।
 स्वामी सुसील समर्थ सुजान सो तोसों तुहीं दसरत्थ दुलारे ॥१२॥

घनाचरी

जातुधान भालु कपि केवट विहंग जो जो
 पाल्यो नाथ सद्य सो सो भयो काम-काज को ।
 आरत अनाथ दीन मलिन सरन आए
 राखे अपनाइ, सो सुभाव महाराज को ॥
 नाम तुलसी पै भोंडे भाग, सो कहायो दास,
 किए अंगीकार ऐसे बड़े दगावाज को ।
 साहेब समर्थ दसरत्थ के दयालु देव,
 दूसरो न तोसों तुही आपने की लाज को ॥ १३ ॥
 महावली वालि दलि, कायर सुकंठ कपि
 सखा किये, महाराज हैं न काहू काम को ।
 आत-घात-पातकी निसाचर सरन आए,
 कियो अंगीकार नाथ एते बड़े वाम को ॥
 राय दसरत्थ के समर्थ तेरे नाम लिए
 तुलसी से कूर को कहत जग राम को ।
 आपने निवाजे की तौ लाज महाराज को,
 सुभाव समुक्त मन मुदित गुलाम को ॥ १४ ॥
 रूप-सीलसिंधु गुनसिंधु, बंधु दीन को, दयानिधान
 जान-मनि, वीर बाहु-बेल को ।
 स्राद्ध कियो गीध को, सराहे फल सबरी के,
 सिलासाप-समन, निबाह्यो नेह कोल को ॥
 तुलसी उराउ होत राम को सुभाव सुनि,

को न बलि जाइ, न बिकाइ बिन मोल को ? ॥
 ऐसेहू सुसाहेब सों जाको अनुराग न सो
 बड़ोई अभागो, भाग भागो लोभ-लोल को ॥१५॥
 सूर-सिरताज महाराजनि के-महाराज,
 जाको नाम लेत ही सुखेत होत ऊसरो ।
 साहब कहाँ जहान जानकीस सो सुजान,
 सुमिरे कृपालु के भराल होत खूसरो ॥
 केवट पषान जातुधान कपि भालु तारे,
 अपनायो तुलसी सो धींग धमधूसरो ।
 बोल को अटल, बाँह को पगार, दीनबंधु,
 दूबरे को दानी, को दयानिधान दूसरो ? ॥ १६ ॥
 कीबे को विसोक लोक लोक पालहू तेँ सब,
 कहूँ कोऊ भो न चरवाहो कपि भालु को ।
 पवि को पहार कियो खयाल ही कृपालु राम,
 बापुरो विभीषन घरौंदा हुतो बाल को ॥
 नाम-ओट लेत ही निखोट होत खोटे खल,
 चोट बिनु मोट पाइ भयो न निहाल को ? ।
 तुलसी की बार बड़ी ढील होति, सीलसिंधु !
 विगरी सुधारिवे को दूसरो दयालु को ? ॥ १७ ॥
 नाम लिये पृत को पुनीत किया पातकीस,
 आरति निवारी प्रभु पाहि कहे पील की ।
 छलिन की छोँड़ी सो निगोड़ी छोटी जाति पाँति,
 कीन्हीं लीन आपु में सुनारी भोंड़े भील की ॥

१५—उराउ = हासला, उत्साह ।

१६—पगार = प्रकार, कोट ।

१७—चोट बिनु मोह पाइ = बिना कष्ट वा श्रम के गठरी पाकर ।

तुलसीऔ तारिबो बिसारिबो न अंत, मोहिं,
 नीके है प्रतीति रावरे सुभाव सील की ।
 देव तौ दयानिकेत, देत दादि दीनन की,
 मेरी बार मेरे ही अभाग नाथ ढील की ॥ १८ ॥
 आगे परे पाहन कृपा; किरात, कोलनी,
 कपीस निसिचर अपनाए नाए माथ जू ।
 साँची सेवकाई हनुमान की सुजानराय
 अनियाँ कहाये हौ विकाने ताके हाथ जू ॥
 तुलसी से खोटे खरे होत ओट नाम ही की,
 तेजी माटी भगहू की मृगमद साथ जू ।
 बात चले बात को न मानिबो विलग, बलि,
 काकी सेवा रीझि कै नेवाजो रघुनाथ जू ? ॥ १९ ॥
 कौसिक की चलत, पषान की परस पायँ,
 दूटत धनुष बनि गई है जनक की ।
 कोल पसु सबरी बिहंग भालु रातिचर,
 रतिन के लालचिन प्रापति मनक की ॥
 कोटि-कला-कुसल कृपालु नतपाल, बलि,
 बातहू कितिक तिन तुलसी तनक की ।
 राइ दसरथ के समथ राम राजमनि,
 तेरे हेरे लोपै लिपि बिधिहू गनक की ॥ २० ॥

घनाचरी

सिला-साप-पाप, गुह गीध को मिलाप,
 सबरी के पास आप चलि गये है सो सुनी मैं ।

१८—छोड़ी = लड़की ।

१९—तेजी = महुँगी ।

२०—मनक = मन भर । तिन = तृण ।

सेवक सराहे कपिनायक विभीषन,
 भरत सभा सादर सनेह सुरधुनी मैं ॥
 आलसी-अभागी-अधी-आरत-अनाथपाल,
 साहेब समर्थ एक नीके मन गुनी मैं ।
 दोष दुख दारिद दलैया दीनबंधु राम,
 तुलसी न दूसरो दयानिधान दुनी मैं ॥ २१ ॥
 मीत बालि-बंधु, पृत दूत, दसकंध-बंधु
 सचिव, सराध कियो सबरी जटाइ को ।
 लंक जरी जोहे जिय सोच सो विभीषन को,
 कहौ ऐसे साहेब की सेवा न खटाइ को ? ॥
 बड़े एक एक तेँ अनेक लोक लोकपाल,
 अपने अपने को तौ कहैगो घटाइ को ? ।
 साँकरे के सेइवे, सराहिवे सुमिरवे को
 राम सो न साहिब, न कुमति-कटाइको ॥ २२ ॥
 भूमिपाल, व्यालपाल, नाकपाल, लोकपाल
 कारन कृपालु, मैं सबै के जी की थाह ली ।
 कादर को आदर काहू के नाहिं देखियत,
 सबनि सोहात है सेवा-सुजानि टाहली ॥
 तुलसी सुभाय कहै नाहीं कछु पच्छपात,
 कौनै ईस किये कीस भालु खास माहली ।
 राम ही के द्वारे पै बोलाइ सनमानियत,
 मोसे दीन दूबरे कुपूत कूर काहली ॥ २३ ॥
 सेवा अनुरूप फल देत भूप कूप ज्यों,
 बिहूनेगुन पथिक पियासे जात पथ के ।

२१—सुरधुनीमैं = गंगामय, पवित्र ।

२२—कटाइको = कटायक, काटनेवाला भी ।

२३—टाहली = टहलुवा, सेवक । माहली = रनिवास का सेवक ।

लेखे जोखे चोखे चित तुलसी स्वारथहित,
नीके देखे देवता देवैया घने गथ के ॥
गीध मानो गुरु, कपि भालु मानो मीत कै,
पुनीत गीत साके सब साहेब समथ के ।
और भूप परखि सुलाखि तौलि ताइ लेत,
लसम के खसम तुही पै दसरथ के ॥ २४ ॥
रीति महाराज की नेवाजिये जो माँगनो सो
दोष-दुख-दारिद-दरिद्र कै कै छोड़िये ।
नाम जाको कामतरु देत फल चारि, ताहि
तुलसी बिहाइ कै बबूर रेंड गोड़िये ॥
जाँचै को नरेस, देसदेस को कलेस करै ?
देहै तो प्रसन्न हूँ बड़ी बड़ाई बौँडिये ।
कृपापाथनाथ लोकनाथ नाथ सीतानाथ,
तजि रघुनाथ हाथ और काहि ओड़िये ? ॥ २५ ॥

सवैया

जाके बिलोकत लोकप होत विसोक, लहैं सुरलोग सुठैरहि ।
सो कमला तजि चंचलता करि कोटि कला रिभूवै सुरमौरहि ॥
ताको कहाय, कहै तुलसी, तू लजाहि न माँगत कूकुर कौरहि ।
जानकीजीवन को जन हूँ जरिजाउ सो जीह जो जाँचत औरहि ॥ २६ ॥
जड़ पंच मिलै जेहि देह करी, करनी लखु धौँ धरनीधर की ।
जन की कहु क्योँ करिहै न सँभार, जो सार करै सचराचर की ॥
तुलसी कहु राम समान को आन है सेवकि जासु रमा घर की ।
जग में गति जाहि जगत्पति की, परवाह है ताहि कहा नर की ॥ २७ ॥

२४—सुलाखि = सूरख करके । लसम = खोटा ।

२५—बड़ी बड़ाई = बहुत बढ़कर । बौँडिये = दमड़ी ही ।

२७—सार करना = सँभाल करना ।

जग जाँचिये कोऊ न; जाँचिये जौ जिय जाँचिये जानकी-जानहि रे ।
 जेहि जाँचत जाचकता जरि जाइ जो जारति जोर जहानहि रे ॥
 गति देखु विचारि विभीषन की, अरु आनु हिये हनुमानहि रे ।
 तुलसी भजु दारिद-दोष-दवानल, संकट-कोटि-कृपानहि रे ॥२८॥
 सुनु कान दिए नित नेम लिए रघुनाथहि के गुनगाथहि रे ।
 सुख-मंदिर सुंदर रूप सदा उर आनि धरे धनुभाथहि रे ॥
 रसना निसि वासर सादर सो तुलसी जपु जानकीनाथहि रे ।
 करु संग सुसील सुसंतन सो, तजि कूर कुपंथ कुसाथहि रे ॥२९॥
 सुत, दार, अगार, सखा, परिवार बिलोकु महाकुसमाजहि रे ।
 सबकी ममता तजिकै, समता सजि संतसभा न विराजहि रे ॥
 नरदेह कहा, करि देखु विचार, बिगारु गँवार न काजहि रे ।
 जनि डोलहि लोलुप कूकर ज्यों, तुलसी भजु कोसलराजहि रे ॥३०॥
 विषया परनारि निसा-तरुनाई, सु पाइ पर्यौ अनुरागहि रे ।
 जम के पहरु दुख रोग वियोग बिलोकतहू न विरागहि रे ॥
 ममतावस तैं सब भूलि गयो, भयो भोर, महा भय भागहि रे ।
 जरठाइ दिसा, रविकाल उग्यो, अजहूँ जड़ जीव न जागहि रे ॥३१॥
 जनम्यो जेहि जोनि अनेक क्रिया सुख लागि करी, न परै वरनी ।
 जननी जनकादि हितु भये भूरि, बहोरि भई उर की जरनी ॥
 तुलसी अब राम को दास कहाइ हिये धरु चातक की धरनी ।
 करि हंस को वेष बड़े सब सो, तजि दे बक बायस की करनी ॥३२॥
 भलि भारतभूमि, भले कुल जन्म, समाज सरीर भलो लहि कै ।
 करषा तजि कै परषा बरषा हिम मारुत घाम सदा सहि कै ॥
 जो भजै भगवान सयान सोई तुलसी हठ चातक ज्यों गहि कै ।

२८—जानकी-जान = जानकी-जानि (स्त्री); अर्थात् जिनकी स्त्री जानकी हैं, रामचंद्र ।

३२—धरनी = धरन । टेक ।

नतु और सबै विष बीज बये हर-हाटक कामदुहा नहि कै ॥३३॥
 सो सुकृती, सुचिमत, सुसंत, सुजान, सुसील-सिरोमनि स्वै ।
 सुर तीरथ तासु मनावत आवत, पावन होत हैं ता तन छै ॥
 गुनगेह, सनेह को भाजन सो, सब ही सों ठठाइ कहौं भुज छै ।
 सति भाय सदा छल छाँड़ि सबै तुलसी जो रहै रघुवीर को है ॥३४॥
 सो जननी, सो पिता, सोइ भाइ, सो भामिनि, सो सुत, सो हित मेरो ।
 सोई सगो, सो सखा, सोइ सेवक, सो गुरु, सो सुर, साहिव, चरो ॥
 सो तुलसी प्रिय प्रानसमान, कहाँ लौं बनाइ कहौं बहुतेरो ।
 जौ तजि देह को गेह को नेह सनेह सौं राम को होइ सेवेरो ॥३५॥
 राम हैं मातु पिता गुरु बंधु औ संगी सखा सुत स्वामि सनेही ।
 राम की सौंह भरोसो है राम को, रामरँग्यो रुचि राच्यो न केही ॥
 जीयत राम, मुये पुनि राम, सदा रघुनाथहि की गति जेही ।
 सोई जियै जगमें तुलसी, नतु डोलत और मुये धरि देही ॥३६॥
 सियराम-सरूप अगाध अनूप विलोचन-मीनन को जलु है ।
 श्रुति रामकथा, मुख राम को नाम, हिये पुनि रामहि को थलु है ॥
 मति रामहिं सों, गति रामहिं सों, रति राम सों, रामहि को बलु है ।
 सब की न कहैं, तुलसी के मते इतनो जग जीवन को फलु है ॥३७॥
 दसरथ के दानि-सिरोमनि राम, पुरान-प्रसिद्ध सुन्यो जसु मैं ।
 नर नाग सुरासुर जाचक जो तुम सों मनभावत पायो न कै ॥
 तुलसी कर जोरि करै विनती जो कृपा करि दीनदयालु सुनै ।
 जेहि देह सनेह न रावरे सों असि देह धराइ कै जाय जियै ॥३८॥
 'भूठो है, भूठो है, भूठो सदा जग' संत कहंत जे अंत लहा है ।
 ताको सहै सठ संकट कोटिक, काढ़त दंत, करंत हहा है ॥
 जानपनी को गुमान बड़ो, तुलसी के विचार गँवार महा है ।
 जानकीजीवन जान न जान्यो तौ जान कहावत जान्यो कहा है ॥३९॥

तिन्ह तेँ खर सूकर खान भले, जड़तावस ते न कहँ कछु वै ।
 तुलसी जेहि राम सोँ नेह नहीं सो सही पसु पूँछ विखान न द्वै ।
 जननी कत भार मुई दस मास, भई किन बाँझ, गई किन चवै ।
 जरि जाड सो जीवन, जानकीनाथ ! जियै जग में तुम्हरो विन ह्वै ॥४०॥
 गज-बाजि-घटा, भले भूरि भटा, वनिता सुत भौंह तकैँ सब वै ।
 धरनी धन धाम सरीर भलो, सुरलोकहु चाहि इहै सुख स्वै ॥
 सब फोकट साटक है तुलसी, अपनो न कछु सपनो दिन द्वै ।
 जरि जाड सो जीवन जानकीनाथ ! जियै जग में तुम्हरो विनु ह्वै ॥४१॥
 सुरराज सो राज-समाज, समृद्धि विरंचि, धनाधिप सो धन भो ।
 पवमान सो, पावक सो, जस सोम सो, पृषन सो, भवभूषन भौँ ॥
 करि जोग, समीरन साधि, समाधि कै, धीर बड़ो, बसहू मन भो ।
 सब जाय सुभाय कहै तुलसी जो न जानकीजीवन को जन भो ॥४२॥
 काम से रूप, प्रताप दिनेस से, सोम से सील, गनेस से माने ।
 हरिचंद्र से साँचे, बड़े बिधि से, मधवा से महीप बिपै-सुखसाने ॥
 सुक से मुनि, सारद से वक्ता, चिरजीवन लोमस तेँ अधिकाने ।
 ऐसे भए तौ कहा तुलसी जु पै राजिवलोचन राम न जाने ॥४३॥
 भूमत द्वार अनेक मतंग जँजीर जरे मदग्रंथु चुचाते ।
 तीखे तुरंग मनोगति चंचल, पौन के गौनहुँ तेँ बढ़ि जाते ॥
 भीतर चंद्रमुखी अवलोकति, बाहर भूप खरे न समाते ।
 ऐसे भए तौ कहा तुलसी जु पै जानकीनाथ के रंग न राते ॥ ४४ ॥
 राज सुरेस पचासक को, विधि के कर को जो पटो लिखि पाए ।
 पृत सुपृत, पुनीत प्रिया, निज सुंदरता रति को मद नाए ॥
 संपति सिद्धि सबै तुलसी, मन की मनसा चितवैँ चित लाए ।
 जानकीजीवन जाने बिना जग ऐसेऊ जीव न जीव कहाए ॥ ४५ ॥
 कृसगात ललात जो रोटिन को, घरबात घरे खुरपा खरिया ।

तिन सोने के मेरु से ढेरु लहे मन तौ न भरो घर पै भरिया ॥
 तुलसी दुख दूनो दसा दुहुँ देखि, कियो मुख दारिद को करिया ।
 तजि आस भो दास रघुपति को, दशरथ को दानि दया-दरिया ॥४६॥
 को भरिहै हरि के रितये, रितवै पुनि को हरि जौ भरिहै ।
 उथपै तेहि को जेहि राम थपै ? थपिहै तेहि को हरि जौ टरिहै ?
 तुलसी यह जानि हिये अपने सपने नहिं कालहु तेँ डरिहै ।
 कुमया कछु हानि न औरन की जेपै जानकीनाथ मया करिहै ॥४७॥
 व्याल कराल, महाविष, पावक, सत्तगयंदहु के रद तोरे ॥
 साँसति संकि चली, डरपे हुते किंकर, ते करनी मुख मोरे ॥
 नेकु विषाद नहीं प्रह्लादहि, कारन केहरि केवल हो रे ।
 कौन की त्रास करै तुलसी, जेपै राखिहै राम तौ मारिहै को रे ? ॥४८॥
 कृपा जिनकी कछु काज नहीं, न अकाज कछू जिनके मुख मोरे ।
 करै तिनकी परवाहि ते जो बिनु पूँछ विषान फिरै दिन दौरे ॥
 तुलसी जेहिके रघुनाथ से नाथ, समर्थ सु सेवत रीझत थोरे ।
 कहा भव-भीर परी तेहि धौं, विचरै धरनी तिन सों तिन तोरे ॥४९॥
 कानन, भूधर, बारि, बयारि, महाविष, व्याधि, दवा, अरि घेरे ।
 संकट कोटि जहाँ तुलसी, सुत मातु पिता हित बंधु न नेरे ॥
 राखिहैं राम कृपालु तहाँ, हनुमान से सेवक हैं जेहि कोरे ।
 नाक, रसातल, भूतल मैं रघुनायक एक सहायक मेरे ॥ ५० ॥
 जबै जमराज रजायसु तेँ मोहिं लै चलिहैं भट बाँधि नटैया ।
 तात न मात न स्वामि सखा सुत बंधु विसाल विपत्ति बँटैया ॥
 साँसति घोर, पुकारत आरत, कौन सुनै चहुँ ओर डटैया ।
 एक कृपालु तहाँ तुलसी दसरथ को नंदन बंदि कटैया ॥ ५१ ॥

४६—घरवात = घर का सामान ।

४८—कारन हो = कारण था ।

४९—तिन तोरे = नाता तोड़े हुए ।

जहाँ जमजातना, घोर-नदी, भट कोटि जलचचर दंत टेवैया ।
 जहँ धार भयंकर वार न पार, न बोहित नाव, न नीक खेवैया ॥
 तुलसी जहँ मातु पिता न सखा, नहि कोऊ कहूँ अवलंब देवैया ।
 तहाँ बिनु कारन राम कृपालु विसाल भुजा गहि काढ़ि लेवैया ॥५२॥
 जहाँ हित, स्वामि, न संग सखा, वनिता सुत बंधु न, बापु न मैया ?
 काय गिरा मन के जन के अपराध सबै छल छाँड़ि छमैया ॥
 तुलसी तेहि काल कृपालु विना दूजो कौन है दारुन दुःख दमैया ।
 जहाँ सब संकट दुर्घट सोच तहाँ मेरो साहब राखै रमैया ॥ ५३ ॥
 तापस को बरदायक देव, सबै पुनि बैर बढ़ावत बाढ़े ।
 थोरेहि कोप कृपा पुनि थोरेहि, बैठिकै जोरत तोरत ठाढ़े ॥
 ठोंकि बजाय लखे गजराज, कहाँ लौं कहाँ केहिसों रद काढ़े ? ।
 आरत के हित नाथ अनाथ के राम सहाय सही दिन गाढ़े ॥ ५४ ॥
 जप, जोग, विराग, महा मख-साधन, दान, दया, दम कोटि करै ।
 मुनि, सिद्ध, सुरेस, गनेस, महेस से सेवत जन्म अनेक सरै ॥
 निगमागम, ज्ञान पुरान पढ़ै, तपसानल में जुग-पुंज जरै ।
 मन सों पन रोपि कहै तुलसी रघुनाथ विना दुख कौन हरै ? ॥ ५५ ॥
 पातक पीन, कुदारिद दीन, मलीन धरे कथरी करवा है ।
 लोक कहै बिधिहू न लिख्यो सपनेहूँ नहीं अपने बर बाहै ॥
 राम को किंकर सो तुलसी समुझेहि भलो कहिवो न रवा है ।
 ऐसे को ऐसो भयो कबहूँ न भजे बिन, बानर के चरवाहै ॥ ५६ ॥
 मातु पिता जग जाय तज्यो, बिधिहू न लिखी कछु भाल भलाई ।
 नीच, निरादर-भाजन, कादर, कूकर टूकन लागि ललाई ॥
 राम-सुभाष सुन्यो तुलसी, प्रभु सों कह्यो बारक पेट खलाई ।
 खारथ को परमारथ को रघुनाथ सो साहब खोरि न लाई ॥ ५७ ॥

५६—रवा = [फा०] उचित ।

५७—जाय = उत्पन्न करके ।

पाप हरे, परिताप हरे, तन पूजि भो सीतल सीतलताई ।
 हंस कियो बक तेँ बलि जाउँ, कहाँ लौं कहैं करुना अधिकाई ॥
 काल विलोकि कहै तुलसी मन में प्रभु की परतीति अघाई ।
 जन्म जहाँ तहँ रावरो सेां निवहै भरि देह सनेह सगाई ॥ ५८ ॥
 लोग कहैं अरु हैं हूँ कहैं 'जन खोटो खरो रघुनायक ही को' ।
 रावरी राम बड़ी लघुता, जस मेरो भयो सुखदायक ही को ॥
 कै यह हानि सहै बलि जाउँ कि मोहूँ करौं निज लायक ही को ।
 आनि हिये हित जानि करौ ज्यों हैं ध्यान धरौं धनुसायक ही को ॥ ५९ ॥
 आपु हौं आपुको नीके कै जानत, रावरो राम ! भरायो गढ़ायो ।
 कीर ज्यों नाम रटै तुलसी सेा कहै जग जानकीनाथ पढ़ायो ॥
 सोई है खेद जो वेद कहै, न घटै जन जो रघुवीर बढ़ायो ।
 हैं तौ सदा खर को असवार, तिहारोई नाम गयंद चढ़ायो ॥ ६० ॥

घनाक्षरी

छार ते सँवारिकै पहार हू तेँ भारी कियो,
 गारो भयो पंच में पुनीत पच्छ पाइकै ।
 हैं तौ जैसो तब तैसो अब, अधमाई कै कै
 पेट भरौं राम रावरोई गुन गाइकै ॥
 आपने निवाजे की पै कीजै लाज, महाराज !
 मेरी ओर हेरिकै न बैठिए रिसाइकै ।
 पालिकै कृपालु व्याल-बाल को न मारिये
 औ काटिये न, नाथ ! विषहू को रूख लाइकै ॥ ६१ ॥
 वेद न पुरान गान, जानौं न विज्ञान ज्ञान,
 ध्यान, धारना, समाधि, साधन-प्रवीनता ।
 नाहिंन बिराग, जोग, जाग भाग तुलसी के,
 दया-दान-दूबरों हैं, पाप ही की पीनता ॥
 लोभ-मोह-काम-कोह-दोषकोष मोसो कौन ?

कलि हू जो सीखि लई मेरियै मलीनता ।
 एक ही भरोसो राम रावरो कहावत हैं,
 रावरे दयालु दीनबंधु, मेरी दीनता ॥ ६२ ॥
 रावरो कहावौँ, गुन गावौँ राम रावरोई,
 रोटी द्वै हैं पावौँ राम रावरी ही कानि हैं ।
 जानत जहान, मन मेरे हू गुमान बड़ो,
 मान्यो मैं न दूसरो, न मानत, न मानिहौँ ॥
 पाँच की प्रतीति न, भरोसो मोहिँ आपनोई,
 तुम अपनायो हैं तबैहीं परि जानिहैं ।
 गढ़ि गुढ़ि, छोलि छालि कुंद को सी भाईँ बातें
 जैसी मुख कहौँ तैसी जीय जब आनिहौँ ॥ ६३ ॥
 बचन विकार, करतबड खुआर, मन,
 विगत-विचार, कलि मल को निधानु है ।
 राम को कहाइ, नाम बेचि बेचि खाइ, सेवा
 संगति न जाइ पाछिले को उपखानु है ॥
 तेहू तुलसी को लोग भलो भलो कहै, ताको
 दूसरो न हेतु, एक नीके कै निदानु है ।
 लोकरीति बिदित बिलोकियत जहाँ तहाँ,
 स्वामी के सनेह खान हू को सनमानु है ॥ ६४ ॥
 स्वारथ को साज न समाज परमारथ को,
 मोसों दगाबाज दूसरो न जगजाल है ।
 कै न आयों, करौँ न करौंगो करतूति भली,
 लिखी न बिरंचि हू भलाई भूलि भाल है ॥
 रावरी सपथ, राम ! नाम ही की गति मेरे,
 इहाँ भूठो भूठी सो तिलोक तिहूँ काल है ।

तुलसी को भलो पै तुम्हारे ही किये, कृपालु !
 कीजै न बिलंब, बलि, पानीभरी खाल है ॥ ६५ ॥
 राग को न साज, न विराग जोग जाग जिय,
 काया नहिं छाँड़ि देत ठाटिबो कुठाट को ।
 मनोराज करत अकाज भयो आजु लागि,
 चाहै चारु चीर पै लहै न टूक टाट को ॥
 भयो करतार बड़े कूर को कृपालु, पायो
 नाम-प्रेम-पारस हौं लालची बराट को ।
 तुलसी बनी है राम रावरे बनाए, ना तौ,
 धोबी कैसो कूकर न घर को न घाट को ॥ ६६ ॥
 ऊँची मन, ऊँची रुचि, भाग नीचो निपट ही,
 लोकरीति-लायक न, लंगर लवारु है ।
 स्वारथ अगम, परमारथ की कहा चली,
 पेट की कठिन, जग जीव को जवारु है ॥
 चाकरी न आकरी न खेती न बनिज भीख,
 जानत न कूर कछु किसब कवारु है ।
 तुलसी की बाजी राखी राम ही के नाम, नतु
 भेंट पितरन कों न मूड़ हू में बारु है ॥ ६७ ॥
 अपत, उतार, अपकार को अगार जग,
 जाकी छाँह छुए सहमत व्याध बाधको ।
 पातक पुहुमि पालिबे को सहसानन सो,
 कानन कपट को, पयोधि अपराध को ॥

६६-बराट = कौड़ी ।

६७-लंगर = नटखट । जवारु [फा० जवाल] = जंजाल, र्कसट । आकरी =
 खान खोदने का काम । किसब [अ०] = कारीगरी । कवारु =
 कबाड़, व्यवसाय, रोजगार ।

तुलसी से बाम को भो दाहिनो दयानिधान,
 सुनत सिहात सब सिद्ध साधु साधको ।
 रामनाम ललित ललाम कियो लाखनि को
 बड़ो कूर कायर कपूत कौड़ी आध को ॥ ६८ ॥
 सब-अंग-हीन, सब-साधन-विहीन, मन
 वचन मलीन, हीन कुल करतूति हों ।
 बुधि-बल-हीन, भाव-भगति-विहीन, हीन
 गुन, ज्ञानहीन, हीन भाग हू विभूति हों ॥
 तुलसी गरीब की गई-बहोर रामनाम,
 जाहि जपि जीह राम हू को बैठो धूति हों !
 प्रीति रामनाम सेाँ, प्रतीति रामनाम की,
 प्रसाद रामनाम के पसारि पायँ सुतिहों ॥ ६९ ॥
 मेरे जान जब तेँ हों जीव हूँ जनम्यो जग,
 तब तेँ बेसाह्यो दाम लोह कोह काम को ।
 मन तिनहों की सेवा, तिनहीं सेाँ भाव नीको,
 वचन बनाइ कहों 'हों गुलाम राम को' ॥
 नाथहू न अपनायो, लोक झूठी हूँ परी, पै
 प्रभु हूँ तेँ प्रबल प्रताप प्रभु नाम को ।
 आपनी भलाई भलो कीजै तौ भलोई, न तौ
 तुलसी को खुलैगो खजानो खोटे दाम को ॥ ७० ॥
 जोग न बिराग जप जाग तप त्याग व्रत,
 तीरथ न धर्म जानौँ वेदविधि किमि है ।
 तुलसी सो पोच न भयो है, नहिँ हूँहै कहूँ,

६८—अपत = अपात्र, खोटा । उतार = सबसे उतरा हुआ, अधम ।

ललाम = भूषण ।

७०—लोह = लोभ या लोहा ।

सोचैँ सब याके अघ कैसे प्रभु छमिहै ॥
 मेरे तौ न डरु रघुबोर सुनौ साँची कहाँ,
 खल अनखैहैं, तुम्हैं सज्जन न गमिहै ।
 भले सुकृती के संग मोहिँ तुला तौलिये तौ,
 नाम के प्रसाद भार मेरी ओर नमिहै ॥ ७१ ॥
 जाति के, सुजाति के, कुजाति के, पेटागिबस,
 खाए दूक सबके विदित बात दुनी सो ।
 मानस बचन काय किए पाप सति भाय,
 राम को कहाय दास दगाबाज पुनी सो ॥
 रामनाम को प्रभाउ, पाउ महिमा प्रताप,
 तुलसी से जग मनियत महामुनी सो ।
 अतिही अभागो अनुरागत न रामपद,
 मूढ़ एतो बड़े अचरज देखि सुनी सो ॥ ७२ ॥
 जायो कुल मंगन, बधावनो बजायो सुनि,
 भयो परिताप पाप जननी जनक को ।
 बारे तेँ ललात विललात द्वार द्वार दीन,
 जानत हो चारि फल चारि ही चनक को ॥
 तुलसी सो साहिब समर्थ को सुसेवक है,
 सुनत सिहात सोच विधिहू गनक को ।
 नाम, राम ! रावरो सयानो किधौँ बावरो,
 जो करत गिरी तेँ गरु तृन तेँ तनक को ॥ ७३ ॥
 वेद हू पुरान कही, लोकहू विलोकियत,
 रामनाम ही सौँ रीझे सकल भलाई है ।

७१—गमिहै = गम न करेंगे, परवा न करेगे, ध्यान न देंगे ।

७२—पुनी = पुनः, फिर ।

७३—जानत हो = जानता था ।

कासी हू मरत उपदेसत महेस सोई,

साधना अनेक चितई न चित लाई है ॥

छाछी को ललात जे ते राम-नाम के प्रसाद

खात खुनसात सोंधे दूध की मलाई है ।

रामराज सुनियत राजनीति की अवधि,

नाम राम ! रावरो तौ चाम की चलाई है ॥ ७४ ॥

सोच संकटनि सोच संकट परत, जर

जरत, प्रभाव नाम ललित ललाम को ।

बूड़ियौ तरति, विगरीयौ सुधरति बात,

होत देखि दाहिनो सुभाव बिधि वाम को ॥

भागत अभाग, अनुरागत विराग, भाग

जागत, आलसि तुलसी हू से निकाम को ।

धाई धारि फिरि कै गोहारि हितकारी होति,

आई मीचु मिटति जपत रामनाम को ॥ ७५ ॥

आँधरो, अधम, जड़, जाजरो जरा जवन,

सूकर के सावक ढका ढकेल्यो मग मैं ।

गिरो हिये हहरि, 'हराम हो हराम हन्यो'

हाय हाय करत परीगो कालफँग मैं ॥

तुलसी बिसोक है त्रिलोकपति-लोक गयो

नाम के प्रताप, बात विदित है जग मैं ।

सोई रामनाम जो सनेह सों जपत जन

ताकी महिमा क्यों कही है जाति अगमैं ॥ ७६ ॥

जापकी न, तप खप कियो न तमाँइ जोग,

जाग न, विराग त्याग तीरथ न तनको ।

७५—धारि=कुंड (छुट्टों का) ।

७६—जाजरो=जजर ।

भाई को भरोसो न खरो सो बैर बैरीहू सों,
 बल अपनो न, हितू जननी न जनकौ ॥
 लोक को न डर, परलोक को न सोच,
 देवसेवा न सहाय, गर्व धाम को न धन को ।
 रामही के नाम तेँ जो होइ सोई नीको लागै,
 ऐसोई सुभाव कछु तुलसी के मन को ॥ ७७ ॥
 ईस न, गनेस न, दिनेस न, धनेस न,
 सुरेस सुर गौरि गिरापति नहिं जपने ।
 तुम्हरेई नाम को भरोसो भव तरिवे को,
 बैठे उठे जागत वागत सोए सपने ॥
 तुलसी है बावरो सो रावरोई, रावरी सौं,
 रावरोऊ जानि जिय कीजिये जु अपने ।
 जानकी-रमन मेरे ! रावरे बदन फेरे,
 ठाउँ न समाउँ कहाँ सकल निरपने ॥ ७८ ॥
 जाहिर जहान में जमानो एक भाँति भयो,
 बैचिये विबुधधेनु रासभी बेसाहिए ।
 ऐसेऊ कराल कलिकाल में कृपालु तेरे
 नाम के प्रताप न त्रिताप तन दाहिए ॥
 तुलसी तिहारो मन वचन करम, तेहि
 नाते नेह-नेम निज ओर तेँ निबाहिए ।
 रंक के निवाज रघुराज राजा राजनि के,
 उमरि दराज महाराज तेरी चाहिए ॥ ७९ ॥
 स्वारथ सयानप, प्रपंच परमारथ,
 कहायो राम रावरो हौं, जानत जहानु है ।

७७—खप = खप कर, पच कर । तमाइ = तमश्च, बालूच ।

७८—निरपने = अपने नहीं । बेगाने ।

नाम के प्रताप, बाप ! आजु लौं निवाही नीके,
 आगे को गोसाईं स्वामी सबल सुजानु है ॥
 कलि की कुचालि देखि दिन दिन दूनी देव !
 पाहर रूई चोर हेरि हिय हहरानु हैं ।
 तुलसी की, बलि, बार बार ही सँभार कीवी,
 जद्यपि कृपानिधान सदा सावधानु है ॥ ८० ॥
 दिन दिन दूनी देखि दारिद दुकाल दुख
 दुरित दुराज, सुख सुकृत सकोचु है ।
 माँगे पैँत पावत पचारि पातकी प्रचंड,
 काल की करालता भले को होत पोचु है ॥
 आपने तौ एक अवलंब अंब डिंभ ज्यों,
 समर्थ सीतानाथ सब संकट-विमोचु है ।
 तुलसी की साहसी सराहिये कृपालु, राम !
 नाम के भरोसे परिनाम को निसोचु है ॥ ८१ ॥
 मोह-मद-मायो, राखो कुमति कुनारि सों,
 बिसारि वेद लोक-लाज, आँकरो अचेतु है ।
 भावै सो करत, मुँह आवै सो कहत कछु,
 काहू की सहत नाहिं, सरकस हेतु है ॥
 तुलसी अधिक अधमाई हू अजामिल तें,
 ताहू में सहाय कलि कपट-निकेतु है ।
 जैवे को अनेक टेक, एक टेक हूँवे की, जो
 पेट-प्रिय-पूत-हित रामनाम लेतु है ॥ ८२ ॥
 जागिए न सोइए बिगोइए जनम जाय,
 दुख रोग रोइए कलेस कोह काम को ।

८१—पैँत = दाँव । घात ।

८२—आँकरो = आँकरा । गहरा । सरकस = सरकश, प्रबल ।

राजा, रंक, रागी औ विरागी, भूरि भागी ये
 अभागी जीव जरत, प्रभाव कलि वाम को ॥
 तुलसी कबंध कैसो धाइवो विचारु, अंध !
 धंध देखियत जग सोच परिनाम को ।
 सोइवो जो राम के सनेह की समाधि-सुख,
 जागिवो जो जीह जपै नीके रामनाम को ॥८३॥
 बरन-धरम गयो, आस्रम निवास तज्यो,
 त्रासन चकित सो परावनेो परो सो है ।
 करम उपासना कुवासना बिनास्यो, ज्ञान
 बचन, विराग वेष जगत हरो सो है ॥
 गोरख जगायो जोग, भगति भगायो लोग,
 निगम नियोग ते सो केलि ही छरो सो है ।
 काय मन बचन सुभाय तुलसी है जाहि
 रामनाम को भरोसो ताहि को भरोसो है ॥ ८४ ॥

सवैया

वेद पुरान विहाइ सुपंथ कुमारग कोटि कुचाल चली है ।
 काल कराल नृपाल कृपालन राजसमाज बड़ेई छली है ॥
 वर्न-विभाग न आस्रम-धर्म, दुनी दुख-दोष-दरिद्र-दली हैं ।
 स्वारथ को परमारथ को कलि राम को नाम-प्रताप वली है ॥ ८५ ॥
 न मिटै भवसंकट दुर्घट है तप तीरथ जन्म अनेक अटो ।
 कलि में न विराग न ज्ञान कहूँ, सब लागत फोकट भूँठ-जटो ॥
 नट ज्यों जनि पेट-कुपेटक कोटिक चेटक कौतुक ठाट ठटो ।
 तुलसी जो सदा सुख चाहिय तौ रसना निसि बासर राम रटो ॥८६॥
 दम दुर्गम, दान दया मख कर्म सुधर्म अधीन सबै धन को ।

८६-जटो = जटित, जड़ा हुआ ।

कुपेटक = बुरे पिटारे से (जैसा बाजीगर रखते हैं) ।

तप तीरथ साधन जोग विराग सेँ होइ नहीं दृढ़ता तनको ॥
 कलिकाल कराल में, राम कृपालु ! यहै अवलंब बड़ो मन को ।
 तुलसी सब संजमहीन सबै, इक नाम अधार सदा जन को ॥८७॥
 पाइ सुदेह विमोह-नदी-तरनी न लही, करनी न कछू की ।
 रामकथा बरनी न बनाइ, सुनी न कथा प्रहलाद न ध्रू की ॥
 अब जोर जरा जरि गात गयो, मन मानि गलानि कुबानि न मूकी ।
 नीके कै ठीक दई तुलसी, अवलंब बड़ो उर आखर दू की ॥८८॥
 राम बिहाय 'मरा' जपते बिगरी सुधरी कवि-कोकिल हू की ।
 नामहि तें गज की, गनिका की, अजामिल की चलि गै चल-चूकी ॥
 नाम-प्रताप बड़े कुसमाज बजाइ रही पति पांडुबधू की ।
 ताको भलो अजहूँ तुलसी जेहि प्रीति प्रतीति है आखर दू की ॥८९॥
 नाम अजामिल से खल तारन, तारन बारन बारबधू को ।
 नाम हरे प्रहलाद विषाद, पिता भय साँसति सागर सूको ॥
 नाम सेँ प्रीति-प्रतीति बिहीन गिल्यो कलिकाल कराल न चूको ।
 राखिहैं राम सो जासु हिये तुलसी हुलसै बल आखर दू को ॥९०॥
 जीव जहान में जायो जहाँ सो तहाँ तुलसी तिहुँ दाह दहो है ।
 दोस न काहू, कियो अपनो, सपनेहु नहीं सुख-लेस लहो है ॥
 राम के नाम तेँ होउ सो होउ, न सोऊ हिये, रसना ही कहो है ।
 कियो न कछू, करिबो न कछू, कहिबो न कछू मरिबोइ रहो है ॥९१॥
 जी जै न ठाँउ, न आपन गाँउ, सुरालयहू को न संबल मेरे ।
 नाम रटो, जमबास क्यों जाउँ, को आइ सकै जम-किंकर नेरे ? ॥
 तुम्हरो सब भाँति, तुम्हारिय सौँ, तुम्हही, बलि, है मोकों ठाहरु हरे ।
 वैरष बाँह बसाइए पै, तुलसी-घरु व्याध अजामिल खरे ॥ ९२ ॥

८८—मूकी = झोड़ी ।

८९—बजाइ रही पति = इज्जत बनी रही ।

९२—वैरष = [तु० बरक] पताका ।

का कियो जोग अजामिल जू, गनिका कबहीं मति पेम पगाई ? ।
 व्याध को साधुपनो कहिए, अपराध अगाधनि मैं हो जनाई ॥
 करुनाकर की करुना करुना-हित नाम-सुहेत जो देत दगाई ।
 काहे को खीभिय ? रीभिय पै, तुलसीहु सो है बलि सोइ सगाई ॥ ८३ ॥
 जे मद-मार-विकार अरे ते अचार विचार समीप न जाहीं ।
 है अभिमान तऊ मन में 'जन भाषिहै दूसरे दीनन पाहीं' ? ॥
 जौ कछु बात बनाइ कहैं तुलसी तुममें तुमहूँ उर माहीं ।
 जानकी-जीवन जानत हौ हम हैं तुम्हरे, तुममें, सक नाहीं ॥ ८४ ॥
 दानव देव अहीस महीस महा मुनि तापस सिद्ध समाजी ।
 जग जाचक दानि दुतीय नहीं तुमही सब की सब राखत बाजी ॥
 एते बड़े तुलसीस तऊ सबरी के दिए विनु भूख न भाजी ।
 राम गरीबनेवाज ! भये हैं गरीबनेवाज गरीब नेवाजी ॥ ८५ ॥

घनाचरी

किसवी, किसान-कुल, बनिक, भिखारी, भाँट,
 चाकर, चपल, नट चोर चार चेटकी ।
 पेट को पढ़त, गुन गढ़त, बढ़त गिरि,
 अटत गहन-गन अहन अखेट की ॥
 ऊँचे नीचे करम धरम अधरम करि,
 पेट ही को पचत बेचत बेटा बेटकी ।
 तुलसी बुझाई एक राम घनस्याम ही तेँ,
 आगि बड़वागि तेँ बड़ी है आगि पेट की ॥ ८६ ॥
 खेती न किसान को, भिखारी को न भीख, बलि,
 बनिक को बनज न चाकर को चाकरी ।
 जीविका-विहीन लोग सीद्यमान सोच-बस,
 कहैं एक एकन सों "कहाँ जाई, का करी ?" ॥
 बेद हू पुरान कही, लोकहू बिलोकियत,

साँकरे सबै पै राम रावरे कृपा करी ।
 दारिद-दसानन दबाई दुनी, दीनबंधु !
 दुरित-दहन देखि तुलसी हहा करी ॥ ६७ ॥
 कुल, करतूति, भूति, कीरति, सुरूप गुन,
 जोवन जरत जुर, परै न कल कहीं ।
 राजकाज कुपथ कुसाज, भोग रोगही के,
 वेद-बुध विद्या पाइ विवस बलकहीं ॥
 गति तुलसीस की लखै न कोउ जो करत,
 पव्वइ तेँ छार, छारै पव्वइ पलक ही ।
 कासों कीजै रोप ? दोष दीजै काहि ? पाहि राम !
 कियो कलिकाल कुलि खलल खलक ही ॥ ६८ ॥
 बबुर बहेरे को बनाय बाग लाइयत,
 रूंधिवे को सोइ सुरतरु काटियत है !
 गारी देत नीच हरिचंद हू दधीचि हू को,
 आपने चना चबाइ हाथ चाटियत है ॥
 आप महापातकी हँसत हरि हर हू को,
 आपु है अभागी भूरिभागी डाटियत है ।
 कलि को कलुष मन मलिन किये महत,
 मसक की पाँसुरी पयोधि पाटियत है ॥ ६९ ॥
 सुनिये कराळ कलिकाल भूमिपाल तुम !
 जाहि वालो चाहिए कहौ धौँ राखै ताहि को ? ।
 हैं तौ दीन दूबरो, बिगारो ढारो रावरो न,
 मैं हू तैं हूँ ताहि को सकल जग जाहि को ॥
 काम कोह लाइ कै देखाइयत आँखि मोहिँ ,
 एते मान अकस कीबे को आपु आहि को ? ॥
 साहिब सुजान जिन स्वानहू को पच्छ कियो,

रामबोला नाम, हौं गुलाम-राम-साहि को ॥ १०० ॥

सवैया

साँची कहीं कलिकाल कराल मैं, ढारो विगारो तिहारो कहा है ? ।
 काम को, कोह को, लोभ को, मोह को, मोहि सों आनि प्रपंच रहा है ॥
 हौ जगनायक लायक आजु, पै मेरियौ टेव कुटेव महा है ।
 जानकीनाथ विना, तुलसी, जग दूसरे सों करिहौं न हहा है ॥ १०१ ॥
 भागीरथी जलपान करौं अरु नाम द्वै राम के लेत नितै हौं ।
 मोको न लेनो न देनो कछू, कलि ! भूलि न रावरी ओर चितैहौं ॥
 जानिकै जोर करौ परिनाम, तुम्है पछितैहो पै मैं न भितैहौं ।
 ब्राह्मन ज्यों उगिल्यो उरगारि हौं त्योंही तिहारे हिये न हितैहौं ॥ १०२ ॥
 राजमराल के बालक पेलि कै, पालत लालत खूसर को ।
 सुचि सुंदर सालि सकैलि सुवारि कै बीज बटोरत ऊसर को ॥
 गुन-ज्ञान-गुमान भभेरि बड़ी, कलपद्रुम काटत मूसर को ।
 कलिकाल विचार अचार हरो, नहिं सृष्टै कछू धमधूसर को ॥ १०३ ॥
 कीवे कहा, पढ़िबे को कहा ? फल वृष्णि न वेद को भेद विचारै ।
 स्वारथ को परमारथ को कलि कामद राम को नाम विसारै ॥
 वाद विवाद विषाद बढ़ाई कै छाती पराई औ आपनी जारै ।
 चारिहु को छहु को नव को दस आठ को पाठ कुकाठ ज्यों फारै ॥ १०४ ॥
 आगम वेद पुरान बखानत, मारग कोटिन जाहिं न जाने ।
 जे मुनि ते पुनि आपुहि आपु को ईस कहावत सिद्ध सयाने ॥
 धर्म सबै कलिकाल ग्रसे, जप जोग विराग लै जीव पराने ।
 को करि सोच मरै, तुलसी, हम जानकीनाथ के हाथ विकाने ॥ १०५ ॥
 धूत कहौ, अवधूत कहौ, रजपूत कहौ, जोलहा कहौ कोऊ ।
 काहू की बेटी सौं बेटा न व्याहव, काहू की जाति विगार न सोऊ ॥

१०४—नव = नौ व्याकरण—इंद्र, चंद्र, काशकृत्स्न, शाकटायन, पिशाचि, पाणिनि, अमर, जैनेंद्र, सरस्वती । दसआठ = अष्टादश मुराण ।

तुलसी सरनाम गुलाम है राम को, जाको रुचै सो कहै कछु ओऊ ।
माँगि कै खैबो मसीत को सोइबो, लैवे को एक न दैवे को दोऊ ॥ १०६ ॥

घनाचरी

मेरे जाति पाँति, न चहँ काहू की जाति पाँति,
मेरे कोऊ काम को, न हैं काहू के काम को ।
लोक परलोक रघुनाथ ही के हाथ सब,
भारी है भरोसो तुलसी के एक नाम को ॥
अति ही अयाने उपखानो नहिँ वृक्षै' लोग
'साह ही को गोत गोत होत है गुलाम को' ।
साधु कै असाधु, कै भलो कै पोच, सोच कहा,
का काहू के द्वार परौं, जो हैं सो हैं राम को ॥ १०७ ॥
कोऊ कहै करत कुसाज दगाबाज बड़ो,
कोऊ कहै राम को गुलाम खरो खूब है ।
साधु जानै' महा साधु, खल जानै' महा खल,
वानी भूँठी साँची कोटि उठत हवूब है ॥
चहत न काहू सों, न कहत काहू की कछु,
सबकी सहत उर अंतर न ऊब है ।
तुलसी को भलो पोच हाथ रघुनाथ ही के,
राम की भगति भूमि, मेरी मति दूब है ॥ १०८ ॥
जागै' जोगी जंगम, जती जमाती ध्यान धरै,
डरै उर भारी लोभ मोह कोह काम के ।
जागै' राजा राजकाज, सेवक समाज साज,
सोचै' सुनि समाचार बड़े वैरी वाम के ॥

१०६—मसीद = मसजिद ।

१०७—उपखानो = उपाख्यान, कहावत ।

१०८—हवूब = बुलबुले ।

जागैं बुध विद्याहित पंडित चकित चित,
जागैं लोभी लालच धरनि धन धाम के ।
जागैं भोगी भोगही, वियोगी रोगी सोगवस,
सोवै सुख तुलसी भरोसे एक राम के ॥ १०६ ॥

छप्पय

राम मातु पितु बंधु सुजन गुरु पूज्य परम हित ।
साहेब सखा सहाय नेह नाते पुनीत चित ॥
देस कोस कुल कर्म धर्म धन धाम धरनि गति॥
जाति पाँति सब भाँति लागि रामहिं हमारि पति ॥
परमारथ स्वारथ सुजस सुलभ राम तेँ सकल फल ।
कह तुलसिदास अब जब कवहुँ एक राम तेँ मोर भल ॥ ११० ॥
महाराज बलि जाउँ रामसेवक सुखदायक ।
महाराज बलि जाउँ राम सुंदर सब लायक ॥
महाराज बलि जाउँ राम सब संकट-मोचन ।
महाराज बलि जाउँ राम राजीव-बिलोचन ॥
बलि जाउँ राम करुनायतन प्रनतपाल पातकहरन ।
बलि जाउँ राम कलि-भय-विकल तुलसिदास राखिय सरन ॥ १११ ॥
जय ताड़का-सुबाहु-मथन, मारीच-मानहर ।
मुनिमख-रच्छन-दच्छ, सिलातारन करुनाकर ॥
नृपगन-बलमदसहित संभु कोदंड-विहंडन ।
जय कुठारधर-दर्पदलन, दिनकरकुल-मंडन ॥
जय जनकनगर-आनंदप्रद, सुखसागर सुखमाभवन ॥
कह तुलसिदास सुर-मुकुटमनि जय जय जय जानकिरवन ॥ ११२ ॥
जय जयंत-जयकर, अनंत, सज्जनजनरंजन ।

* कृकन लाल की प्रति में इस चरण के स्थान पर यह पाठ है—“निसि
दिन रघुपति चरन-सरन, सपनेहु न आन गति ।

जय विराध-बध-विदुष, विबुध-मुनिगन-भयभंजन ॥
 जय निसिचरी-विरूप-करन रघुवंसविभूषन ।
 सुभट चतुर्दस-सहस-दलन त्रिसिरा खर दूषन ॥
 जय दंडकवन-पावन-करन तुलसिदास संसय-समन ।
 जगविदित जगतमनि जयति जय जय जय जय जानकिरमन ॥११३॥
 जय मायामृगमथन गीध-सवरी-उद्धारन ।
 जय कबंधसूदन विसाल-तरुताल-विदारन ॥
 दवन बालि बलसालि, थपन सुग्रीव संतहित ।
 कपि-कराल-भट-भालुकटक-पालन, कृपालु-चित ॥
 जय सियवियोग-दुखहेतु-कृत-सेतुबंध बारिधि-दमन ।
 दससीस विभीषन-अभयप्रद जय जय जय जानकिरमन ॥ ११४ ॥
 कनककुधर-केदार, बीज सुंदर सुरमनिवर ।
 सींचि कामधुक धेनु सुधामय पय विसुद्धतर ॥
 तीरथपति अंकुर-सरूप, यच्छेस रच्छ तेहि ।
 मरकतमय साखा, सुपत्र मंजरिय लच्छ जेहि ॥
 कैवल्य सकल फल कल्पतरु सुभ सुभाव सब सुख बरिस ।
 कह तुलसिदास रघुवंसमनि तौ कि होहि तुव कर सरिस ? ॥११५॥
 जाय सो सुभट समर्थ पाइ रन रारि न मंडै ।
 जाय सो जती कहाय विषय-वासना न छंडै ॥
 जाय धनिक बिनु दान, जाय निर्धन बिनु धर्महिं ।
 जाय सो पंडित पढ़ि पुरान जो रत न सुकर्महिं ॥
 सुत जाय मातु-पितु-भक्ति बिनु, तिय सो जाइ जेहि पति न हित ।
 सब जाय दास तुलसी कहैं जौ न रामपद नेह नित ॥ ११६ ॥
 को न क्राध निरदह्यो, काम बस केहि नहिं कीन्हों ? ।
 को न लोभ दृढ़ फंद बाँधि त्रासन करि दीन्हों ? ॥

कौन हृदय नहिं लाग कठिन अति नारिनयनसर ? ।
लोचनजुत नहिं अंध भयो श्री पाइ कौन नर ? ॥
सुर-नाग-लोक महिमंडलहु को जु मोह कीन्हों जय न ? ।
कह तुलसिदास सो ऊबरै जेहि राख राम राजिवनयन ॥ ११७ ॥

सवैया

भौंह कमान सँधान सुठान जे नारि-विलोकनि-वान तैं वाँचे ।
कोप-कृसानु गुमान-अवाँ घट ज्यों जिनके मन आँच न आँचे ॥
लोभ सवै नट के बस है कपि ज्यों जग में बहु नाच न नाचे ॥
नीके हैं साधु सवै तुलसी पै तेई रघुवीर के सेवक साँचे ॥ ११८ ॥

कवित्त

भेष सुवनाइ, सुचि वचन कहैं चुवाइ,
जाइ तौ न जरनि धरनि धन धाम की ।
कोटिक उपाय करि लालि पालियत देह,
मुख कहियत गति राम ही के नाम की ॥
प्रगटै उपासना, दुरावै दुरवासनाहिं,
मानस निवास-भूमि लोभ मोह काम की ।
राग रोष ईरपा कपट कुटिलाई भरे
तुलसी से भगत भगति चहैं राम की ! ॥ ११९ ॥
‘काल्हिही तरुन तन, काल्हि ही धरनि धन,
काल्हि ही जितौंगो रन कहत कुचालि है ।
काल्हिही साधौंगो काज, काल्हि ही राजा समाज,’
मसक है कहै “भार मेरे मेरु हालिहै” ॥
तुलसी यही कुभाँति घने घर घालि आई,
घने घर घालति है, घने घर घालिहै ।
देखत सुनत समुझत हू न सूझै सोई,
कवहुँ कह्यो न ‘कालहु को काल काल्हि है’ ॥ १२० ॥

भयो न तिकाल तिहूँ लोक तुलसी सो मंद,
 निंदै^२ सब साधु, सुनि मानौ न सकोचु हौं ।
 जानत न जोग हिय हानि मानौ, जानकीस !
 काहे को परेखे पातकी प्रपंची पोचु हौं ॥
 पेट भरिबे के काज महाराज को कहायों,
 महाराज हू कह्यो है प्रनत-विमोचु हौं ।
 निज अघ जाल, कलिकाल की करालता
 विलोकि होत व्याकुल, करत सोई सोचु हौं ॥ १२१ ॥
 धरम के सेतु जगमंगल के हेतु,
 भूमि भार हरिबे को अवतार लियो नर को ।
 नीति औ प्रतीति-प्रीति-पाल चालि प्रभु मान,
 लोक वेद राखिबे को पन रघुबर को ॥
 बानर विभीषन की ओर के कनावड़े हैं,
 सो प्रसंग सुने अंग जरै अनुचर को ।
 राखे रीति आपनी जो होइ सोई कीजै, बलि,
 तुलसी तिहारो घरजायउ है घर को ॥ १२२ ॥
 नाम महाराज के निबाह नीको कीजै उर,
 सबही सोहात, मैं न लोगनि सोहात हौं ।
 कीजै राम बार यहि मेरी ओर चखकोर,
 ताहि लगि रंक ज्यों सनेह को ललात हौं ॥
 तुलसी विलोकि कलिकाल की करालता,
 कृपालु को सुभाव समुक्त सकुचात हौं ।
 लोक एक भाँति को, तिलोकनाथ लोकबस,
 आपनो न सोच, स्वामी सोच ही सुखात हौं ॥ १२३ ॥
 तौलों लोभ, लोलुप ललात लालची लवार

बार बार, लालच धरनि धन धाम को ।
 तब लौं वियोग रोग सोग भोग जातना को,
 जुग सम लगत जीवन जाम जाम को ॥
 तौलों दुख दारिद दहत अति नित तनु,
 तुलसी है किंकर विमोह कोह काम को ।
 सब दुख आपने, निरापने सकल सुख,
 जौलों जन भयो न वजाइ राजा राम को ॥ १२४ ॥
 तब लौं मलीन हीन दीन, सुख सपने न,
 जहाँ तहाँ दुखी जन भाजन कलेस को ।
 तब लौं उबैने पायँ फिरत पेटै खलाय,
 बाये मुँह सहत पराभौ देस देस को ॥
 तब लौं दयावनी दुसह दुख दारिद को,
 साथरी को सोइवो, ओढ़िवो भूने खेस को ।
 जब लौं न भजै जीह जानकी-जीवन राम,
 राजन को राजा सो तौ साहव महेस को ॥ १२५ ॥
 ईसन के ईस, महाराजन के महाराज,
 देवन के देव, देव ! प्रानहूँ के प्रान है ॥
 कालहू के काल, महाभूतन के महाभूत,
 कर्म हू के कर्म, निदान हू के निदान है ॥
 निगम को अगम, सुगम तुलसीहू से को,
 एते मान सीलसिंधु करुनानिधान है ।
 महिमा अपार, काहू बोल को न वारापार,
 बड़ी साहिबी में नाथ बड़े सावधान है ॥ १२६ ॥

१२४—वजाइ = डंके की चोट, खुल्लमखुल्ला ।

१२५—उबैने = नंगे (पावँ) । भूने = मीने, भाँकुरे । खेस = पुरानी रुई के पहले का बुना हुआ खुरदुरा कपड़ा ।

१२६—बोळ = वाक्य, वर्णन । निदान = कारण । एते मान = इतने ।

सवैया

आरतपालु कृपालु जो राम, जेही सुमिरे तेहि को तहँ ठाढ़े ।
 नामप्रताप महा महिमा, अकरे किये खोटेउ, छोटेउ बाढ़े ॥
 सेवक एक तेँ एक अनेक भए तुलसी तिहुँ तापन डाढ़े ।
 प्रेम बदैँ प्रहलादहि को जिन पाहन तेँ परमेस्वर काढ़े ॥ १२७ ॥
 काढ़ि कृपान, कृपा न कहूँ, पितु काल कराल बिलोकि न भागे ।
 'राम कहाँ' 'सब ठाँउ है' 'खंभ में?' 'हाँ' सुनि हाँक नृकोहरि जागे ॥
 बैरी बिदारि भए विकराल, कहे प्रहलादहि के अनुरागे ।
 प्रीति प्रतीति बढ़ी तुलसी तब तेँ सब पाहन पूजन लागे ॥ १२८ ॥
 अंतर्जामिहु तेँ बड़ बाहरजामि हैं राम, जे नाम लिए ते ।
 धावत धेनु पन्हाइ लवाइ ज्यों बालक बोलनि कान किये तेँ ।
 आपनि बूझि कहै तुलसी, कहिवे की न बावरि बात बिये तेँ ॥
 पैज परे प्रहलादहु को प्रगटे प्रभु पाहन तेँ, न हिये तेँ ॥ १२९ ॥
 बालक बोलि दिये बलि काल को, कायर कोटि कुचाल चलाई ।
 पापी है बाप बड़े परिताप तेँ आपनी ओर तेँ खोरि न लाई ॥
 भूरि दर्ई बिषमूरि भई प्रहलाद सुधार्ई सुधा की मलाई ।
 रामकृपा तुलसी जन को जग होत भले को भलाई भलाई ॥ १३० ॥
 कंस करी ब्रजवासिन सों करतूति कुभाँति, चली न चलाई ।
 पांडु के पूत सपूत, कुपूत सुजोधन भो कलि छोटा छलाई ।
 कान्ह कृपालु बड़े नतपालु, गए खल खेचर खीस खलाई ॥
 ठीक प्रतीति कहैं तुलसी जग होइ भले को भलाई भलाई ॥ १३१ ॥

१२७—अकरा=महंगा, चोखा (अक्रय) ।

१२८—अंतर्जामी = अंतस् ही में जानने योग्य निर्गुण । बाहरजामी = बाह्य जगत् में जानने योग्य सगुण रूप । बावरी=बुरी । बिये=दूसरे ।

१३१—कलि-छोटो=कलि का छोटा भाई । छलाई=छल में । खेचर = राक्षस ।

अवनीस अनेक भए अवनी जिनके डर तेँ सुर सोच सुखाहीं ।
 मानव-दानव-देव-सतावन रावन घाटि रच्यो जग माहीं ॥
 ते मिलये धरि धूरि सुजोधन जे चलते बहुछत्र की छाहीं ।
 वेद पुरान कहै, जग जान, गुमान गोबिंदहि भावत नाहीं ॥ १३२ ॥
 जब नयनन प्रीति ठई ठग स्याम सों स्यानी सखी हठि हैं बरजी ॥
 नहिं जान्यों बियोग सो रोग है आगे झुकी तब हैं, तेहि सों तरजी ॥
 अब देह भई पट नेह के घाले सों, व्योंत करै विरहा दरजी ।
 ब्रजराज कुमार विना सुनु, शृंग ! अनंग भयो जिय को गरजी ॥ १३३ ॥
 जोगकथा पठई ब्रज को, सब सो सठ चेरी की चाल चलाकी ।
 ऊधो जू ! क्यों न कहैं कुवरी जो बरी नटनागर हेरि हलाकी ॥
 जाहि लगै पर जानै सोई, तुलसी सो सुहागिनि नंदलाल की ।
 जानी है जानपनी हरि की, अब बाँधियैगी कछु मोटि कला की ॥ १३४ ॥

कवित्त

पठयो है छपद छबीले कान्ह कैहू कहूँ
 खोजि कै खवास खासो कुवरी सी बाल को ॥
 ज्ञान को गढ़ैया, बिनु गिरा को पढ़ैया, बार,
 खाल को कढ़ैया सो बढ़ैया उरसाल को ॥
 प्रीति को बधिक, रसरीति को अधिक, नीति-
 निपुन, बिबेक है निदेस देसकाल को ।
 तुलसी कहे न बनै, सहेही बनैगी सब,
 जोग भयो जोग को, बियोग नंदलाल को ॥ १३५ ॥

१३२—घाटि रच्यो = बुराई का आयोजन किया ।

१३४—हलाकी = मार डालने वाला, घातक । मोटि = गठरी । बाँधियैगी = बाँधैहीगी अथवा “बाँधिहैगी” भविष्य का दोहरा रूप जैसा देव, मुबारक आदि जाए हैं; जैसे, हों कहों रंग न फाबिहैगो—मुबारक ।

१३५ जोग = अवसर, संयोग, मौक़ा ।

हनूमान है कृपालु, लाड़िले लषन लाल,
 भावते भरत कीजै सेवक सहाय जू ।
 बिनती करत दीन दूबरो दयावनो सो,
 बिगरे ते आपही सुधारि लीजै भाय जू ॥
 मेरी साहिबिनि सदा सीस पर बिलसति,
 देवि ! क्यों न दास को देखाइयत पाय जू ।
 खीझू में रीझवे की बानि, राम रीझत हैं,
 रीझे हैं राम की दुहाई रघुराय जू ॥ १३६ ॥
 सबैया

वेष विराग को, राग भरो मनु, माय ! कहैं सतिभाव हैं तोसों ।
 तेरे ही नाथ को नाम लै बेचिहैं पातकी पामर प्राननि पोसों ॥
 एते बड़े अपराधी अधी कहूँ, तैं कहूँ अंव को मेरो तु मोसों ।
 स्वारथ को परमारथ को, परिपूरन भो फिरि घाटि न हो सो ॥ १३७ ॥

घनाचरी

जहाँ बालमीकि भए व्याध ते मुनींद्र साधु,
 'मरा मरा' जपे सुनि सिष ऋषि सात की ।
 सीय को निवास लव-कुश को जनमथल,
 तुलसी छुवत छाँह ताप गरै गात की ॥
 बिटप महीप सुरसरित समीप सोहै,
 सीताबट पेखत पुनीत होत पातकी ।
 बारिपुर दिगपुर बीच बिलसति भूमि,
 अंकित जो जानकी चरन जलजात की ॥ १३८ ॥
 मरकत बरन परन, फल मानिक से,
 लसै जटाजूट जनु रुख वेष हरु है ।
 सुखमा को ढेरु कैधौँ, सुकृत सुमेरु कैधौँ,
 संपदा सकल मुद मंगल को घरु है ॥

देत अभिमत जो समेत प्रीति सेइए,
 प्रतीति मानि तुलसी विचारि काको थरु है ।
 सुरसरि निकट सोहावनी अबनि सोहै,
 रामरमनी को वट कलि कामतरु है ॥१३८॥
 देवधुनी पास मुनिवास श्रीनिवास जहाँ,
 प्राकृत हूँ वट वृट बसत पुरारि हूँ ।
 जोग जप जाग को विराग को पुनीत पीठ,
 रागिन पै सीठि, डीठि बाहरी निहारिहूँ ॥
 'आयसु', 'आदेश' 'बाबा' 'भलो भलो' 'भाव सिद्ध',
 तुलसी विचारि जोगी कहत पुकारि हूँ ।
 रामभगतन को तौ कामतरु तें अधिक,
 सियवट सेए करतल फल चारि हूँ ॥१४०॥
 जहाँ बन पावनो सुहावनो विहंग मृग,
 देखि अति लागत अनंद खेत खूँट सो ।
 सीताराम-लखन-निवास, बास मुनिन को,
 सिद्ध साधु साधक सबै बिबेक बूट सो ॥
 भरना भरत भारि सीतल पुनीत बारि,
 मंदाकिनी मंजुल महेस जटाजूट सो ।
 तुलसी जौ राम सों सनेह साँचे चाहिए
 तौ सेइए सनेह सों बिचित्र चित्रकूट सो ॥ १४१ ॥
 मोह-बन कलिमल-पल-पीन जानि जिय,
 साधु गाय बिप्रन के भय को नेवारिहूँ ।
 दीन्हि है रजाइ राम पाइ सो सहाइ लाल,

१४०—'आयसु'... 'भाव सिद्ध' = साधु संतों की बोल्चाळ के वाक्य ।
 अर्थात् वहाँ के रहनेवाले इसी प्रकार के शिष्ट और मधुर शब्दों का व्यवहार
 करते हैं ।

लषन समर्थ वीर हेरि हेरि मारिहै ॥
 मंदाकिनी मंजुल कमान असि, बान जहाँ,
 बारि-धार धीर धरि सुकर सुधारिहै ।
 चित्रकूट अचल अहेरि वैठ्यो घात मानों,
 पातक के त्रात घोर सावज सँहारिहै ॥ १४२ ॥

सवैया

लागि दवारि पहार ठही लहकी कपिलंक जथा खर-खौकी ।
 चारु चुवा चहुँ ओर चलै, लपटै भूपटै सो तमीचर तौंकी ।
 क्यों कहि जात महा सुखमा, उपमा तकि ताकत है कवि कौ की ॥
 मानों लसी तुलसी हनुमान हिये जगजीति जराय की चौकी ॥ १४३ ॥
 देव कहैं अपनी अपना अवलोकन तीरथराज चलो रे ।
 देखि मिटै अपराध अगाध, निमज्जत साधु समाज भलो रे ॥
 सोहै सितासित को मिलिबो, तुलसी हुलसै हिय हेरि हलोरे ।
 मानों हरे तृन चारु चरै बगरे सुरधेनु के धौल कलोरे ॥ १४४ ॥
 देवनदी कहैं जो जन जान किये मनसा कुल कोटि उधारे ।
 देखि चले भगरै सुरनारि, सुरेस बनाइ बिमान सँवारे ॥
 पूजा को साज बिरंचि रचै, तुलसी जे महातम जाननहारे ।
 ओक की नींव परी हरिलोक बिलोकत गंग तरंग तिहारे ॥ १४५ ॥
 ब्रह्म जो व्यापक बेद कहैं, गम-नाहिं गिरा गुनज्ञान गुनी को ।
 जो करता भरता हरता सुर साहिब, साहब दोन दुनी को ॥
 सोई भयो द्रव रूप सही जु है नाथ बिरंचि महेस मुनी को ।
 मानि प्रतीति सदा तुलसी जल काहे न सेवत देवधुनी को ? ॥ १४६ ॥

१४३—ठही = ठह कर, जम कर, अच्छी तरह । लहकी = लहकाई । खर-
 खौकी = तृण खानेवाली अर्थात् आग । चुवा = चौवा, चतुष्पद मृग । तौंकी =
 तौक कर, आँच से तप कर । कौं की = कब का, बड़ी देर से ।

१४४—कलोरे = बछड़े ।

बारि तिहारो निहारि मुरारि भए परसे पद पाप लहैंगो ।
 ईस है सीस धरौं पै डरौं, प्रभु की समता बड़ दोष दुहैंगो ॥
 बरु बारहि बार सरीर धरौं, रघुवीर को हूँ तव तीर रहैंगो ।
 भागीरथी ! बिनवैं करजोरि, बहोरि न खोरि लगै सो कहैंगो ॥१४७॥

कवित्त

लालची ललात, बिललात द्वार द्वार दीन,
 वदन मलीन, मन मिटै न विसूरना ।
 ताकत सराध कै विबाह कै उछाह कछु,
 डोलै लोल वृक्षत सबद डोल तूरना ॥
 प्यासे हू न पावै बारि, भूखे न चनक चारि,
 चाहत अहारन पहार दारि कूरना ।
 सोक को अगार दुख-भार-भरो तौलों जन
 जौलों देवी द्रवै न भवानी अन्नपूरना ॥ १४८ ॥

छप्पय

भस्म अंग मर्दन अनंग, संतत असंग हर ।
 सीस गंग, गिरिजा अधंग, भूषन भुजंगवर ॥
 मुंड माल, विधु बाल माल, डमरु कपाल कर ।
 विबुध-वृंद-नवकुमुद-चंद, सुखकंद, सूलधर ॥
 त्रिपुरारि त्रिलोचन दिग्वसन विष-भोजन भव-भय-हरन ।
 कह तुलसिदास सेवत सुलभ सिव सिव सिव संकर सरन ॥१४९॥
 गरल-असन, दिग्वसन, व्यसन-भंजन, जनरंजन ।
 कुंद-इंदु-कपूर-गौर, सच्चिदानंदधन ॥
 विकट वेष, उर शेष, सीस सुरसरित सहज सुचि ।
 सिव अकाम, अभिराम-धाम, नित रामनाम रुचि ॥
 कंदर्पदर्प-दुर्गम-दवन, उमारवन गुनभवन हर ।

१४८—दारि कूरना = दाल के कूर भरे हुए अच्छे पकवानों का ढेर ।

तुलसीस त्रिलोचन, त्रिगुन-पर, त्रिपुरमथन जय त्रिदसवर ॥१५०॥
 अर्ध-अंग अंगना, नाम जोगीस जोगपति ।
 विषम असन, दिगवसन, नाम बिस्वेस बिस्वगति ॥
 कर कपाल, सिर माल व्याल, विष भूति विभूषन ।
 नाम सुद्ध, अबिरुद्ध, अमर, अनवद्य, अदूषन ॥
 विकराल भूत-वैताल-प्रिय, भीम नाम भवभय-दमन ।
 सब विधि समर्थ महिमा अकथ तुलसिदास संसयसमन ॥१५१॥
 भूतनाथ भयहरन, भीम, भय, भवन, भूमिधर ।
 भानुमंत भगवंत, भूति भूषन भुजंगवर ॥
 भव्य-भाव-वृद्धभ, भवेस भवभार-बिभंजन ।
 भूरि भोग, भैरव कुजोग-नंजन जन-रंजन ॥
 भारती बदन, विष-अदन सिव, ससि-पतंग-पावकनयन ।
 कह तुलसिदास किन भजसि मन भद्रसदन मर्दनमयन ॥१५२॥

सवैया

नांगो फिरै कहै मांगतो देखि “न खांगो कछू, जनि माँगिए थैरो” ।
 राँकनि नाकप रीझि करै, तुलसी जग जो जुँरै जाचक जोरो ॥
 “नाक सवाँरत आयो हौं नाकहि, नाहिं पिनाकिहि नेकु निहोरो” ।
 ब्रह्म कहै “गिरिजा ! सिखवो, पति रावरो दानि है बावरो भोरो” ॥१५३॥
 विष-पावक, व्याल कराल गरे, सरनागत तौ तिहुँ ताप न डाढ़े ।
 भूत बैताल सखा, भव नाम, दलै पल में भव के भय गाढ़े ॥
 तुलसीस दरिद्र-सिरोमनि सो सुमिरे दुखदारिद होहि न ठाढ़े ।
 भौन में भांग; धतूरोई आंगन, नांगे के आगे हैं माँगने बाढ़े ॥१५४॥
 सीस बसै बरदा, बरदानि, चढ़्यो बरदा, धरन्यौ बरदा है ।
 धाम धतूरो बिभूति को कूरो, निवास तहाँ शव लै मरे दाहै ॥
 व्याली कपाली है ख्याली, चहूँ दिसि भाँग की टाटिन को परदा है ।
 राँकसिरोमनि काकिनिभाग बिलोकत लोकप को करदा है ॥१५५॥

‘दानी जो चारि पदारथ को त्रिपुरारि तिहूँ पुर में सिर-टीको ।
 भारो भलो भले भाय को भूखो, भलोई कियो सुमिरे तुलसी को ॥
 ता बिनु आस को दास भयो, कवहूँ न मिट्यो लघु लालच जी को ।
 साधो कहा करि साधन तेँ जोपै राधो नहीं पति पारवती को ? ॥१५६॥
 जात जरे सब लोक बिलोकि त्रिलोचन सेों बिष लोकि लियो है ।
 पान कियो बिष भूषन भो, करुना-बरुनालय साँई-हियो है ॥
 मेरोई फोरिबे जोग कपार, किधौँ कछुँ काहूँ लखाइ दियो है ।
 काहे न कान करौ बिनती, तुलसी कलिकाल बिहाल कियो है ॥१५७॥

कवित्त

खायो कालकूट भयो अजर अमर तनु,
 भवन मसान, गथ गाँठरी गरद की ।
 डमरु कपाल कर, भूषन कराल व्याल,
 बावरे बड़े की रीझ बाहन-बरद की ॥
 तुलसी विसाल गोरे गात बिलसति भूति,
 मानों हिमगिरि चारु चाँदनी सरद की ।
 अर्थ धर्म काम मोक्ष बसत बिलोकनि में,
 कासी करामाति जोगी जागत मरद की ॥१५८॥
 पिंगल जटा कलाप, माथे पै पुनीत आप,
 पावक नयना, प्रताप भ्रू पर बरत हैं ।
 लोचन विसाल लाल, सोहै बालचंद्र भाल,
 कंठ कालकूट, व्याल भूषन धरत हैं ॥
 सुंदर दिगंबर बिभूति गात, भाँग खात,
 रुरे सुंगी पूरे काल-कंटक हरत हैं ।
 देत न अघात, रीझि जात पात आक ही के,
 भोलानाथ जोगी जब औठर ठरत हैं ॥१५९॥

१५६-राधो = आराधना की ।

देत संपदा समेत श्रीनिकेत जाचकनि,
 भवन बिभूति भाँग वृषभ बहनु है ।
 नाम बामदेव, दाहिनी सदा असंग रंग,
 अर्द्ध अंग अंगना, अनंग को महनु है ॥
 तुलसी महेस को प्रभाव भाव ही सुगम,
 निगम अगम हूँ को जानिबो गहनु है ।
 बेष तौ भिखारि को, भयंक रूप संकर,
 दयालु दीनबंधु दानि दारिद-दहनु है ॥१६०॥
 चाहै न अनंग-अरि एकौ अंग मंगन को,
 देखोई पै जानिए सुभाव-सिद्ध बानि सो ।
 बारिबुंद चारि त्रिपुरारि पर डारिए तौ
 देत फल चारि, लेत सेवा साँचो मानि सो ॥
 तुलसी भरोसो न भवेस भोलानाथ को तौ
 कोटिक कलेस करौ मरौ छार छानि सो ।
 दारिद-दमन, दुख-दोष-दाह-दावानल,
 दुनी न दयालु दूजो दानि सूलपानि सो ॥१६१॥
 काहे को अनेक देव सेवत जागै मसान,
 खोवत अपान, सठ होत हठि प्रेत रे ! ।
 काहे को उपाय कोटि करत मरत धाय,
 जाचत नरेस देस देस के, अचेत रे ! ॥
 तुलसी प्रतीति बिनु त्यागै तैं प्रयाग तनु,
 धन ही के हेतु दान देत कुरुखेत रे ।
 पात द्वै धतूरै के दै भोरे कै भवेस सो
 सुरेस हू की संपदा सुभाय सों न लेत, रे ॥१६२॥
 स्यंदन, गयंद, बाजिराजि, भले भले भट,

धन-धाम-निकर, करनि हू न पूजै कै ।
 बनिता बिनीत, पृत-पावन सोहावन, औ
 विनय विवेक विद्या सुभग सरीर ज्वै ॥
 इहाँ ऐसो सुख, परलोक सिवलोक ओक,
 ताको फल तुलसी सों सुनौ सावधान है ।
 जाने, बिनु जाने, कै रिसाने, केलि कबहुँक,
 सिवहि चढाये हैहैं बेल के पतौवा द्वै ॥ १६३ ॥
 रति सी रवनि, सिंधु-मेखला-अवनिपति,
 औनिप अनेक ठाढ़े हाथ जोरि हारि कै ।
 संपदा समाज देखि लाज सुरराज हू के,
 सुख सब विधि विधि दीन्हें हैं सँवारि कै ॥
 इहाँ ऐसो सुख, सुरलोक सुरनाथ-पद,
 ताको फल तुलसी सो कहैगो विचारि कै ।
 आक के पतौवा चारि, फूल कै धतूरे के द्वै,
 दीन्हें हैहैं धारक पुरारि पर डारि कै ॥ १६४ ॥
 देवसरि सेवौं वामदेव गाउँ रावरे ही,
 नाम राम ही के माँगि उदर भरत हैं ।
 दीबे जोग तुलसी न लेत काहू को कछुक,
 लिखी न भलाई भाल, पोच न करत हैं ॥
 एते पर हू जो कोऊ रावरो है जोर करै,
 ताको जोर, देवे दीन द्वारे गुदरत हैं ।
 पाइकै उराहनो उराहनो न दीजै मोहिं,
 काल-कला कासीनाथ कहे निबरत हैं ॥ १६५ ॥
 चरो राम राय को सुजस सुनि तेरो, हर !
 पाइँ तर आइ रह्यो सुरसरि तीर हैं ।

वामदेव, राम को सुभाव सील जानि जिये,
 नातो नेह जानियत रघुबीर भीर हैं ॥
 अविभूत, बेदन बिषम होत, भूतनाथ !
 तुलसी विकल पाहि पचत कुपीर हैं ।
 मारिए तो अनायास कासीवास खास फल,
 ज्याइए तौ कृपा करि निरुज सरीर हैं ॥१६६॥
 जीबे की न लालसा, दयालु महादेव ! मोहिं,
 मालुम है तोहिं मरिबेइ को रहतु हैं ।
 कामरिपु राम के गुलामनि को कामतरु,
 अवलंब जगदंब सहित चहतु हैं ॥
 रोग भयो भूत सो, कुसूत भयो तुलसी को,
 भूतनाथ पाहि पदपंकज गहतु हैं ।
 ज्याइए तौ जानकी-रमन जन जानि जिये,
 मारिए तौ माँगी मीचु सूधियै कहतु हैं ॥१६७॥
 भूतभव ! भवत् पिसाच-भूत-प्रेत-प्रिय,
 आपनो समाज, सिव ! आपु नीके जानिए ।
 नाना बेष बाहन बिभूषन बासन, बास,
 खान पान, बलि पूजा बिधि को बखानिए ॥
 राम के गुलामनि की रीति प्रीति सूधी सब,
 सब सौं सनेह सबही को सनमानिए ।
 तुलसी की सुधरै सुधारे भूतनाथही के,
 मेरे माय बाप गुरु संकर भवानिए ॥ १६८ ॥
 गौरीनाथ भोलानाथ भवत भवानीनाथ,
 बिखनाथ-पुर फिरी आन कलिकाल की ।

 १६७-कुसूत = कुपास, सुभीता न रहना ।

१६८-भूतभव = पंचभूतों के कारणस्वरूप । भवत = आप ।

संकर से नर, गिरिजा सी नारी कासीबासी,
 वेद कही, सही ससिसेषर कृपाल की ॥
 छमुख गनेस तेँ महेस के पियारे लोग,
 विकल विलोकियत, नगरी बिहाल की ।
 पुरी-सुरबेलि केलि काटत किरात कलि,
 निठुर निहारिए उघारि डीठि भाल की ॥ १६६ ॥
 ठाकुर महेस, ठकुराइन उमा सी जहाँ,
 लोक वेद हू विदित महिमा ठहर की ।
 भट रुद्रगन, भूतगनपति सेनापति,
 कलिकाल की कुचाल काहू तौ न हरकी ॥
 बीसी बिस्वनाथ की विषाद बड़ो बारानसी,
 बूझिए न ऐसी गति संकर-सहर की ।
 कैसे कहै तुलसी, वृषासुर के बरदानि !
 जानि जानि सुधा तजि पियनि जहर की ॥ १७० ॥
 लोक वेद हू विदित बारानसी की बड़ाई,
 बासी नरनारि ईस अंबिका-सरूप हैं ।
 कालनाथ कोतवाल, दंडकारि दंडपानि,
 सभासद गनप से अमित अनूप हैं ॥
 तहाँऊँ कुचालि कलिकाल की कुरीति, कैधौँ
 जानत न मूढ़, इहाँ भूतनाथ भूप हैं ।
 फलैँ फूलैँ फौलैँ खल, सीदैँ साधु पल पल,
 खाती दीपमालिका ठठाइयत सूप हैं ॥ १७१ ॥
 पंचकोस पुन्यकोस स्वारथ परारथ को,
 जानि आप आपने सुपास बास दियो है ।

१७०-हरकी = मना की । बीसी बिस्वनाथ की-रुद्रबीसी जो संवत् १६६५ से १६८५ तक रही ।

नीच नर नारि न सँभारि सकै आदर,
 लहत फल कादर बिचारि जो न कियो है ॥
 बारी बारानसी बिनु कहे चक्र चक्रपानि,
 मानि हितहानि सो मुरारि मन भियो है ।
 रोष मैं भरोसो एक आसुतोष कहि जात,
 बिकल बिलोकि लोक कालकूट पियो है ॥ १७२ ॥
 रचत बिरंचि, हरि पालत, हरत हर,
 तेरेही प्रसाद जग अगजगपालिके ।
 तोहि में बिकास बिख, तोहि में बिलास सब,
 तोहि में समात मातु भूमिधरबालिके ॥
 दीजै अवलंब जगदंब न बिलंब कीजै,
 करुना-तरंगिनी कृपातरंग-मालिके ।
 रोष महामारी परितोष, महतारी ! दुनी,
 देखिए दुखारी मुनि-मानस-मरालिके ॥ १७३ ॥
 निपट बसेरे अघ औगुन घनेरे नर
 नारिक अनेरे जगदंब चेरी चेरे हैं ।
 दारिदी दुखारी देखि भूसुर भिखारी भीरु
 लोभ मोह काम कोह कलिमल-घेरे हैं ॥
 लोकरीति राखी, राम साखी बामदेव जान,
 जन की बिनति मानि मातु कही 'मेरे हैं' ।
 महामारी महेशानि/महिमा की खानि,
 मोद मंगल की रासि, दास कासी-बासी तेरे हैं ॥ १७४ ॥
 लोगन के पाप, कैधों सिद्ध-सुर-साप,

१७२-बारी.....चक्र = मिथ्या वासुदेव को दंड देने के लिए कृष्ण के चक्र ने उसकी सेना का तो संहार किया ही पर बिना आज्ञा के उसकी पुरी कारी को भी भस्म कर डाला । भियो है = डरा है ।

काल के प्रताप कासी तिहूँ-ताप-तई है ।
 ऊँचे, नीचे, बीच के, धनिक रंक राजा राय,
 हठनि बजाय करि डीठि पीठि दई है ॥
 देवता निहोरे महामारिन्ह सों कर जोरे,
 भोरानाथ जानि भोरे आपनी सी ठई है ।
 करुनानिधान हनुमान वीर बलवान,
 जसरासि जहाँ तहाँ तैहाँ लूटि लई है ॥ १७५ ॥
 संकर-सहर सर, नरनारि बारिचर,
 विकल सकल महामारी माँजा भई है ।
 उछरत उतरात हहरात मरि जात,
 भभरि भगत, जल/थल मीचुमई है ॥
 देव न दयालु महिपाल न कृपालुचित,
 बारानसी बाढ़ति अनीति नित नई है ।
 पाहि रघुराज, पाहि कपिराज रामदूत,
 रामहू की बिगरी तुहीं सुधारि लई है ॥ १७६ ॥
 एक तो कराल कलिकाल सूल-मूल तामें,
 कोढ में की खाजु सी सनीचरी है मीन की ।
 वेद धर्म दूरि गए, भूमिचोर भूप भए,
 साधु सीधमान जानि रीति पाप-पीन की ॥
 दूबरे को दूसरो न द्वार, राम दया-धाम, !
 रावरी ई गति बल-बिभव-बिहीन को ।
 लागैगी पै लाज वा बिराजमान बिरुदहि,
 महाराज आजु जौ न देत दादि दीन की ॥ १७७ ॥

१७५—करि डीठि = देख सुन कर । पीठि दई = बिमुख हुए ।

१७७—मीन की सनीचरी = मीनराशि पर शनैश्चर की स्थिति की दशा जिसका फल राजा प्रजा का नाश होता है । यह योग संवत् १६६१ के आरंभ

रामनाम मातुपितु, स्वामि समरथ हितु,
 आस रामनाम की, भरोसो रामनाम को ।
 प्रेम रामनाम ही सों, नेम रामनाम ही को,
 जानौं न मरम पद दाहिनो न बाम को ॥
 स्वारथ सकल परमारथ को रामनाम,
 रामनामहीन तुलसी न काहू काम को ।
 राम की सपथ सरबस मेरे रामनाम,
 कामधेनु कामतरु मो से छीन छाम को ॥ १७८ ॥

सवैया

मारग मारि, महीसुर मारि, कुमारग कोटिक कैं धन लीयो ।
 संकर कोप सों पाप को दाम परीच्छित जाहिगो जारि कैं हीयो ॥
 कासी में कंटक जेते भए ते गो पाइ अघाइ कैं आपनो कीयो ।
 आजु कि कालिह परौं कि नरौं जड़ जाहिंगे चाटि दिवारी को दीयो ॥ १७९ ॥
 कुंकुम रंग सुभ्रंग जितो, मुखचंद सों चंद सों होड़ परी है ।
 बोलत बोल समृद्धि चुवै, अवलोकत सोच विषाद हरी है ॥
 गौरी कि गंग बिहंगिनि बेध, कि मंजुल मूरति मोद भरी है ।
 पेखि सप्रेम पयान समय सब सोच बिमोचन छेमकरी है ॥ १८० ॥

से १६७१ के मध्य तक पड़ा था । अतः यह कवित्त उसी समय के भीतर कहा गया होगा ।

१७९—परीच्छित = निश्चित, निश्चयरूप से । चाटि दिवारी को दीयो = ऐसा कहते हैं कि सप आदि दीवाली का दीया चाट कर चले जाते हैं अर्थात् दीवाली के बाद नहीं रह जाते ।

१८०—कुंकुम रंग.....परी है = चेमकरी नाम की चील जो कत्थई या ललाई लिए पीले रंग की होती है । इसकी चोंच सफेद रंग की होती है । इसका दर्शन शुभ माना जाता है । यह दक्षिण में कारमंडल के किनारे अधिक होती है । तंत्रसार में इसके नमस्कार का श्लोक इस प्रकार है—कुंकुमारुण्य सर्वांगि ! कुंदेंदुषवळानने । मत्स्यमांसप्रिये देवि, चेमंकरि नमोस्तुते ।

घनाक्षरी

मंगल की रासि, परमारथ की खानि,
जानि, बिरचि बनाई विधि, केसव बसाई है ।
प्रलय हू काल राखी सूलपानि सूल पर,
मीचुअस नीच सोऊ चहत खसाई है ॥
छाँड़ि छितिपाल जो परीछित भए कृपालु,
भलो कियो खल को निकाई सो नसाई है ।
पाहि हनुमान ! करुनानिधान राम पाहि !
कासी कामधेनु कलि कुहत कसाई है ॥ १८१ ॥

विरची बिरचि की बसति बिस्वनाथ की जो
प्रानहू तेँ प्यारी पुरी केसव कृपाल की ।
ज्योतिरूप-लिंगमई, अगनित-लिंगमई,
भोक्ष-वितरनि, बिदरनि जगजाल की ॥
देवी देव देवसरि सिद्ध मुनिवर बास,
लोपति विलोकत कुलिपि भौँडे भाल की ।
हाहा करै तुलसी दयानिधान राम ! ऐसी
कासी की कदर्थना कराल कलिकाल की ॥ १८२ ॥

आस्रम बरन कलि-बिबस बिकल भय,
निज निज मरजाद मोटरी सी डार दी ।
संकर सरोष महामारि ही तेँ जानियत,
साहिब सरोष दुनी दिन दिन दारदी ॥
नारि नर आरत पुकारत, सुनै न कोउ,
काहू देवतनि मिलि मोटी मूठि मार दी ।

१८१-कुहत = मारता है ।

१८२-कदर्थना = दुर्दशा ।

तुलसी सभित-पाल सुमिरे कृपालु राम,
 समय सुकरुना सराहि सनकार दी ॥ १८३ ॥

१८३-सनकार दी = इशारा कर दिया ।

हनुमानबाहुक

छप्पय

सिंधु-तरन सिय-सोच-हरन रवि-बाल-बरन-तनु ।
भुज बिसाल, मूरति कराल, कालहु को काल जनु ॥
गहन-दहन-निरदहन-लंक, निःसंक, बंकभुव ।
जातुधान-बलवान-मान-मद-दवन पवनसुव ॥
कह तुलसिदास सेवत सुलभ, सेवक हित संतत निकट ।
गुन गनत, नमत, सुभिरत, जपत समन सकल-संकट-विकट ॥ १ ॥
खर्न-सैल-संकाश कोटि-रवि-तरुन-तेज घन ।
उर बिसाल, भुजदंड चंड नखवज्र वज्रतन ॥
पिग नयन, भ्रुकुटी कराल, रसना दसनानन ।
कपिस केस, करकस लँगूर, खल-दल-बल-भानन ॥
कह तुलसिदास बस जासु उर मारुतसुत मूरति विकट ।
संताप पाप तेहि पुरुष कहँ सपनेहुँ नहिँ आवत निकट ॥ २ ॥

भूलना

पंचमुख छमुख भृगुमुख्य भट,
असुर-सुर-सर्व सरि समर संमरत्य सूरौ ।
बाँकुरो बीर बिरुदैत बिरुदावली,
बेद बंदी बदत पैजपूरो ॥

१-भुव = भू, भ्रुकुटी ।

२-संकाश = प्रकाश, चमक । भानन = तोड़ना ।

जासु गुनगाथ रघुनाथ कह, जासु बल
 बिपुलजल-भरित जगजलधि भूरो ।
 दीन-दुख-दमन को कौन तुलसीस है ?
 पवन को पृत रजपृत रूरो ॥ ३ ॥

घनाचरी

भानु सों पढ़न हनुमान गए भानु, मन ।
 अनुमानि सिसुकैलि कियो फेरफार सो ।
 पाछिले पगनि गम गगन मगनमन,
 क्रम को न भ्रम, कपि-बालक-विहार सो ॥
 कौतुक बिलोकि सुरपाल हरि हर विधि,
 लोचननि चकाचौंधी चित्तनि खँभार सो ।
 बल कैधौं बीररस, धीरज कै, साहस, कै
 तुलसी सरीर धरे सबनि को सार सो ॥ ४ ॥
 भारत में पारथ के रथकेतु कपिराज,
 गाज्यो सुनि कुरुराजदल हलबल भो ।
 कह्यो द्रोण भीषम समीरसुत महावीर,
 बीर-रस-वारि-निधि जाको बल जल भो ॥
 बानर सुभाय बालकैलि भूमि भानु
 लागि फलँग फलाँग हू ते' घाटि नभतल भो ।
 नाइ नाइ माथ जोरि जोरि हाथ जोधा जोहैं,
 हनुमान देखे जगजीवन को फल भो ॥ ५ ॥

३-भृगुसुख्य = परशुराम ।

४-पाछिले पगनि गम = पीछे की ओर पैरों से चलते हुए । कथा है कि जब हनुमानजी सूर्य के पास पढ़ने गए तब उन्होंने कहा कि मैं एक जगह स्थिर नहीं रहता, इससे यदि पढ़ना हो तो मेरे रथ के सामने पीछे की ओर पैर रखते साथ साथ भागते चलो । हनुमान् ने ऐसा ही किया ।

गोपद पयोधि करि, होलिका ज्यों लाय लंक,
 निपट निसंक परपुर गलबल भो ।
 द्रोन सो पहार लियो ख्याल ही उखारि कर,
 कंदुक ज्यों कपिखेल बेल कैसो फल भो ॥
 संकटसमाज असमंजस में रामराज,
 काज जुग पूगनि को करतल पल भो ।
 साहसी समत्थ तुलसी को नाह जाकी बाँह
 लोकपाल पालन को फिरि थिर थल भो ॥ ६ ॥
 कमठ की पीठि जाके गोड़नि की गाड़ें मानौ,
 नाप के भाजन भरि जलनिधिजल भो ।
 जातुधानदावन, परावन को दुर्ग भयो,
 महामीनबास तिमि-तोमनि को थल भो ॥
 कुंभकर्न-रावन-पयोदनाद-ई धन को
 तुलसी प्रताप जाको प्रबल अनल भो ।
 भीषम कहत मेरे अनुमान हनुमान
 सारिखो त्रिकाल न त्रिलोक महाबल भो ॥ ७ ॥
 दूत रामराय को, सपूत पूत पौन को,
 तू अंजनी को नंदन प्रताप भूरि भानु सो ।
 सीय-सोच-समन, दुरित-दोष-दमन, सरन
 आए अवन, लखनप्रिय प्रान सो ॥
 दसमुख दुसह दरिद्र दरिबे को भयो
 प्रगट त्रिलोक ओक तुलसी निधान सो ।

६-लाय = जला कर । कपिखेल बेल = कपिकच्छु, केवाँच नाम की लता ।
 काज जुग...पल भो = जुग भर में पूरा होने का काम (हनुमान के) करतल
 में हो गया । पूगना = पूजना, पूरा होना ।

८-अवन = रचा ।

ज्ञानगुनवान बलवान सेवासावधान,
 साहेब सुजान उर आनु हनुमान सो ॥ ८ ॥
 दवन-दुवन-दल भुवनविदित बल,
 वेद जस गावत बिबुध-बंदी-छोर को ।
 पाप-ताप-तिमिर-तुहिन-विघटन-पटु,
 सेवक-सरोरुह सुखद भानु भोर को ॥
 लोक परलोक तेँ विसोक, सपने न सोक,
 तुलसी कं हिए है भरोसो एक ओर को ।
 राम को दुलारो दास बामदेव को निवास,
 नाम कलिकामतरु कैसरि किसोर को ॥ ९ ॥
 महाबलसींव, महा भीम, महा बानइत,
 महाबीर बिदित बरायो रघुबीर को ।
 कुलिस कठोरतनु, जेर परै रोर रन,
 करुना-कलित मन धारमिक धीर को ॥
 दुर्जन को काल सो कराल पाल सज्जन को,
 सुमिरे हरनहार तुलसी की पीर को ।
 सीय सुखदायक, दुलारो रघुनायक को,
 सेवक सहायक है साहसी समीर को ॥ १० ॥
 रचिबे को विधि जैसे पालिबे को हरि हर
 मीच मारिबे को, ज्यायबे को सुधापान भो ।
 धरिबे को धरनि, तरनि तम दलिबे को,
 सोखिबे कृसानु, पोषिबे को हिमभानु भो ॥
 खलदुख दोषिबे को, जन परितोषिबे को,
 माँगिबो मलीनता को मोदक सुदान भो ।
 आरत की आरति निवारिबे को तिहूँ पुर

तुलसी को साहिब हठीलो हनुमान भो ॥ ११ ॥
 सेवक सेवकाई जानि जानकीस मानै कानि,
 सानुकूल सूलपानि नवै नाथ नाक को ।
 देवीदैव दानव दयावने हैं जोरै हाथ,
 बापुंरे बराक और राजा राना राँक को ॥
 जागत सोवत बैठे बागत बिनोद मोद,
 ताकै जो अनर्थ सो समर्थ एक आक को ॥ १२ ॥
 सानुग सगौरि सानुकूल सूलपानि ताहि,
 लोकपाल सकल लषन राम जानकी ।
 लोक परलोक को विसोक सो विलोक ताहि,
 तुलसी तमाहि ताहि काहु बीर आन की ?॥
 केसरी-किसोर, बंदीछोर को निवाजे सब,
 कीरति विमल कपि करुनानिधान की ।
 बालक ज्यों पालिहैं कृपालु मुनि सिद्ध ताको
 जाके हिये हुलसति हाँक हनुमान की ॥ १३ ॥
 करुनानिधान, बलबुद्धि के निधान, मेद
 महिमानिधान, गुनज्ञान के निधान है ।
 वामदेवरूप, भूपराम के सनेही, नाम
 लेत देत अर्थ धर्म काम निरबान है ॥
 आपने प्रभाव, सीतानाथ के सुभाव सील,
 लोक-बेद-विधि के बिदुष हनुमान है ।
 मन की, बचन की, करम की तिहूँ प्रकार
 तुलसी तिहरो तुम साहिब सुजान है ॥ १४ ॥
 मन को अगम, तन सुगम किए कपीस,

१२—बराक = बेचारा । बागत = घूमते फिरते ।

१३—तमाहि = तमः ही, ठालच ही ।

काज महाराज के समाज साज साजे हैं ।
 देव बंदीछोर रनरोर केसरीकिसोर,
 जुग जुग जग तेरे बिरद बिराजे हैं ॥
 बीर बरजोर, घटि जोर तुलसी की ओर,
 सुनि सकुचाने साधु, खलगन गाजे हैं ।
 बिगरी-सँवार अंजनीकुमार कीजै मोहिँ,
 जैसे होत आए हनुमान के निवाजे हैं ॥ १५ ॥

मत्तगयंद

सुजान सिरोमनि हौ, हनुमान ! सदा जन के मन बास तिहारो ।
 ढारो बिगारो मैं काको कहा ? केहि कारन खीझत हौ तो तिहारो ॥
 साहिब सेवक नाते तेँ हातो कियौ तो तहाँ तुलसी को न चारो ।
 दोष सुनाए ते आगेहुँ को हुसियार हैहौ, मन तौ हिय हारो ॥ १६ ॥
 तेरे थपे रथपै न महेस, थपै थिर को कपि जे घर घाले ?
 तेरे निवाजे गरीबनिवाज बिराजत बैरिन को उर साले ॥
 संकट सोच सबै तुलसी लिए नाम फटै मकरी के से जाले ।
 बूढ़ भये, बलि, मेरेहि बार, कि हारि परे बहुतै नत पाले ॥ १७ ॥
 सिंधु तरे, बड़े बीर दले खल, जारे हैं लंक से बंक मवासे ।
 तेँ रनकेहरि केहरि के बिदले धरि-कुंजर छैल छवा से ॥
 तोसों समथ सुसाहिब सेइ सहै तुलसी दुख-दोष दवा से ।
 बानर-बाज ! बड़े खल खेचर, लीजत क्यों न लपेटि लवा से ? ॥ १८ ॥
 अच्छ-बिमर्दन कानन-भान दसानन आनन भा न निहारो ।
 बारिदनाद अकंपन कुंभकरन्न से कुंजर केहरि-बारो ॥
 राम-प्रताप हुतासन, कच्छ विपच्छ, समीर समीर दुलारो ।
 पाप तेँ, साप तेँ, ताप तिहूँ तेँ सदा तुलसी कहँ सो रखवारो ॥ १९ ॥

घनाक्षरी

जानत जहान हनुमान को निवाज्यौ जन,
 मन अनुमानि, बलि, बोल न बिसारिए ।
 सेवा-जोग तुलसी कबहुँ ? कहाँ चूक परी,
 साहेब सुभाथ कपि साहेब सँभारिए ॥
 अपराधी जानि कीजै साँसति सहस भाँति,
 मोदक मरै जो ताहि माहुर न मारिए ।
 साहसी समीर के दुलारे रघुवीरजू के,
 बाँहपीर महावीर बेगि ही निवारिये ॥ २० ॥
 बालक विलोकि, बलि, बारे तेँ आपनो कियो,
 दीनबंधु दया कीन्हीं निरुपाधि न्यारिये ।
 रावरो भरोसो तुलसी के, रावरोई बल,
 आस रावरीथै, दास रावरो बिचारिए ॥
 बड़ो बिकराल कलि, काको न बिहाल कियो ?
 माथे पगु बली को, निहारि सो निवारिए ।
 केसरीकिसोर, रन-रोर, बरजोर बीर,
 बाहुपीर राहुमातु ज्यौँ पछारि मारिए ॥ २१ ॥
 उथपे-थपन, थिरथपे-उथपनहार,
 केसरीकुमार बल आपनो सँभारिए ।
 राम के गुलामनि को कामतरु रामदूत,
 मोसे दीन दूबरे को तकिया तिहारिए ॥
 साहिब समर्थ तोसो तुलसी के माथे पर,
 सोऊ अपराध विनु, बीर ! बाँधि मारिए ।
 पोषरी बिसाल बाहुँ, बलि, बारिचर पीर,
 मकरी ज्यौँ पकरि कै बदन बिदारिए ॥ २२ ॥

२१—राहुमातु = छायाग्राहिणी सिंहिका । २२—तकिया = भरोसा ।

राम को सनेह, राम साहस, लखन सिय
 राम की भगति, सोच संकट निवारिए ।
 मुद्गरकट रोग-वारिनिधि हेरि हारे,
 जीव जामवंत को भरोसो तेरो भारिये ॥
 कूदिए कृपाल तुलसी सु-प्रेमपन्वइ तेँ,
 सुथल सुबेल भाल बैठि कै बिचारिए ।
 महाबीर बाँकुरे बराकी बाहुपीर क्यों न
 लंकिनी ज्यों लातघात ही मरोरि मारिए ॥ २३ ॥
 लोक परलोक हूँ, तिलोक न बिलोकियत
 तो सो समरथ चष चारिहूँ निहारिए ।
 कर्म काल, लोकपाल, अग जग जीवजाल,
 नाथहाथ सब निज महिमा बिचारिए ॥
 खास दास रावरो, निवास तेरो तासु उर,
 तुलसी सो, देव ! दुखी देखियत भारिए ।
 बात तरुमूल, बाहुमूल कपिकच्छु बेलि
 उपजी, सकेलि, कपि, खेलही उखारिए ॥ २४ ॥
 ! करम-कराल-कंस भूमिपाल के भरोसे
 बकी बक भगिनी काहू तेँ कहा डरैगी ? ।
 बड़ी बिकराल बालघातिनी न जात कहि,
 बाहुबल बालक छबीले छोटे छरैगी ॥
 आई है बनाइ बेष, आप तू बिचारि देख,
 पाप जाय सब को गुनी के पाले परैगी ।
 पूतना पिसाचिनी ज्यों कपिकान्ह तुलसी की
 बाहु-पीर, महाबीर, तेरे मारे मरैगी ॥ २५ ॥

 २३—बराकी = बापुरी, तुच्छ ।

२४—कपिकच्छु बेल = केवाँच नाम की लता जो बंदरों को बहुत प्रिय होती है ।

भाल की, कि काल की, कि रोष की, त्रिदोष की है
 बेदन बिषम पापताप छलछाहँ की ।
 करमन कूट की, कि जंत्र मंत्र बूट की,
 पराहि जाहि, पापिनी ! मल्लीन मन माहँ की ॥
 पैहहि सजाय, नतु कहत बजाय तोहि
 बावरी न होहि बानि जानि कपिनाह की ।
 आन हनुमान की, दोहाई बलवान की,
 सपथ महावीर की जो रहै पीर बाहँ की ॥ २६ ॥
 सिंहिका सँहारि, बलि, सुरसा सुधारि छल,
 लंकिनी पछारि मारि बाटिका उजारी है ।
 लंका परजारि, मकरी विदारि, बार बार
 जातुधान धारि धूरिधानी करि डारी है ॥
 तोरि जमकातरि मँदोदरी कढ़ोरि आनी,
 रावन की रानी मेघनाद-महतारी है ।
 भीर बाहँपीर की निपट राखी महावीर
 कौन के सँकोच, तुलसी के सोच भारी है ॥ २७ ॥
 तेरी बालकेलि, बीर ! सुनि सहमत धीर,
 भूलत सरीर-सुधि सक्र रवि राहु की ।
 तेरी बाँह बसत बिसोक लोकपाल सब,
 तेरो नाम लेत रहै आरति न काहु की ॥
 साम दान भेद विधि, बेदहु लबेद सिद्धि,
 हाथ कपिनाथ ही के चोटी चोर साहु की ।
 आलस, अनख, परिहास की सिखावन है ?
 एते दिन रही पीर तुलसी के बाहु की ! ॥ २८ ॥
 दूकनि को घरघर डोलत कंगाल बोलि,
 बाल ज्यों कृपाल नतपाल पालि पोसो है ।

कीन्ही है सँभार सार अंजनीकुमार बीर,
 आपनो बिसारि है न मेरे हूँ भरोसो है ॥
 एतनो परेखो सब भाँति समरथ आजु,
 कपिनाथ साँची कहौ को त्रिलोक तोसो है ? ।
 साँसति सहत दास कीजै पेधि परिहास,
 चीरी को मरन खेल बालकनि को सो है ॥ २६ ॥
 आपने ही पाप तें त्रिताप तें, कि साप तें
 बढ़ो है बाहुबेदन, कही न सहि जाति है ।
 औषध अनेक जंत्र मंत्र टोटकादि किए,
 बादि भए देवता, मनाए अधिकाति है ॥
 करतार, भरतार, हरतार, कर्म, काल,
 को है जगजाल जो न मानत इताति है ।
 चरो तेरो तुलसी 'तू मेरो' कह्यो रामदूत,
 ढील तेरी, बीर, मोहिँ पीर तें पिराति है ॥ ३० ॥
 दूत रामराय को, सपूत पूत बाय को,
 समथ हाथ पाय को, सहाय असहाय को ।
 बाँकी विरुदावलि बिदित बेद गाइयत,
 रावन सो भट भयो मूठिका के घाय को ॥
 एते बड़े साहेब समर्थ को निवाजो आजु
 सीदत सुसेवक बचन मन काय को ।
 थोरि बाहुपीर की बड़ी गलानि तुलसी को,
 कौन पाप कोप, लोप प्रगट प्रभाय को ? ॥ ३१ ॥
 देवी देवदनुज मनुज मुनि सिद्ध नाग,
 छोटे बड़े जीव जेते चेतन अचेत हैं ।
 पृतना पिसाची जातुधानी जातुधान बाम

रामदूत की रजाइ माथे मानि लेत हैं ॥
 घोर जंत्र मंत्र कूट कपट कुजोग रोग,
 हनुमान आन सुनि छाँड़त निकेत हैं ॥
 क्रोध कीजै कर्म को, प्रबोध कीजे तुलसी को,
 सोध कीजै तिनको जो दोष दुख देत हैं ॥ ३२ ॥
 तेरे बल बानर जिताए रन रावन से,
 तेरे घाले जातुधान भए घर घर को ।
 तेरे बल रामराज किए सब सुर काज,
 सकल समाज साज साजे रघुवर के ॥
 तेरे गुनगान सुनि गीरवान पुलकित,
 सजल विलोचन विरंचि हरि हर के ॥
 तुलसी के माथे पर हाथ फेरौ कीसनाथ,
 देखिए न दास दुखी तो से कनिगर के ॥ ३३ ॥
 पालो तेरे दूक को, परे हूँ चूक मूकिए न,
 कूर कौड़ी दू को हैं आपनी ओर हेरिए ।
 भोरानाथ भोरे हैं, सरोष होत थोरे दोष,
 पोषि तोषि थापि आपने न अवडेरिए ॥
 अंबु तू हैं अंबुचर, अंब तू हैं डिंभ, सो न,
 बूझिए बिलंब अवलंब मेरे तेरिए ।
 बालक बिकल जानि, पाहि, प्रेम पहिचानि
 तुलसी की बाहँ पर लामी लूम फेरिए ॥ ३४ ॥
 घेरि लियो रोगनि कुलोगनि कुजोगनि ज्यों

३३—घर घर के भए = इधर उधर बैठकाने हो गये । गीरवान = गीर्वाण, देवता । कनिगर = कानिवाला, जिसे अपनी मर्यादा की लज्जा हो ।

३४—मूकना = छोड़ना, त्याग करना । अवडेरिए = उद्वास करना, बसने या रहने न देना । डिंभ = छोटा बच्चा ।

बासर जलद घनघटा धुकि धाई है ।
 वरषत बारि पीर जारिए जवासे जस,
 रोष बिनु दोष, धूम-मूल, मलिनाई है ॥
 करुनानिधान हनुमान महा बलवान !
 हेरि हँसि हाँकि फूँकि फौजैँ तैँ उड़ाई है ।
 खायो हुतो तुलसी कुरोग राढ़ राकसनि,
 कैसरी किसोर राखे बीर वरियाई है ॥ ३५ ॥

मत्तगयंद

रामगुलाम तुही हनुमान गुसाईँ सुसाईँ सदा अनुकूलो ।
 पाल्यौ हौँ बाल ज्यों आखर दू पितुमातु ज्यों मंगलमोद समूलो ॥
 बाहुँ की बेदन, बाँहपगार ! पुकारत आरत आनंदभूलो ॥
 ओरघुवीर निवारिए पीर, रहौँ दरबार परो लटि लूलो ॥ ३६ ॥

घनाचरी

काल की करालता, करमकठिनाई कीधौँ,
 पाप के प्रभाव, की सुभाय बाय बावरे ।
 बेदन कुभाँति सो सही न जाति रातिदिन,
 सोई बाँह गही जों गही समीरडावरे ॥
 लायो तरु तुलसी तिहारो, सो निहारि बारि
 सींचिए मलीन भो, तयो है तिहुँ ताव रे !
 भूतनि की, आपनी, पराई, हे कृपानिधान !
 जानियत सबही की रीति राम रावरे ॥ ३७ ॥
 पाँय-पीर, पेट-पीर बाहु-पीर, मुँह-पीर,
 जरजर सकल सरीर पीरमई है ।
 देव, भूत, पितर, करम, खल, काल, ग्रह,

३६—बाँह-पगार = हे दृढ़ कोट के समान बाहुवाले ।

३७—डावरे = बच्चे, पुत्र ।

मोहिँ पर दवरि दमानक सी दर्ई है ॥
 हैं तो बिन मोल ही बिकानो, बलि, बारे ही तेँ,
 ओट रामनाम की ललाट लिखि लई है ।
 कुंभज के किंकर बिकल बूढ़े गोखुरनि,
 हाय रामराय ! ऐसी हाल कहूँ भई है ? ॥ ३८ ॥
 बाहुक-सुबाहु नीच, लीचर-मरीच मिलि,
 मुँहपीर-केतुजा, कुरोग-जातुधान हैं ।
 रामनाम जपजाग कियो चाहैं सानुराग,
 काल कैसे दूतभूत कहा मेरे मान हैं ॥
 सुमिरे सहाइ रामलघन आखर दोउ,
 जिनके साकेसमूह जागत जहान हैं ।
 तुलसी सँभारि, ताड़का सँहारि, भारी भट
 बेधे बरगद से बनाइ बानबान हैं ॥ ३९ ॥
 बालपने सुधे मन राम सनमुख भयो,
 रामनाम लेत, माँगि खात टूकटाक हैं ।
 परगै लोकरीति में, पुनीत प्रीति रामराय
 मोहबस बैठो तोरि तरकि तराक हैं ॥
 खोटे खोटे आचरन आचरत अपनायो
 अंजनीकुमार, सोध्यो रामपानि पाक हैं ।
 तुलसी गुसाईँ भयो, भौँड़े दिन भूलि गयो,
 ताको फल पावत निदान परिपाक हैं ॥ ४० ॥
 असन-बसन-हीन, बिषम-बिषाद-लीन देखि

३८—दमानक = तोपों की बाढ़ ।

३९—लीचर = लीचरपन, अशक्ति, शिथिलता । कहा मेरे मान हैं = क्या मेरे मान के हैं ? क्या मेरे इखितयार में हैं ? अर्थात् मेरी सामर्थ्य के बाहर हैं ।

४०—पाक = पवित्र ।

दीन दूबरो करै न हाय हाय को ? ।
 तुलसी अनाथ सौं सनाथ रघुनाथ कियो,
 दियो फल सीलसिंधु आपने सुभाय को ॥
 नीच यहि बीच पति पाइ भरुआइ गो
 बिहाय प्रभुभजन बचन मन काय को ।
 ताते तनु पेधियत घोर बरतोर मिस
 फूटि फूटि निकसत लोन रामराय को ॥ ४१ ॥
 जीवौ जग जानकीजीवन को कहाय जन,
 मरिबे को बारानसी, बारि सुरसरि को ।
 तुलसी के दुहूँ हाथ मोदक हैं ऐसे ठाउँ,
 जाके जिए मुए सोच करिहैं न लरि को ॥
 मोको भूठो साँचो लोग राम को कहत सब,
 मेरे मन मान है न हर को, न हरि को ।
 भारी पीर दुसह सरीर ते बिहाल होत,
 सोऊ रघुबीर बिनु सकै दूरि करि को ? ॥ ४२ ॥
 सीतापति साहेब, सहाय हनुमान नित,
 हित उपदेस को महेस मानो गुरु कै ।
 मानस बचन काय सरन तिहारे पायँ,
 तुम्हरे भरोसे सुर मैं न जाने सुर कै ॥
 व्याधि भूत-जनित उपाधि काहू खल की,
 समाधि कीजै तुलसी को जानि जन फुर कै ।
 कपिनाथ, रघुनाथ, भोलानाथ, भूतनाथ !
 रोगसिंधु क्यों न डारियत गायखुर कै ? ॥ ४३ ॥

४१—पति = प्रतिष्ठा । भरुआइ गो = फूट उठा, इतरा गया, अपने को सारी समझने लगा ।

४३—समाधि कीजै = समाधान कीजिए ।

कहैं हनुमान सों, सुजान रामराय सों,
 कृपानिधान संकर सों, सावधान सुनिए ।
 हरष-विषाद-राग रोष-गुन-दोष-मई,
 बिरची विरंचि सब देखियतु हुनिए ॥
 माया जीव काल के, करम के, सुभाय के,
 करैया राम, वेद कहैं, साँची मन गुनिए ।
 तुमतेँ कहा न होय, हाहा ! सो बुझैये मोहिँ,
 हौंरहैं रहीं मौन ही, बयो सो जानि लुनिए ॥ ४४ ॥



गीतावली

विष्णुसूक्तम्

गीतावली

राग आसावरी

आजु सुदिन सुभ घरी सुहाई ।

रूपसील-गुनधाम राम नृप-भवन प्रगट भए आई ॥ १ ॥

अति पुनीत मधुमास, लगन ग्रह बार जोग समुदाई ।

हरषवंत चर अचर भूमिसुर तनरुह पुलक जनाई ॥ २ ॥

वरषहिं विबुध-निकर कुसुमावलि नभ दुंदुभी बजाई ।

कौसल्यादि मातु मन हरषित, यह सुख बरनि न जाई ॥ ३ ॥

सुनि दसरथ सुत जन्म लिए सब गुरु जन विप्र बोलाई ।

बेद-बिहित करि क्रिया परम सुचि, आनंद उर न समाई ॥ ४ ॥

सदन बेद-धुनि करत मधुर मुनि, बहु विधि बाज बधाई ।

पुरवासिन्ह प्रिय नाथ हेतु निज निज संपदा लुटाई ॥ ५ ॥

मनि, तोरन, बहु केतु पताकनि पुरी रुचिर करि छाई ।

मागध सूत द्वार बंदीजन जहँ तहँ करत बड़ाई ॥ ६ ॥

सहज सिंगार किए बनिता चलीं मंगल बिपुल बनाई ।

गावहिं देहि असीस मुदित चिरजिवौ तनय सुखदाई ॥ ७ ॥

बीथिन्ह कुंकुम कीच, अरगजा अगर अबीर उड़ाई ।

नाचहिं पुर-नर-नारि प्रेम भरि देहदसा बिसराई ॥ ८ ॥

अमित धेनु गज तुरग बसन मनि जातरूप अधिकाई ।

देत भूप अनुरूप जाहि जोइ, सकल सिद्धि गृह आई ॥ ९ ॥

सुखी भए सुर, संत, भूमिसुर, खलगन मन मलिनाई ।

सबइ सुमन बिकसत रवि निकसत, कुमुद-बिपिन बिलखाई ॥ १० ॥

जो सुख-सिंधु-सकृत्-सीकर तेँ सिव बिरंचि प्रभुताई ।
 सोइ सुख अवध उमँगि रह्यो दस दिसि कौन जतन कहौँ गाई ॥११॥
 जे रघुबीर चरन चिंतक तिन्हकी गति प्रगट दिखाई ।
 अविरल अमल अनूप भगति दृढ़ तुलसीदास तब पाई ॥१२॥१॥

राग जैतश्री

सहेली सुनु सोहिलो रे !

सोहिलो, सोहिलो, सोहिलो, सोहिलो सब जग आज ॥
 पूत सपूत कौसिला जायो, अचल भयो कुलराज ॥ १ ॥
 चैत चारु नौमी तिथि सितपख मध्य-गगन-गत भानु ॥
 नखत जोग ग्रह लगन भले दिन मंगल मोद निधानु ॥ २ ॥
 व्योम पवन पावक जल थल दिसि दसहु सुमंगल-भूल ।
 सुर दुंदुभी बजावहिँ, गावहिँ, हरषहिँ, बरषहिँ फूल ॥ ३ ॥
 भूपति सदन सोहिलो सुनि बाजैँ गहगहे निसान ।
 जहँ तहँ सजहिँ कलस धुज चामर तोरन केतु वितान ॥ ४ ॥
 सोंचि सुगंध रचैँ चौके गृह आँगन गली बजार ।
 दल फल फूल दूब दधि रोचन घर घर मंगलचार ॥ ५ ॥
 सुनि सानंद ठठे दसस्यंदन सकल समाज समेत ।
 लिए बोलि गुरु सचिव भूमिसुर प्रमुदित चले निकेत ॥ ६ ॥
 जातकर्म करि, पूजि पितर सुर दिए महिदेवन दान ।
 तेहि औसर सुत तीनि प्रगट भए मंगल, मुद, कल्याण ॥ ७ ॥
 आनंद महुँ आनंद अवध, आनंद बधावन होइ ।
 उपमा कहौँ चारि फल की, मोहिँ भलो न कहैँ कवि कोइ ॥ ८ ॥
 सजि आरती विचित्र थार कर जूथ जूथ वरनारि ।
 गावत चलीँ बधावन लै लै निज निज कुल अनुहारि ॥ ९ ॥

असही दुसही मरहु मनहिं मन, बैरिन बढहु विषाद ।
 नृपसुत चारि चारु चिरजीवहु संकर गौरि प्रसाद ॥ १० ॥
 लै लै ढोव प्रजा प्रमुदित चले भाँति भाँति भरि भार ।
 करहिँ गान करि आन राय की, नाचहिँ राजदुवार ॥ ११ ॥
 गज, रथ, बाजि, वाहिनी, बाहन सबनि सँवारे साज ।
 जनु रतिपति ऋतुपति कोसलपुर बिहरत सहित समाज ॥ १२ ॥
 घंटा घंटी पखाउज आउज भौंभु बेनु डफ तार ॥
 नूपुर धुनि, मंजीर मनोहर, कर कंकन-भनकार ॥ १३ ॥
 नृत्य करहिँ नट नटी, नारि नर अपने अपने रंग ।
 मनहुँ मदनरति विविध बेष धरि नटत सुदेस सुढंग ॥ १४ ॥
 उघटहिँ छंद प्रबंध गीत पद राग तान बंधान ।
 सुनि किन्नर गंधर्व सराहत, विथके हैं बिबुध-विमान ॥ १५ ॥
 कुंकुम अगर अरगजा छिरकहिँ भरहिँ गुलाल अवीर ।
 नभ प्रसून भरि, पुरी कोलाहल, भइ मनभावति भीर ॥ १६ ॥
 बड़ी बयस बिधि भयो दाहिनी सुरगुरु आसिरवाद ।
 दसरथ सुकृत-सुधासागर सब उमगे हैं तजि मरजाद ॥ १७ ॥
 ब्राह्मण वेद, बंदि बिरदावलि, जय धुनि मंगल गान ।
 निकसत पैठत लोग परसपर बोलत लागि लागि कान ॥ १८ ॥
 बारहिँ मुकुता रतन राजमहिषी पुर-सुमुखि समान ।
 बगरे नगर निछावरि मनिगन जनु जुवारि जव धान ॥ १९ ॥
 कीन्हि बेदविधि लोकरीति नृप, मंदिर परम हुलास ।

२—१०—असही दुसही = द्वेयी, बैरी (जिन्हें भलाई सहा या दुःसह हो) ।

२—११—ढोव = भेंट की वस्तु जो मंगल के अवसर पर भार में भर कर भेजते हैं । आन करि = गीतों में नाम लेते कर ।

२—१३—आउज = तासा । तार = ताळ, मजीरा ।

२—१५—उघटहिँ = बार बार पद को कहते हैं ।

कौसल्या कैकयी सुमित्रा रहस-बिबस रनिवास ॥ २० ॥
 रानिन दिए बसन मनि भूषन, राजा सहन-भँडार ।
 मागध सूत भाँट नट जाचक जहँ तहँ करहिँ कबार ॥ २१ ॥
 विप्रबधू सनमानि सुआसिनि, जन पुरजन पहिराइ ।
 सनमाने अरुनीस, असीसत ईस रमेस मनाइ ॥ २२ ॥
 अष्टसिद्धि नवनिद्धि भूति सब भूपति भवन कमाहिँ ।
 समउ समाज राज दसरथ को लोकप सकल सिहाहिँ ॥ २३ ॥
 को कहि सकै अवधवासिन को प्रेम प्रमोद उछाह ।
 सारद सेस गनेस गिरीसहिँ अगम निगम अवगाह ॥ २४ ॥
 सिव बिरंचि मुनि सिद्ध प्रसंसत, बड़े भूप के भाग ।
 तुलसिदास प्रभु सोहिलो गावत उमगि उमगि अनुराग ॥ २५ ॥ २ ॥

राग बिलावल

आजु महामंगल कोसलपुर सुनि नृप के सुत चारि भए ।
 सदन सदन सोहिलो सोहावनो नभ अरु नगर निसान हए ॥ १ ॥
 सजि सजि जान अमर किन्नर मुनि जानि समय सम गान ठए ।
 नाचहिँ नभ अपसरा मुदित मन पुनि पुनि बरषहिँ सुमन चए ॥ २ ॥
 अति सुख बेगि बेलि गुरु भूसुर भूपति भीतर भवन गए ।
 जातकरम करिँ कनक बसन, मनिभूषित सुरभि समूह दए ॥ ३ ॥
 दल फल फूल दूब दधि रोचन जुवतिन्ह भरि भरि थार लए ।
 गावत चलीं भीर भइ बीथिन्ह, बंदिन्ह बाँकुरे बिरद बए ॥ ४ ॥
 कनक-कलस चामर पताक धुज जहँ तहँ बंदनवार नए ।
 भरहिँ अवीर, अरगजा छिरकहिँ, सकल लोक एक रंग रए ॥ ५ ॥
 उमँगि चलयौ आनंद लोक तिहुँ, देत सबनि मंदिर रितए ।
 तुलसिदास पुनि भरेइ देखियत, रामकृपा चितवनि चितए ॥ ६ ॥

२—२१—सहन-भँडार = बाहरी खजाना ? । कबार = लेन देन ।

४—४—बए = कहे ।

राग जयतश्री

गावै' विबुध विमल बरबानी ।

भुवन कोटि कल्याण-कंद जो जायो पृत कौसिला रानी ॥ १ ॥

मास पाख तिथि बार नखत ग्रह जोग लगन सुभ ठानी ।

जल थल गगन प्रसन्न साधु मन, दसदिसि हिय हुलसानी ॥ २ ॥

बरषत सुमन, बधाव नगर नभ, हरष न जात बखानी ।

ज्यौं हुलास रनिवास नरेसहिं त्यों जनपद रजधानी ॥ ३ ॥

अमर नाग मुनि मनुज सपरिजन विगतबिषाद-गलानी ।

मिलेहि माँरू रावन रजनीचर लंकसंक अकुलानी ॥ ४ ॥

देव पितर गुरु विप्र पृजि नृप दिए दान रुचि जानी ।

मुनि-बनिता, पुरनारि सुआसिनि सहस भाँति सनमानी ॥ ५ ॥

पाइ अघाइ असीसत निकसत जाचक जन भए दानी ।

‘यों प्रसन्न कैकयी सुमित्रहिं होहु महेस भवानी’ ॥ ६ ॥

दिन दूसरे भूप-भामिनि दोड भई सुमंगल-खानी ।

भयो सोहिलो सोहिले मो जनु सृष्टि सोहिले-सानी ॥ ७ ॥

गावत नाचत, मो मन भावत सुख सो अवध अधिकानी ।

देत लेत पहिरत पहिरावत प्रजा प्रमोद-अधानी ॥ ८ ॥

गान निसान कुलाहल कौतुक देखत दुनी सिहानी ।

हरि-बिरंचि हरपुर सोभा कुलि कोसलपुरी लोभानी ॥ ९ ॥

आनंद अवनि, राजरानी सब माँगहु कोख जुड़ानी ।

आसिष दै दै सराहहिं सादर उमा रमा ब्रह्मानी ॥ १० ॥

विभव-बिलास बाढ़ि दसरथ की देखि न जिनहिं सोहानी ।

कीरति, कुसल, भूति, जय, ऋधि सिधि तिन्ह पर सबै कोहानी ॥ ११ ॥

छठी बारहैं-लोक-बेद विधि करि सुविधान विधानी ।

राम लषन रिपुदवन भरत धरे नाम ललित गुरु ज्ञानी ॥ १२ ॥

४-४—मिलेहि माँरू = साथ ही ।

सुकृत-सुमन तिल-मोद बासि बिधि जतन-जंत्र भरि घानी ।
 सुख सनेह सब दियो दसरथहि खरि खलेल थिरथानी ॥ १३ ॥
 अनुदिन उदय उछाह उमग जग, घर घर अवध कहानी ।
 तुलसी राम-जनम-जस गावत सो समाज उर आनी ॥ १४ ॥ ४ ॥

राग केदारा

घर घर अवध बधावने मंगल साज समाज ।
 संगुन सोहावने मुदित मन कर सब निज निज काज ॥
 निज काज सजत सँवारि पुर-नर-नारि रचना अनगनी ।
 गृह, अजिर, अटनि, बजार, बीथिन्ह, चारु चौकै बिधि घनी ॥
 चामर, पताक, वितान, तोरन, कलस, दीपावलि बनी ।
 सुख-सुकृत-सोभामय पुरी बिधि सुमति-जननी जनु जनी ॥ १ ॥
 चैत चतुरदसि चाँदनी, अमल उदित निसिराज ।
 उडुगन अवलि प्रकासहीं, उमगत आनंद आज ॥
 आनंद उमंगत आजु, बिबुध बिमान बिपुल बनाइकै ।
 गावत, बजावत, नटत, हरषत, सुमन बरषत आइ कै ॥
 नर निरखि नभ, सुरपेखि पुरछवि परसपर सचु पाइकै ।
 रघुराज-साज सराहि लोचन-लाहु लेत अघाइकै ॥ २ ॥
 जागिय राम छठी सजनि रजनी रुचिर निहारि ।
 मंगल मोदमढ़ी मुरति नृप के बालक चारि ॥
 मूरति मनोहर चारि बिरचि बिरंचि परमारथ मई ।
 अनुरूप भूपति जानि पूजद-जोग बिधि संकर दई ॥
 तिन्हकी छठी, मंजुलमठी, जग सरस जिन्हकी सरसई ।
 किए नौंद भामिनि जागरन, अभिरामिनी जामिनि भई ॥ ३ ॥

४-१३—खलेल = तेल की मैल या गाद । थिरथानी = लोकपाल आदि स्थिर स्थानवाले ।

सेवक सजग भए समय, साधन सचिव सुजान ।
 मुनिवर सिखये लौकिकौ बैदिक बिबिध बिधान ॥
 बैदिक बिधान अनेक लौकिक आचरत सुनि जानिकै ।
 बलिदान पूजा मूलिकामनि साधि राखी आनिकै ॥
 जे देव देवी सेइयत हित लागि चित सनमानिकै ।
 ते जंत्र मंत्र सिखाइ राखत सबनि सौँ पहिचानिकै ॥ ४ ॥
 सकल सुआसिनि गुरुजन पुरजन पाहुनलोग ।
 बिबुध विलासिनि सुर मुनि जाचक जो जेहि जोग ॥
 जेहि जोग जे तेहि भाँति ते पहिराइ परिपूरन किये ।
 जय कहत देत असीस तुलसीदास ज्यों हुलसत हिये ॥
 ज्यों आजु कालिहु परहुँ जागन होहिँगे नेवते दिये ।
 ते धन्य पुन्य-पयोधि जे तेहि समै सुख-जीवन जिये ॥ ५ ॥
 भूपति भागवली सुर वर नाग सराहि सिहाहिँ ।
 तिय-वरवेष अली रमा सिधि अनिमादि कमाहिँ ॥
 अनिमादि, सारद, सैलनंदिनि बाल लालहि पालहीं ।
 भरि जनम जे पाए न ते परितोष उमा रमा लहीं ॥
 निज लोक बिसरे लोकपति, घर की न चरचा चालहीं ।
 तुलसी तपत तिहुँ ताप जग, जनु प्रभुछठी छाया लही ॥ ६ ॥ ५ ॥

राग जयतश्री

बाजत अवध गहागहे आनंद-बधाए ।
 नामकरन रघुबरनि के नृप सुदिन सोधाए ॥
 पाय रजायसु राय को ऋषिराज बोलाए ।
 सिष्य सचिव सेवक सखा सादर सिर नाए ॥
 साधु सुमति समरथ सबै सानंद सिखाए ।
 जल दल फल मनि-मूलिका कुलि काज लिखाए ॥ १ ॥

१-६—कमहिँ = सेवा या काम करती हैं ।

गनप गौरि हर पूजिकै गोवृंद दुहाए ।
 घर घर मुद मंगल महा गुन-गान सुहाए ॥
 तुरत मुदित जहँ तहँ चले मन के भए भाए ।
 सुरपति-सासन धन मनो मारुत मिलि धाए ॥ २ ॥
 गृह आँगन चौहट गली बाजार बनाए ।
 कलस चँवर तोरन धुजा सुबितान तनाए ॥
 चित्र चारु चौकै रचीं लिखि नाम जनाए ।
 भरिभरि सरवर बापिका अरगजा सनाए ॥ ३ ॥
 नर-नारिन्ह पल चारि में सब साज सजाए ।
 दसरथ-पुर छवि आपनी सुरनगर लजाए ॥
 बिबुध बिमान बनाइ कै आनंदित आए ।
 हरषि सुमन बरषन लगे गए धन जनु पाए ॥ ४ ॥
 बरे बिप्र चहुँ बेद के रविकुल-गुरु ज्ञानी ।
 आपु बसिष्ठ अथर्वणी, महिमा जग जानी ॥
 लोक-रीति बिधि बेद की करि कह्यो सुबानी—
 'सिसु समेत बेगि बोलिए कौसल्या रानी' ॥ ५ ॥
 सुनत सुआसिनि लै चलीं गावत बड़भागों ।
 उमा रमा सारद सची लखि सुनि अनुरागीं ॥
 निज निज रुचि बेष बिरचि कै हिलिमिलि सँग लागीं ।
 तेहि अवसर तिहुँ लोक की सुदसा जनु जागीं ॥ ६ ॥
 चारु चौक बैठत भई भूप भामिनी सोहैं ।
 गोद मोद-मूरति लिए, सुकृती जन जोहैं ॥
 सुख सुखमा कौतुक कला देखि सुनि मुनि मोहैं ।
 सो समाज कहैं बरनिकै ऐसे कवि को हैं ? ॥ ७ ॥
 लगे पढ़न रच्छा ऋचा ऋषिराज बिराजे ।

गगन सुमन-भरि, जयजय, बहु बाजन बाजे ॥
 भए अमंगल लंक में, संक संकट गाजे ।
 भुवन-चारिदस के बड़े दुख दारिद भाजे ॥ ८ ॥
 बाल बिलोकि अथर्वणी हँसि हरहि जनायो ।
 सुभ को सुभ, मोद मोद को 'राम' नाम सुनायो ॥
 आलवाल कल कौसिला, दल बरन सोहायो ।
 कंद सकल आनंद को जनु अंकुर आयो ॥ ९ ॥
 जोहि जानि जपि जोरि कै करपुट सिर राखे ।
 'जय जय जय करुनानिधे !' सादर सुर भाषे ॥
 सत्यसंध साँचे सदा जे आखर आषे ॥
 प्रनतपाल पाए सही जे फल अभिलाषे ॥ १० ॥
 भूमिदेव देव देखिकै नरदेव सुखारी ।
 बोलि सचिव सेवक सखा पट धारि भँडारी ॥
 देहु जाहि जोइ चाहिए सनमानि सँभारी ।
 लगे देन हिय हरषि कै हेरि हेरि हँकारी ॥ ११ ॥
 राम-निछावरि लेन को हठि होत भिखारी ।
 बहुरि देत तेहि देखिए मानहुँ धन-धारी ॥
 भरत लषन रिपुदवनहुँ धरे नाम विचारी ।
 फलदायक फल चारि के दसरथ-सुत चारी ॥ १२ ॥
 भए भूप बालकनि के नाम निरूपम तीके ।
 सबै सोच संकट मिटे तब तेँ पुर-ती के ॥
 सुफल मनोरथ बिधि किए सब बिधि सबही के ।
 अब होइहै गाए सुने सब के तुलसी के ॥ १३ ॥ ६ ॥

६-१० — आषे = कहे ।

६-११ — नरदेव = राजा ।

६-१२ — धनधारी = कुबेर ।

राग बिलावल

सुभगसेज सोभित कौसल्या रुचिर राम-सिसु गोद लिये ।
 बार बार विधुबदन दिलोकति लोचन चारु चकोर किये ॥ १ ॥
 कबहुँ पौढ़ि पयपान करावति, कबहुँ राखति लाइ हिये ।
 बालकेलि गावति हलरावति, पुलकति प्रेम-पियूष पिये ॥ २ ॥
 विधि महेस मुनि सुर सिंहात सब, देखत अंबुद ओट दिये ।
 तुलसिदास ऐसो सुख रघुपति पै काहू तो पायो न बिये ॥ ३ ॥ ७ ॥

राग सोरठ

हैहौ लाल कबहिँ बड़े बलि मैया ।

राम लषन भावते भरत रिपुदवन चारु चारयो मैया ॥ १ ॥
 बाल-बिभूषन-बसन मनोहर अंगनि बिरचि बनैहैं ।
 सोभा निरखि निछावरि करि उर लाइ वारने जैहैं ॥ २ ॥
 छगन-मगन अँगना खेलिहौ मिलि ठुमुकु ठुमुकु कब धैहौ ।
 कलबल बचन तोतरे मंजुल कहि “माँ” मोहिँ बुलैहो ॥ ३ ॥
 पुरजन सचिव राउ रानी सब सेवक सखा सहेली ।
 लैहैं लोचन-लाहु सुफल लखि ललित मनोरथ-बेली ॥ ४ ॥
 जा सुख की लालसा लट्ट सिव, सुक सनकादि उदासी ।
 तुलसी तेहि सुखसिंधु कौसिला मगन, पै प्रेम-पियासी ॥ ५ ॥ ८ ॥

पगनि कब चलिहौ चारौ मैया ?

प्रेम-पुलकि उर लाइ सुवन सब कहति सुमित्रा मैया ॥ १ ॥
 सुंदर तनु सिसु-बसन-बिभूषन नखसिख निरखि निकैया ।
 दलि टन, प्रान निछावरि करि करि लैहैं मातु बलैया ॥ २ ॥
 किलकनि नटनि चलनि चितवनि भजि मिलनि मनोहरतैया ।
 मनि-खंभनि प्रतिबिंब-भलक, छवि छलकिहै भरि अँगनैया ॥ ३ ॥
 बालबिनोद, मोद मंजुल विधु, लीला ललित जुन्हैया ।
 भूपति पुन्य-पयोधि उमंग, घर घर आनंद बधैया ॥ ४ ॥

हैं सकल सुकृत-सुख-भाजन-लोचन, लाहु लुटैया ।
 अनायास पाइहैं जनमफल तोतरे बचन सुनैया ॥ ५ ॥
 भरत, राम, रिपुदवन, लषन के चरित-सरित अन्हवैया ।
 तुलसी तब के से अजहुँ जानिवे रघुबर-नगर-बसैया ॥ ६ ॥ ८ ॥

राग कैदारा

चुपरि उबटि अन्हवाइकै नयन आँजे,
 चिर रुचि तिलक गोरोचन को कियो है ।
 झूपर अनूप मसिबिंदु, बारे बारे बार
 बिशसत सीस पर हेरि हरै हियो है ।
 मोद-भरी गोद लिये लालति सुमित्रा देखि
 देव कहैं सबको सुकृत उपवियो है ।
 मातु, पितु, प्रिय, परिजन, पुरजन धन्य,
 पुन्यपुंज पेखि पेखि प्रेमरस पियो है ।
 लोहित ललित लघु चरन-कमल चारु,
 चाल चाहि सो छवि सुकवि जिय जियो है ।
 बालकेलि बातबस भलकि भलमलत
 सोभा की दीयटि मानो रूप दीप दियो है ।
 राम-सिसु सानुज चरित चारु गाइ सुनि
 सुजनन सादर जनम-लाहु लियो है ।
 तुलसी बिहाइ दसरथ दसचारिपुर
 ऐसे सुखजोग बिधि बिरच्यो न बियो है ॥ १० ॥
 राम-सिसु गोद-महामोद भरे दसरथ,
 कौसिलाहु ललकि लषन लाल लए हैं ।
 भरत सुमित्रा लए, कैकयी सत्रुसमन,
 तन प्रेम-पुलक, मगन मन भए हैं ।

मेढ़ी लटकन मनि-कनक-रचित, बाल-
भूषन बनाइ आछे अंग अंग ठए हैं ।

चाहि चुचुकारि चूमि लालत लावत डर,
तैसे फल पावत जैसे सुबीज बए हैं ।

घनघोट बिबुध बिलोकि बरषत फूल,
अनुकूल बचन कहत नेह नए हैं ।

ऐसे पितु, मातु, पूत, प्रिय, परिजन बिधि,
जानियत आयु भरि येई निरमए हैं ।

‘अजर अमर होहु’ ‘करौ हरि हर छोहु’
जरठ जठेरिन्ह आसिरवाद दए हैं ।

तुलसी सराहैं भाग तिन्हके जिन्हके हिये
डिभ-रामरूप-अनुराग-रंग रए हैं ॥ ११ ॥

राग आसावरी

आजु अनरसे हैं भोर के, पय पियत न नीके ।

रहत न बैठे ठाढ़े, पालने झुलावतहु, रोवत राम मेरो सो सोच सबही के ॥

देव, पितर, ग्रह पूजिये तुला तौलिए घी के ।

तदपि कबहुँ कबहुँक सखी ऐसेहि अरत जब परत दृष्टि दुष्ट ती के ॥

बेगि बोलि कुलगुरु छुयो माथे हाथ अमी के ।

सुनत आइ ऋषि कुस हरे नरसिंह मंत्र पढ़े जो सुमिरत भय भी के ॥

जासु नाम सर्वस सदासिव पार्वती के ।

ताहि भरावति कौसिला, यह रीति प्रीति की हिय हुलसति तुलसी के ॥

माथे हाथ ऋषि जब दियो राम किलकन लागे ।

महिमासमुक्ति, लीलाबिलोकिगुरुसजलनयन, तनुपुलक, रोमरोम जागे ॥

११—मेढ़ी = आगे के बाळ को दोनों ओर गूंथकर बीच की चोटी के साथ बाँध देते हैं जिसे मेढ़ी कहते हैं ।

१२—भी = डर ।

लिए गोद, धाए गोद तेँ मोद मुनि मन अनुरागे ।
 निरखि मातु हरषी हिये आली ओट कहति मृदु बचन प्रेम के से पागे ॥
 तुम्ह सुरतरु रघुवंस के, देत अभिमत माँगे ।
 मेरे बिसेषि गति रावरी तुलसी प्रसाद जाके सकल अमंगल भागे ॥
 अमिय-विलोकनि करि कृपा मुनिवर जब जोए ।
 तबतेँ राम अरु भरत लषनरिपुदवन, सुमुखसखि ! सकलसुवनसुखसोए ॥
 सुमित्रा लाय हिये फनि मनि ज्यों गोए ।
 तुलसी नेबछावरि करति मातु अति प्रेम-मगन मन, सजल सुलोचन कोये ॥
 मातु सकल, कुलगुरु-बधू, प्रिय सखी सुहाई ।
 सादर सब मंगल किए महि-मनि-महेस पर सबनि सुधेनु दुहाई ॥
 बोलि भूप भूसुर लिये अति विनय बड़ाई ।
 पूजि पायँ सनमानि दान दिये लहि असीस मुनि बरषै सुमन सुरसाई ॥
 घर घर पुर बाजन लगौ आनंद बधाई ।
 सुख सनेह तेहि समय को तुलसी जानै जाको चोरयो है चितचहुँ भाई ॥ १२ ॥

राग धनाश्री

या सिसु के गुन नाम बड़ाई ।

को कहि सकै सुनहु नरपति श्रोपति समान प्रभुताई ॥
 जद्यपि बुधि, बय, रूप, सील, गुन समय चारु चारो भाई ।
 तदपि लोक-लोचन-चकोर-ससि राम भगत-सुखदाई ॥
 सुर, नर, मुनि करि अभय दनुज हति हरिहि धरनि गरुआई ।
 कीरति बिमल बिस्व-अघमोचनि रहिहि सकल जग छाई ॥
 याके चरन-सरोज कपट तेजि जे भजिहैं मन लाई ।
 ते कुल जुगल सहित तरिहैं भव, यह न कछू अधिकाई ॥
 मुनि गुरुबचन पुलक तन दंपति, हरष न हृदय समाई ।
 तुलसिदास अवलोकि मातु-मुख प्रभु मन में मुसुकाई ॥ १३ ॥

राग बिलावल

अवध आजु आगमी एकु आयो ।

करतल निरखि कहत सब गुनगन, बहुत न परिचौ पायो ॥
 बूढो बड़ो प्रमानिक ब्राह्मन संकर नाम सुहायो ।
 सँग सिसुसिष्य, सुनत कौसल्या भीतर भवन बुलायो ॥
 पाँय पखारि पूजि दियो आसन, असन बसन पहिरायो ।
 मेले चरन चारु चारयो सुत, माथे हाथ दिवायो ॥
 नखसिख बाल बिलोकि विप्रतनु पुलक, नयन जल छायो ।
 लै लै गोद कमल-कर निरखत, उर प्रमोद न अमायो ॥
 जनम प्रसंग कह्यो कौसिक मिसि सीय स्वयंवर गायो ।
 राम, भरत, रिपुदवन लखन को जय सुख सुजस सुनायो ॥
 तुलसिदास रनिवास रहसबस, भयो सबको मन भायो ।
 सनमान्यौ महिदेव असीसत सानँद सदन सिधायो ॥ १४ ॥

राग केदारा

पौढ़िये लालन, पालने हैं भुलावैं ।

कर, पद, मुख, चख कमल लसत लखि लोचन-भँवर भुलावैं ॥
 बाल-बिनोद-मोद-मंजुलमनि किलकनि खानि खुलावैं ।
 तेइ अनुराग ताग गुहिबे कहँ मति मृगनयनि बुलावैं ॥
 तुलसी भनित भली भामिनि उर सो पहिराइ फुलावैं ।
 चारु चरित रघुवर तेरे तेहि मिलि गाइ चरन चितु लावैं ॥ १५ ॥

सोइये लाल लाडिले रघुराई ।

मगन मोद लिये गोद सुमित्रा बार बार बलि जाई ॥
 हँसे हँसत, अनरसे अनरसत प्रतिबिंबनि ज्यों भाँई ।
 तुम सबके जीवन के जीवन, सकल सुमंगलदाई ॥
 मूल मूल सुरबीधि-बेलि, तम-तोम-सुदल अधिकाई ।

नखत-सुमन, नभ-बिटप बैँडि मानो छपा छिटकि छवि छाई ॥
 है जँभात अलसात, तात ! तेरी बानि जानि मैं पाई ।
 गाइ गाइ हलराइ बोलिहैं सुख नौदरी सुहाई ॥
 बछरु छबीलो छगनमगन मेरे कहति मल्हाइ मल्हाइ ।
 सानुज हिय हुलसति तुलसी के प्रभु की ललित लरिकारि ॥ १६ ॥

ललन लोने लेरुआ, बलि मैया ।

सुख सोइए नौद-बेरिया भई चारु-चरित चारौ मैया ॥
 कहति मल्हाइ लाइ उर छिन छिन छगन छबीले छोटे छैया ।
 मोद-कंद कुल-कुमुद-चंद्र मेरे रामचंद्र रघुरैया ॥
 रघुबर बालकेलि संतन की सुभग सुभद सुरगैया ।
 तुलसी दुहि पीवत सुख जीवत पय सप्रेम घनी घैया ॥ १७ ॥

सुखनौद कहति आलि आइहैं ।

राम, लखन, रिपुदवन, भरत सिसु करि सब सुमुख सोआइहैं ॥
 रोबनि, धोवनि, अनखानि, अनरसनि, डिठि-मुठि निठुर नसाइहैं ।
 हँसनि, खेलनि, किलकनि, आनंदनि भूपति-भवन बसाइहैं ॥
 गोद विनोद मोदमय मूरति हरषि हरषि हलराइहैं ।
 तनु तिल तिल करि वारि राम पर लेहैं रोग बलाइहैं ॥
 रानी राउ सहित सुत परिजन निरखि नयन-फल पाइहैं ।
 चारु चरित रघुवंस-तिलक के तहँ तुलसी मिलि गाइहैं ॥ १८ ॥

राग आसावरी

कनक-रतन मय पालनो रच्यो मनहुँ मार सुतहार ।

बिबिध खेलौना किंकिनी लागे मंजुल मुकुताहार ॥

रघुकुल-मंडन राम लला ॥ १ ॥

जननि उबटि अन्हवाइकै मनिभूषन सजि लिये गोद ।

१७—लेरुआ = बछवा । घैया = थन सँ निकलती हुई दूध की धार ।

१८—डिठि मुठि = डीठ मूठ नजर और दोना ।

१९-१—सुतहार = खाट बीननेवाला, बढ़ई ।

पौढ़ाए पटु पालने, सिसु निरखि मगन मन मोद ॥

दसरथनंदन राम लला ॥ २ ॥

मदन, मोर कै चंद की भलकनि निदरति तनु-जोति ।

नील कमल, मनि, जलद की उपमा कहे लघु मति होति ॥

मातु-सुकृत-फल राम लला ॥ ३ ॥

लघु लघु लोहित ललित हैं पद, पानि, अधर एक रंग ।

को कवि जो छवि कहि सकै नखसिख सुंदर सब अंग ॥

परिजन-रंजन राम लला ॥ ४ ॥

पग नूपुर, कटि किंकिनी, कर-कंजनि पहुँची मंजु ।

हिय हरिनख अदभुत बन्यों मानो मनसिज मनि-गन-मंजु ॥

पुरजन-सिरमनि राम लला ॥ ५ ॥

लोयन नील सरोज से, भूपर मसि-बिंद विराज ।

जनु बिधु-मुख-छवि-अमिय को रच्छक राखे रसराज ॥

सोभासागर राम लला ॥ ६ ॥

गमुआरी अलकावली लसै, लटकन ललित ललाट ।

जनु उडुगन बिधु मिलन को चले तम बिदारि करि बाट ॥

सहज सोहावनो राम लला ॥ ७ ॥

देखि खेलौना किलकहीं पद पानि बिलोचन लोल ।

बिचित्र बिहँग अलि जलज ज्यों सुखमा-सर करत कलोल ॥

भगत-कल्पतरु राम लला ॥ ८ ॥

बाल-बोल बिनु अरथ के सुनि देत पदारथ चारि ।

जनु इन्ह बचनन्हि तेँ भए सुरतरु तापस त्रिपुरारि ॥

नाम-कामधुक राम लला ॥ ९ ॥

११-६—मसिबिंद = बिड़ौना ।

११-८—कामधुक = कामधेनु ।

११-७—गमुआरी = [सं० गर्भ, प्रा० गम्भ + प्र० आर] गर्भ अर्थात् पेट की ।

सखी सुमित्रा वारहीं मनि भूषन बसन बिभाग ।
मधुर झुलाइ मल्हावहीं गावैं उमंगि उमंगि अनुराग ॥

हैं जग-मंगल राम लला ॥ १० ॥

मोती जायो सीप में अरु अदिति जन्यो जग-भानु ।

रघुपति जायो कौसिला गुन-मंगल-रूप-निधानु ॥

भुवन-बिभूषन राम लला ॥ ११ ॥

राम प्रगट जब तेँ भए गए सकल अमंगल मूल ।

मीत मुदित, हित उदित हैं, नित बैरिन के चित सूल ॥

भव-भय-भंजन राम लला ॥ १२ ॥

अनुज सखा सिसु संग लै खेलन जैहैं चौगान ।

लंका खरभर परैगी, सुरपुर बाजिहैं निसान ॥

रिपुगन-गंजन राम लला ॥ १३ ॥

राम अहेरे चलहिंगे जब गज रथ बाजि सँवारि ।

दसकंधर उर धकधकी अब जनि धावै धनु धारि ॥

अरि-करि-केहरि राम लला ॥ १४ ॥

गीत सुमित्रा सखिन्ह कै सुनि सुनि सुर सुनि अनुकूल ।

दै असीस जय जय कहैं हरषैं बरषैं फूल ॥

सुर-सुखदायक राम लला ॥ १५ ॥

बालचरित-मय चंद्रमा यह सोरह-कला-निधान ।

चित चकोर तुलसी कियो कर प्रेम-अमिय-रस पान ॥

तुलसी को जीवन राम लला ॥ १६ ॥ १६ ॥

राग कान्हरा

पालने रघुपति झुलावै ।

लै लै नाम सप्रेम सरस स्वर कौसल्या कल कीरति गावै ॥

केकिंकठ दुति, स्यामबरन बपु, बाल-बिभूषन विरचि बनाए ।

अलकैँ कुटिल, ललित लटकन भ्रू, नील नलिन दोउ नयन सुहाए ॥

सिसु सुभाय सोहत जब कर गहि बदन निकट पदपल्लव लाए ।
 मनहुँ सुभग जुग भुजग जलज भरि लेत सुधा ससि सों सचु पाए ॥
 उपर अनूप बिलोकि खेलौनां किलकत पुनि पुनि पानि पसारत ।
 मनहुँ उभय अंभोज अरुन सों बिधु-भय विनय करत अति आरत ॥
 तुलसिदास बहु-बास-बिबस अलि गुंजत सुछबि न जाति बखानी ।
 मनहुँ सकल स्तुति ऋचा मधुप है बिसद सुजस बरनत बर बानी ॥२०॥

राग बिलावल

भूलत राम पालने सोहैं ।
 भूरि-भाग जननी जन जोहैं ॥
 तन मृदु मंजुल मेचकताई ।
 भलकति बाल बिभूषन भाँई ॥
 अधर पानि पद लोहित लेने ।
 सर-सिंगार-भव सारस सेने ॥
 किलकत निरखि बिलोल खेलौना ।
 मनहुँ बिनोद लरत छबि छौना ॥
 रंजित अंजन कंज-बिलोचन ।
 भ्राजत भाल तिलक गोरोचन ॥
 लस मसिबिंदु बदन-बिधु नीको ।
 चितवत चितचकोर तुलसी को ॥ २१ ॥

राग कल्याण

राजन सिसुरूप राम सकल गुन निकाय धाम,
 कौतुकी कृपालु ब्रह्म जानु-पानि-चारी ।
 नीलकंज जलदपुंज मरकतमनि सरिस स्याम,
 काम कोटि सोभा अंग अंग उपर वारी ॥
 हाटक-मनि-रत्न-खचित रचित इंद्र-मंदिराम,

२२—जानु पानि-चारी = घुटनों के बल चढ़नेवाले । षडंघ्रि = षट्पद, मौंरा ।

ईदिरानिवास सदन बिधि रच्यो सँवारी ।
 बिहरत नृप-अजिर अनुज सहित बालकेलि-कुसल,
 नील-जलज-लोचन हरि मोचन-भयभारी ॥
 अरुन चरन अंकुस धुज कंज कुलिस चिन्ह रुचिर,
 आजत अति नूपुर बर मधुर मुखरकारी ।
 किंकिनी विचित्र जाल, कंबुकंठ ललित माल,
 उर विसाल कैहरि नख, कंकन करधारी ॥
 चारु चिबुक नासिका कपोल, भाल तिलक, भ्रुकुटि,
 खवन अधर सुंदर, द्विज-छवि अनूप न्यारी ।
 मनहुँ अरुन कंज-कोस मंजुल जुगपाँति प्रसव,
 कुंदकली जुगल जुगल परम सुभ्रवारी ॥
 चिह्नन चिकुरावली मनो षडंघ्रि-मंडली,
 बनी, विसेषि गुंजत जनु बालक किलकारी ।
 इकटक प्रतिबिंब निरखि पुलकत हरि हरषि हरषि,
 लै उछंग जननी रसभंग जिय बिचारी ॥
 जा कहँ सनकादि संभु नारदादि सुक मुनींद्र
 करत विविध जोग काम क्रोध लोभ जारी ।
 दसरथ गृह सोइ उदार, भंजन संसार-भार,
 लीला अवतार तुलसिदास त्रासहारी ॥ २२ ॥

राग कान्हरा

आँगन फिरत घुटुरुबनि धाए ।

नील-जलद-तनु-स्याम राम-सिसु जननि निरखि मुख निकट बोलाए ॥ १ ॥
 बंधुक-सुमन-अरुन पदपंकज अंकुस प्रमुख चिन्ह बनि आए ।
 नूपुर जनु मुनिवर-कलहंसनि रचे नीड़, दै बाहँ बसाए ॥ २ ॥
 कटि मेखल, बर हार, ग्रीव दर, रुचिर बाँह भूषन पहिराए ।
 बर श्रीवत्स मनोहर हरिनख हेम मध्य मनिगन बहु लाए ॥ ३ ॥

सुभग चिबुक द्विज अधर नासिका स्रवन कपोल मोहिं अति भाए ।
 भ्रू सुंदर करुनारस-पूरन, लोचन मनहुं जुगल जलजाए ॥ ४ ॥
 भाल बिसाल ललित लटकन बर, बालदसा के चिकुर सोहाए ।
 मनु दोउ गुरु सनि कुज आगे करि ससिहि मिलन तम के गन आए ॥ ५ ॥
 उपमा एक अभूत भई तब जब जननी पट पीत ओढ़ाए ।
 नील जलद पर उडुगन निरखत तजि सुभाव मनो तड़ित छपाए ॥ ६ ॥
 अंग अंग पर मार-निकर मिलि छबिसमूह लैलै जनु छाए ।
 तुलसिदास रघुनाथ-रूप-गुन तौ कहौ जो बिधि होंहि बनाए ॥ ७ ॥ २३ ॥

राग केदारा

रघुबर-बाल-छवि कहौ बरनि ।

सकल सुख की सींव, कोटि-मनोज-सोभाहरनि ॥ १ ॥
 बसी मानहुं चरन कमलनि अरुनता तजि तरनि ।
 रुचिर नूपुर किंकिनी मन हरति रुनभुनु करनि ॥ २ ॥
 मंजु मेचक मृदुल तनु अनुहरति भूषन भरनि ।
 जनु सुभग सिगार-सिसु-तरु फरयो है अदभुत फरनि ॥ ३ ॥
 भुजनि भुजग, सरोज नयननि, बदन बिधु जित्यो लरनि ।
 रहे कुहरनि, सलिल नभ उपमा अपर दुरि डरनि ॥ ४ ॥
 लसत कर प्रतिबिंब मनि-आँगन घुटुरुवनि चरनि ।
 जनु जलज-संपुट सुछवि भरि भरि धरति उर धरनि ॥ ५ ॥
 पुन्यफल अनुभवति सुतहि विलोकि दसरथ-घरनि ।
 बसति तुलसी-हृदय प्रभु किलकनि ललित लरखरनि ॥ ६ ॥ २४ ॥

नेकु बिलोकि धौं रघुबरनि ।

चारि फल त्रिपुरारि तोको दिये कर नृप-घरनि ॥ १ ॥
 बाल-भूषन-बसन, तन सुंदर रुचिर रजभरनि ।
 परसपर खेलनि अजिर, उठि चलनि, गिरि गिरि परनि ॥ २ ॥

भुकनि भाँकनि, छाँह सों किलकनि, नटनि, हठि लरनि ।
 तोतरी बोलनि, बिलोकनि मोहनी मनहरनि ॥ ३ ॥
 सखि बचन सुनि कौसिला लखि सुढर पासे ढरनि ।
 लेति भरि भरि अंक सैतति पैत जनु दुहुँ करनि ॥ ४ ॥
 चरित निरखत बिबुध तुलसी ओट दै जलधरनि ।
 चहत सुर सुरपति भयो सुरपति भए चहै तरनि ॥ ५ ॥ २५ ॥

राग जयतश्री

भूमितल भूप के बड़े भाग ।

राम लषन रिपुदमन भरत सिसु निरखत अति अनुराग ॥ १ ॥
 बाल-बिभूषन लसत पायँ मृदु मंजुल अंग-बिभाग ।
 दसरथ सुकृत-मनोहर-विरवनि रूप-करह जनु लाग ॥ २ ॥
 राजमराल विराजत बिहरत जे हर-हृदय-तड़ाग ।
 ते नृप-अजिर जानुकर धावत धरन चटक चल काग ॥ ३ ॥
 सिद्ध सिहात, सराहत मुनिगन कहैं सुर किन्नर नाग ।
 “हूँ बरु बिहँग बिलोकिय बालक बसि पुर उपवन बाग” ॥ ४ ॥
 परिजन सहित राय रानिन्ह कियो मज्जन प्रेम-प्रयाग ।
 तुलसी फल ताके चार्यो मनि मरकत पंकजराग ॥ ५ ॥ २६ ॥

राग आसावरी

छँगन-मँगन अँगना खेलत चारु चार्यो भाई ।
 सानुज भरत लाल लषन राम लोने लोने,
 लरिकां लखि मुदित मातुसमुदाई ॥ १ ॥
 बाल-बसन-भूषन धरे नखसिख छबि छाई ।
 नील पीत मनसिज-सरसिज मंजुल,

२५-४—सैतना = संचय और रक्षा करना । पैत = दाँव में रखा हुआ द्रव्य ।

२६-२—करह = नया कल्ला ।

२६-५—पंकजराग = पद्मराग, सानिक ।

मालनि मानो है देहनि तौ दुति पाई ॥ २ ॥
 ठुमुकु ठुमुकु पग धरनि, नटनि, लरखरनि सुहाई ।
 भजनि मिलनि रुठनि दूठनि किलकनि,
 अवलोकनि बोलनि बरनि न जाई ॥ ३ ॥
 जननि सकल चहुँ ओर आलबाल मनि-अँगनाई ।
 दसरथ सुकृत-बिबुध-बिरवा बिलसत,
 बिलोकि जनु बिधि वर बारि बनाई ॥ ४ ॥
 हरि बिरंचि हर हेरि राम प्रेम-परबसताई ।
 सुख-समाज रघुराज के बरनत,
 बिसुद्ध मन सुरनि सुमन भरि लाई ॥ ५ ॥
 सुमिरत श्रीरघुबरन की लीला लरिकारि ।
 तुलसिदास अनुराग अवध आनंद,
 अनुभवत तब को सो अजहुँ अघाई ॥ ६ ॥ २७ ॥
 राग बिलावल
 आँगन खेलत आनंदकंद ।
 रघुकुल कुमुद सुखद चारु चंद ॥
 सानुज भरत लषन सँग सोहैं ।
 सिसु-भूषन भूषित मन मोहैं ॥
 तन दुति मोरचंद जिमि भलकैं ।
 मनहु उमंगि अँग अँग छवि छलकैं ॥ १ ॥
 कटि किंकिनि, पग पैजनि बाजैं ।
 पंकज-पानि पहुँचियाँ राजैं ॥
 कठुला कंठ बघनहा नीकै ।
 नयन-सरोज मयन-सरसी के ॥ २ ॥
 लटकन लसत ललाट लट्ठरी ।

दमकति द्वैद्वै दँतुरियाँ रूरीँ ॥
 मुनि-मन हरत मंजु मसि-बुंदा ।
 ललित बदन, बलि, बालमुकुंदा ॥ ३ ॥
 कुलही चित्र-बिचित्र भँगूली ।
 निरखत मातु मुदित मन फूली ॥
 गहि मनि-खंभ डिंभ डगि डोलत ।
 कलवल बचन तोतरे बोलत ॥ ४ ॥
 किलकत भुंकि भाँकत प्रतिबिंबनि ।
 देत परम सुख पितु अरु अंवनि ॥
 सुमिरत सुखमा हिय हुलसी है ।
 गावत प्रेम पुलकि तुलसी है ॥ ५ ॥ २८ ॥

राग कान्हरा

ललित सुतहि लालति सचु पाए ।

कौसल्या कल कनक अजिर महुँ सिखवति चलन अँगुरियाँ लाए ॥१॥
 कटि किंकिनी, पैंजनी पाँयनि बाजति रुनभुनु मधुर रेंगाए ।
 पहुँची करनि, कंठ कटुला बन्यो केहरिनख-मनि-जरित जराए ॥२॥
 पीत पुनीत बिचित्र भँगूलिया सोहति स्याम सरीर सोहाए ।
 दँतियाँ द्वैद्वै मनोहर मुखछबि, अरुन अधर चित लेत चोराए ॥३॥
 चिबुक कपोल नासिका सुंदर, भाल तिलक मसिविंदु बनाए ।
 राजत नयन मंजु अंजनजुत खंजन कंज मीन मद नाए ॥ ४ ॥
 लटकन चारु भुकुटिया टेढ़ी, मेढ़ी सुभग सुदेस सुभाए ।
 किलकि किलकि नाचत चुटकी सुनि, डरपति जननि पानि छुटकाए ॥५॥
 गिरि घुदुरुवनि टेकि उठि अनुजनि तोतरि बोलत पूष देखाए ।
 बाल-केलि अवलोकि मातु सब मुदित मगन आनंद न अमाए ॥ ६ ॥
 देखत नभ घन-ओट चरित मुनि जोग समाधि बिरति बिसराए ।
 तुलसिदास जे रसिक न एहि रस ते नरजड़ जीवत जंग जाए ॥ ७ ॥ २९ ॥

राग ललित

छोटो छोटो गोड़ियाँ अँगुरियाँ छबीलीं छोटी,
 नख-जोति मोती मानो कमल-दलनि पर ।
 ललित आँगन खेलै, उमुकु उमुकु चलै,
 झुँझुनु झुँझुनु पाँय पैजनी मृदु मुखर ॥
 किंकिनी कलित कटि हाटक-जटित मनि,
 मंजु कर-कंजनि पहुँचियाँ रुचिरतर ।
 पियरी भीनी भँगुली साँवरे सरीर खुली,
 बालक दामिनि ओढ़ी मानो बारे वारिधर ॥ १ ॥

उर बघनहा, कंठ कठुला, भँहूले कोस,
 मेढ़ी लटकन मसिबिंदु मुनि मन-हर ।

अंजन-रंजित नैन, चित चौरै चितवनि,
 मुख-सोभा पर वारौं अमित असमसर ॥

चुटकी बजावती नचावती कौसल्या माता,
 बालकेलि गावति मल्हावति सुप्रेम-भर ।

किलकि किलकि हँसै, हूँ हूँ हँसै दँतुरियाँ लसै,

तुलसी के मन बसैं तोतरे बचन बर ॥ २ ॥ ३० ॥

सादर सुमुखि बिलोकि राम-सिसुरूप, अनूप भूप लिए कनियाँ ।

सुंदर स्याम-सरोज-बरन तनु, नखसिख सुभग सकल सुखदनियाँ ॥ १ ॥

अरुन चरन नखजोति जगमगति, रुनुझुनु करति पाँय पैजनियाँ ।

कनकरतन-मनि-जटित रटति कटि किंकिनि, कलित पीतपट-तनियाँ ॥ २ ॥

पहुँची करनि, पदिक हरिनख उर, कठुला कंठ, मंजु गजमनियाँ ।

रुचिर चिबुक, रद अधर मनोहर, ललित नासिका लसति नथुनियाँ ॥ ३ ॥

बिकट भ्रुकुटि सुखमानिधि आनन कल कपोल काननि नगफनियाँ ।

भाल तिलक मसिबिंदु बिराजत, सोहति सीस लाल चौतनियाँ ॥ ४ ॥

मनमोहनी तोतरी बोलनि, मुनिमनहरनि हँसनि किलकनियाँ ।

बाल सुभाय बिलोल बिलोचन, चोरति चितहि चारु चितवनियाँ ॥५॥
 सुनि कुलवधू भरोखनि भाँकति रामचंद्र-छवि चंदबदनियाँ ।
 तुलसिदास प्रभु देखि मगन भई प्रेमविवस कछु सुधिन अपनियाँ ॥६॥३१॥

राग विलावल

सोहत सहज सुहाए नैन ।

खंजन मीन कमल सकुचत तब जब उपमा चाहत कवि दैन ॥ १ ॥
 सुंदर सब अंगनि सिसु-भूषन राजत जनु सोभा आए लैन ।
 बड़े लाभ, लालची लोभ बस रहि गए लखि सुखमा बहु मैन ॥२॥
 भोर भूप लिए गोद मोद भरे, निरखत बदन, सुनत कल बैन ।
 बालक-रूप अनूप राम-छवि निवसति तुलसिदास-उर-ऐन ॥३॥ ३२॥

राग विभास

भोर भयो जागहु, रघुनंदन !
 गत-व्यलीक, भगतनि-उर-चंदन ॥
 ससि करहीन, छीनदुति तारे ।
 तमचुर मुखर, सुनहु मेरे प्यारे ! ॥
 विकसित कंज, कुमुद बिलखाने ।
 लै पराग रस मधुप उड़ाने ॥
 अनुजसखा सब बोलनि आए ।
 बंदिन्ह अति पुनीत गुन गाए ॥
 मनभावतो कल्लेऊ कीजै ।
 तुलसिदास कहँ जूठनि दीजै ॥ ३३ ॥
 प्रात भयो तात, बलि, मातु, बिधु बदन पर
 मदन वारौं कोटि, उठौ प्रानप्यारे ! ।
 सूत मागध बंदि बंदत बिरुदावली,
 द्वार सिसु-अनुज प्रियतम तिहारे ।

कोक गतसोक अवलोकि ससि छीनछवि,
 अरुनमय गगन राजत रुचि-तारे ।
 मनहुँ रबिबाल-मृगराज तमनिकर-करि
 दलित, अति ललित मनिगन बिथारे ।
 सुनहु तमचुर मुखर, कीर कलहंस पिक
 केकि रव कलित, बोलत बिहंग बारे ॥ ३४ ॥
 मनहुँ मुनिवृंद, रघुवंसमनि ! रावरे
 गुनत गुन आस्रमनि सपरिवारे ।
 सरनि बिकसित कंजपुंज मकरंद वर,
 मंजुतर मधुर मधुकर गुंजारे ।
 मनहुँ प्रभुजन्म सुनि चैन अमरावती,
 इंदिरानंद मंदिर सँवारे ।
 प्रेम-संमिलित वर वचन-रचना अकनि
 राम राजीव-लोचन उधारे ।
 दास तुलसी मुदित, जननि करै आरती,
 सहज सुंदर अजिर पाँव धारे ॥ ३५ ॥
 जागिए कृपानिधान जानराय रामचंद्र !
 जननी कहै बार बार भोर भयो प्यारे ।
 राजिवलोचन बिसाल, प्रीति-बापिका मराल,
 ललित कमल-बदन ऊपर मदन कोटि वारे ॥
 अरुन उदित, बिगत सर्वरी, ससांक किरनिहीन,
 दीन दीपजोति, मलिन-हुति समूह तारे ।
 मनहुँ ज्ञान धन प्रकास, बीते सब भव-बिलास
 आसत्रास-तिमिर तोष-तरनि-तेज जारे ॥
 बोलत खगनिकर मुखर मधुर-करि प्रतीत
 सुनहु स्रवन, प्रानजीवन धन, मेरे तुम वारे ।

मनहुँ बेद बंदी मुनिवृंद सूत मागधादि विरुद
 बदत 'जय जय जय जयति कैटभारे' ॥
 विकसित कमलावली, चले प्रपुंज चंचरीक
 गुंजत कल कोमल धुनि त्यागि कंज न्यारे ।
 जनु विराग पाइ सकल-सोक-रूप-गृह बिहाइ
 श्रुत्य प्रेममत्त फिरत गुनत गुन तिहारे ॥
 सुनत वचन प्रिय रसाल जागे अतिसय दयाल,
 भागे जंजाल विपुल, दुख-कदंब दारे ।
 तुलसिदास अति अनंद, देखिकै मुखारबिंद,
 छूटे अमरद परम मंद द्वंद भारे ॥ ३६ ॥
 बोलत अवनप-कुमार ठाढ़े नृपभवन-द्वार,
 रूपसील-गुन उदार जागहु मेरे प्यारे ।
 विलखित कुमुदिनि, चकोर, चक्रवाक हरष भोर,
 करत सार तमचुर खग, गुंजत अलि न्यारे ॥
 रुचिर मधुर भोजन करि, भूषन सजि सकल अंग,
 संग अनुज बालक सब विविध विधि सँवारे ।
 करतल गहि ललित चाप भंजन रिपु-निकर-दाप,
 कटितट पटपीत, तून सायक अनियारे ॥
 उपवन मृगया-बिहार-कारन गवने कृपाल,
 जननी मुख निरखि पुन्यपुंज निज बिचारे ।
 तुलसिदास संग लीजै, जानि दीन अभय कीजै
 दीजै मति बिमल गावै चरित बर तिहारे ॥ ३७ ॥

राग नट

खेलन चलिये आनंदकंद ।

सखा प्रिय नृपद्वार ठाढ़े विपुल बालक-वृंद ॥ १ ॥

३६—कदंब = समूह ।

टुषित तुम्हरे दरस कारन चतुर चातक-दास ।
 बपुष-बारिद बरषि छवि-जल हरहु लोचन-प्यास ॥ २ ॥
 बंधु-बचन बिनीत सुनि उठे मनहुँ केहरि-बाल ।
 ललित लघु सर चाप कर, उर नयन बाहु बिसाल ॥ ३ ॥
 चलत पद प्रतिबिंब राजत अजिर सुखमा-पुंज ।
 प्रेमबस प्रति चरन महि मानो देति आसन कंज ॥ ४ ॥
 निरखि परम बिचित्र सोभा चकित चितवहिँ मात ।
 हरष-बिबस न जात कहि, 'निज भवन बिहरहु, तात' ॥ ५ ॥
 देखि तुलसीदास प्रभु-छवि रहे सब पल रोकि ।
 शकित निकर-चकोर मानहुँ सरदइंदु बिलोकि ॥ ६ ॥ ३८ ॥

बिहरत अवध-बीथिन राम ।

संग अनुज अनेक सिंसु, नव-नील-नीरद-स्याम ॥ १ ॥
 तरुन अरुन-सरोज-पद बनी कनकमय पदत्रान ।
 पीत पट कटि तून बर, कर ललित लघु धनु बान ॥ २ ॥
 लोचननि को लहत फल छवि निरखि पुर-नर-नारि ।
 बसत तुलसीदास उर अवधेस के सुत चारि ॥ ३ ॥ ३९ ॥

जैसे राम ललित तैसे लोने लषन लालु ।

तैसेई भरत सील-सुखमा-सनेह-निधि, तेसेई सुभग सँग सत्रुसालु ॥ १ ॥
 धरे धनु सर कर, कसे कटि तरकसी, पीरे पट ओढ़े चले चारु चालु ।
 अंग अंग भूषन जराय के जगमगत, हरत जन के जी को तिमिरजालु ॥ २ ॥
 खेलत चौहट घाट बीथी बाटिकनि प्रभु सिव सुप्रेम-मानस-मरालु ।
 सोभा-दान दै दै सनमानत जाचकजन करत लोक-लोचन निहालु ॥ ३ ॥
 रावन-दुरित-दुख दलै सुर कहैं आजु 'अवध सकल सुख को सुकालु' ।
 तुलसी सराहैं सिद्ध सुकृत कौसल्या जूके, भूरि-भाग-भाजन भुवालु ॥ ४ ॥

राग ललित

ललित ललित लघु लघु धनु सर कर,

तैसी तरकसी, कटि कसे पट पियरे ।
 ललित पनही पाँय पैँजनी-किंकिनि-धुनि,
 सुनि सुख लहै मनु रहै नित नियरे ॥
 पहुँची अंगद चारु, हृदय पदिक हारु,
 कुंडल-तिलक-छवि गढ़ो कवि जियरे ।
 सिरसि टिपारो लाल, नीरज-नयन बिसाल,
 सुंदर बदन ठाढ़े सुरतरु सियरे ॥
 सुभग सकल अंग, अनुज बालक संग,
 देखि नर-नारि रहैं ज्यों कुरंग दियरे ।
 खेलत अवध खोरि, गोली भौरा चक डोरि,
 मूरति मधुर बसै तुलसी के हियरे ॥ ४१ ॥
 छोटिऐ धनुहियाँ, पनहियाँ पगनि छोटी,
 छोटिऐ कछौटी कटि, छोटिऐ तरकसी ।
 लसत भँगूली भीनी, दामिनि की छवि छीनी,
 सुंदर बदन, सिर पगिया जरकसी ॥
 बय-अनुहरत विभूषन विचित्र अँग,
 जोहे जिय आवति सनेह की सरक सी ।
 मूरति की सुरति कही न परै तुलसी पै,
 जानै सोई जाके उर कसकै करक सी ॥ ४२ ॥

राग टोड़ी

राम लषन इक ओर, भरत रिपुदवन लाल इक ओर भये ।
 सरजुतीर सम सुखद भूमि-थल, गनि गनि गोइयाँ बाँटि लये ॥

४१—टिपारा = ऊँची दीवार की टोपी के आकार का सुकुट । दियरा =
 बड़ा सा लुक जो शिकारी हिरनों को आकर्षित करने के लिए जलाते हैं ।

४२—सरक = शराब या शराब का खुमार ।

कंदुक-कैलि-कुसल हय चढ़ि चढ़ि, मन कसि कसि, ठोंकि ठोंकि खये ।
 कर-कमलनि विचित्र चौगानै, खेलन लगे खेल रिभये ॥
 व्योम बिमाननि विबुध बिलोकत खेलक पेखक छाँह छये ।
 सहित समाज सराहि दसरथहि वरषत निज तरु-कुसुम चये ॥
 एक लै बढ़त, एक फेरत, सब प्रेम-प्रमोद-बिनोद-मयं ।
 एक कहत भइ हारि राम जू की, एक कहत भइया भरत जये ॥
 प्रभु बकसत गज बाजि बसन मनि, जय-धुनि गगन निसान हये ।
 पाइ सखा सेवक जाचक भरि जनम न दुसरे द्वार गए ॥
 नभ-पुर परति निछावरि जहँ तहँ, सुर सिद्धनि वरदान दये ।
 भूरि-भाग अनुराग उमँगि जे गावत सुनत चरित्र नित ये ॥
 हारे हरष होत हिय भरतहि, जिते सकुच सिर नयन नए ।
 तुलसी सुमिरि सुभाव सील सुकृती तेइ जे एहि रंग-रए ॥ ४३ ॥

खेलि खेल सुखेलनिहारे ।

उतरि उतरि चुचुकारि तुरंगनि सादर जाइ जोहारे ॥ १ ॥
 बंधु सखा सेवक सराहि सनमानि सनेह सँभारे ।
 दिए बसन गज बाजि साजि सुभ साज सुभाँति सँवारे ॥ २ ॥
 सुदित नयन-फल पाइ, गाइ गुन सुर सानंद सिधारे ।
 सहित समाज राजमंदिर कहँ राम राउ पगु धारे ॥ ३ ॥
 भूप-भवन घरघर घमंड, कल्याण कोलाहल भारे ।
 निरखि हरषि आरती निछावरि करत सरीर बिसारे ॥ ४ ॥
 नित नए मंगल मोद अवध सब, सब बिधि लोग सुखारे ।
 तुलसी तिन्ह सम तेउ जिन्हके प्रभु तेँ प्रभु-चरित पियारे ॥ ५ ॥ ४४ ॥

राग सारंग

चहत महामुनिजाग जयो ।

नीच निसाचर देत दुसह दुख, कस तनु ताप-तयो ॥ १ ॥

४३—खये = बाहुमूल ।

सापे पाप, नये निदरत खल, तब यह मंत्र ठयो ।
 विप्र-साधु-सुर-धेनु-धरनि-हित हरि अवतार लयो ॥ २ ॥
 सुमिरत श्रीसारंगपानि छन में सब सोच गयो ।
 चले मुदित कौसिक कोसलपुर, सगुननि साथ दयो ॥ ३ ॥
 करत मनोरथ जात पुलकि, प्रगटत आनंद नयो ।
 तुलसी प्रभु अनुराग उमगि मग मंगल-मूल भयो ॥ ४ ॥ ४५ ॥

आजु सकल सुकृत फलु पाइहैं ।

सुख की सीव,, अवधि आनंद की, अवध बिलोकि हैं पाइहैं ॥१॥
 सुतनि सहित दसरथहि देखिहैं, प्रेम पुलकि उर लाइहैं ।
 रामचंद्र-मुखचंद्र-सुधा-छवि नयन-चकोरनि प्याइहैं ॥ २ ॥
 सादर समाचार नृप बुझिहैं, हैं सब कथा सुनाइहैं ।
 तुलसी हैं कृतकृत्य आसमहिं राम लषन लै आइहैं ॥ ३ ॥ ४६ ॥

राग नट

देखि मुनि! रावरे पद आज ।

भयो प्रथम मनती में अब ते' हैं जहँ लौं साधु-समाज ॥ १ ॥
 चरन वंदि कर जोरि निहोरत, "कहिय कृपा करि काज ।
 मेरे कछु न अदेय राम बिनु, देह गेह सब राज" ॥ २ ॥
 भली कही भूपति-त्रिभुवन में को सुकृती सिरताज ?
 तुलसि राम-जनमहि तेँ जनियत सकल सुकृत को साज ॥ ३ ॥ ४७ ॥

राजन्! राम लषन जौं दीजै ।

जस रावरो, लाभ ढोटनिहूँ, मुनि सनाथ सब कीजै ॥ १ ॥
 डरपत हैं साँचे सनेह-बस सुत-प्रभाव बिनु जाने ।
 बूझिय बामदेव अरु कुलगुरु, तुम पुनि परम सयाने ॥ २ ॥
 रिपु रन दलि, मख राखि, कुसल अति अलप दिननि घर ऐहैं ।
 तुलसिदास रघुवंस-तिलक की कबिकुल कीरति गैहैं ॥ ३ ॥ ४८ ॥

४५—जयो = यजन किया ।

रहे ठगिसे नृपति सुनि मुनिवर के बयन ।

कहि न सकत कछु, राम-प्रेमबस पुलक गात, भरे नीर नयन ॥ १ ॥

गुरु बसिष्ठ समुझाय कह्यो तब हिय हरषाने जाने सेष-सयन ।

सौंपे सुत गहि पानि पाँय परि, भूसुर उर चले उमगि चयन ॥ २ ॥

तुलसी प्रभु जोहत पोहत चित, सोहत मोहत कोटि मयन ।

मधु माधव मूरति दोउ सँग मानो

दिनमनि गवन कियो उतर अयन ॥ ३ ॥ ४६ ॥

राग सारंग

ऋषि सँग हरषि चले दोउ भाई ।

पितु-पद बंदि सीस लियो आयसु सुनि सिष आसिषं पाई ॥ १ ॥

नील पीत पाथोज-बरन बपु, बय किसोर बनि आई ।

सर धनु पानि, पीत पट कटितट, कसे निखंग बनाई ॥ २ ॥

कलित कंठ मनि-माल, कलेवर चंदन खौरि सुहाई ।

सुंदर बदन, सरोरुह-लोचन, मुखछवि बरनि न जाई ॥ ३ ॥

पद्मव पंख सुमन सिर सोहत, क्यों कहौं वेष लुनाई ?

मनु मूरति धरि उभय भाग भइ त्रिभुवन सुंदरताई ॥ ४ ॥

पैठत सरनि, सिलनि चढ़ि चितवत खग-मृग-वन-रुचिराई ।

सादर सभय सप्रेम पुलकि मुनि पुनि पुनि लेत बुलाई ॥ ५ ॥

एक तीर तकि हती ताड़का-विद्या बिप्र पढ़ाई ।

राख्यो जज्ञ जीति रजनीचर, भइ जग बिदित बढ़ाई ॥ ६ ॥

चरन-कमल-रज-परस अहल्या निज पति-लोक पठाई ।

तुलसिदास प्रभु के वूझे मुनि सुरसरि कथा सुनाई ॥ ७ ॥ ५० ॥

राग नट

दोउ राजसुवन राजत मुनि के संग ।

नखसिख लोने, लोने बदन, लोने लोयन दामिनि-बारिद-बरबरन अंग ॥ १ ॥

४३—पतंगसुत = सूर्य के पुत्र अश्विनीकुमार ।

सिरनि सिखा सुहाइ, उपवीत पीट पट, धनु सर कर, कसे कटि निखंग ।
मानो मख-रुज-निसिचर हरिवे को सुत पावक के साथ पठए पतंग ॥२॥
करत छाँह धन, बरषैं सुमन सुर, छवि बरनत अतुलित अनंग ।
तुलसी प्रभु बिलोकि मग-लोग, खग-मृग प्रेममगन रंगे रूप-रंग ॥३॥५१॥

राग कल्याण

मुनि के संग बिराजत बोर ।

काकपच्छ, धरं, कर कोदंड सर, सुभग पीतपट कटि तूनीर ॥ १ ॥
बदन इंदु, अंभोरुह लोचन, स्याम गौर सोभा-सदन सरीर ।
पुलकत ऋषि अवलोकि अमित छवि, उर न समाति प्रेम की भीर ॥२॥
खेलत चलत करत मग कौतुक बिलंबत सरित-सरोवर-तीर ।
तेरत लता सुमन सरसीरुह, पियत सुधा सम सीतल नीर ॥ ३ ॥
वैठत बिमल सिलनि बिटपनि तर, पुनि पुनि बरनत छाँह समीर ।
देखत नटत केकि, कल गावत मधुप मराल कोकिला कीर ॥ ४ ॥
नयननि को फल लेत निरखि खग मृग सुरभी ब्रजबधू अहीर ।
तुलसी प्रभुहि देत सब आसन निज निज मन-मृदु-कमल-कुटीर ॥५॥५२॥

राग कान्हड़ा

सोहत मग मुनि सँग दोड भाई ।

तरुन तमाल चारु चंपक-छवि कवि सुभाय कहि जाई ॥ १ ॥
भूषन बसन अनुहरत अंगनि, उमगति सुंदरताई ।
बदन-मनोज सरोज-लोचननि रही है लुभाइ लुनाई ॥ २ ॥
अंसनि धनु, सर कर-कमलनि, कटि कसे हैं निखंग बनाई ।
सकल-भुवन-सोभा-सरबसु लघु लागति निरखि निकाई ॥ ३ ॥
महि मृदु पथ, धन छाँह, सुमन सुर बरष, पवन सुखदाई ।
जल-थल-रुह फल फूल सलिल सब करत प्रेम पहुनाई ॥ ४ ॥

५२—नटत = नाचते हैं । ब्रज = अहीरों का डोल या बाड़ा ।

५३—अंसनि = कंधों पर ।

सकुच समीत विनीत साथ गुरु बोलनि चलनि सुहाई ।
 खग मृग चित्र बिलोकत बिच बिच, लसति ललित लरिकारै ॥ ५ ॥
 विद्या दर्ई जानि विद्यानिधि, बिद्यहु लही बड़ाई ।
 ख्याल दली ताडुका, देखि ऋषि देत असीस अघाई ॥ ६ ॥
 ब्रूभक्त प्रभु सुरसरि प्रसंग कहि निज-कुल-कथा सुनाई ।
 गाधिसुवन-सनेह-सुख-संपति उर-आस्रम न समाई ॥ ७ ॥
 बनबासी बटु जती जोगि-जन साधु-सिद्ध-समुदाई ।
 पूजत पेखि प्रीति पुलकत तनु, नयन लाभ लुटि पाई ॥ ८ ॥
 मख राख्यो खलदल दलि भुजबल, बाजत बिबुध बधाई ।
 नित पथ-चरित-सहित तुलसी-चित बसत लखन रघुराई ॥ ९ ॥ ५३ ॥

मंजुल मंगलमय नृप-ढोटा ।

मुनि, मुनितिय, मुनिसिसु बिलोकि कहैं मधुर मनोहर जोटा ॥ १ ॥
 नाम-रूप-अनुरूप बेष बय, राम लखन लाल लोने ।
 इन्हतें लही है मानो घन-दामिनि दुति मनसिज मरकत सोने ॥ २ ॥
 चरन-सरोज, पीतपट कटितट, तून-तीर-धनुधारी ।
 केहरिकंध, काम-करि-करवर विपुल बाहु, बल भारी ॥ ३ ॥
 दूषन-रहित समय सम भूषन पाइ सुअंगनि सोहैं ।
 नव-राजीव-नयन, पूरन-बिधुबदन मदन मन मोहैं ॥ ४ ॥
 सिरनि सिखंड, सुमन-दल-मंडन बाल सुभाय बनाए ।
 केलि-अंक तनु रेनु पंक जनु प्रगटत चरित चोराए ॥ ५ ॥
 मख राखिबे लागि दसरथ सों माँगि आस्रमहिं आने ।
 प्रेम पूजि पाहुने प्रानप्रिय गाधिसुवन सनमाने ॥ ६ ॥

१३-१-चित्र = रंग विरंग ।

१४-सिखंड = मोरपक्ष । केलिअंक.....चुराए = खेल के चिन्ह स्वरूप जो धूल और कीचड़ शरीर में लगा है वह मानो उस चरित्र को प्रकट करता है जो विश्वामित्र से चुरा कर किया गया ।

साधन-फल साधक सिद्धनि के, लोचन-फल सबही के ।

सकल सुकृत-फल मातु पिता के, जीवनधन तुलसी के ॥ ७ ॥ ५४ ॥

राग सूहे

रामपद-पदुम-पराग परी ।

अपि तिय तुरत त्यागि पाहन-तनु छविमय देह धरी ॥ १ ॥

प्रबल पाप पति-साप-दुसह-दव दारुन जरनि जरी ।

कृपा-सुधा सिँचि बिबुध बेलि ज्यों फिरि सुख-फरनि फरी ॥ २ ॥

निगम-अगम मूरति महेस-मति-जुवति बराय बरी ।

सोइ मूरति भइ जानि नयनपथ इकटक तँ न टरी ॥ ३ ॥

वरनति हृदय सरूप सील गुन प्रेम-प्रमोद-भरी ।

तुलसिदास अस केहि आरत की आरति प्रभु न हरी ? ॥ ४ ॥ ५५ ॥

परत पद-पंकज अपि-रवनी ।

भई है प्रगट अति दिव्य देह धरि मानो त्रिभुवन-छवि-छवनी ॥ १ ॥

देखि बड़ो आचरज पुलकि तनु कहति मुदित मुनि-भवनी ।

जो चलिहैं रघुनाथ पयादेहि सिला न रहिहि अवनी ॥ २ ॥

परसि जो पाँय पुनीत सुरसरी सोहै तीनि-गवनी ।

तुलसिदास तेहि चरन-रेनु की महिमा कहै मति कवनी ॥ ३ ॥ ५६ ॥

भूरिभाग भाजनु भई ।

रूपरासि अवलोकि बंधु दोउ प्रेम-सुरंग रई ॥ १ ॥

कहा कहैं केहि भाँति सराहैं, नहिँ करतूति नई ।

बिनु कारन करुनाकर रघुवर केहि केहि गति न दई ? ॥ २ ॥

करि बहु बिनय, राखि उर मूरति मंगल-मोदमई ।

तुलसी हैं बिसोक पति-लोकहि प्रभुगुन गनत गई ॥ ३ ॥ ५७ ॥

राग कान्हरा

कौसिक के मख के रखवारें ।

नाम राम अरु लखन ललित अति दसरथ-राज-दुलारे ॥ १ ॥

मेचक पीत कमल कोमल कल काकपच्छ-धर बारे ।
 सोभा सकल सकेलि मदन-बिधि सुकर-सरोज सँवारे ॥ २ ॥
 सहस्र समूह सुबाहु सरिस खल समर सूर भट भारे ।
 केलि-तून-धनु-बान-पानि रन निदरि निसाचर मारे ॥ ३ ॥
 ऋषितिय तारि स्वयंवर पेखन जनक-नगर पगु धारे ।
 मग नरनारि निहारत सादर कहँ बड़ भाग हमारे ॥ ४ ॥
 तुलसी सुनत एक एकनि सों चलत बिलोकनिहारे ।
 मूकनि बचन-लाहु, मानो अंधनि लहे हैं बिलोचन-तारे ॥ ५ ॥ ५८॥

राग ठाड़ी

आए सुनि कौसिक जनक हरषाने हैं ।
 बोलि गुरु भूसुर समाज सों मिलन चले,
 जानि बड़े भाग अनुराग अकुलाने हैं ॥ १ ॥
 नाइ सीस पगनि, असीस पाइ प्रमुदित
 पाँवड़े अरघ देत आदर सों आने हैं ।
 असन बसन बास कै सुपास सब बिधि,
 पूजि प्रिय पाहुने, सुभाय सनमाने हैं ॥ २ ॥
 बिनय बड़ाई ऋषि-राजऊ परसपर
 करत पुलकि प्रेम आनँद अघाने हैं ।
 देखे राम लखन निमेषै बिथकित भई,
 प्रानहुँ ते प्यारे लागे विनु पहिचाने हैं ॥ ३ ॥
 ब्रह्मानंद हृदय, दरस-सुख लोयननि
 अनुभए उभय, सरस राम जाने हैं ।
 तुलसी बिदेह की सनेह की दसा सुमिरि
 मेरे मन माने राउ निपट सयाने हैं ॥ ४ ॥ ५८ ॥

राग मलार

कोसलराय के कुञ्जरोटा ।

राजत रुचिर जनक-पुर पैठत स्याम गौर नीके जोटा ॥ १ ॥
चैतनि सिरनि, कनक-कली काननि, कटि पट पीत सोहाए ।
उर मनि-माल, बिसाल बिलोचन, सीय-स्वयंवर आए ॥ २ ॥
बरनि न जात, मनहिं मन भावत, सुभग अबहिं बय थोरी ।
भई हैं भगन बिधुबदन बिलोकत बनिता चतुर चकोरी ॥ ३ ॥
कहैं सिवचाप लरिकवनि बूझत बिहँसि चितै तिरछौं हैं ।
तुलसी गलिन भीर, दरसन लागि लोग अटनि आरोहैं ॥ ४ ॥ ६० ॥

ये अबधेस के सुत दोऊ ।

चढ़ि मंदिरनि बिलोकत सादर जनकनगर सब कोऊ ॥ १ ॥
स्याम गौर सुंदर किसोरतनु, तून-बान-धनुधारी ।
कटि पट पीत, कंठ मुकुतामनि, भुज बिसाल, बलभारी ॥ २ ॥
मुखमयंक, सरसीरुह-लोचन, तिलक भाल टेढ़ी भौहैं ।
कल कुंडल, चौतनी चारु अति, चलत मत्त-गज-गौं हैं ॥ ३ ॥
बिस्वामित्र हेतु पठए नृप, इनहिं ताडुका मारी ।
मख राख्यो रिपु जीति जान जग, मग मुनिबधू उधारी ॥ ४ ॥
प्रिय पाहुने जानि नरनारिन नयननि अयन दए ।
तुलसिदास प्रभु देखि लोग सब जनक समान भए ॥ ५ ॥ ६१ ॥

राग टोड़ी

बूझत जनक 'नाथ ढोटा दोऊ काके हैं' ?

तरुन तमाल-चारु-चंपक-बरन-तनु,
कौने बड़े भागी के सुकृत पीरपाके हैं ॥ १ ॥
सुख के निधान पाए, हिय के पिधान लाए,

६१-गौं = ढब, चाल । जनक समान = विदेह । विवाके = बेबाक किया, जोड़ा ।

ठग के से लाडू खाए, प्रेम-मधु छाकें हैं ।
 स्वारथ-रहित परमार्थी कहावत हैं,
 भे सनेह-विषस विदेहता विचाकें हैं ॥ २ ॥
 सील-सुधा के अगार, सुखमा के पारावार,
 पावत न पैरि पार पैरि पैरि थाकें हैं ।
 लोचन ललकि लागे, मन अति अनुरागे,
 एक रसरूप चित सकल सभा के हैं ॥ ३ ॥
 जिय जिय जोरत सगाई राम लपन सों
 आपने आपने भाय जैसे भाय जाके हैं ।
 प्रीति को, प्रतीति को, सुमिरिबे को,
 सेइबे को, सरन को समरथ तुलसिहु ताके हैं ॥ ४ ॥ ६२ ॥
 ए कौन, कहाँ तेँ आए ?

नील-पीत-पाथोज-वरन, मन-हरन सुभाय सुहाए ॥ १ ॥
 मुनिसुत किधौँ भूप-बालक, किधौँ ब्रह्म-जीव जग जाए ।
 रूप-जलधि के रतन सुछवि तिय लोचन ललित ललाए ॥ २ ॥
 किधौँ रवि-सुवन, मदन, ऋतुपति, किधौँ हरि हर वेष बनाए ।
 किधौँ आपने सुकृत-सुरतरु के सुफल राबरेहि पाए ॥ ३ ॥
 भए विदेह विदेह नेहवस देहदसा विसराए ।
 पुलक गाव, न समात हरष हिय, सलिल सुलोचन छाए ॥ ४ ॥
 जनक-बचन मृदु मंजु मधु-भरे-भगति कौसिकहि भाए ।
 तुलसी अति आनंद उमंगि उर राम लषन गुन गाए ॥ ५ ॥ ६३ ॥

कौसिक कृपालू हूँ को पुलकित तनु भो ।

उमंगत अनुराग, सभा के सराहे भाग,
 देखि दसा जनक की कहिबे को मनु भो ॥ १ ॥
 प्रीति के न. पातकी, दिएहुँ साप पाप बड़ो,
 मख-मिस मेरो तथ अवध-गवनु भो ।

प्राणहूँ ते प्यारे सुत माँगे दिए दसरथ,
 सत्यसिंधु सोच सहे, सुनो सो भवतु भो ॥ २ ॥
 काकसिखा सिर, कर केलि-तून-धनु-सर
 बालक-बिनोद जातुधाननि सों रनु भो ।
 वृक्षत विदेह अनुराग-आचरज-बस,
 ऋषिराज-जाग भयो महाराज अनुभो ॥ ३ ॥
 भूमिदेव नरदेव सचिव परसपर
 कहत हमहिं सुरतरु सिवधनु भो ।
 सुनत राजा की रीति, उपजी प्रतीति प्रीति,
 भाग तुलसी के, भले साहेब को जनु भो ॥ ४ ॥ ६४ ॥
 चारो भले बेटा देव दसरथ राय के ।
 जैसे राम-लषन भरत-रिपुहन तैसे,
 सील सोभा सागर प्रभाकर प्रभाय के ॥ १ ॥
 ताड़का सँहारि मख राखे, नीके पाले व्रत,
 कोटि कोटि भट किए एक एक घाय के ।
 एक बान बेगही उड़ाने जातुधान जात,
 सुखि गए गात हैं पतौआ भए बाय के ॥ २ ॥
 सिलाछोर छुवत अहल्या भई दिव्य देह,
 गुन पेखे पारस के पंकरुह पाय के ।
 राम के प्रसाद गुरु गौतम खसम भए,
 रावरेहु सतानंद पूत भये माय के ॥ ३ ॥
 प्रेम-परिहास-पोख-बचन परसपर
 कहत सुनत सुख सबही सुभाय के ।

६४—प्रीति के न पातकी = यज्ञ में विघ्न करनेवाले पातकी राक्षस प्रीति के पात्र नहीं थे ।

तुलसी सराहैं भाग कौसिक जनक जू के,
 बिधि के सुढर होत सुढर सुदाय के ॥४॥६५॥
 ए दोऊ दसरथ के बारे ।

नाम राम घनस्याम, लषन लघु नखसिख अँग उजियारे ॥ १ ॥
 निज हित लागि माँगि आने मैं धर्मसेतु-रखवारे ।
 धीर बीर बिरुदैत बाँकुरे महाबाहु बल भारे ॥ २ ॥
 एक तीर तकि हती ताड़का, किए सुर साधु सुखारे ।
 जज्ञ राखि जग साखि, तोषि ऋषि, निदरि निसाचर मारे ॥ ३ ॥
 मुनितिय तारि खयंबर पेखन आए सुनि बचन तिहारे ।
 एउ देखि हैं पिनाकु नेकु जेहि नृपति लाज-ज्वर जारे ॥ ४ ॥
 सुनि सानंद सराहि सपरिजन बारहि बार निहारे ।
 पूजि सप्रेम प्रसंसि कौसिकहि भूपति सदन सिधारे ॥ ५ ॥
 सोचत सत्य-सनेह-बिबस निसि नृपहिं गनत गए तारे ।
 पठए बोलि भोर गुरु के सँग रंगभूमि पगु धारे ॥ ६ ॥
 नगर लोग सुधि पाइ मुदित सबही सब काज बिसारे ।
 मनहुँ मघा-जल उमगि उदधि-रुख चले नदी नद नारे ॥ ७ ॥
 ए किसोर, धनु घोर बहुत, बिलखात बिलोकनिहारे ।
 टरयो न चाप तिन्हते जिन्ह सुभटनि कौतुक कुधर उखारे ॥ ८ ॥
 ए जाने बिनु जनक जानियत करि पन भूप हँकारे ।
 नतरु सुधासागर परिहरि कत कूप खनावत खारे ॥ ९ ॥
 सुखमा सील सनेह सानि मनो रूप बिरंचि सँवारे ।
 रोम रोम पर सोम काम सत कोटि बारि फेरि डारे ॥ १० ॥
 कोउ कहै तेज प्रताप पुंज चितए नहिं जात, भिया रे !
 छुअत सरासन-सलभ जरैगो ये दिनकर-बंस-दिया रे ॥ ११ ॥

एक कहै कछु होउ सुफल भए जीवन जनम हमारे ।
अबलोके भरि नयन आजु तुलसी के प्रानपियारे ॥ १२ ॥ ६६ ॥

जनक बिलोकि बार बार रघुबर को ।

मुनिपद सीस नाथ आयसु असीस पाई,
एई बातैं कहत गवन कियो घर को ॥ १ ॥
नौद न परति राति, प्रेम पन एक भाँति,
सोचत सकोचत बिरंचि हरि हर को ।
तुरुहते सुगम सब देव देखिबे को अब.
जस हंस किए जोगवत जुग पर को ॥ २ ॥
ल्याये संग कौसिक, सुनाए कहि गुनगन,
आए देखि दिनकर-कुल-दिनकर को ।
तुलसी तेऊ सनेह को सुभाउ बाउ मानो
चलदल को सो पात करै चित चर को ॥ ३ ॥ ६७ ॥

राग केदारा

रंग-भूमि भोरेही जाइकै ।

राम लषन लखि लोग लूटिहैं लोचन-लाभ अघाइकै ॥ १ ॥
भूप-भवन घर घर, पुर बाहर इहै चरचा रही छाइकै ।
मगन मनोरथ मोद नारि नर प्रेम-बिबस उठैं गाइकै ॥ २ ॥
सोचत बिधि-गति समुझि परसपर कहत बचन बिलखाइकै ।
कुँवर किसोर कठोर सरासन, असमंजस भयो आइकै ॥ ३ ॥
सुकृत संभारि मनाइ पितर सुर सीस ईसपद नाइकै ।
रघुबर-कर धनु-भंग चहत सब अपनो सो हितु चितु लाइकै ॥ ४ ॥
लेत फिरत कनसुई सगुन, सुभ बूझत गनक बोलाइकै ।
सुनि अनुकूल मुदित मन मानहुँ धरत धीरजहि धाइकै ॥ ५ ॥
कौसिक-कथा एक एकनि सों कहत प्रभाउ जनाइकै ।

सीय-राम-संजोग जानियत रच्यो बिरंचि बनाइकै ॥ ६ ॥
 एक सराहि सुबाहु-मथन बर बाहु उछाह बढ़ाइकै ।
 सानुज राज-समाज बिराजिहैं राम पिनाक चढ़ाइकै ॥ ७ ॥
 बड़ी सभा, बड़ो लाहु, बड़ो जस, बड़ी बढ़ाई पाइकै ।
 को सोहिहै और को लायक रघुनायकहि बिहायकै ? ॥ ८ ॥
 गवनिहैं गँवहिँ गवाँइ गरब गृह नृपकुल बलहि लजाइकै ।
 भली भाँति साहब तुलसी के चलिहैं व्याहि वजाइकै ॥ ८ ॥ ६८ ॥

राग टोड़ी

भोर फूल बीनवे को गए फुलवाई हैं ।
 सीसनि टिपारे, उपवीत, पीत पट कटि,
 देना बाम करनि सलोने मे सवाई हैं ॥ १ ॥
 रूप के अगार भूप के कुमार सुकुमार,
 गुरु के प्रानअधार संग सेवकाई हैं ।
 नीच ज्यों टहल करै, राखै रुख अनुसरै,
 कौसिक से कोही बस किये दुहुँ भाई हैं ॥ २ ॥
 सखिन सहित तेहि औसर बिधि के संजोग
 गिरिजा जू पूजिबे को जानकी जू आई हैं ।
 निरखि लषन राम जाने ऋतुपति काम,
 मोहि मानो मदन मोहनी मूढ़ नाई हैं ॥ ३ ॥
 राघौजू-श्रीजानकी-लोचन मिलिबे को मोद
 कहिबे को जोगु न, मैं बातै सी बनाई हैं ।
 स्वामी सीय सखिन्ह लखन तुलसी को तैसो
 तैसो मन भयो जाकी जैसिये सगाई हैं ॥ ४ ॥ ६९ ॥

६८—कनसुई बेना— गोबर की गौर चल्नी में रखकर त्रिशू पृथ्वी पर फेरती हैं । यदि वह गौर सीधी गिरती है तो सगुन और उल्टी या आड़ी गिरती है तो अपसगुन मानती हैं ।

पूजि पारवती भले भाय पाँय परिकै ।

सजल सुलोचन सिथिल तनु पुलकित,

आवै न बचन मनु रह्यो प्रेम भरिकै ॥ १ ॥

अंतरजामिनि भवभामिनि स्वामिनि सों हों,

कही चाहैं बात, मातु, अंत तौ हों लरिकै ।

मूरति कृपालु मंजु माल दै बोलत भई,

पूजे अन कामना भावतो बरु बरिकै ॥ २ ॥

राम कामतरु पाइ बेलि ज्यों वौंड़ी बनाइ

माँग कोषि तोषि पोषि फैलि फूलि फरिकै ।

रहैगी कहैगी तब साँची कही अंबा सिय

गहे पाँय द्वै उठाय माथे हाथ धरिकै ॥ ३ ॥

मुदित असीस सुनि सीस नाइ पुनि पुनि

विदा भई देवी सों जननि डर डरिकै ।

हरषों सहेली, भयो भावतो, गावतों गीत,

गवनी भवन तुलसीस हियो हरिकै ॥ ४ ॥ ७० ॥

रंगभूमि आए दसरथ के किसोर हैं ।

पेखनो सो पेखन चले हैं पुर-नर-नारि,

बारे बूढ़े अंध पंगु करत निहोर हैं ॥ १ ॥

नील-पीत-नीरज-कनक-मरकत-धन-

दामिनि-वरन तनु रूप के निचोर हैं ।

सहज सलोने राम लषन ललित नाम

जैसे सुने तैसेई कुँवर सिरमौर हैं ॥ २ ॥

चरन-सरोज, चारु जंघा जानु ऊरु कटि,

कंधर बिसाल, बाहु बड़े बरजोर हैं ।

नीके कै निषंग कसे, कर कमलनि लसै

बान बिसिषासन मनोहर कठोर हैं ॥ ३ ॥

काननि कनकफूल, उपवीत अनुकूल,
 पियरे दुकूल बिलसत आछे छोर हैं ।
 राजिव-नयन बिधुबदन टिपारे सिर,
 नख सिख अंगनि ठगौरी ठौर ठौर हैं ॥ ४ ॥
 सभा-सरवर, लोक-कोकनद-कोकगन
 प्रमुदित मन देखि दिनमनि भोर हैं ।
 अबुध असैले मन-मैले महिपाल भए,
 कलुक ललुक कलु कुमुद चकोर हैं ॥ ५ ॥
 भाई सों कहत बात कौसिकहि सकुचात,
 बोल घन घोर से बोलत थोर थोर हैं ।
 सनमुख सबहि बिलोकत सबहि नीके,
 कृपा सों हेरत हँसि तुलसी की ओर हैं ॥ ६ ॥ ७१ ॥
 एई राम लषन जे मुनि सँग आए हैं ।
 चैतनी चालना काछे, सखि ! सोहैं आगे पाछे,
 आछे हुते आछे आछे आछे भाय भाए हैं ॥ १ ॥
 साँवरे गोरे सरीर, महाबाहु, महाबीर,
 कटि तून तीर धरे, धनुष सुहाए हैं ।
 देखत कोमल कल, अतुल बिपुल बल,
 कौसिक कोदंड-कला कलित सिखाए हैं ॥ २ ॥
 इन्हहीं ताड़का मारी, गौतम की तिय तारी,
 भारी भारी भूरि भट रन बिचलाए हैं ।
 ऋषि-मख रखवारे दसरथ के दुलारे,
 रंगभूमि पगुधारे, जनक बुलाए हैं ॥ ३ ॥
 इन्हकै बिमल गुन गनत पुलकि तनु
 सतानंद कौसिक नरेसहि सुनाए हैं ।

प्रभुपद मन दिए सो समाज चित्त किए
हुलसि हुलसि हिये तुलसिहुँ गाए हैं ॥ ४ ॥ ७२ ॥

राग कान्हरा

सीय स्वयंवर, माई, दोउ भाई आए देखन ।
सुनत चलों प्रमदा प्रमुदित मन,
प्रेम पुलकि तनु मनहुँ मदन मंजुल पेखन ॥
निरखि मनोहरताई सुख पाई कहैं एक एक सों,
'भूरि भाग हम धन्य, आलि ! ए दिन, ए खन ।'
तुलसी सहज सनेह सुरँग सब,
सो समाज चित-चित्रसार लागी लेखन ॥ ७३ ॥

राग गौरी

राम लषन जब दृष्टि परे, री !

अबलोकत सब लोग जनकपुर मानो विधि विविध विदेह करे, री ॥१॥
वनुषज्ज कमनीय अवनितल कौतुकही अए आय खरे, री ।
छवि सुरसभा मनहुँ मनसिज के कलित कलपतरु रुख फरे, री ॥२॥
सकल काम बरषत मुख निरखत, करषत चित हित हरष भरे, री ।
तुलसी सबै सराहत भूपहि भले पैतें पासे सुढर ढरे, री ॥३॥७४॥

नेकु ! सुमुखि, चित लाइ चितौ, री ।

राजकुँवर-मूरति रचिबे को रुचि सुब्ररंचि सम कियो है कितौ, री ॥१॥
नख सिख सुंदरता अबलोकत कह्यो न परत सुख होत जितौ, री ।
साँवर-रूप-सुधा भरिबे कहँ नयन-कमल-कल-कलस रितौ, री ॥२॥
मेरे जान इन्हैं बोलिबे कारन चतुर जनक ठयो ठाट इतौ, री ।
तुलसी प्रभु भंजिहैं संभु-धनु भूरि भाग सिय मातु पितौ, री ॥३॥७५॥

राग सारंग

जबते राम लषन चितए, री ।

रहे इकटक नर-नारि जनकपुर, लागत पलक कलप बितए, री ॥ १ ॥

प्रेम-बिबस माँगत महेस सों देखत ही रहिए नित ए, री ।
 कै ए सदा बसहु इन्ह नयनन्हि, कै ए नयन जाहु जित ए, री ॥२॥
 कोउ समुझाइ कहै किन भूपहि बड़े भाग आए इत ए, री ।
 कुलिस कठोर कहाँ संकर-धनु, मृदु मूरति किसोर कित ए, री ॥३॥
 बिरचत इन्हहिं बिरंचि भुवन सब सुंदरता खोजत रितए, री ॥
 तुलसिदास ते धन्य जनमजन मन क्रम बच जिन्हके हित ए, री ॥४॥७६॥

सुनु सखि भूपति भलोइ कियो, री ।

जेहि प्रसाद अवधेस-कुँवर दोउ नगर-लोग अवलोकि जियो, री ॥१॥
 मानि प्रतीति कत मेरे तैं कब सँदेह-बस करति हियो, री ।
 तौलौं है यह संभु सरासन श्रीरघुबर जौलौं न लियो, री ॥ २ ॥
 जेहि बिरंचि रचि सीय सँवारी औ रामहिं ऐसो रूप दियो, री ।
 तुलसिदास तेहि चतुर बिधाता निज कर यह संजोग सियो, री ॥३॥७७॥

अनुकूल नृपहि सुलपानि हैं ।

नीलकंठ कारुन्यसिंधु हर दीनबंधु दिनदानि हैं ॥ १ ॥
 जो पहिलेही पिनाक जनक कहँ गए सौंपि जिय जानि हैं ।
 बहुरि त्रिलोचन लोचन के फल सबहि सुलभ किए आनि हैं ॥२॥
 सुनियत भव-भावते राम हैं, सिय भावती-भवानि हैं ।
 परखत प्रीति प्रतीति पयज पनु रहे काज ठटु ठानि हैं ॥ ३ ॥
 भए बिलोकि बिदेह नेहबस बालक बिनु पहिचानि हैं ।
 होत हरे होने बिरवनि दल सुमति कहति अनुमानि हैं ॥ ४ ॥
 देखियत भूप भोर के से उडुगन, गरत गरीब गलानि हैं ।
 तेज प्रताप बढ़त कुँवरन को जदपि सँकोची बानि हैं ॥ ५ ॥
 बय किसोर बरजोर बाहुबल मेरु मेलि गुन तानिहैं ।
 अबसि राम राजीव-बिलोचन संभु सरासन भानिहैं ॥ ६ ॥

देखिहैं व्याह-उछाह नारि-नर सकल-सुमंगल-खानि हैं ।
मूरि भाग तुलसी तेऊ जे सुनिहैं, गाइहैं, बखानिहैं ॥ ७ ॥ ७८ ॥

राग केदारा

रामहिं नीके कै निरखि, सुनैनी !

मनसहु अगम समुझि यह अवसर कत सकुचति पिकवैनी ॥ १ ॥

बड़े भाग मख-भूमि प्रगट भइ सीय सुमंगल-ऐनी ।

जा कारन लोचन-गोचर भइ मूरति सब-सुखदैनी ॥ २ ॥

कुलगुरु-तिथ को मधुर वचन सुनि जनक-जुवति मति-पैनी ।

तुलसी सिथिल देह सुधि बुधि करि सहज-सनेह-बिषैनी ॥ ३ ॥ ७९ ॥

मिलो बर सुंदर सुंदरि सीतहि लायकु,

साँवरो सुभग, सोभा हूँ को परम सिंगारु ।

मनहूँ को मन मोहै, उपमा को को है ?

सोहै सुखमासागर-संग अनुज राजकुमारु ॥ १ ॥

ललित सकल अंग, तनु धरे कै अनंग,

नैननि को फल कैधौं, सिय को सुकृत-सारु ।

सरद-सुधा-सदन-छबिहि निंदै बदन,

अरुन आयत नवनलिन-लोचन चारु ॥ २ ॥

जनक-मन की रीति जानि विरहित प्रीति,

ऐसीऔ मूरति देखे रख्यो पहिलो बिचारु ।

तुलसी नृपहि ऐसेो कहि न बुझावै कोउ,

‘पन औ कुँवर दोऊ प्रेम की तुला धौं तारु’ ॥ ३ ॥ ८० ॥

देखि देखि री ! दोउ राजसुवन ।

गौर स्याम सल्लोने लोने, लोने लोयननि,

जिन्हकी सोभा तँ सोहै सकल भुवन ॥ १ ॥

इन्हहीं ताड़का मारी, मग मुनि-तिय तारी,

अभिमुख राख्यो, रन दले हैं दुवन ।

तुलसी प्रभु को अब जनकनगर-नभ

सुजस-विमल-बिधु चहत उवन ॥ २ ॥ ८१ ॥

राग टोड़ी

राजा रंगभूमि आज बैठे जाइ जाइकै ।

आपने आपने थल, आपने आपने साज,

आपनी आपनी बर बानिक बनाइ कै ॥ १ ॥

कौसिक सहित राम, लषन ललित नाम,

लरिका ललाम लोने पठए बुलाइकै ।

दरसलालसा-बस लोग चले भाय भले

विकसत-मुख निकसत धाइ धाइ कै ॥ २ ॥

सानुज सानंद हिये आगे हैं जनक लिए,

रचना रुचिर सब सादर देखाइ कै ।

दिये दिव्य आसन सुपास सावकास अति,

आछे आछे बीछे बीछे बिछौना बिछाइ कै ॥ ३ ॥

भूपति-किसोर दुहुँ ओर, बीच मुनिराउ,

देखिबे को दाँउ, देखौ देखिबो बिहाइ कै ।

उदय-सैल सोहैं सुंदर कुँवर, जोहैं,

मानौ भानु भोर भूरि किरनि छिपाइ कै ॥ ४ ॥

कौतुक कोलाहल निसान गान पुर नभ,

बरषत सुमन बिमान रहे छाइ कै ।

हित अनहित, रत बिरत बिलोकि बाल,

प्रेम-मोद-मगन जनम-फल पाइ कै ॥ ५ ॥

राजा की रजाइ पाइ सचिव सहेली धाइ,

सतानंद ल्याए सिय सिविका चढ़ाइ कै ।

रूप-दीपिका निहारि मृग-मृगी नर-नारि,

बिथके बिलोचन निमेषै बिसराइ कै ॥ ६ ॥

हानि लाहु अनख उछाहु, बाहुबल कहि
बंदि बोले बिरद अकस उपजाइ कै ।

दीप दीप के महीप आए सुनि पैज पन,
कीजै पुरुषारथ को अवसर भो आइ कै ॥ ७ ॥

आनाकानी, कंठ, हँसी मुँहा-चाही होन लगी,
देखि दसा कहत बिदेह बिलखाइ कै ।

घरनि सिधारिए सुधारिए आगिलो काज,
पूजि पूजि धनु कीजै बिजय बजाइ कै ॥ ८ ॥

जनक-वचन छुए बिरवा लजारु को से
बीर रहे सकल सकुचि सिर नाइ कै ।

तुलसी लखन भाषे, रोषे, राखे रामरुख,
भाषे मृदु परुष सुभायन रिसाइ कै ॥ ९ ॥ ८२ ॥

भूपति बिदेह कही नीकियै जो भई है ।

बड़े ही समाज आजु राजनि की लाज-पति
हाँकि आँक एक ही पिनाक छीनि लई है ॥ १ ॥

मेरो अनुचित न कहत लरिकाई-बस,
पन-परमिति और भाँति सुनि गई है ।

नतरु प्रभु प्रताप उतरु चढ़ाय चाप
देतो पै देखाइ बल, फल पापमई है ॥ २ ॥

भूमि के हरैया उखरैया भूमि-घरनि के,
बिधि बिरचे प्रभाउ जाको जग-जई है ।

बिहँसि हिये हरषि हटके लषन राम,
सोहत सकोच सील नेह नारि नई है ॥ ३ ॥

सहमी संभा सकल, जनक भए बिकल,
राम लखि कौसिक असीस आज्ञा दर्ई है ।

तुलसी सुभाय गुरुपाँय लागि रघुराज
 ऋषिराज की रजाइ माथे मानि लई है ॥ ४ ॥ ८३ ॥

सोचत जनक पोच पेच परि गई है ।

जोरि कर-कमल निहोरि कहैं कौसिक सों,
 'आयसु भो राम को सो मेरे दुचितई है ॥ १ ॥

बान जातुधानपति भूप दीप सातहूँ के,
 लोकप बिलोकत पिनाक भूमि लई है ।

जोतिर्लिंग कथा सुनि जाको अंत पाए बिनु
 आए बिधि हरि हारि सोई हाल भई है ॥ २ ॥

आपुही बिचारिए निहारिए सभा की गति,
 बेद-मरजाद मानौ हेतुवाद हई है ।

इन्हके जितौहैं मन, सोभा अधिकानी तन,
 मुखन की सुखमा सुखद सरसई है ॥ ३ ॥

रावरो भरोसो बल, कै है कोऊ कियो छल,
 कैधों कुल को प्रभाव, कैधों लरिकई है ? ।

कन्या, कल-कीरति, बिजय बिस्व की बटोरि
 कैधों करतार इन्हहीं को निरमई है ॥ ४ ॥

पन को न मोह, न बिसेष चिंता सीता हू की,
 लुनिहै पै सोई सोई जोई जेहि बई है ।

रहै रघुनाथ की निकाई नीकी नीके नाथ,

८३—नारि नई है = नार या गरदन नीची हुई है ।

८४—जोतिर्लिंग = शैव पुराणों में कथा है कि जब शिव का-ज्योतिर्लिंग
 प्रकट हुआ तब ब्रह्मा और विष्णु उस पर घूमते ही रह गए किसी को उसका
 अंत न मिला । हेतुवाद = तर्क शास्त्र ।

हाथ सों तिहारे करतूति जाकी नई है' ॥ ५ ॥
 कहि 'साधु साधु' गाधि-सुवन सराहे राउ,
 'महाराज ! जानि जिय ठीक भली दई है' ।
 हरपे लषन, हरषाने बिलषाने लोग,
 तुलसी मुदित जाको राजाराम जई है ॥ ६ ॥ ८४ ॥

सुजन सराहैं जो जनक बात कही है ।

महि सोहानी जानि, मुनिमन-मांनी सुनि
 नीच महिपावली दहन बिनु दही है ॥ १ ॥
 कहैं गाधिनंदन मुदित रघुनंदन सों,
 नृपगति अगह, गिरा न जाति गही है ।
 देखे सुने भूपति अनेक भूँठे भूँठे नाम,
 साँचे तिरहुतिनाथ साखि देति मही है ॥ २ ॥
 रागऊ बिराग, भोग जोग जोगवत मन,
 जोगी जागबलिक-प्रसाद सिद्धि लही है ।
 ताते न तरनि तेँ, न सीरे सुधाकरहू तेँ,
 सहज समाधि निरुपाधि निरबही है ॥ ३ ॥
 ऐसेउ अगाध बोध रावरे सनेह-बस
 बिकल बिलोकित दुचितई सही है ।
 कामधेनु-कृपा हुलसानी तुलसीस उर,
 पन-सिसु हेरि, मरजाद बाँधी रही है ॥ ४ ॥ ८५ ॥

ऋषिराज राजा आजु जनक समान को ? ।

आपु यहि भाँति प्रीति सहित सराहित,
 रागी औ बिरागी बड़भागी ऐसो आन को ? ॥ १ ॥
 भूमि भोग करत अनुभवत जोग-सुख,
 मुनि-मन-अगम अलख गति जान को ?
 गुरु हर-पद-नेहु गेह बसि भो बिदेह,

अगुन-सगुन-प्रभु-भजन-सयान को ? ॥ २ ॥

कहनि रहनि एक, बिरति विवेक नीति,

बेद-बुध-संमत पथी न निरवान को ? ।

गाँठि बिनु गुन की कठिन जड़ चेतन की,

छोरी अनायास, साधु सोधक अपान को ॥ ३ ॥

सुनि रघुवीर की बचन-रचना की रीति

भयो मिथिलेस मांनो दीपक बिहान को ।

मिथ्यो महा मोह जी को, छूट्यो पोच सोच सी को,

जान्यो अवतार भयो पुरुष-पुरान को ॥ ४ ॥

सभा नृप गुरु, नर-नारि पुर, नभ सुर,

सब चितवत मुख करुनानिधान को ।

एकै एक कहत प्रगट एक प्रेम-बस,

तुलसीस तोरिए सरासन इसान को ॥ ५ ॥ ८६ ॥

राग मारु ।

सुनो मैया भूप सकल दै कान ।

बजरेख गजदसन जनक-पन बेद-बिदित, जग जान ॥ १ ॥

घोर कठोर पुरारि-सरासन नाम प्रसिद्ध पिनाकु ।

जो दसकंठ दियो बाँवों, जेहि हर-गिरि कियो है मनाकु ॥ २ ॥

भूमि-भाल आजत न चलत सो ज्यों बिरंचि को आँकु ।

धनु तोरै सोई बरै जानकी राउ होइ की राँकु ॥ ३ ॥

सुनि आमरषि उठे अवनीपति, लगे बचन जनु तीर ।

टरै न चाप, करै अपनी सी महा महा बलधीर ॥ ४ ॥

नमित-सीस सोचहिं सलज्ज सब श्रीहत भए सरीर ।

बोले जनक बिलोकि सीथ तन दुखित सरोष अधीर ॥ ५ ॥

सप्त दीप नव खंड भूमि के भूपति बृंद जुरे ।

बड़ो लाभ कन्या कीरति को जहँ तहँ महिप सुरे ॥ ६ ॥

डग्यौ न धनु, जनु बीर-बिगत महि, किधौं कहूँ सुभट दुरे ।
 रोषे लषन बिकट भृकुटी करि, भुज अरु अधर फुरे ॥ ७ ॥
 सुनहु भानुकुल-कमल-भानु ! जो अब अनुसासन पावौँ ।
 का बापुरो पिनाकु मेलि गुन मंदर मेरु नवावौँ ॥ ८ ॥
 देखौ निज किंकर को कौतुक क्यों कोदंड चढ़ावौँ ।
 लै धावौँ, भंजौँ मृनाल ज्यों तौ प्रभु अनुग कहावौँ ॥ ९ ॥
 हरषे पुर-नर-नारि सचिव नृप कुँवर कहे बर बैन ।
 मृदु मुसकाइ राम बरज्यौ प्रिय बंधु नयन की सैन ॥ १० ॥
 कौसिक कह्यौ उठहु रघुनंदन जगबंदन बलपन ।
 तुलसिदास प्रभु चले मृगपति ज्यों निज भगतनि सुखदैँ ॥ ११ ॥ ८७ ॥

जबहि सब नृपति निरास भए ।

गुरुपद-कमल बंदि रघुपति तब चाप-समीप गए ॥ १ ॥
 स्याम-तामरस-दाम-बरन बपु-उर भुज नयन बिसाल ।
 पीत बसन कटि कलित कंठ सुंदर सिंधुर-मनि-माल ॥ २ ॥
 कल कुंडल, पद्मव प्रसून सिर चारु चौतनी लाल ।
 कोटि-मदन-छवि-संदन बदन-विधु, तिलक मनोहर भाल ॥ ३ ॥
 रूप अनूप बिलोकत सादर पुरजन राजसमाज ।
 लषन कह्यो थिर होहु धरनिधरु धरनि, धरनिधर आज ॥ ४ ॥
 कमठ कोल दिग-दंति सकल अंग सजग करहु प्रभु-काज ।
 चहत चपरि सिव-चाप चढ़ावन दसरथ को जुवराज ॥ ५ ॥
 गहि करतल, मुनि पुलक सहित, कौतुकहि उठाइ लियो ।
 नृपगन-मुखनि समेत नमित करि सजि सुख सबहि दियो ॥ ६ ॥
 आकरण्यो सिय-मन समेत हरि, हरण्यो जनक-हियो ।
 भंज्यौ भृगुपति-गर्व सहित, तिहुँ लोक बिमोह कियो ॥ ७ ॥
 भयो कठिन कोदंड-कोलाहल प्रलय-पयोद समान ।
 चौंके सिव, बिरंचि, दिसिनायक रहे मूँदि कर कान ॥ ८ ॥

सावधान हूँ चढ़े विमाननि चले बजाइ निसान ।
 उमगि चलयौ आनंद नगर, नभ जयधुनि मंगलगान ॥ ८ ॥
 विप्र-बचन सुनि सखी सुआसिनि चलीं जानकिहि ल्याइ ।
 कुँवर निरखि जयमाल मेलि उर कुँवरि रंही सकुचाइ ॥ १० ॥
 बरषहिं सुमन असीसहिं सुर मुनि, प्रेम न हृदय समाइ ।
 सीय राम की सुंदरता पर तुलसिदास बलि जाइ ॥ ११ ॥ ८८ ॥

राग मलार

जब दोउ दसरथ कुँवर बिलोके ।
 जनक-नगर नर-नारि मुदित मन निरखि नयन पल रोके ॥ १ ॥
 बय किसोर घन-तड़ित-बरन तनु नखसिख अंग लोभारे ।
 दै चित, कै हित, लै सब छवि-वित बिधि निज हाथ सँवारे ॥ २ ॥
 संकट नृपहि, सोच अति सीतहि, भूप सकुचि सिर नाए ।
 उठे राम रघुकुल-कल-केहरि गुरु अनुसासन पाए ॥ ३ ॥
 कौतुक ही कोदंड खंडि प्रभु, जय अरु जानकि पाई ।
 तुलसिदास कीरति रघुपति की मुनिन्ह तिहूँ पुर गाई ॥ ४ ॥ ८९ ॥

राग टोड़ी

मुनि-पदरेनु रघुनाथ माथे धरी है ।
 रामरुख निरखि, लषन की रजाइ पाइ,
 धरा धरा-धरनि सुसावधान करी है ॥ १ ॥
 सुमिरि गनेस गुरु गौरि हर भूमिसुर
 सोचत सकोचत सकोची बानि धरी है ।
 दीनबंधु, कृपासिंधु, साहसिक, सीलसिंधु,
 सभा को सकोच, कुलहू की लाज परी है ॥ २ ॥
 पेषि पुरुषारथ परखि पन, पेम नेम,
 सिय-हिय की बिसेषि बड़ी खरभरी है ।

दाहिने दियो पिनाकु, सहमि भयो मनाकु,
महाव्याल विकल बिलोकि जनु जरी है ॥ ३ ॥
सुर हरषत बरषत फूल बार बार,
सिद्धि मुनि कहत सगुन सुभ घरी है ।
रामबाहु-बिटप बिसाल बैांडी देखियत,
जनक-मनोरथ कलपबेलि फरी है ॥ ४ ॥
लख्यौ न चढ़ावत, न तानत, न तोरत हू,
घोर धुनि सुनि सिव की समाधि टरी है ।
प्रभु के चरित चारु तुलसी सुनत सुख,
एक ही सुलाभ सबही की हानि हरी है ॥ ५ ॥ ६० ॥

राग सारंग

राम कामरिपु-चाप चढ़ायो ।

मुनिहिं पुलक, आनंद नगर, नभ निरखि निसान बजायो ॥ १ ॥
जेहि पिनाक बिनु नाक किए नृप, सबहि बिषाद बढ़ायो ।
सोइ प्रभु कर परसत दृष्ट्यौ जनु हुतो पुरारि पढ़ायो ॥ २ ॥
पहिराई जयमाल जानकी जुवतिन्ह मंगल गायो ।
तुलसी सुमन बरषि हरषे सुर, सुजस तिहूँ पुर छायो ॥ ३ ॥ ६१ ॥

राम टोड़ी

जनक मुदित मन दूटत पिनाक के ।

बाजे हैं बधावने सुहावने मंगल-गान,
भयो सुख एकरस रानी राजा राँक के ॥ १ ॥
दुंदुभी बजाइ, गाइ हरषि, बरषि फूल,
सुरगन नाचै नाच नायकहू नाक के ।
तुलसी महीस देखे दिन रजनीस जैसे,
सूने परे सूत से मनो मिटाए आँक के ॥ २ ॥ ६२ ॥

लाज तोरि, साजि साज राजा राढ़ रोषे हैं ।
 कहा भौ चढ़ाए चाप, व्याह है बड़े खाए,
 बोलैं खेलैं सेल असि चमकत चोखे हैं ॥ १ ॥
 जानि पुरजन त्रसे, धीर दै लषन हँसे,
 बल इनको पिनाक नीके नापे जोखे हैं ।
 कुलहि लजावैं बाल, बालिस बजावैं गाल,
 कैधौ कूर कालवस तमकि त्रिदोषे हैं ॥ २ ॥
 कुँवर चढाई भौहैं, अब को बिलोकै सोहैं,
 जहँ तहँ भे अचेत, खेत के से धोखे हैं ।
 देखे नर-नारि कहैं, साग खाइ जाए माइ,
 बाहु पीन पाँवरनि पीना खाइ पोखे हैं ॥ ३ ॥
 प्रसुदित-मन लोक-कोकनद-कोकगन,
 राम के प्रताप-रवि सोच-सर सोखे हैं ।
 तब के देखैया तोषे, तब के लोगनि भले,
 अब के सुनैया साधु तुलसिहुँ तोषे हैं ॥ ४ ॥ ६३ ॥

जयमाल जानकी जलजकर लई है ।
 सुमन सुमंगल सगुन की बनाइ मंजु,
 मानहुँ मदनमाली आपु निरमई है ॥ १ ॥
 राज-रुख लखि गुरु भूसुर सुआसिनिन्हि
 समय समाज की ठवनि भली ठई है ।
 चलीं गान करत, निसान बाजे गहगहे,
 लहलहे लोयन सनेह सरसई है ॥ २ ॥
 हनि देव दुंदुभी हरषि बरषत फूल,

६३—बड़े खाए = (मुहा०) बड़ी कठिनाता से । धोखे = खेत में पशु पक्षियों को डराने के लिए खड़ा किया हुआ चीथड़ों का पुतला । पीना = तिल की खली अर्थात् निःसार भोजन ।

सफल मनोरथ भो, सुख सुचितई है ।
 पुरजन परिजन रानी राउ प्रमुदित,
 मनसो अनूप राम-रूप-रंग रई है ॥ ३ ॥
 सतानंद सिष सुनि पाँय परि पहिराई
 माल सिय पिय-हिय, सोहत सो भई है ।
 मानस ते' निकसि बिसाल सु तमाल पर
 मानहुँ मरालपाँति वैठी बनि गई है ॥ ४ ॥
 हितनि के लाह की, उछाह की, बिनोद मोद
 सोभा की अवधि नहिं, अब अधिकई है ।
 याते बिपरीत अनहितन की जानि लीबी,
 गति, कहे प्रगट खुनिस खासी खई है ॥ ५ ॥
 निज निज बेद की सप्रेम जोग-छेम-मई,
 मुदित असीस बिप्र बिदुषनि दर्ई है ।
 छबि तेहि काल की कृपालु सीतादूलह की
 झुलसति हिण तुलसी के नित नई है ॥ ६ ॥ ८४ ॥

राग केदारा

लेहु री लोचननि को लाहु ।

कुँवर सुंदर साँवरो, सखि सुमुखि ! सांदर चाहु ॥ १ ॥
 खंडि हर-कोदंड ठाढ़े, जानु-लंबित बाहु ।
 रुचिर उर जयमाल राजति, देत सुख सब काहु ॥ २ ॥
 चितै चित हित-सहित नखसिख अंग-अंग-निबाहु ।
 सुकृत निज, सियरामरूप, बिरंचि-मतिहि संराहु ॥ ३ ॥
 मुदित मन बरबदन-सोभा उदित अधिक उछाहु ।
 मनहुँ दूरि कलंक करि ससि समर सूयो राहु ॥ ४ ॥

१४—खई = झगड़ा लड़ाई ।

१५—सूयो = सूदन किया, नाश किया ।

नयन सुखमा-अयन हरत सरोज-सुंदरताहु ।

बसत तुलसीदास-उरपुर जानकी को नाहु ॥ ५ ॥ ८५ ॥

राग सारंग

भूष के भाग की अधिकाई ।

दृष्ट्यो धनुष, मनोरथ पृज्यौ, बिधि सब बात बनाई ॥ १ ॥

तब तेँ दिन दिन उदय जनक को जब तेँ जानकी जाई ।

अब यहि ब्याह सफल भयो जीवन, त्रिभुवन बिदित बड़ाई ॥ २ ॥

बारहि बार पहुनई ऐहैं राम लषन दोउ भाई ।

एहि आनंद मगन पुरबासिन्ह देहदसा बिसराई ॥ ३ ॥

सादर सकल बिलोकत रामहिं काम-कोटि-छवि छाई ।

यह सुखसमउ समाज एक मुख क्यों तुलसी कहै गाई ? ॥ ४ ॥ ८६ ॥

राग सोरठ

मेरे बालक कैसे धौं मग निबहहिंगे ?

भूख, पियास, सीत, स्रम सकुचनि क्यों कौसिकहि कहहिंगे ? ॥ १ ॥

को भोर ही उबटि अन्हवैहै, काढ़ि कलेऊ दैहै ?

को भूषन पहिराइ निछावरि करि लोचन-सुख लैहै ? ॥ २ ॥

नयन निमेषनि ज्यो जोगवै नित पितु परिजन महतारी ।

ते पठए ऋषि साथ निसाचर मारन, मख रखवारी ॥ ३ ॥

सुंदर सुठि सुकुमार सुकोमल काकपच्छ-धर दोऊ ।

तुलसी निरखि हरषि उरलैहौं बिधि हैहै दिन सोऊ ? ॥ ४ ॥ ८७ ॥

ऋषि नृप-सीस ठगौरी सी डारी ।

कुलगुरु, सचिव, निपुन नेवनि अवरेब न समुझि सुधारी ॥ १ ॥

सिरिस-सुमन-सुकुमार कुँवर दोउ, सूर सरोष सुरारी ।

पठए बिनहिं सहाय पयादेहि केलि-बान-धनुधारी ॥ २ ॥

अति सनेह कातरि माता कहै, सुनि सखि ! बचन दुखारी ।

बादि वीर-जननी-जीवन जग, छत्रि-जाति-गति भारी ॥ ३ ॥

जो कहिहै फिरे राम लषन घर करि मुनिमख-रखवारी ।
सो तुलसी प्रिय मोहिँ लागिहै ज्यों सुभाय सुत चारी ॥ ४ ॥ ८८ ॥

जब तैं लै मुनि संग सिधाए ।

राम लखन के समाचार, सखि ! तब तैं कछुअ न पाए ॥ १ ॥
बिनु पानही गमन, फल भोजन, भूमि सयन तरछाहीं ।
सर सरिता जलपान, सिसुन के संग सुसेवक नार्हीं ॥ २ ॥
कौसिक परम कृपालु परमहित, समरथ, सुखद, सुचाली ।
बालक सुठि सुकुमार सकोची, समुझि सोच मोहिँ, आली ! ॥ ३ ॥
बचन सप्रेम सुमित्रा के सुनि सब सनेह-बस रानी ।
तुलसी आइ भरत तेहि औसर कही सुमंगल-बानी ॥ ४ ॥ ८९ ॥

सानुज भरत भवन उठि धाए ।

पितु-समीप सब समाचार सुनि मुदित मातु पहुँ आए ॥ १ ॥
सजल नयन, तनु पुलक, अधर फरकत लखि प्रीति सुहाई ।
कौसल्या लिए लाइ हृदय 'बलि' कहौ कछु है सुधि पाई ? ॥ २ ॥
सतानंद उपरोहित अपने तिरहुति-नाथ पठाए ।
खेम कुसल रघुवीर-लषन की ललित पत्रिका ल्याए ॥ ३ ॥
दलि ताडुका, मारि निसिचर, मख राखि, विप्र-तिय तारी ।
दै विद्या, लै गए जनकपुर, हैं गुरु संग सुखारी ॥ ४ ॥
करि पिनाक-पन, सुता-स्वयंबर सजि, नृप-कटक बटोरयो ।
राजसभा रघुबर मृनाल ज्यों संभु-सरासन तोरयो ॥ ५ ॥
यों कहि सिथिल सनेह बंधु दोउ अंग अंक भरि लीन्हें ।
बार बार मुख चूमि, चारु मनि बसन निछावरि कीन्हें ॥ ६ ॥
सुनत सुहावनि चाह अवध घर घर आनंद बधाई ।
तुलसिदास रनिवास रहस-बस, सखी सुमंगल गाई ॥ ७ ॥ १०० ॥

८८—नेव = नायब, मंत्री । अवरेब = टेढ़ी स्थिति, कठिनाई ।

१००—चाह = खबर ।

राग कान्हरा

राम लषन सुधि आई बाजै अवध बधाई ।

ललित लगन लिखि पत्रिका,

उपरोहित के कर जनक-जनेस पठाई ॥ १ ॥

कन्या भूप विदेह की रूप की अधिकाई ।

तासु खयंबर मुनि सब आए

देस देस के नृप चतुरंग बनाई ॥ २ ॥

पन पिनाक, पवि मेरु तेँ गुरुता कठिनाई ।

लोकपाल महिपाल बान बानइत,

दसानन सके न चाप चढ़ाई ॥ ३ ॥

तेहि समाज रघुराज के मृगराज जगाई ।

भंजि सरासन संभु को जग जय कल कीरति,

तिय तियमनि सिय पाई ॥ ४ ॥

पुर घर घर आनंद महा मुनि चाह सुहाई ।

मातु मुदित मंगल सजै, कहैं मुनि

प्रसाद भए सकल सुमंगल, माई ॥ ५ ॥

गुरु आयसु मंडप रच्यो सब साज सजाई ।

तुलसिदास दसरथ बरात सजि,

पूजि गनेसहि चले निसान बजाई ॥ ६ ॥ १०१ ॥

राग केदारा

मन में मंजु मनोरथ हो, री ! ।

सो हर-नौरि-प्रसाद एक तेँ, कौसिक-कृपा चौगुनो भो, री ! ॥ १ ॥

पन-परिताप, चाप-चिंता-निसि, सोच-सकोच-तिमिर नहिं थोरी ।

रविकुलरवि अवलोकि सभा-सर हितचित्त-बारिज-बन बिकसो री ॥ २ ॥

कुंवर कुंवरि सब मंगलमूरति, नृप दोउ धरम धुरंधर धोरी ।

राजसमाज भूरि-भागी जिन लोचन-लाहु लखो एक ठोरी ॥ ३ ॥

ब्याह-उछाह राम-सीता को सुकृत सकेलि बिरंचि रच्यो, री ।
तुलसिदास जानै सोइ यह सुख जेहि उर बसति मनोहर जोरी ॥४॥१०२॥

राजति राम जानकी जोरी ।

स्याम-सरोज जलद-सुंदर बर, दुलहिनि तड़ित-बरन तनु गोरी ॥ १ ॥
ब्याह-समय सोहति बितान तर, उपमा कहूँ न लहति मति मोरी ।
मनहुँ मदन-मंजुल-मंडप महुँ छवि सिंगार सोभा इक ठौरी ॥ २ ॥
मंगलमय दोउ, अंग मनोहर ग्रथित चूनरी पीत पिछोरी ।
कनककलस कहूँ देत भाँवरी, निरखि रूप सारद भइ भोरी ॥ ३ ॥
इत बसिष्ठ मुनि उतहिं सतानंद, बंस-बखान करै दोउ ओरी ।
इत अवधेस उतहिं मिथिलापति, भरत अंक सुख-सिंधु हिलोरी ।
मुदित जनक, रनिवास रहसबस, चतुर नारि चितवहिं वृन तोरी ।
गान निसान बेदधुनि सुनि सुर वरषत सुमन, हरष कहै को री ? ॥४॥
नयनन को फल पाइ प्रेमबस सकल असीसत ईस निहोरी ।
तुलसी जेहि आनंद-मगन मन क्यों रसना बरनै सुख सो री ! ॥५॥१०३॥

दूल्हा राम, सीय दुल्हा री ! ।

घन-दामिन-बर बरन, हरन-मन सुंदरतां नखसिख निबही, री ॥१॥
ब्याह-बिभूषन-बसन-बिभूषित, सखि-अवली लखि ठगि सी रही, री ।
जीवन-जनम-लाहु लोचन-फल है इतनोइ, लखो आजु सही, री ॥२॥
सुखमा-सुरभि सिंगार-छीर दुहि मयन अमिय-मय कियो है दही, री ।
मथि माखन सिय राम सँवारे, सकल-भुवन-छवि मनहुँ मही, री ॥३॥
तुलसिदास जोरी देखत सुख सोभा अतुल न जाति कहो, री ।
रूप-रासि बिरंची बिरंचिमनो, सिलालवनिरति-काम लही री ॥४॥१०४॥

१०२—हो = था ।

१०४—सिला = शीला, जो दाने खेत काटते समय खेत में गिर जाते हैं ।

लवनि = लवनी, अनाज की फसल का वह थोड़ा सा बोझ जो मज़दूरों को दिया जाता है ।

जैसे ललित लषन लाल लोने ।

तैसिये ललित उरमिला, परसपर लखत सुलोचन-कोने ॥ १ ॥

सुखमासार सिंगारसार करि कनक रचे हैं तिहि सोने ।

रूपप्रेम-परमिति न परत कहि, बिथकि रही मति मौनै ॥ २ ॥

सोभा सील सनेह सोहावनो, समउ केलिगृह गौने ।

देखि तियनि के नयन सफल भए, तुलसीदास हू के होने ॥ ३ ॥ १०५ ॥

राग विलावल

जानकी-वर सुंदर, माई ।

इंद्रनील-मनि-स्याम सुभग अंग अंग मनोजनि बहु छबि छाई ॥ १ ॥

अरुन चरन, अंगुली मनोहर, नख दुतिवंत कछुक अरुनाई ।

कंजदलनि पर मनहुँ भौम दस बैठे अचल सु-सदसि बनाई ॥ २ ॥

पीत जानु उर चारु जटित मनि नूपुर पद कल मुखर सोहाई ।

पीतपराग भरे अलिगन जनु जुगल जलज लखि रहे लोभाई ॥ ३ ॥

किकिनि कनककंज-अवली मृदु मरकत सिखर मध्य जनु जाई ।

गई न उपर सभीत नमित-मुख, बिकसि चहुँ दिसि रही लोनाई ॥ ४ ॥

नाभि गँभीर उदर रेखा वर, उर भृगु-चरन-चिह्न सुखदाई ।

भुज प्रलंब भूषन अनेक जुत, बसन पीत सोभा अधिकाई ॥ ५ ॥

यज्ञोपवीत बिचित्र हेममय, मुक्तामाल उरसि मोहिँ भाई ।

कंद-तड़ित बिच जनु सुरपति-धनु रुचिर बलाकपाँति चलि आई ॥ ६ ॥

कंबु कंठ, चिबुकाधर सुंदर, क्यों कहाँ दसनन की रुचिराई ?

पदुमकोस महुँ वसे बज्र मनो निज सँग तड़ित-अरुन-रुचि लाई ॥ ७ ॥

नासिक चारु, ललित लोचन, भ्रू कुटिल, कचनि अनुपम छबि पाई ।

रहे घेरि राजीव उभय मनो चंचरीक कछु हृदय डेराई ॥ ८ ॥

भाल तिलक, कंचन किरीट सिर, कंडल लोल कपोलनि भाँई ।

निरखहि नारि-निकर बिदेहपुर निमि नृप की मरजाद मिटाई ॥ ९ ॥

सारद सेस संभु निसि बासर चितत रूप न हृदय समाई ।
तुलसिदास सठक्यों करिबरनैयह छबि, निगम नेति कह गई ॥ १० ॥ १०६ ॥

राग कान्हरा

भुजनि पर जननी वारि फेरि डारी ।

क्यों तोरौ कोमल कर-कमलनि संभु-सरासन भारी ? ॥ १ ॥

क्यों मारीच सुबाहु महाबल प्रबल ताड़का मारी ?

मुनि-प्रसाद मेरे राम लषन की बिधि बड़ि करवर टारी ॥ २ ॥

चरनरेनु लै नयननि लावति, क्यों मुनिबधू उधारी ।

कहौ धौं तात ! क्यों जीति सकल नृप बरी है विदेहकुमारी ॥ ३ ॥

दुसह-रोष-मूरति भृगुपति अति नृपति-निकर-खयकारी ।

क्यों सौंघ्यो सारंग हारि हिय, करी है बहुत मनुहारी ॥ ४ ॥

उमंगि उमंगि आनंद बिलोकति बधुनसहित सुत चारी ।

तुलसिदास आरती उतारति प्रेम-मगन महतारी ॥ ५ ॥ १०७ ॥

मुदित-मन आरती करै माता ।

कनक बसन मनि वारि वारि करि पुलक प्रफुल्लित गाता ॥ १ ॥

पाँलागनि दुलहियन सिखावति सरिस सासु सत-साता ।

देहिं असीस 'ते बरिस कोटि लुगि अचल होउ अहिवाता' ॥ २ ॥

रामसीय-छबि देखि जुवतिजन करहिं परसपर बाता ।

अब जान्यो साँचहु सुनहु, सखि ! कोबिद बड़ो बिधाता ॥ ३ ॥

मंगल-गान निसान नगर नभ, आनंद कह्यो न जाता ।

चिरजीवहु अवधेस-सुवन सब तुलसिदास-सुखदाता ॥ ४ ॥ १०८ ॥

अयोध्या कांड

राग सौराठ

नृप कर जोरि कछो गुरु पाहीं ।

तुम्हरी कृपा असीस, नाथ ! मेरी सबै महेस निबाहीं ॥ १ ॥

राम होहिं जुवराज जियत मेरे यह लालच मन माहीं ।

बहुरि मोहैं जियवे मरिबे की चित चिंता कछु नाहीं ॥ २ ॥

महाराज, भलो काज बिचारो बेगि बिलंब न कीजै ।

बिधि दाहिनो होइ तौ सब मिलि जनम-लाहु लुटि लीजै ॥ ३ ॥

सुनत नगर आनंद बधावन, कैकेयी बिलखानी ।

तुलसीदास देवमायाबस कठिन कुटिलता ठानी ॥ ४ ॥ १ ॥

राग गौरी

सुनहु राम मेरे प्रानपियारे ।

बारैं सत्यवचन सुति-सम्मत जाते हैं बिछुरत चरन तिहारे ॥ १ ॥

बिनु प्रयास सब साधन को फल प्रभु पायो सो तो नाहिं सँभारे ।

हरि तजि धरमसील भयो चाहत, नृपति नारिबस सरबस हारे ॥ २ ॥

रुचिर काँचमनि देखि मूढ ज्यों करतल ते चिंतामनि डारे ।

मुनि-लोचन-चक्रोर, ससि-राघव, सिव-जीवनधन सोड न बिचारे ॥ ३ ॥

जद्यपि नाथ तात ! मायाबस सुखनिधान सुत तुम्हहिं बिसारे ।

तदपि हमहिं त्यागहु जनि रघुपति दीनबंधु दयालु मेरे बारे ॥ ४ ॥

अतिसय प्रीति बिनीत बचन सुनि प्रभु कोमल-चित चलत न पारे ।

तुलसीदास जो रहैं मातु-हित को सुर बिप्र भूमि भय टारे ? ॥ ५ ॥ २ ॥

रहि चलिष सुंदर रघुनायक ।

जो सुत तात-बचन-पालन-रत जननिउ तात ! मानिबे लायक ॥ १ ॥

बेद-बिदित यह बानि तुम्हारी रघुपति सदा संत-सुखदायक ।

राखहु निज मरजाद निगम की, हैं बलि जाउँ धरहु धनुसायक ॥ २ ॥
 सोक-कूप पुर परिहि, मरिहि नृप, सुनि सँदेसं रघुनाथ-सिधायक ।
 यह दूसन बिधि तोहिं होत अब रामचरन-बियोग-उपजायक ॥ ३ ॥
 मातु-बचन सुनि स्रवत नयन जल, कछु सुभाउ जनु नरतनु-पायक ।
 तुलसिदास सुरकाज न साध्यौतौ तो दोष होय मोहिं महि आयक ॥ ४ ॥ ३ ॥

राग सोरठ

राम ! हैं कौन जतन घर रहिहैं ?
 बार बार भरि अंक गोद लै ललन कौन सों कहिहैं ॥ १ ॥
 इहि आँगन बिहरत मेरे बारे ! तुम जो संग सिसु लीन्हें ।
 कैसे प्राण रहत सुमिरत सुत बहु बिनोद तुम्ह कीन्हें ॥ २ ॥
 जिन्ह स्रवनि कल बचन तिहारे सुनि सुनि हैं अनुरागी ।
 तिन्ह स्रवननि बनगवन सुनति हैं, मो तेँ कौन अभागी ? ॥ ३ ॥
 जुग संम निमिष जाहिं रघुनंदन-बदनकमल दिनु देखे ।
 जौ तनु रहै बरष बीते, बलि, कहा प्रीति इहि लेखे ? ॥ ४ ॥
 तुलसीदास प्रेमबस श्रीहरि देखि विकल महतारी ।
 गदगद कंठ, नयन जल, फिरि फिरि आवन कछो मुरारी ॥ ५ ॥ ४ ॥

राग बिलावल

रहहु भवन हमरे कहे, कामिनि !
 सादर सासु चरन सेवहु नित जो तुम्हरे अति हित गृह-स्वामिनि ॥ १ ॥
 राजकुमारि कठिन कंटक मग, क्यों चलिहौ मृदु पद गजगामिनि ।
 दुसह बात बरषा, हिम, आतप कैसे सहिहौ अगनित दिन जामिनि ? ॥ २ ॥
 हैं पुनि पितु-आज्ञा प्रमान करि ऐहौ बेगि सुनहु दुति-दामिनि ।
 तुलसिदास प्रभु-बिरह-बचन सुनि सहि न संकी मुरझित भइ भामिनि ॥ ३ ॥ ५ ॥

३—रघुनाथ-सिधायक = रघुनाथ के सिधारने का । नरतनुपायक = नरशरीर पाने का । महिआयक = पृथ्वी पर आने का ।

कृपानिधान सुजान प्रानपति संग बिपिन है आवोंगी ।
 गृह तेँ कोटि-गुनित सुख मारग चलत, साथ सच्चु पावोंगी ॥ १ ॥
 थाके चरन कमल चापौंगी, सम भए बाउ डोलावोंगी ।
 नयन-चकोरनि मुखमयंक-छवि सादर पान करावोंगी ॥ २ ॥
 जो हठि नाथ राखिहौ मोकहँ तौ सँग प्रान पठावोंगी ।
 तुलसिदास प्रभु-बिनु जीवत रहि क्यों फिरि बदन देखावोंगी ? ॥३॥६॥
 कहौ तुम्ह बिनु गृह मेरो कौन काजु ? ।
 बिपिन कोटि सुरपुर समान मोको जोपै पिय परिहरयो राजु ॥ १ ॥
 बलकल विमल दुकूल मनोहर, कंद मूल फल अमिय नाजु ।
 प्रभुपद कमल विलोकिहँ छिनछिन, इहि तें अधिक कहा सुख-समाजु ? ॥२॥
 हौं रहौं भवन भोग-लोलुप हूँ पति कानन कियो मुनि को साजु ।
 तुलसिदास ऐसे बिरह-बचन सुनि कठिन हियो बिहरो न आजु ॥३॥७॥

पिय निठुर बचन कहे कारन कवन ?

जानत हौ सब के मन की गति, मृदुचित, परमकृपालु, रवन ! ॥ १ ॥
 प्राननाथ सुंदर सुजानमनि, दीनबंधु, जग-आरति-दवन ।
 तुलसिदास प्रभु-पदसरोज तजि रहिहौ कहा करौंगी भवन ? ॥२॥८॥

मैं तुम्ह सों सतिभाव कही है ।

व्रूक्ति और भाँति भामिनि कत, कानन कठिन कलेस सही है ॥१॥
 जौ चलिहौ तो चलौ चलि कै बन, सुनि सिय मन अवलंब लही है ।
 वृद्धत बिरह-वारिनिधि मानहुँ नाह बचनमिस बाँह गही है ॥ २ ॥
 प्राननाथ के साथ चलीं उठि अवध सोकसरि उमंगि बही है ।
 तुलसी सुनी न कबहुँ काहु कहुँ, तनु परिहरि परिछाँहि रही है ॥३॥९॥

जबहिं रघुपति-संग सीय चली ।

विकल-वियोग लोग पुरतिय कहैं अति अन्याउ, अली ॥ १ ॥
 कोउ कहै मनिगन तजत काँच लगि, करत न भूप भली ।
 कोउ कहै कुल-कुवेलि कैकेयी दुख-विष-फलनि फली ॥ २ ॥

एक कहैं बन जोग जानकी ! बिधि बड़ विषम बली ।

तुलसी कुलिसहु की कठोरता तेहि दिन दलकि दली ॥ ३ ॥ १० ॥

ठाढ़े हैं लषन कमलकर जोरे ।

उर धकधकी न कहत कछु सकुचनि, प्रभु परिहरत सबनि वृन तोरे ॥ १ ॥

कृपासिंधु अवलोकि बंधु तन, प्रान-कृपान बीर सी छोरे ।

तात बिदा माँगिए मातु सों, बनिहै बात उपाइ न औरे ॥ २ ॥

जाइ चरन गहि आयसु जाँचौ, जननि कहत बहुभाँति निहारे ।

सिय-रघुबर-सेवा सुचि ह्वैहौ तौ जानिहैं सही सुत मोरे ॥ ३ ॥

कोजहु इहै विचार निरंतर राम समीप सुकृत नहिं थोरे ।

तुलसी सुनि सिष चले चकित-चित,

उड़्यो मानो बिहग बधिक भए भोरे ॥ ४ ॥ ११ ॥

राग सोरठ

मोको बिधुबदन बिलोकन दीजै ।

राम लषन मेरी यहैं भेंट, बलि, जाउँ जहाँ मोहिं मिलि लीजै ॥ १ ॥

सुनि पितु-बचन चरन गहे रघुपति, भूप अंक भरि लीन्हें ।

अजहुँ अवनि-बिदरत दरार मिस सो अवस-सुधि कीन्हें ॥ २ ॥

पुनि सिर नाइ गवन कियो प्रभु, मुरछित भयो भूप न जाग्यो ।

करम-चोर नृप-पथिक मारि मानो राम-रतन लै भाग्यो ॥ ३ ॥

तुलसी रविकुल-रवि रथ चढ़ि चले तकि दिसि दखिन सुहाई ।

लोग नलिन भए मलिन अवध-सर, विरह-विषम-हिम पाई ॥ ४ ॥ १२ ॥

राग बिलावल

कहौ सो बिपिन हैं धौं केतिक दूरि ।

जहाँ-गवन कियो कुँवर कोसलपति, ब्रूभति सिय पिय-पतिहि बिसूरि ॥ १ ॥

प्राननाथ परदेस पयादेहि चले सुख सकल तजे वृन तूरि ।

करौं बयारि बिलंबिय विटपतर, भारौं हैं चरन-सरोरुह-धूरि ॥ २ ॥

तुलसिदास प्रभु प्रियाबचन सुनि नीरजनयन नीर आए पुरि ।

कानन कहाँ अबहिँ, सुनु, सुंदरि, रघुपति फिरि चितए हित भूरि । ३११३॥

फिरि फिरि राम सीयतनु हेरत ।

वृषित जानि जल लेन लषन गए, भुज उठाइ ऊँचे चढ़ि टेरत ॥ १ ॥

अवनि कुरंग, विहँग द्रुम-डारन रूप निहारत पलक न प्रेरत ।

मगन न डरत निरखि कर-कमलनि सुभग सरासन सायक फेरत ॥ २॥

अवलोकत मग-लोग चहूँ दिसि मनहुँ चकोर चंद्रमहिँ घेरत ।

ते जन भूरिभाग भूतल पर तुलसी राम-पथिक-पद जेरत ॥ ३ ॥ १४ ॥

नृपति-कुँवर राजत मग जात ।

सुंदर बदन, सरोरुह-लोचन मरकत-कनकवरन मृदुगात ॥ १ ॥

अंसनि चाप, तून कटि मुनिपट, जटा मुकुट विच नूतन पात ॥

फेरत पानि-सरोजनि सायक, चोरत चितहि सहज सुसुकात ॥ २ ॥

संग नारि सुकुमारि सुभग सुठि राजति विन भूषन नव-सात ।

सुखमा निरखि ग्राम-वनितनि के नलिन-नयन बिकसित मनो प्रात ॥ ३॥

अंग अंग अगनित अनंग-छवि उपमा कहत सुकवि सकुचात ।

सिय समेतनित तुलसिदास चित, बसत किसोर पथिक-दोड आत ॥ ४॥ १५॥

तू देखि देखि री ! पथिक परम सुंदर दोऊ ।

मरकत-कलधौत-वरन, काम-कोटि-कांतिहरन,

चरन-कमल कोमल अति, राजकुँवर कोऊ ॥ १ ॥

कर सर धनु, कटि निषंग, मुनिपट सोहैं सुभग अंग,

संग चंद्रवदनि बधू, सुंदरि सुठि सोऊ ।

तापस बर बेष किए सोभा सब छुटि लिए,

चित के चोर बय किसोर, लोचन भरि जोऊ ॥ २ ॥

दिनकर-कुलमनि निहारि प्रेम-मगन ग्राम-नारि,

परसपर कहैं, सखि ! अनुराग ताग पोऊ ।

तुलसी यह ध्यान-सुधन जानि मानि लाभ सधन,
कृपन ज्यों सनेह सो हिये-सुगेह गोऊ ॥ ३ ॥ १६ ॥

कुँवर साँवरो, री सजनी ! सुंदर सब अंग ।
रोम रोम छबि निहारि आलि वारि फेरि डारि,
कोटि भानु-सुवन सरद-सोम, कोटि अनंग ॥ १ ॥
बाम अंग लसत चाप, मौलि मंजु जटा कलाप,
सुचि सर कर, मुनिपट कटि-तट कसे निषंग ।
आयत उर बाहु नैन, मुख-सुखभा को लहै न
उपमा अवलोकि लोक, गिरामति-गति भंग ॥ २ ॥
यों कहि भई मगन बाल, बिथकी सुनि जुवति-जाल,
चितवत चले जात संग मधुप मृग बिहंग ।
बरनौं किमि तिनकी दसहि, निगम-अगम प्रेम-रसहि,
तुलसीमन-वसन रंगे रुचिर रूपरंग ॥ ३ ॥ १७ ॥

राग कल्याण

देखु कोऊ परम सुंदर सखि ! बटोही ।
चलत महि मृदु चरन अरुन-बारिज-बरन
भूपसुत, रूपनिधि निरखि हैं मोही ॥ १ ॥
अमल मरकत स्याम सीलसुखमाधाम,
गौरतनु सुभग सोभा सुमुखि जोही ।
जुगल बिच नारि सुकुमारि सुठि सुंदरी,
इंदिरा इंदु-हरि मध्य जनु सोही ॥ २ ॥
करनि बर धनु तीर, रुचिर कटि तूलीर,
धीर, सुर-सुखद, मर्दनअवनि-द्रोही ।
अंबुजायत नयन, बदन छबि बहु मयन,
चारु चितवनि चतुर लेति चित पोही ॥ ३ ॥
बचन प्रिय सुनि सवन राम करुनाभवन

चितए सब अधिक हित सहित कछु ओही ।
 दास तुलसी नेह-बिबस बिसरी देह,
 जान नहिं आपु तेहि काल धौं कोही ॥ ४ ॥ १८ ॥

राग केदारा

सखि ! नीके कै निरखि कोऊ सुठि सुंदर बटोही ।
 मधुर मूरति मदनमोहन जोहन-जोग,
 बदन सोभासदन देखिहैं मोही ॥ १ ॥
 साँवरे गोरे किसोर, सुर मुनि चित्त-चोर,
 उभय-अंतर एक नारि सोही ।
 मनहुँ बारिद बिधु बीच ललित अति,
 राजति तड़ित निज सहज बिछोही ॥ २ ॥
 उर धीरजहि धरि, जन्म सफल करि,
 सुनहि सुमुखि ! जनि विकल होही ।
 को जानै कौने सुकृत लखौ है लोचन-लाहु,
 ताहि तेँ बारहि बार कहति तोही ॥ ३ ॥
 सखिहि सुसिख दर्ई, प्रेम-मगन भई,
 सुरति बिसरि गई आपनी ओही ।
 तुलसी रही है ठाढ़ी पाहन गढ़ी सी काढ़ी;
 कौन जानै कहाँ तेँ आई, कौन की को ही ॥ ४ ॥ १९ ॥

माई ! मन के मोहन जोहन-जोग जोही ।

थोरी ही ब्यस गोरे साँवरे सलोने लोने,
 लोयन ललित, बिधुबदन बटोही ॥ १ ॥
 सिरनि जटा मुकुट मंजुल सुमनजुत,
 तैसिये लसति नव पल्लव खोही ।

१९—निज सहज बिछोही = अपना चंचल स्वभाव छोड़कर ।

२०—खोही = पत्तों का बना हुआ छाता ।

किए मुनि-वेष बीर, धरे धनु तून तीर,
 सोहैं मग, को हैं लखि परै न मोही ॥ २ ॥
 सोभा को साँचे सँवारि रूप जातरूप,
 ढारि नारि विरची विरंचि संग सोही ।
 राजत रुचिर तनु, सुंदर स्रम के कन,
 चाहे चकचौंधी लागै, कहैं का तोही ? ॥ ३ ॥
 सनेह-सिथिल सुनि बचन सकल सिया
 चितई अधिक हित सहित ओही ।
 तुलसी मनहुँ प्रभु कृपा की मूरति फिरि
 हेरि कै हरषि हिये लियो है पोही ॥ ४ ॥ २० ॥

सखि ! सरद-विमल-विधुवदनि बधूटी ।
 ऐसी ललना सलोनी न भई, न है, न होनी,
 रत्यो रची बिधि जो छोलत छबि छूटी ॥ १ ॥
 साँवरे गोरे पथिक बीच सोहति अधिक,
 तिहुँ त्रिभुवन-सोभा मनहुँ लूटी ।
 तुलसी निरखि सिय प्रेमबस कहैं तिय,
 लोचन-सिसुन्ह देहु अमिय घूटी ॥ २ ॥ २१ ॥

सोहैं साँवरे पथिक, पाछे ललना लोनी ।
 दामिनि-वरन गोरी, लखि सखि तन तोरी,
 बीती हैं बय किसोरी, जोबन होनी ॥ १ ॥
 नीके कै निकाई देखि, जनम सफल लेखि,
 हम सी भूरि-भागिनि नभ न छोनी ।
 तुलसी-स्वामी-स्वामिनि जोहे मोही हैं भामिनि,
 सोभा-सुधा पिए करि अँखिया दोनी ॥ २ ॥ २२ ॥

पथिक गोरे साँवरे सुठि लोने ।

संग सुतिय जाके तनु तेँ लही है द्युति सोन सरोरुह सोने ॥ १ ॥

वय किसोर-सरि-पार मनोहर बयस-सिरोमनि होने ।

सोभा-सुधा, आलि ! अँचबहु करि नयन मंजु मृदु देने ॥ २ ॥

हेरत हृदय हरत, नहिं फेरत चारु विलोचन कोने ।

तुलसी-प्रभु किधौं प्रभु को प्रेम पढ़े प्रगट कपट बिनु टोने ॥ ३ ॥ २३ ॥

मनोहरता के मानो ऐन ।

स्यामल गौर किसोर पथिक दोढ, सुमुखि ! निरखु भरि नैन ॥ १ ॥

बीच बधू बिधुबदनि बिराजति उपमा कहूँ कोऊ है न ।

मानहुँ रति अतुनाथ सहित मुनि-वेष बनाए है मैं ॥ २ ॥

किधौं सिँगार-सुखमा-सुप्रेम मिलि चले जग-चित-बित लैन ।

अद्भुत त्रयी किधौं पठई है बिधि मग-लोगनिह सुख दैन ॥ ३ ॥

मुनि सुचि सरल सनेह सुहावने ग्रामबधुन्ह के बैन ।

तुलसी प्रभु तरु तर बिलेंबे किए प्रेम कनौडे कै न ? ॥ ४ ॥ २४ ॥

वय किसोर गोरे साँवरे धनुवान धरे हैं ।

सब अंग सहज सोहावने, राजीव जिते नैननि, बदननि बिधु निदरे हैं ॥ १ ॥

तून सुमुनिपट कटि कसे, जटा मुकुट करे हैं ।

मंजु मधुर मृदु मूरति, पानहों न पायनि, कैसे धौं पथ बिचरे हैं ? ॥ २ ॥

उभय बीच बनिता बनौ लखि मोहि परे हैं ।

मदन सप्रिया सप्रिय सखा मुनि-वेष बनाए लिए मन जात हरे हैं ॥ ३ ॥

मुनि जहँ तहँ देखन चले अनुराग भरे हैं ।

राम-पथिक छावि निरखि कै, तुलसी,

मग-लोगनि धाम-काम बिसरे हैं ॥ ४ ॥ २५ ॥

कैसे पितु मातु, कैसे ते प्रिय परिजन हैं ?

जगजलधि ललाम, लोने लोने गोरे स्याम,

जिन पठए हैं ऐसे बालकनि बन हैं ॥ १ ॥

रूप कै न पारावार, भूप के कुमार मुनि-वेष,

देखत लोनाई लघु लागत मदन हैं ।
 सुखमा की मूरति सी, साथ निसिनाथ-मुखी,
 नखसिख अंग सब सोभा के सदन हैं ॥ २ ॥
 पंकज-करनि चाप, तीर तरकस कटि,
 सरद-सरोजहु तेँ सुंदर चरन हैं ।
 सीता राम लषन निहारि ग्रामनारि कहैं,
 हेरि, हेरि, हेरि ! हेली हिय के हरन हैं ॥ ३ ॥
 प्रानहूँ के प्रान से, सुजीवन के जीवन से,
 प्रेमहूँ के प्रेम, रंक कृपिन के धन हैं ।
 तुलसी के लोचन-चकोर के चंद्रमा से,
 आछे मन-मोर चित-चातक के घन हैं ॥ ४ ॥ २६ ॥

राग भैरव

देखि ! द्वै पथिक गोरे साँवरे सुभग हैं ।
 सुतिय सलोनी संग सोहत सुभग हैं ॥ १ ॥
 सोभासिंधु-संभव से नीके नीके नग हैं ।
 मातु-पितु-भाग-बस गए परि फँग हैं ॥ २ ॥
 पाई पनह्यौ न, मृदु पंकज से पग हैं ।
 रूप की मोहनी मेलि मोहे अग जग हैं ॥ ३ ॥
 मुनि-बेष धरे धनु सायक सुलग हैं ।
 तुलसी हिये लसत लोने लोने डग हैं ॥ ४ ॥ २७ ॥
 पथिक पयादे जात पंकज से पाय हैं ।
 मारग कठिन, कुस कंटकनिकाय हैं ॥ १ ॥
 सखी भूखे प्यासे पै चलत चित चाय हैं ।
 इन्हके सुकृत सुर संकर सहाय हैं ॥ २ ॥
 रूप सोभा प्रेम के से कमनीय काय हैं ।

मुनिवेष किए किधौं ब्रह्म जीव माय हैं ॥ ३ ॥
 बीर बरियार धीर धनुधर-राय हैं ।
 दसचारि-पुर-पाल आली उरगाय हैं ॥ ४ ॥
 मग-लोग देखत करत हाय हाय हैं ।
 बन इनको तो बाम बिधि कै बनाय हैं ॥ ५ ॥
 धन्य ते जे मीन से अवधि-अंबु-आय हैं ।
 तुलसी प्रभु सौं जिन्हूँ के भले भाय हैं ॥ ६ ॥ २८ ॥

राग आसावरी

सजनी ! हैं कोउ राजकुमार ।

पंथ चलत मृदु पद कमलनि दोउ सील-रूप-आगार ॥ १ ॥
 आगे राजिवनैन स्याम-तनु सोभा अमित अपार ।
 डारौं वारि अंग अंगनि पर कोटि कोटि सत मार ॥ २ ॥
 पाछे गोर किसोर मनोहर, लोचन बदन उदार ।
 कटि तूनीर कसे, कर सर धनु, चले हरन छिति भार ॥ ३ ॥
 जुगुल बीच सुकुमारि नारि इक राजति बिनहि सिँ गार ।
 इंद्रनील, हाटक, मुकुतामनि जनु पहिरे महि हार ॥ ४ ॥
 अवलोकहु भरि नैन, बिकल जनि होहु, करहु सुबिचार ।
 पुनि कहँ यह सोभा, कहँ लोचन, देह गेह संसार ? ॥ ५ ॥
 सुनि प्रिय बचन चितै हित कै रघुनाथ कृपा सुखसार ।
 तुलसिदास प्रभु हरे सबन्धि के मन, तन रही न सँभार ॥ ६ ॥ २९ ॥

देखु री सखी ! पथिक नख-सिख नीके हैं ।

नीले पीले कमल से कोमल कलेवरनि
 तापस हूँ, वेष किये काम कोटि फीके हैं ॥ १ ॥
 सुकृत सनेह सील सुखमा सुख सकेलि

२८-उरगाय = उरुगाय, विष्णु । कै बनाय है = बनाय कै है, बहुत ही अधिक है । अवधि-अंबु-आय = जिनकी आयु अवधि रूपी जल ही तक है ।

बिरचे बिरंचि किधौं अमिय अमी के हैं ।
 रूप की सी दामिनी सुभामिनी सोहति संग,
 उमहुँ रमा तैं आछे अंग अंग ती के हैं ॥ २ ॥
 बन-पट कसे कटि, तून तीर धनु धरे,
 धीर बीर पालक कृपालु सबही के हैं ।
 पानही न, चरन-सरोजनि चलत मग,
 कानन पठाए पितु-मातु कैसे ही के हैं ? ॥ ३ ॥
 आली अबलोकि लेहु, नयननि के फलु येहु,
 लाभ के सुलाभ, सुखजीवन से जी के हैं ।
 धन्य नर नारि जे निहारि बिनु गाहक हूँ
 आपने आपने मन मोल बिनु बीके हैं ॥ ४ ॥
 बिबुध बरखि फूल हरषि हिये कहत,
 ग्राम-लोग मगन सनेह सिय-पीके हैं ।
 जोगीजन अगम दरस पायो पावँरनि,
 प्रमुदित मन सुनि सुरप सची के हैं ॥ ५ ॥
 प्रीति के सुबालक से लालत सुजन मुनि,
 मग चारु चरित लषन राम सी के हैं ।
 जोग न विराग जाग तप न तीरथ त्याग,
 एही अनुराग भाग खुले तुलसी के हैं ॥ ६ ॥ ३० ॥
 रीति चलिबे की चाहि, प्रीति पहिचानि कै ।
 आपनी आपनी कहैं प्रेम परबस अहैं,
 मंजु मृदु बचन सनेह-सुधा सानि कै ॥ १ ॥
 साँवरे कुँवर के बराइ कै चरन के चिह्न ,
 बधू पग धरति कहा धौं जिय जानि कै ।
 जुगल कमल-पद-अंक जोगवत जात,
 गोरे गात कुँवर महिमा महा मानि कै ॥ २ ॥

उनकी कहनि नीकी, रहनि लषन सी की,
तिनकी गहनि जे पथिक उर आनि कै ।
लोचन सजल, तन पुलक, मगन मन,
होत भूरिभागी जस तुलसी बखानि कै ॥ ३ ॥ ३१ ॥

राग केदारा

जेहि जेहि मग सिय राम लषन गए
तहँ तहँ नर नारि बिनु छर छरिगे ।
निरखि निकाई-अधिकारी बिथकित भए
बच, बिय-नैन-सर सोभा-सुधा भरिगे ॥ १ ॥
जेते बिनु, बए बिनु, निफन निराए बिनु,
सुकृत-सुखेत सुख-सालि फूलि फरिगे ।
मुनिहुँ मनोरथ को अगम अलभ्य लाभ
सुगम सो राम लघु लोगनि को करिगे ॥ २ ॥
लालची कौड़ी को कूर पारस परे हैं पाले,
जानत न को हैं, कहा कीबो सो बिसरिगे ।
बुधि न विचार, न बिगार, न सुधार सुधि,
देह गेह नेह नाते मन से निसरिगे ॥ ३ ॥
बरषि सुमन सुर हरषि हरषि कहैं,
'अनायास भवनिधि नीच नीके तरिगे' ।
सो सनेह समउ सुमिरि तुलसीहू के से
भली भाँति भले पैत भले पाँसे परिगे ॥ ४ ॥ ३२ ॥
बोले राज देन को, रजायसु भो कानन को,
आनन प्रसन्न, मन मोद, बड़ो काज भो ।

३२—बिनु छर छरिगे = बिना छँटे हुए छूट कर साफ़ हो गए (चावल के समान), कना अलग करने के लिए चावल को फिर फटक कर साफ़ करने को 'छरना' कहते हैं । निफन = अच्छी तरह ।

मातु-पिता-बंधु-हित, आपनो परम हित,
 मोको बीसहू कै ईस अनुकूल आजु भो ॥ १ ॥
 असन अजीरन को समुक्ति तिलक तज्यौ,
 बिपिन-गवनु भले भूखे को सुनाजु भो ।
 धरम-धुरीन धीर बीर रघुबीरजू को
 कोटि राज सरिस भरत जू को राजु भो ॥ २ ॥
 ऐसी बातैं कहत सुनत मग-लोगन की
 चले जात बंधु दोउ मुनि को सो साज भो ।
 ध्याइबे को, गाइबे को, सेइबे सुभिरिबे को,
 तुलसी को सब भाँति सुखद समाज भो ॥ ३ ॥ ३३ ॥
 सिरिस-सुमन-सुकुमारि सुखमा की सीँव
 सीय, राम बड़े ही सकोच संग लई है ।
 भाई के प्रान समान, प्रिया के प्रान के प्रान,
 जानि बानि प्रीति रीति कृपासील मई है ॥ १ ॥
 आलबाल-अवध सुकामतरु कामबेलि
 दूरि करि केकई बिपत्ति-बेलि बई है ।
 आप, पति, पूत, गुरुजन, प्रिय परिजन,
 प्रजाहू को कुटिल दुसह दसा दर्ई है ॥ २ ॥
 पंकज से पगनि पानह्यौ न, परुष पंथ,
 कैसे निबहे हैं निबहेंगे गति नई है ? ।
 एही सोच संकट मगन मग-नर-नारि,
 सबकी सुमति राम-राग-रँग-रई है ॥ ३ ॥
 एक कहैं बाम बिधि दाहिनेो हम को भयो,
 उत कीन्हीं पीठि, इत को सुडीठि भई है ।
 तुलसी सहित बनवासी मुनि हमरिऔ,

अनायास अधिक अघाइ बनि गई है ॥ ४ ॥ ३४ ॥

राग गौरी

नीके कै मैं न बिलोकन पाए ।

सखि ! यहि मग जुग पथिक मनोहर, बधु बिधु-बदनि समेत सिधाए ॥१॥

नयन सरोज, किसोर बयस बर, सीस जटा रचि मुकुट बनाए ।

कटि मुनि बसन तून, धनु सर कर, स्यामल गौर सुभाय सोहाए ॥२॥

सुंदर बदन, बिसाल बाहु उर, तनु-छवि कोटि मनोज लजाए ।

चितवत मोहिं लगी चौंधी सी जानौं न कौन कहाँ तेँ धौं आए ॥३॥

मनु गयो संग, सोचबस लोचन मोचत बारि, कितौ समुझाए ।

तुलसिदास लालसा दरस की सोइ पुरवै जेहिं आनि देखाए ॥ ४ ॥ ३५ ॥

पुनि न फिरे दोउ बीर बटाऊ ।

स्यामल गौर सहज सुंदर, सखि ! बारक बहुरि बिलोकिबे काऊ ॥१॥

कर-कमलनि सर सुभग सरासन, कटि मुनि बसन निषंग सोहाए ।

भुज प्रलंब, सब अंग मनोहर, धन्य सो जनक जननि जेहि जाए ॥२॥

सरद-बिमल-बिधु-बदन, जटा सिर, मंजुल अरुन-सरोरुह-लोचन ।

तुलसिदास मनमय मारग में राजत कोटि-मदन-मदमोचन ॥३॥ ३६ ॥

राग केदारा

आली ! काहू तौ बूझौ न पथिक कहाँ धौं सिधैहैं ।

कहाँ तेँ आए हैं, को हैं, कहा नाम स्याम गोरे,

काज कै कुसल फिरि एहि मग ऐहैं ? ॥ १ ॥

उठति बयस, मसि भींजति, सलोने सुठि,

सोभा-देखवैया बिनु बित्त ही बिकैहैं ।

हिये हेरि हरि लेत लोनी ललना समेत,

लोयननि लाहु देत जहाँ जहाँ जैहैं ॥ २ ॥

राम-लषन-सिय-पंखि की कथा पृथुल,

प्रेम बिथकीं कहति सुमुखि सबै हैं ।

तुलसी तिन्ह सरिस तेऊ भूरिभाग जेऊ
 सुनि कै सुचित तेहि समै समैहैं ॥ ३ ॥ ३७ ॥
 बहुत दिन बीते सुधि कछु न लही ।
 गए जो पथिक गोरे साँवरे सलोने,
 सखि ! संग नारि सुकुमारि रही ॥ १ ॥
 जानि पहिचानि बिनु आपु तेँ आपुनेहु तेँ,
 प्रानहुँ तेँ प्यारे प्रियतम उपही ।
 सुधा के सनेह दू के सार लै सँवारे बिधि,
 जैसे भावते हैं भाँति जाति न कही ॥ २ ॥
 बहुरि बिलोकिवे कबहुँक, कहत
 तनु पुलक, नयन जलधार बही ।
 तुलसी प्रभु सुमिरि ग्रामजुवती सिथिल,
 बिनु प्रयास परीं प्रेम सही ॥ ३ ॥ ३८ ॥
 आली री ! पथिक जे एहि पथ परीं सिधाए ।
 तेतौ राम लषन अवध तेँ आए ॥ १ ॥
 संग सिय सब अंग सहज सोहाए ।
 रति, काम, ऋतुपति कोटिक लजाए ॥ २ ॥
 राजा दसरथ रानी कौसिला जाए ।
 कैकेयी कुचालि करि कानन पठाए ॥ ३ ॥
 बचन कुभामिनि के भूपहि क्यों भाए ?
 हाय हाय राय बाम बिधि भरमाए ॥ ४ ॥
 कुलगुरु सचिव काहू न समुझाए ।
 काँच मनि लै अमोल मानिक गवाँए ॥ ५ ॥
 भाग मग-लोगनि के देखन जे पाए ।

३७—सुचित समैहैं = चित्त में समवाएँगे अर्थात् धारण करेंगे ।

३८—उपही = ऊपरी, बायबी ।

तुलसी सहित जिन गुन गन गाए ॥ ६ ॥ ३६ ॥
 सखि ! जबते सीता समेत देखे दोउ भाई ।
 तब ते परै न कल, कछू न सोहाई ॥ १ ॥
 नखसिख नीके, नीके निरखि निकाई ।
 तन सुधि गई, मन अनत न जाई ॥ २ ॥
 हेरनि हँसनि हिय लिये हैं चोराई ।
 पावन-प्रेम-बिबस भई हौं पराई ॥ ३ ॥
 कैसे पितु मातु प्रिय परिजन भाई ।
 जीवत जीव के जीवन बनहिं पठाई ॥ ४ ॥
 समउ सो चित करि हित अधिकाई ।
 प्रीति ग्रामबधुन की तुलसिहुँ गाई ॥ ५ ॥ ४० ॥

राग केदारा

जब ते सिधारे यहि मारग लखन राम
 जानकी सहित तब ते न सुधि लही है ।
 अवध गए धौं फिरि, कैधौं चढ़े बिंध्यगिरि,
 कैधौं कहूँ रहे सो कछू न काहू कही है ॥ १ ॥
 एक कहै चित्रकूट निकट नदी के तीर
 परनकुटीर करि बसे, बात सही है ।
 सुनियत भरत मनाइबे को आवत हैं,
 होइगी पै सोई जो बिधाता चित्त चही है ॥ २ ॥
 सत्य-संध धरम-धुरीन रघुनाथजू को
 आपनी निबाहिबे नृप की निरबही है ।
 दस-चारि बरिस बिहार बन पदचार
 करिबे पुनीत सैल सर सरि मही है ॥ ३ ॥
 मुनि सुर सुजन समाज के सुधारि काज,
 बिगारि बिगारि जहाँ जहाँ जाकी रही है ।

पुर पाँउ धारिहैं उधारिहैं तुलसी हूँ से जन,
जिन जानि कै गरीबी गाढ़ी गही है ॥ ४ ॥ ४१ ॥

राग सारंग

ये उपही कोउ कुँवर अहेरी ।

स्याम गौर धनु-बान-तूनधर चित्रकूट अब आइ रहे, री ॥ १ ॥
इन्हहिं बहुत आदरत महामुनि समाचार मेरे नाह कहे, री ।
बनिता बंधु समेत बसे बन, पितु हित कठिन कलेस सहे री ॥ २ ॥
बचन परसपर कहति किरातिनि पुलक गात, जल नयन बहे, री ।
तुलसी प्रमुहि बिलोकति एकटक लोचन जनु विनु पलक लहे, री ॥ ३ ॥ ४२ ॥

राग चंचरी

चित्रकूट अति बिचित्र, सुंदर बन महि पवित्र,
पावनि पय सरित सकल मल-निकंदिनी ।
सानुज जहँ बसत राम, लोक लोचनाभिराम,
बाम अंग बामाबर बिख-बंदिनी ॥ १ ॥ ❀
चितवत मुनिगन चकोर, बैठे निज ठौर ठौर,
अक्षय अकलंक सरद-चंद-चंदिनी ।
उदित सदा बन-अकास, मुदित बहत तुलसिदास,
जय जय रघुनंदन जय जनकनंदिनी ॥ २ ॥ ४३ ॥
फटिकसिला मृदु बिसाल, संकुल सुरतरु तमाल,
ललित-लता-जाल हरति छबि बितान की ।
मंदाकिनि तटिनि तीर, मंजुल मृग बिहग भीर,

* टी० बैजनाथ वाली प्रति में इसके आगे ये चार चरण और हैं—
अपिबर तहँ छंद बास, गावत कलकंठ हास, कीर्तन उनमाय काय क्रोधकंदिनी ।
बर बिधान करत गान, वारत धन मान प्रान, मरना मर मिंग मिंग मिंग
जल तरंगिनी । बर बिहार चरन चारु पाँड़र चंपक चनार करनहार बार पार पुर
पुरंगिनी । जोवन नव ढरत ढार, दुत्त मत्त मृग मराल, मंद मंद गुंजत हैं अलि
अलिंगिनी ।

धीर मुनिगिरा गभीर सामगान की ॥ १ ॥
 मधुकर पिक बरहि मुखर, सुंदर गिरि निर्भर भर,
 जल-कन घन छाँह, छन प्रभा न भान की ।
 सब ऋतु ऋतुपति प्रभाउ, संतत बहै त्रिविध बाउ,
 जनु बिहार-बाटिका नृप पंचवान की ॥ २ ॥
 बिरचित तहँ पर्नसाल, अति बिचित्र लषन लाल,
 निवसत जहँ नित कृपालु राम-जानकी ।
 निजकर राजीवनयन पल्लव-दल-रचित सयन
 प्यास परसपर पियूष प्रेम-पान की ॥ ३ ॥
 सिय अँग लिखै धातुराग, सुमननि भूषन-बिभाग,
 तिलक करनि का कहैं कलानिधान की ।
 माधुरी बिलास हास, गावत जस तुलसिदास,
 बसति हृदय जोरी प्रिय परम प्रान की ॥ ४ ॥ ४४ ॥

राग केदारा

लोने लाल लषन, सलोने राम, लोनी सिय,
 चारु चित्रकूट बैठे सुरतरु-तर हैं ।
 गोरे साँवरे सरीर पीत नील नीरज से,
 प्रेमरूप सुखमा के मनसिज-सर हैं ॥ १ ॥
 लोने नख-सिख, निरुपम निरखन जोग,
 बड़े उर कंधर-बिसाल भुज बर हैं ।
 लोने लोने लोचन जटनि के मुकुट लोने,
 लोने बदननि जीते कोटि सुधाकर हैं ॥ २ ॥
 लोने लोने धनुष, विशिष कर कमलनि,
 लोने मुनिपट, कटि लोने सरघर हैं ।

४४—सयन = शयनासन, बिस्तर ।

४५—सर-वर = तरकश, तूणीर ।

प्रिया प्रिय बंधु को दिखावत बिटप, बेलि,
 मंजु कुंज, सिलातल, दल, फूल, फर हैं ॥ ३ ॥
 ऋषिन के आश्रम सराहैं, मृग नाम कहैं,
 लागी मधु, सरित, भरत निर्भर हैं ।
 नाचत बरहि नीके, गावत मधुप पिक,
 बोलत बिहंग, नभ-जल-थल-चर हैं ॥ ४ ॥
 प्रभुहि बिलोकि मुनिगन पुलके कहत
 भूरिभाग भये सब नीच नारि-नर हैं ।
 तुलसी सो सुख-लाहु लूटत किरात कोल
 जाको सिसकत सुर विधि हरि हर हैं ॥ ५ ॥ ४५ ॥

राग सारंग

आइ रहे जब तैं दोउ भाई ।

तब ते' चित्रकूट-कानन-छवि दिन दिन अधिक अधिक अधिकाई ॥ १ ॥
 सीता-राम-लषन-पद-अंकित अवनि सोहावनि बरनि न जाई ।
 मंदाकिनि मज्जत अवलोकत त्रिविध पाप त्रयताप नसाई ॥ २ ॥
 उकठेउ हरित भए जल-थलरुह, नित नूतन राजीव सुहाई ।
 फूलत फलत पल्लवत पलुहत बिटप बेलि अभिमत सुखदाई ॥ ३ ॥
 सरित सरनि सरसीरुह-संकुल सदन सँवारि रमा जनु छाई ।
 कूजत बिहंग, मंजु गुंजत अलि, जात पथिक जनु लेत बुझाई ॥ ४ ॥
 त्रिविध समीर नीर भर भरननि जहँ तहँ रहे ऋषि कुटी बनाई ।
 सीतल सुभग सिलनि पर तापस करत जोग जप तप मन लाई ॥ ५ ॥
 भए सब साधु किरात किरातिनि, राम-दरस मिटि गइ कलुषाई ।
 खग मृग मुदित एक सँग बिहरत सहज बिषम बड़ बैर बिहाई ॥ ६ ॥
 कामकेलि बाटिका बिबुध-बन, लघु उपमा कवि कहत लजाई ।
 सकल भुवन सोभा सकेलि मनौ राम बिपिन बिधि आनि बसाई ॥ ७ ॥
 बन मिस मुनि, मुनितिय, मुनि-बालक बरनत रंगुबर-बिमल-बड़ाई ।

पुलक सिथिल तनु, सजल सुलोचनु प्रमुदित मन जीवन फलु पाई ॥ ८ ॥
 क्यों कहौं चित्रकूट-गिरि संपति महिमा मोद मनोहरताई ।
 तुलसी जहँ बसि लखन राम सिय आनंद-अवधि अवध विसराई ॥ ८ ॥ ४६ ॥

राग गौरी

देखत चित्रकूट बन मन अति होत हुलास ।
 सीताराम लषन प्रिय, तापस-वृंद-निवास ॥ १ ॥
 सरित सोहावनि पावनि, पापहरनि पय नाम ।
 सिद्धि-साधु-सुर-सेवित देति सकल मन काम ॥ २ ॥
 विटप बेलि नव किसलय, कुसुमित सघन सुजाति ।
 कंदमूल, जल-थलरुह अगनित अनवन भाँति ॥ ३ ॥
 बंजुल मंजु, बकुल कुल सुरतरु, ताल, तमाल ।
 कदलि, कदंब, सुचंपक, पाटल, पनस-रसाल ॥ ४ ॥
 भूरुह भूरि भरे जनु छवि अनुराग सुभाग ।
 बन विलोकि लघु लागहिं बिपुल विबुध-वन-बाग ॥ ५ ॥
 जाइ न बरनि राम-वन चितवत चित हरि लेत ।
 ललित-लता-द्रुम-संकुल मनहुँ मनोज-निकेत ॥ ६ ॥
 सरित सरनि सरसीरुह फूले नाना रंग ।
 गुंजत मंजु मधुप गन कूजत विविध बिहंग ॥ ७ ॥
 लषन कहेउ रघुनंदन देखिय बिपिन-समाज ।
 मानहुँ चयन मयन-पुर आयउ प्रिय अतुराज ॥ ८ ॥
 चित्रकूट पर राउर जानि अधिक अनुरागु ।
 सखा सहित जनु रतिपति आयउ खेलन फागु ॥ ९ ॥
 मिझि, भाँझ, भरना, डफ, नव मृदंग निसान ।
 मेरि उपंग भृंग रव, ताल कीर कलगान ॥ १० ॥
 हंस कपोत कबूतर बोलत चक्र चकोर ।

गावत मनहुँ नारिनर मुदित नगर चहुँ ओर ॥ ११ ॥
 चित्र विचित्र विविध मृग डोलत डोंगर डाँग ।
 जनु पुरबीथिन बिहरत छैल सँवारे खाँग ॥ १२ ॥
 नचहिँ मोर, पिक गावहिँ, सुर बर राग बँधान ।
 निलज तरुन तरुनी जनु खेलहिँ समय समान ॥ १३ ॥
 भरि भरि मुंड करिनि करि जहँ तहँ डारहिँ बारि ।
 भरत परसपर पिचकनि मनहुँ मुदित नर नारि ॥ १४ ॥
 पीठि चढ़ाइ सिसुन्ह कपि कूदत डारहिँ डार ।
 जनु मुँह लाइ गेरु मसि भए खरनि असवार ॥ १५ ॥
 लिए पराग सुमनरस डोलत मलय समीर ।
 मनहुँ अरगजा छिरकत, भरत गुलाल अबीर ॥ १६ ॥
 काम कौतुकी यहि बिधि प्रभुहित कौतुक कीन्ह ।
 रीझि राम रतिनाथहि जग-बिजयी बर दीन्ह ॥ १७ ॥
 दुखवहु मोरे दास जनि, मानेहु मोरि रजाइ ।
 'भलेहि नाथ' माथे धरि आयसु चलेउ बजाइ ॥ १८ ॥
 मुदित किरात किरातिनि रघुवर-रूप निहारि ।
 प्रभुगुन गावत नाचत चले जोहारि जोहारि ॥ १९ ॥
 देहिँ असीस प्रसंसहिँ मुनि, सुर बरषहिँ फूल ।
 गवने भवन राखि उर मूरति मंगलमूल ॥ २० ॥
 चित्रकूट कानन छवि को कवि बरनै पार ।
 जहँ सिय लषन सहित नित रघुवर करहिँ बिहार ॥ २१ ॥
 तुलसिदास चाँचरि मिस कहे राम गुन-ग्राम ।
 गावहिँ सुनिहिँ नारि नर पावहिँ सब अभिराम ॥ २२ ॥ ४७ ॥

४७—डोंगर = जंची ज़मीन या टीला । डाँग = घना बनखंड ।

राग बसंत

आजु बन्यो है बिपिन देखो, राम धीर । मानो खेलत फागु मुद मदन बीर ॥ १ ॥
 बट बकुल कदंब पनस रसाल । कुसुमित तरु-निकर कुरव तमाल ॥
 मानो बिबिध बेष धरे छैल-जूथ । बिच बीच लता ललना बरूथ ॥ २ ॥
 पनवानक निर्भर, अलि उपंग । बोलत पारावत मानो डफ मृदंग ॥
 गायक सुक कोकिल, फिछि ताल । नाचत बहु भाँति बरहिँ मराल ॥ ३ ॥
 मलयानिल सीतल सुरभि मंद । बह सहित सुमन रस रेनु वृंद ॥
 मनु छिरकत फिरत सबनि सुरंग । भ्राजत उदार लीला अनंग ॥ ४ ॥
 क्रीड़त जीते सुर असुर नाग । हठि सिद्ध मुनिन के पंथ लाग ॥
 कह तुलसिदास तेहि छाँडु, मैन । जेहि राख राम राजीवनैन ॥ ५ ॥ ४८ ॥
 ऋतु-पतिआए भलो बन्यो बनसमाज । मानो भए हैं मदन महाराज आज ॥ १ ॥
 मनो प्रमथ फागु मिस करि अनीति । होरी मिस अरिपुर जारि जीति ॥
 मारुत मिस पत्र-प्रजा उजारि । नय नगर बसाए बिपिन भारि ॥ २ ॥
 सिंहासन सैल सिला सुरंग । कानन, छवि रति परिजन कुरंग ॥
 सित छत्र सुमन, बल्ली बितान । चामर समीर, निर्भर निसान ॥ ३ ॥
 मनो मधु माधव दोउ अनिप धीर । घर बिपुल बिटप वानैत बीर ॥
 मधुकर सुक कोकिल बंदि-वृंद । बरनहिँ बिसुद्ध जस बिबिध छंद ॥ ४ ॥
 महि परत सुमन-रस फल पराग । जनु देत इतर नृप कर-विभाग ॥
 कलि सचिव सहित नय-निपुन मार । कियो विस्व बिबस चारिहु प्रकार ॥ ५ ॥
 बिरहिन पर नित नइ परै मारि । डाँड़ियत सिद्ध साधक प्रचारि ॥
 तिनकी न काम सकै चापि छाँह । तुलसी जे बसहिँ रघुबीर-बाह ॥ ६ ॥ ४९ ॥

राग मलार

सब दिन चित्रकूट नीको लागत ।

बरषाऋतु प्रवेस बिसेष गिरि-देखन मन अनुरागत ॥ १ ॥

चहुँदिसि बन संपन्न, बिहंग मृग बोलत सोभा पावत ।

जनु सुनरेस देस पुर प्रमुदित प्रजा सकल सुख छावत ॥ २ ॥
 सोहत स्याम जलद मृदु घोरतं धातु रँगमगे संगनि ।
 मनहुँ आदि अंभोज बिराजत सेवित सुर-मुनि-भृंगनि ॥ ३ ॥
 सिखर परस घन घटहिं, मिलति बग पाँति सो छवि कवि बरनी ।
 आदि बराह बिहरि बारिधि मनो उठ्यो है दसन धरि धरनी ॥ ४ ॥
 जल-जुत विमल सिलनि भलकत नभ, बन-प्रतिबिंब तरंग ।
 मानहुँ जग-रचना विचित्र बिलसति विराट अँग अंग ॥ ५ ॥
 मंदाकिनिहि मिलत भरना भरि भरि भरि भरि जल आछे ।
 तुलसी सकल सुकृत सुख लागे मानौ राम भगति के पाछे ॥ ६ ॥ ५० ॥

राग सौरठ

आजु को भोर और सो, माई ।

सुनौं न द्वार वेद बंदी धुनि गुनिगन-गिरा सोहाई ॥ १ ॥
 निज निज सुंदर पति सदननि तेँ रूप-सील-छवि-छाई ।
 लेन असीस सीय आगे करि मोपै सुतबधू न आई ॥ २ ॥
 वूझी हौं न बिहँसि मेरे रघुबर 'कहाँ री ! सुमित्रा माता ?' ।
 तुलसी मनहुँ महासुख मेरो देखि न सकेउ बिधाता ॥ ३ ॥ ५१ ॥

जननी निरखति वान धनुहियाँ ।

बार बार उर नैननि लावति प्रभुजू की ललित पनहियाँ ॥ १ ॥
 कबहुँ प्रथम ज्यों जाइ जगावति कहि प्रिय बचन सबारे ।
 उठहु तात ! बलि मातु बदन पर, अनुज सखा सब द्वारे ॥ २ ॥
 कबहुँ कहति यों "बड़ी बार भइ जाहु भूप पहुँ, मैया ।
 बंधु बोलि जेंइय जो भावै गई निछावरि मैया" ॥ ३ ॥
 कबहुँ समुझि बनगवन राम को रहि चकि चित्र लिखी सी ।
 तुलसिदास वह समय कहे तेँ लागति प्रीति सिखी सी ॥ ४ ॥ ५२ ॥

माई री ! मोहिँ कोउ न समुझावै ।

राम-गवन साँचो किधौं सपनो, मन परतीति न आवै ॥ १ ॥

लगेइ रहत मेरे नैननि आगे राम लषन अरु सीता ।
 तदपि न मिटत दाह या उर को, बिधि जो भयो बिपरीता ॥ २ ॥
 दुख न रहै रघुपतिहि बिलोकत, तनु न रहै बिनु देखे ।
 करत न प्रान पयान सुनहु, सखि ! अरुभि परी यहि लेखे ॥ ३ ॥
 कौसल्या के बिरह-बचन सुनि रोइ उठीं सब रानी ।
 तुलसिदास रघुबीर-बिरह की पीर न जाति बखानी ॥ ४ ॥ ५३ ॥

जब जब भवन बिलोकति सुनो ।

तब तब बिकल होति कौसल्या दिन दिन प्रति दुख दूनो ॥ १ ॥
 सुमिरत बाल-बिनोद राम के सुंदर मुनि-मन-हारी ।
 होत हृदय अति सूल समुभि पदपंकज अजिर-बिहारी ॥ २ ॥
 को अब प्रात कलेऊ माँगत रुठि चलैगो, माई !
 स्याम-तामरस-नैन स्रवत जल काहि लेउँ उर लाई ॥ ३ ॥
 जीवों तौ बिपति सहैं निसिबासर मरौं तौ मन पछितायो ।
 चलत बिपिन भरि नयन राम को बदन न देखन पायो ॥ ४ ॥
 तुलसिदास यह दुसह दसा अति, दारुन बिरह घनेरो ।
 दूर करै को भूरि कृपा बिनु सोकजनित रुज मेरो ? ॥ ५ ॥ ५४ ॥

मेरो यह अभिलाषु बिधाता ।

कब पुरवै सखि सानुकूल है हरि सेवक सुखदाता ॥ १ ॥
 सीता सहित कुसल कोसलपुर आवत हैं सुत दोऊ ।
 स्रवन-सुधा-सम बचन सखी कब आइ कहैगो कोऊ ? ॥ २ ॥
 सुनि संदेस प्रेम-परिपूरन संभ्रम उठि धावोंगी ।
 बदन बिलोकि रोकि लोचन-जल हरषि हिये लावोंगी ॥ ३ ॥
 जनकसुता कब सासु कहैं मोहि, राम लषन कहैं मैया ।
 बाहु जोरि कब अजिर चलहिंगे स्यामगौर दोउ भैया ॥ ४ ॥
 तुलसिदास यहि भाँति मनोरथ करत प्रीति अति बाढ़ी ।
 यकित भई उर आनि राम-छवि मनहुँ चित्र लिखि काढ़ी ॥ ५ ॥ ५५ ॥

सुन्यौ जब फिरि सुमंत पुर आयो ।

कहिहै कहा प्रानपति की गति, नृपति बिकल उठि धायो ॥ १ ॥

पाँय परत मंत्री अति व्याकुल, नृपं उठाइ उर लायो ।

दसरथ-दसा देखि न कह्यो कछु हरि जो सँदेस पठायो ॥ २ ॥

बूझि न सकत कुसल प्रीतम की हृदय यहै-पछितायो ।

साँचेहु सुत-बियोग सुनिबे कहँ धिग बिधि मोहिँ जिआयो ॥ ३ ॥

तुलसीदास प्रभु जानि निठुर हैं न्याय नाथ बिसरायो ॥

हा ! रघुपति कहि परगौ अवनि जनु जल ते' मीन बिलगायो ॥ ४ ॥ ५६ ॥

मुएहु न मिटैगो मेरो मानसिक पछिताउ ।

नारिबस न बिचारि कीन्हों काज, सोचत राउ ॥ १ ॥

तिलक को बोल्यो, दियो बन, चौगुनो चित चाउ ।

हृदय दाड़िम ज्यों न बिदरयो समुझि सील सुभाउ ॥ २ ॥

सीय रघुवर लषन बिनु, भय भभरि भगी न आउ ।

मोहिँ बूझि न परत यातें कौन कठिन कुचाउ ॥ ३ ॥

सुनि सुमंत ! कि आनि सुंदर सुवन सहित जिआउ ।

दास तुलसी नतरु मोको मरन-अमिय पिआउ ॥ ४ ॥ ५७ ॥

अवध बिलोकि हैं जीवत रामभद्र-बिहीन ।

कहा करि हैं आइ सानुज भरत धरमधुरीन ॥ १ ॥

राम-सोक-सनेह-संकुल, तनु बिकल, मनु लीन ।

द्वटि तारो गगन-मग ज्ये' होत छिन छिन छीन ॥ २ ॥

हृदय समुझि सनेह सादर प्रेम-पावन-मीन ।

करी तुलसीदास दसरथ प्रीति-परमिति पीन ॥ ३ ॥ ५८ ॥

राग गौरी

करत राउ मन मों अनुमान ।

सोक-बिकल मुख बचन न आवै बिछुरे कृपानिधान ॥ १ ॥

राज देन कहि बोलि नारि-बस मैं जो कह्यौ बन जान ।

आयसु सिर धरि चले हरषि हिय कानन भवन समान ॥ २ ॥

ऐसे सुत के बिरह-अवधि लौं जौ राखैं यह प्रान ।

तौ मिटि जाइ प्रीति की परमिति अजस सुनौं निज कान ॥ ३ ॥

राम गए अजहूँ हैं जीवत समुक्त हिय अकुलान ।

तुलसिदास तनु तजि रघुपति हित कियो प्रेम परवान ॥४॥५६॥

ऐसे तैं क्यों कटु बचन कह्यो, री ?

‘राम जाहु कानन’ कठोर तेरो कैसे धौं हृदय रह्यो री ॥ १ ॥

दिनकर-बंस, पिता दसरथ से, राम लषन से भाई ।

जननी ! तू जननी ? तौ कहा कहाँ, विधि केहि खोरि न लाई ? ॥२॥

हैं लहिहैं सुख राजमातु है, सुत सिर छत्र धरैगो ।

कुल-कलंक मल-मूल मनोरथ तव विलु कौन करैगो ? ॥ ३ ॥

ऐहैं राम, सुखी सब हैहैं, ईस अजस मेरो हरिहैं ।

तुलसिदास मोको बड़ो सोच है तू जनम कौनि विधि भरिहै ॥४॥६०॥

ताते हैं देव न दूषन तोहूँ ।

रामबिरोधी उर कठोर ते प्रगट कियो है विधि मोहूँ ॥ १ ॥

सुंदर सुखद सुसील सुधानिधि, जरनि जाइ जिहि जोए ।

विष-वारुनी-बंधु कहियत बिधु ! नातो मिटत न घोए ॥ २ ॥

होते जौ न सुजान-सिरोमनि राम सब के मन माहीं ।

तौ तेरी करतूति, मातु ! सुनि, प्रीति प्रतीति कहा हीं ? ॥ ३ ॥

मृदु मंजुल सीँची-सनेह सुचि सुनत भरत-बर-बानी ।

तुलसी ‘साधु साधु’ सुर नर मुनि कहत प्रेम पहिचानी ॥४॥६१॥

जो पै हैं मातु मते महुँ हैहैं ।

तौ जननी ! जग में या मुख की कहाँ कालिमा ध्वैहैं ? ॥ १ ॥

क्यों हैं आजु होत सुचि सपथनि ? कौन मानिहै साँची ? ।

महिमा-मृगी कौन सुकृती की खल-बच-बिसिषन बाँची ? ॥ २ ॥

गहि न जाति रसना काहु की, कहाँ जाहि जोइ सूझै ।

दीनबंधु कारुण्य-सिंधु बिनु कौन हिये की बूझै ? ॥ ३ ॥

तुलसी रामबियोग-विषम-विष-बिकल नारिनर भारी ।

भरत-सनेहसुधा सींचे सब भए तेहि समय सुखारी ॥४॥६२॥

काहे को खोरि कैकथिहि लावौ ?

धरहु धीर बलि जाउँ, तात ! मोको आज बिधाता बावौं ॥ १ ॥

सुनिबे जोग बियोग राम को हैं न होउँ मेरे प्यारे ।

सो मेरे नयननि आगे तँ रघुपति बनहि सिधारे ॥ २ ॥

तुलसिदास समुझाइ भरत कहँ आँसु पोछि उर लाए ।

उपजी प्रीति जानि प्रभु के हित, मनहुँ राम फिरि आए ॥३॥६३॥

मेरो अवध धौं कहहु कहा है ।

करहु राज रघुराज-चरन तजि, लै लटि लोगु रहा है ॥ १ ॥

धन्य मातु, हैं धन्य लागि जेहि राज-समाज ढहा है ।

तापर मोकों प्रभु करि चाहत, सब बिनु दहन दहा है ॥ २ ॥

राम-सपथ कोउ कछू कहै जनि, मैं दुख दुसह सहा है ।

चित्रकूट चलिए सब मिलि, बलि, छमिए मोहिं हहा है ॥ ३ ॥

यों कहि भोर भरत गिरिवर को भारग बूझि गहा है ।

सकल संराहत एक भरत जग जनमि सुलाहु लहा है ॥ ४ ॥

जानहिं सिय रघुनाथ भरत को सील सनेह महा है ।

कै तुलसी जाको राम-नाम सों प्रेम-नेम निबहा है ॥५॥६४॥

भाई ! हैं अवध कहा रहि लैहैं ।

राम-लषन-सिय-चरन बिलोकन काल्हि काननहिं जैहैं ॥ १ ॥

जद्यपि मोतें, कै कुमातु तें, हूँ आई अति पोची ।

सन्मुख गए सरन राखहिंगे रघुपति परम सँकोची ॥ २ ॥

तुलसी यों कहि चले भोरहीं, लोग बिकल सँग लागे ।

जनु बन जरत देखि दारुन दव निकसि बिहंग मृग भागे ॥३॥६५॥

६४—लै लटि लोग रहा है—इसी धुन में लोग हैरान हो रहे हैं ।

सुक सों गहवर हिये कहै सारो ।

बीर कीर ! सिय राम लषन बिनु लागत जग अँधियारो ॥ १ ॥
 पापिनि चेरि, अयानि रानि, नृप हित अनहित न बिचारो ।
 कुलगुरु सचिव साधु सोचतु बिधि को न बसाइ उजारो ? ॥ २ ॥
 अवलोके न चलत भरि लोचन, नगर कोलाहल भारो ।
 सुने न बचन करुनाकर के जब पुर परिवार सँभारो ॥ ३ ॥
 भैया भरत भावते के सँग बन सब लोग सिधारो ।
 हम पँख पाइ पीँजरनि तरसत, अधिक अभाग हमारो ॥ ४ ॥
 सुनि खग कहत अंब ! मौंगी रहि समुझि प्रेमपथ न्यारो ।
 गए ते प्रभुहि पहुँचाइ फिरे पुनि करत करम गुन गारो ॥ ५ ॥
 जीवन जग जानकी लखन को मरन महीप सँवारो ।
 तुलसी और प्रीति की चरचा करत कहा कछु चारो ॥ ६ ॥ ६६ ॥

कहै सुक सुनिहिं सिखावन, सारो ! ।

बिधि करतब बिपरीत वाम गति, रामप्रेम-पथ न्यारो ॥ १ ॥
 को नर-नारि अवध खग मृग जेहि जीवन राम तें प्यारो ।
 विद्यमान सब के गवने बन, बदन करम को कारो ॥ २ ॥
 अंब अनुज प्रिय सखा सुसेवक देखि बिषाद बिसारो ।
 पंछी परबस परे पीँजरनि लेखो कौन हमारो ॥ ३ ॥
 रही नृप की, बिगरो है सब की, अब एक सँवार निहारो ।
 तुलसी प्रभु निज चरन-पीठ-मिस भरत-प्रान रखवारो ॥ ४ ॥ ६७ ॥

ता दिन सुंगबेरपुर आए ।

राम सखा ते समाचार सुनि बारि बिलोचन छाए ॥
 कुस साथरी देखि रघुपति की हेतु अपनपौ जानी ।
 कहत कथा सिय राम लषन की बैठेहि रैन बिहानी ॥
 भोरहि भरद्वाज आत्मम ह्वै करि निषादपति आगे ।

चले जनु तक्यो तड़ाग वृषित गज घोर घाम के लागे ॥
 वृक्षत 'चित्रकूट कहँ' जेहि तेहि मुनि बालकनि बतायो ।
 तुलसी मनहुँ फनिक मनि दूँढत निरखि हरषि हिय धायो ॥१॥६८॥

राग केदारा

बिलोके दूरि तेँ दोउ बीर ।

उर आयत, आजानु सुभग भुज, स्यामल गौर सरीर ॥ १ ॥
 सीस जटा, सरसीरुह लोचन, बने परिधन मुनिचीर ।
 निकट निषंग, संग सिय सोभित, करनि धुनत धनु तीर ॥ २ ॥
 मन अगहुँड़ तनु पुलक सिथिल भयो, नलिन नयन भरे नीर ।
 गड़त गोड़ मानों सकुच-पंक महँ, कढ़त प्रेम-बल धीर ॥ ३ ॥
 तुलसिदास दसा देखि भरत की उठि धाए अतिहि अधीर ।
 लिये उठाइ उर लाइ कृपानिधि बिरह-जनित हरि पीर ॥४॥६९॥

भरत भए ठाढ़े कर जोरि ।

हैं न सकत सामुहँ सकुचबस समुझि मातुकृत खोरि ॥ १ ॥
 फिरिहँ किधौँ फिरन कहिहँ प्रभु कलपि कुटिलता मोरि ।
 हृदय सोच, जल भरे बिलोचन, नेह देह भइ भोरि ॥ २ ॥
 बनवासी, पुरलोग, महामुनि किए हैं काठ के से कोरि ।
 दै दै स्रवन सुनिबे को जहँ तहँ रहे प्रेम मन बोरि ॥ ३ ॥
 तुलसी राम-सुभाव सुमिरि उर धरि धीरजहि बहोरि ।
 बोले बचन बिनीत उचित हित करुना-रसहि निचोरि ॥४॥७०॥

जानत हौँ सबही के मन की ।

तदपि कृपालु करौँ बिनती सोइ सादर सुनहु दीन हित जन की ॥१॥
 ए सेवक संतत अनन्य अति ज्यों चातकहि एक गति घन की ।
 यह विचारि गवनहु पुनीत पुर, हरहु दुसह आरति परिजन की ॥२॥

६९—धुनत = झड़ावश धनुष की डोरी पर मारते हैं ।

७०—कोरि = झीलछाल कर ।

मेरो जीवन जानिय ऐसेइ जियै जैसे अहि जासु गई मनि फन की ।
 मेटहु कुलकलंक कोसलपति आझा देहु नाथ मोहिँ बन की ॥ ३ ॥
 मोकों जोइ लाइय लागै सोइ, उतपति है कुमातु तेँ तन की ।
 तुलसिदास सब दोष दूरि करि प्रभु अब लाज करहु निज पन की ॥ ४ ॥ ७१ ॥
 तात ! विचारो धौं हैं क्यों आवौं ।

तुम्ह सुचि सुहृद सुजान सकल विधि, बहुत कहा कहि कहि ससुभावौं ॥ १ ॥
 निज कर खाल खैंचि या तनु तेँ जौ पितु पग पानहीं करावौं ।
 होंउँ न उम्ह न पिता दसरथ तेँ ; कैसे ताके बचन मेटि पति पावौं ॥ २ ॥
 तुलसिदास जाको सुजस तिहूँ पुर क्यों तेहि कुलहि कालिमा लावौं ।
 प्रभुखनिरखिनिरास भरतभए, जान्योहै सबहि भाँति विधिबावौं ? ॥ ३ ॥ ७२ ॥
 बहुरो भरत कह्यो कछु चाहैं ।

सकुच-सिंधु बोहित विवेक करि बुधि बल बचन निबाहैं ॥ १ ॥
 छोटे हुतैं छोह करि आए मैं सामुहैं न हेरो ।
 एकहि बार आजु विधि मेरो सील सनेह निबेरो ॥ २ ॥
 तुलसी जो फिरियो न बनै प्रभु तौ हैं आयसु पावौं ।
 घर फेरिए लषन लरिका हैं, नाथ साथ हैं आवौं ॥ ३ ॥ ७३ ॥
 रघुपति ! मोहिँ संग किन लीजै ? ।

बारबार 'पुर जाहु' नाथ ! केहि कारन आयसु दीजै ॥ १ ॥
 जद्यपि हैं अति अधम कुटिल मति अपराधिनि को जायो ।
 प्रनतपाल कोमल-सुभाव जिय जानि सरन तकि आयो ॥ २ ॥
 जो मेरे तजि चरन आन गति, कहैं हृदय कछु राखी ।
 तौ परिहरहु दयालु दीनहित प्रभु अभिअंतर-साखी ॥ ३ ॥
 ताते, नाथ ! कहैं मैं पुनि पुनि प्रभु पितु मातु गोसाईं ।
 भजन-हीन नरदेह वृथा खर खान फेरु की नाई ॥ ४ ॥
 बंधु-बचन सुनि सवन नयन राजीव नीर भरि आए ।
 तुलसिदास प्रभु परम कृपा गहि बाँह भरत उर लाए ॥ ५ ॥ ७४ ॥

काहेको मानत हानि हिये है ?

प्रीति नीति गुन सील धर्म कहँ तुम अवलंब दिये है ॥ १ ॥

तात ! जात जानिबे न ए दिन; करि प्रमान पितु-बानी ।

ऐहँ बेगि, धरहु धीरज उर कठिन कालगति जानी ॥ २ ॥

तुलसिदास अनुजहिं प्रबोधि प्रभु चरनपीठ निज दीन्हँ ।

मनहुँ सबनि के प्रान-पाहरू भरत सीस धरि लीन्हँ ॥ ३ ॥ ७५ ॥

बिनती भरत करत कर जोरे ।

दीनबंधु दीनता दीन की कबहुँ परै जिनि भोरे ॥ १ ॥

तुम्हसे तुम्हहिं नाथ मोको, मोसे जन तुमको बहुतेरे ।

इहै जानि पहिचानि प्रीति छमिए अघ औगुन मेरे ॥ २ ॥

यों कहि सीय-राम-पाँयनि परि लषन लाइ उर लीन्हँ ।

पुलक सरीर नीर भरि लोचन कहत प्रेम-पन कीन्हँ ॥ ३ ॥

तुलसी बीते अवधि प्रथम दिन जो रघुवीर न ऐहौ ।

तो प्रभु-चरन-सरोज-सपथ जीवत परिजनहि न पैहौ ॥ ४ ॥ ७६ ॥

अवसि हैं आयसु पाइ रहँगो ।

जनमि कैकयी-क्रोखि कृपानिधि ! क्यों कछु चपरि कहँगो ॥ १ ॥

‘भरत भूप, सिय राम लषन बन,’ सुनि सानंद सहँगो ।

पुर परिजन अवलोकि मातु सब सुख संतोष लहँगो ॥ २ ॥

प्रभु जानत जेहि भाँति अवधि लौं बचन पालि निबहँगो ।

आगे की बिनती तुलसी तव जब फिरि चरन गहँगो ॥ ३ ॥ ७७ ॥

प्रभु सों मैं ढीठो बहुत दई है ।

कीबो छमा नाथ आरति तेँ कही कुजुगुति नई है ॥ १ ॥

यों कहि बार बार पाँयनि परि पाँवरि पुलकि लई है ।

अपनो अदिन देखि हैं डरपत जेहि विष बेलि बई है ॥ २ ॥

आए सदा सुधारि गोसाईँ जन तेँ बिगरि गई है ।

थके बचन पैरत सनेह-सरि परयो मानो घोर घई है ॥ ३ ॥

चित्रकूट तेहि समय सबनि की बुद्धि विषाद हई है ।
तुलसी राम-भरत के बिछुरत सिला सप्रेम भई है ॥४॥७८॥

जब ते चित्रकूट ते आए ।

नंदिग्राम खनि अवनि, डासि कुस, परनकुटी करि छाए ॥ १ ॥
अजिन बसन, फल असन, जटा धरे रहत अवधि चित दीन्हें ।
प्रभुपद-प्रेमनेमव्रत निरखत मुनिन्ह नमित मुख कीन्हें ॥ २ ॥
सिंहासन पर पूजि पादुका बारहिं बार जोहारे ।
प्रभु-अनुराग माँगि आयसु पुरजन सब काज सँवारे ॥३॥
तुलसी ज्यों ज्यों घटत तेज तनु त्यों त्यों प्रीति अधिकाई ।
भए, न हैं, न होहिंगे कबहुँ भुवन भरत से भाई ॥४॥७९॥

राग रामकली

राखी भगति भलाई भली भाँति भरत ।

स्वारथ परमारथ पथी जय जय जग करत ॥ १ ॥
जो व्रत मुनिवरनि कठिन मानस आचरत ।
सो व्रत लिए चातक ज्यों सुनत पाप हरत ॥ २ ॥
सिंहासन सुभग राम-चरन-पीठ धरत ।
चालत सब राजकाज आयसु अनुसरत ॥ ३ ॥
आपु अवध, बिपिन बंधु, सोच जरनि जरत ।
तुलसी सम बिषम, सुगम अगम लखि न परत ॥४॥८०॥
मोहिं भावति, कहि आवति नहिं भरतजू की रहनि ।
सजल नयन, सिथिल बयन प्रभु-गुन-गान कहनि ॥ १ ॥
असन-बसन-अयन-सयन धरम-गारुअ-गहनि ।
दिन दिन पन प्रेम नेम निरुपधि निरबहनि ॥ २ ॥
सीता-रघुनाथ-लषन-बिरह-पीर सहनि ।
तुलसी तजि उभय लोक रामचरन-चहनि ॥ ३ ॥ ॥ ८१ ॥

जानी है संकर हनुमान लषन भरत-रामभगति ।
 कहत सुगम, करत अगम, सुनत मीठी लगति ॥ १ ॥
 लहत सकृत् चहत सकल, जुग जुग जगमगति ।
 राम-प्रेम-पथ तेँ कबहुँ डोलति नहिं डगति ॥ २ ॥
 अधि, सिधि, बिधि चारि सुगति जा बिनु गति अगति ।
 तुलसी तेहि सनमुख बिनु बिषय-ठगिनि ठगति ॥३॥८२॥

राग गौरी

कैकयी करी धौं चतुराई कौन ? ।
 राम लषन सिय बनहिं पठाए, पति पठए सुरभौन ॥ १ ॥
 कहा भलो धौं भयो भरत को लगे तरुन-तन दौन ।
 पुरबासिन्ह के नयन नीर बिनु कबहुँ तो देखति हैं न ॥ २ ॥
 कौसल्या दिन राति बिसूरति बैठि मनहिं मन मौन ।
 तुलसी उचित न होइ रोइबो प्रान गए संग जौ न ॥३॥८३॥

हाथ मीजिबो हाथ रह्यो ।

लगी न संग चित्रकूटहु तेँ ह्यौ कहा जात बह्यो ॥ १ ॥
 पति सुरपुर, सिय राम लषन बन, मुनिव्रत भरत गह्यो ।
 हैं रहि घर मसान-पावक ज्यों मरिबोइ मृतक दह्यौ ॥ २ ॥
 मेरोइ हिय कठोर करिबे कहँ बिधि कहँ कुलिस लह्यो ।
 तुलसी बन पहुँचाइ फिरी सुत, क्यों कछु परत कह्यौ ? ॥३॥८४॥

राग सोरठ

हैं तो समुझि रही अपने सो ।
 राम लषन सिय को सुख मो कहँ भयो, सखी ! सपने सो ॥ १ ॥
 जिन्हके विरह बिषाद बँटावन खग मृग जीव दुखारी ।
 मोहि कहा सजनी समुझावति हैं तिन्हकी महतारी ॥ २ ॥

८४—मरिबोइ मृतक दह्यो = मानो मृत्यु रूपी मृतक को ही जला डाला है अर्थात् मैं मरती भी नहीं हूँ ।

भरत-दसा सुनि, सुमिरि भूपगति, देखि दीन पुरबासी ।
तुलसी 'राम' कहति हैं सकुचति हैं जग उपहाँसी ॥ ३ ॥ ८५ ॥

आली ! हैं इन्हहिं बुझावौ कैसे ? ।

लेत हिये भरि भरि पति को हित, मातुहेतु सुत जैसे ॥ १ ॥
बार बार हिहिनात हेरि उत जो बोलै कोउ द्वारे ।
अंग लगाइ लिए बारे तेँ करुनामय सुत प्यारे ॥ २ ॥
लोचन सजल, सदा सोवत से, खान पान बिसराए ।
चितवत चौंकि नाम सुनि, सोचत राम-सुरति उर आए ॥ ३ ॥
तुलसी प्रभु के बिरह बधिक हठि राजहंस से जोरे ।
ऐसेहु दुखित देखि हैं जीवति राम लषन के घोरे ॥ ४ ॥ ८६ ॥

राघौ ! एक बार फिरि आवौ ।

ए बर बाजि विलोकि आपने बहुरो बनहिं सिधावौ ॥ १ ॥
जे पय प्याइ पोखि कर-पंकज बार बार चुचुकारे ।
क्यों जीवहिं, मेरे राम लाड़िले ! ते अब निपट बिसारे ॥ २ ॥
भरत सौगुनी सार करत हैं अति प्रिय जानि तिहारे ।
तदपि दिनहिं दिन होत भाँवरे मनहुँ कमल हिम-मारे ॥ ३ ॥
सुनहु पथिक ! जो राम मिलहिं बन कहियो मातु सँदेसो ।
तुलसी मोहिं और सबहिन तेँ इन्हको बड़ो अँदेसो ॥ ४ ॥ ८७ ॥

राग केदारा

काहू सों काहू समाचार ऐसे पाए ।

चित्रकूट तेँ राम लषन सिय सुनियत अनत सिधाए ॥ १ ॥
सैल, सरित, निर्भर, बन, मुनिथल देखि देखि सब आए ।
कहत सुनत सुमिरत सुखदायक मानस सुगम सुहाए ॥ २ ॥
बड़ि अवलंब बाम-बिधि-विघटित, बिषम विषाद बढ़ाए ।
सिरिस सुमन सुकुमार मनोहर बालक बिंध्य चढ़ाए ॥ ३ ॥

अवध सकल नर नारि विकल अति अँकनि वचन अनभाए ।
तुलसी राम-वियोग-सोग-बस समुझत नहिँ समुझाए ॥४॥८८॥

सुनी मैं, सखि ! मंगल चाह सुहाई ।

सुभ पत्रिका निषादराज की आजु भरत पहुँ आई ॥ १ ॥

कुँवर सो कुसल-छेम अलि ! तेहि पल कुलगुरु कहँ पहुँचाई ।

गुरु कृपालु संभ्रम पुर घर घर सादर सबहि सुनाई ॥ २ ॥

बधि विराध, सुर साधु सुखी करि, ऋषि सिख आसिष पाई ।

कुंभज सिष्य समेत संग सिय मुदित चले दोउ भाई ॥ ३ ॥

बीच बिंध्य रेवा सुपास थल वसे हैं परन-गृह छाई ।

पंथ-कथा रघुनाथ पथिक की तुलसिदास सुनि गाई ॥४॥८९॥

— — —

अरग्य कांड

राग मलार

देखे राम-पथिक नाचत मुदित मोर ।

मानत मनहुँ सतड़ित ललित घन, धनु सुरधनु, गरजनि टंकोर ॥ १ ॥
कँपै कलाप बर बरहि फिरावत, गावत कल कोकिल-किसोर ।
जहँ जहँ प्रभु बिचरत तहँ तहँ सुख दंडकवन कौतुक न थोर ॥ २ ॥
सघन छाँह तम-रुचिर रजनि भ्रम, बदन-चंद चितवत चकोर ।
तुलसी मुनि खग मृगनि सराहत भए हैं सुकृत सब इन्हकी ओर ॥ ३ ॥ १ ॥

राग कल्याण

सुभग सरासन सायक जोरे ।

खेलत राम फिरत मृगया बन बसति सो मृदु मूरति मन मोरे ॥
पीत बसन कटि, चारु चारि सर, चलत कोटि नट सो वृन तोरे ।
स्यामल तनु स्रम-कन राजत ज्यों नव घन सुधा-सरोवर खोरे ॥
ललित कंध, बर भुज, बिसाल उर, लेहि कंठ-रेखै चित चोरे ।
अवलोकत मुख देत परम सुख लेत सरद-ससि की छवि छोरे ॥
जटा मुकुट सिर सारस-नयननि गौं हैं तकत सुभौंह सकोरे ।
सोभा अमित समाति न कानन, उमगि चली चहुँ दिसि मिति फोरे ॥
चितवत चकित कुरंग कुरंगिनि सब भए मगन मदन के भोरे ।
तुलसिदास प्रभु बान न मोचत, सहज सुभाय प्रेमबस थोरे ॥ २ ॥

१—कँपै = कँपा कर । कलाप = मोर की पूछ ।

२—चलत..... तोरे = नट भी उनकी सुंदर हुत गति पर मोहित होकर
तिनका तोड़ते हैं जिसमें उन्हें नजर न लगे । (स्त्रियाँ बच्चों को नजर से बचाने के
लिए तिनका तोड़ने का डेटका करती हैं ।)

राग सौरठ

बैठे हैं राम लषन अरु सीता ।

पंचवटी बर परनकुटी तर कहैं कछु कथा पुनीता ॥

कपट-कुरंग कनकमनिमय लखि प्रिय सों कहति हंसि बाला ।

पाए पालिबे जोग मंजु मृग, मारेहुं मंजुल छाला ॥

प्रिया-बचन सुनि बिहंसि प्रेमबस गवहिं चाप सर लीन्हें ।

चल्यो भाजि फिरि फिरि चितवत मुनिमख-रखवारे चीन्हें ॥

सोहति मधुर मनोहर मूरति हेम-हरिन के पाछे ।

धावनि, नवनि, बिलोकनि, बिथकनि बसै तुलसि उर आछे ॥ ३ ॥

राग कल्यान

कर सर धनु, कटि रुचिर निषंग ।

प्रिया-प्रीति-प्रेरित बन बीथिन्ह विचरत कपट-कनक-मृग संग ॥

भुज बिसाल, कमनीय कंध उर, सम-सीकर सोहैं साँवरे अंग ।

मनु मुकुता मनि-मरकतगिरि पर लसत ललित रवि-किरनि प्रसंग ॥

नलिन नयन, सिर जटा मुकुट बिच सुमन-माल मनु सिव-सिर गंग ।

तुलसिदास ऐसी मूरति की बलि, छवि,

बिलोकि लाजै अमित अनंग ॥ ४ ॥

राग केदारा

राघव, भावति मोहि बिपिन की बीथिन्ह धावनि ।

अरुन-कंज-बरन चरन सोकहरन, अंकुस कुलिस केतु अंकित अवनि ॥

सुंदर स्यामल अंग, बसन पीत सुरंग, कटि निषंग परिकर मेरवनि ।

कनक-कुरंग संग साजे कर सर चाप, राजिवनयन इत उत चितवनि ॥

सोहत सिर मुकुट जटा पटल, निकर सुमन लता सहित, रची बनवनि ।

तैसेई सम-सीकर रुचिर राजत मुख, तैसिए ललित अकुटिन्ह की नवनि ॥

३—गवहिं = धीरे से, चुपचाप ।

४—मेरवनि = मिलान । भँवनि = अभ्रमण, धूमना । पवनि = पावन, पवित्र ।

देखत खग-निकर, मृग रवनिन्ह जुत, थकित बिसारि जहाँ तहाँ की भँवनि ।
हरि-दरसन-फल पायो है ज्ञान बिमल, जाँचत भगति मुनि चाहत जवनि ॥
जिन्हके मन मगन भए हैं रस सगुन, तिन्हके लेखे अगुन मुकुति कवनि ।
सवन-सुख करनि, भवसरिता तरनि, गावत तुलसिदास कीरति पवनि ॥ ५ ॥

राग सोरठ

रघुबर दूरि जाइ मृग मारयो ।

लखन पुकारि, राम हरए कहि मरतहुँ बैर सँभारयो ॥
सुनहु तात ! कोउ तुम्हहिँ पुकारत प्राननाथ की नाई ।
कह्यो लषन हयौ हरिन, कोपि सिय हठि पठ्यो बरिआई ॥
बंधु बिलोकि कहत तुलसी-प्रभु “भाई ! भली न कीन्हीं ।
मेरे जान जानकी काहु खल छल करि हरि लीन्हीं” ॥ ६ ॥

आरत बचन कहति बैदेही ।

बिलपति भूरि बिसूरि ‘दूरि गए मृग सँग परम सनेही’ ॥
कहे कटु बचन, रेख नाँघी मैं, तात छमा सो कीजै ।
देखि बधिक-बस राज मरालिनि लषन लाल छिनि लीजै ॥
बनदेविनि सिय कहन कहति यों छल करि नीच हरी हैं ।
गोमर-कर सुरधेनु, नाथ ! ज्यों त्यों पर-हाथ परी हैं ॥
तुलसिदास रघुनाथ-नाम-धुनि अकनि गीध धुकि धायो ।
‘पुत्रि पुत्रि ! जनि डरहि, न जैहै नीचु ? मीचु हैं आयो’ ॥ ७ ॥

फिरत न बारहिं बार पचारयो ।

चपरि चोच चंगुल हय हति, रथ खंड खंड करि डारयो ॥
बिरथ बिकल कियो, छीनि लीन्हि सिय, धन धायनि अकुलान्यौ ।
तब असि काढ़ि काटि पर पाँवर लै प्रभु-प्रिया परान्यौ ॥
रामकाज खगराज आजु लरयो जियत न जानकि त्यागी ।
तुलसिदास सुर सिद्ध सराहत धन्य बिहँग बड़भागी ॥ ८ ॥

राग गौरी

हेम को हरिन हनि फिरे रघुकुल-मनि
 लषन ललित कर लिए मृगछाल ।
 आस्रम आवत चले, सगुन न भए भले,
 फरके बाम बाहु लोचन बिसाल ॥ १ ॥
 संरित जल मलिन, सरनि सूखे नलिन,
 अलि न गुंजत, कल कूजें न मराल ।
 कोलिनि कोल किरात जहाँ तहाँ बिलखात,
 बन न बिलोकि जात खग-मृग-माल ॥ २ ॥
 तरु जे जानकी लाए, ज्याये हरि करि कपि,
 हेरैं न हुँकरि, भरै फल न रसाल ।
 जे सुक सारिका पाले, मातु ज्यों ललकि लाले,
 तेरु न पढ़त, न पढ़ावै मुनिबाल ॥ ३ ॥
 समुक्ति सहमे सुठि, प्रिया तौ न आई उठि,
 तुलसी बिबरन परन-चन-साल ।
 औरै सो सब समाजु, कुसल न देखैं आजु
 गहबर हिय कहैं कोसलपाल ॥ ४ ॥ ६ ॥
 आस्रम निरखि भूले, द्रुम न फले न फूले,
 अलि खग मृग मानो कबहुँ न हे ।
 मुनि न मुनिबधूटी, उजरी परनकुटी,
 पंचबटी पहिचानि ठाढ़े रहे ॥ १ ॥
 उठी न सलिल लिये प्रेम प्रमुदित हिये
 प्रिया, न पुलकि प्रिय बचन कहे ।
 पल्लव-सालन हेरी, प्रानबल्लभा न टेरी,
 बिरह बिथकि लखि लषन गहे ॥ २ ॥
 देखे रघुपति-गति बिबुध बिकल अति,

तुलसी गहन बिनु दहन दहे ।
 अनुज दियो भरोसो, तौलों है सोचु खरो सो,
 सिय-समाचार प्रभु जौलों न लहे ॥ ३ ॥ १० ॥

राग सोरठ

जबहिं सिय-सुधि सब सुरनि सुनाई ।
 भए सुनि सजग बिरहसरि पैरत थके थाह सी पाई ॥
 कसि तूनीर तीर धनु-धर-धुर धीर बीर दोउ भाई ।
 पंचबटी गोदहि प्रनाम करि कुटी दाहिनी लाई ॥
 चले वृक्षत बन बेलि बिटप खग मृग अलि अवलि सुहाई ।
 प्रभु की दसा सो समौ कहिबे को कबि उर आह न आई ॥
 रटनि अकनि पहिचानि गीध फिरे करुनामय रघुराई ।
 तुलसी रामहिं प्रिया बिसरि गई सुमिरि सनेह सगाई ॥ ११ ॥
 मेरे एकौ हाथ न लागी ।

गयो बपु वीति बादि कानन ज्यों कलपलता दव दागी ॥
 दसरथ सों न प्रेम प्रतिपाल्यौ हुतो जो सकल जग साखी ।
 बरबस हरत निसाचरपति सों हठि न जानकी राखी ॥
 मरत न मैं रघुबीर बिलोके तापस वेष बनाए ।
 चाहत चलन प्रान पाँवर बिनु सिय-सुधि प्रभुहि सुनाए ॥
 बारबार कर मीजि सीस धुनि गीधराज पछिताई ।
 तुलसी प्रभु कृपालु तेहि औसर आइ गए दोउ भाई ॥ १२ ॥
 राधौ गीध गोद करि लीन्हों ।

नयन-सरोज सनेह-सलिल सुचि मनहुँ अरधजल दीन्हों ॥
 सुनहु लषन ! खगपतिहि मिले बन मैं पितु-मरन न जान्यौ ।
 सहि न सक्यौ सो कठिन बिधाता बड़ा पछु आजुहि भान्यौ ॥
 बहु विधि राम कह्यौ तनु राखन परम धीर नहिं डोल्याँ ।

११-गोदहिं = गोदावरी को । आह = हिम्मत, साहस ।

रोकि प्रेम, अवलोकि बदनविधु बचन मनोहर बोल्यौ ॥
तुलसी प्रभु भूठे जीवन लागि समय न धोखे लैहौं ।
जाको नाम मरत मुनि दुर्लभ तुमहिं कहाँ पुनि पैहौं ? ॥ १३ ॥

नीके कै जानत राम हियो है ।

प्रनतपाल, सेवक-कृपालु-चित, पितु पटतरहि दियो हैं ॥
त्रिजगजोनि-गत गीध जनम भरि खाइ कुजंतु जियो हैं ।
महाराज सुकृती-समाज सब-ऊपर आजु कियो हैं ॥
स्रवन बचन, मुख नाम, रूप चख, राम उछंग लियो हैं ।
तुलसी मो समान बड़भागी को कहि सकै वियो हैं ॥ १४ ॥

मेरे जान तात कछू दिन जीजै ।

देखिय आपु सुवन-सेवासुख मोहिं पितु को सुख दीजै ॥
दिब्य-देह इच्छा-जीवन जग विधि मनाइ मँगि लीजै ।
हरि हर सुजस सुनाइ, दरस दै लोग कृतारथ कीजै ॥
देखि बदन, सुनि बचन अमिय, तन रामनयन-जल भीजै ।
बोल्यो बिहग बिहँसि 'रघुबर बलि कहौं सुभाय पतीजै ॥
मेरे मरिबे सम न चारि फल होंहि तौ क्यों न कहीजै ?' ॥
तुलसी प्रभु दियो उत्तर मौन हीं परी मानो प्रेम-सहीजै ॥ १५ ॥

मेरो सुनियो, तात ! सँदेसो ।

सीय-हरन जनि कहेहु पिता सों, ह्वैहैं अधिक अँदेसो ॥
रावरे पुन्यप्रताप-अनल महुँ अलप दिननि रिपु दहिहैं ।
कुल समेत सुरसभा दसानन समाचार सब कहिहैं ॥
सुनि प्रभु-बचन राखि उर मूरति चरनकमल सिर नाई ।
चल्यो नम सुनत राम-कल-कीरति अरु निज भाग बड़ाई ॥
पितु ज्यों गीध-क्रिया करि रघुपति अपने धाम पठायो ।
ऐसो प्रभु बिसारि तुलसी सठ तू चाहत सुख पायो ॥ १६ ॥

राग सूहे

सबरी सोइ उठी, फरकत बाम बिलोचन बाहु ।
 सगुन सुहावने सूचत मुनि-मन-अगम उछाहु ॥
 मुनि-अगम उर आनंद, लोचन सजल, तनु पुलकावली ।
 रत्न-पर्नसोल बनाइ, जल भरि कलस, फल चाहन चली ॥
 मंजुल मनोरथ करति, सुमिरति विप्र-बरबानी भली ।
 ज्यों कल्प-बेलि सकेलि सुकृत सुफूल-फूली सुख-फली ॥१॥
 प्रानप्रिय पाहुने ऐहैं राम लषन मेरे आजु ।
 जानत जन-जिय की मृदु चित राम गरीबनिवाजु ॥
 मृदु चित गरीबनिवाज आजु विराजि हैं गृह आइकै ।
 ब्रह्मादि संकर गौरि पूजित पूजिहौं अब जाइकै ॥
 लहि नाथ हौं रघुनाथ-बानो पतितपावन पाइकै ।
 दुहुँ ओर लाहु अघाइ तुलसी तीसरेहु गुन गाइकै ॥ २ ॥
 दोना रुचिर रचे पुरन कंद मूल फल फूल ।
 अनुपम अमियहु ते अंबक अवलोकत अनुकूल ॥
 अनुकूल अंबक अंब ज्यों निज डिंभ हित सब आनिकै ।
 सुंदर सनेह सुधा सहस जनु सरस राखे सानिकै ॥
 छन भवन, छन बाहर बिलोकति पंथ भू पर पानिकै ।
 दोउ भाइ आये शवरिका के प्रेम-पन पहचानिकै ॥ ३ ॥
 सवन सुनत चली आवत देखि लषन रघुराउ ।
 सिथिल सनेह कहै, 'है सपना बिधि कैधों सति भाउ' ॥
 सति भाउ कै सपनो ? निहारि कुमार कोसलराय के ।
 गहे चरन जे अघहरन नत-जन-बचन-मानस-काय के ॥
 लघु-भाग-भाजन उदधि उमग्यो लाभ सुख चित चाय कै ।
 सो जननि ज्यों आदरी सानुज, राम भूखे भाय के ॥ ४ ॥
 प्रेम पट पाँवड़े देत सुअरघ बिलोचन-बारि ।

आस्रम लै दिए आसन पंकज-पाँय पखारि ॥
 पद-पंकजात पखारि पूजे पंथ-सम-विरहित भये ।
 फल फूल अंकुर मूल धरे सुधारि भरि दोना नये ॥
 प्रभु खात पुलकित गात, स्वाद सराहि आदर जनु जये ।
 फल चारिहु फल चारि दहि परचारि फल सवरी दये ॥ ५ ॥
 सुमन बरषि हरषे सुर, मुनि मुदित सराहि सिहात ।
 केहि रुचि केहि छुधा सानुज माँगि माँगि प्रभु खात !
 प्रभु खात माँगत, देति सवरी राम भोगी जाग के ।
 पुलकत प्रसंसत सिद्ध सिव सनकादि भाजन-भाग के ॥
 बालक सुमित्रा कौसिला के पाहुने फल साग के ।
 सुनु समुझि तुलसी जानु रामहिं बस अमल अनुराग के ॥ ६ ॥
 रघुवर अँचइ उठे सवरी करि प्रनाम कर जेरि ।
 हैं बलि बलि गई पुरई मंजु मनोरथ मोरि ॥
 पुरई मनोरथ स्वारथहु परमारथहु पून करी ।
 अघ अवगुनन्हि की कोठरी करि कृपा मुदमंगल भरी ॥
 तापस किरातिनि कोल मृदु मूरति मनोहर मन धरी ।
 सिर नाइ आयसु पाइ गवने परमनिधि पाले परी ॥ ७ ॥
 सिय-सुधि सब कही नख सिख निरख निरख दोउ भाइ ।
 दै दै प्रदच्छिना करति प्रनाम न प्रेम अघाइ ॥
 अति प्रीति मानस राखि रामहि, राम-धामहिं सो गई ।
 तेहि मातु ज्यों रघुनाथ अपने हाथ जलअंजलि दई ॥
 तुलसी-भनित सवरी-प्रनति, रघुवर प्रकृति करुनामई ।
 गावत, सुनत, समुझत भगति हिय होय प्रभुपद नित नई ॥ ८ ॥ १७ ॥

१७—फलचारि हू.....सवरी दये = चारो फलों (अर्थ, धर्म आदि) को
 (शवरी के दिए) चार फलों से जलाकर जलकारकर शवरी को फल दिए
 अर्थात् शवरी को चारों फलों से कहीं बढ़कर फल दिए ।

किष्किधा कांड

राग केदारा

भूषन बसन बिलोकत सिय के ।

प्रेम-बिबस मन, कंप पुलक तनु, नीरजनयन नीर भरे पिय के ॥
सकुचत कहत, सुमिरि उर उमगत, सील सनेह सुगुनगन तिय के ।
स्वामिदसा लखि लषन सखा कपि, पिघले हैं आँच माठ मानो धिय के ॥
सोचत हानि मानि मन, गुनि गुनि, गये निघटि फल सकल सुकिय के ।
बरने जामवंत तेहि अवसर, बचन विवेक बीररस विय के ॥
धीर बीर सुनि समुझि परसपर, बल उपाय उघटत निज हिय के ।
तुलसिदास यह समझ कहे तें कबि लागत निपट निठुर जड़ जिय के ॥१॥

प्रभु कपि-नायक बोलि कह्यो है ।

बरषा गई, सरद आई, अब लागि नहिं सिय-सोधु लह्यो है ।
जा कारन तजि लोकलाज तनु राखि बियोग सह्यो है ।
ताको तौ कपिराज आज लागि कछु न काज निबह्यो है ॥
सुनि सुग्रीव समीत नमित-मुख उतरु न देन चह्यो है ।
आइ गए हरि-जूथ देखि उर पूरि प्रमोद रह्यो है ।
पठये बदि बदि अवधि दसहुँ दिसि, चले बलु सबनि गह्यो है ।
तुलसी सिय लागि भवदधि-निधि मनु फिर हरि चहत मह्यो है ॥२॥

सुंदर कांड

राग केदारा

रजायसु राम को जब पायो ।

गाल मेलि मुद्रिका मुदित मन पवनपूत सिर नायो ॥
भालुनाथ नल नील साथ चले, बली बालि को जायो ।
फरकि सुअँग भए सगुन, कहत मानो मग मुद-मंगल छायो ॥
देखि बिबर सुधि पाइ गीध सों सबनि अपनो बलु मायो ।
सुमिरि राम, तकि तरकि तोयनिधि लंक लूक सो आयो ॥
खोजत घर घर जनु दरिद्र-मनि फिरत लागि धन धायो ।
तुलसी सिय बिलोकि पुलक्यो तनु भूरिभाग भयो भायो ॥ १ ॥

देखी ज्ञानकी जब जाइ ।

परम धीर समीरसुत के प्रेम उर न समाइ ॥
कृस सरीर सुभाय सोभित, लगी उड़ि उड़ि धूलि ।
मनहुँ मनसिज मोहनी-मनि गयो भोरे भूलि ॥
रटति निसि बासर निरंतर राम राजिवनैन ।
जात निकट न बिरहिनी-अरि अकनि ताते बैन ॥
नाथ के गुनगाथ कहि कपि दई मुँदरी डारि ।
कथा सुनि उठि लई कर वर रुचिर नाम निहारि ॥
हृदय हरष बिषाद अति पति-मुद्रिका पहिचानि ।
दास तुलसी दसा सो केहि भाँति कहै बखानि ? ॥ २ ॥

राग सोरठ

बोलि, बलि, मुँदरी ! सानुज कुसल कोसलपालु ।
अमिय बचन सुनाइ मेटहि बिरह-ज्वाला-जालु ॥

कहत हित अपमान मैं कियो, होत हिय सोइ सालु ।
 रोष छमि सुधि करत कबहुँ ललित लछिमन लालु ? ॥
 परस्पर पति देवरहि का होति चरचा चालु ।
 देवि ! कहु केहि हेत बोले बिपुल बानर भालु ॥
 सीलनिधि समरथ सुसाहिब दीनबंधु दयालु ।
 दास तुलसी प्रभुहि काहु न कहगो मेरो हालु ॥ ३ ॥
 रदल सलषन हैं कुसल कृपालु कोसल-राउ ! ।
 सील-सदन सनेह-सागर सहज सरल सुभाउ ॥
 नौद भूख न देवरहि परिहरे को पछिताउ ।
 धीरधुर रघुबीर को नहिं सपनेहुँ चित चाउ ॥
 सोधु बिनु, अनुरोधु ऋतु के, बोध बिहित उपाउ ।
 करत हैं सोइ समय साधन फलति बनत बनाउ ॥
 पठए कपि दिसि दसहुँ जे प्रभुकाज कुटिल न काउ ।
 बोलि लियो हनुमान करि सनमान जानि समाउ ॥
 दई हैं संकेत कहि कुसलात सियहि सुनाउ ।
 देखि दुर्ग बिसेषि जानकि जानि रिपु-गति आउ ॥
 कियो सीय प्रबोध मुँदरी, दियो कपिहि लखाउ ।
 पाइ अवसर नाइ सिर तुलसीस गुनगन गाउ ॥ ४ ॥
 सुवन समीर को धीर धुरीन बीर बड़ोइ ।
 देखि गति सिय मुद्रिका की बाल ज्यों दियो रोइ ॥
 अकनि कटु बानी कुटिल की क्रोध-बिंध्य बढ़ोइ ।
 सकुचि सम भयो ईस-आयसु-कलसभव जिय जोइ ॥
 बुद्धि बल साहस पराक्रम अछत राखे गोइ ।
 सकल साज समाज साधक समउ कहै सब कोइ ॥
 उतरि तरु तें नमत पद, सकुचात सोचत सोइ ।

५—कलसभव = अगस्त्य, जिन्होंने बिंध्यपर्वत को बढ़ने से रोक दिया था ।

चुके अवसर मनहुँ सुजनहिं सुजन सनमुख होइ ॥
 कहे वचन बिनीत प्रीति प्रतीति नीति निचोइ ।
 सीय सुनि हनुमान जान्यौ भली भाँति भलोइ ॥
 देवि ! बिनु करतूति कहिबो जानिहैं लघु लोइ ।
 कहौंगो मुख की समरसरि कालि कारिख धोइ ॥
 करत कछू न बनत हरिहिय हरष सोक समोइ ।
 कहत मन तुलसीस लंका करहुँ सघन घमोइ ॥ ५ ॥

राग केदारा

हैं रघुवंसमनि को दूत ।

मानु मानु प्रतीति जानकि ! जानि मारुतपूत ॥
 मैं सुनी बातैं असैली जे कही निसिचर नीच ।
 क्यों न मारै गाल बैठो काल-डाढ़नि बीच ॥
 निदरि अरि रघुबीर-बल लै जाउँ जौ हठि आज ।
 डरौं आयसु-भंग तेँ, अरु बिगरिहै सुरकाज ॥
 बाँधि बारिधि, साधि रिपु दिन चारि में दोउ बीर ।
 मिलहिंगे कपि-भालु-दल सँग, जननि उर धरु धीर ॥
 चित्रकूट कथा कुसल कहि सीस नायो कीस ।
 सुहृद सेवक नाथ को लखि दर्ई अचल असीस ॥
 भये सीतल स्रवन तन मन सुने वचन-पियूष ।
 दास तुलसी रही नयननि दरस ही की भूख ॥ ६ ॥
 तात ! तोहूँ सों कहत होति हियें गलानि ।

मन को प्रथम पन समुझि अछत तनु

लखि नइ गति भइ मति मलानि ॥

५—तुलसीस = हनुमान । घमोइ = सत्यानाशी या भंडभाँड़ नाम का पौधा जो खंडहरों में प्रायः उगता है ।

६—असैली = शैलीविरुद्ध, रीति-नीति-विरुद्ध ।

पिय को बचन परिहरयो जिय के भरोसे,

संग चली वन बड़ा लाभ जानि ।

पीतम-बिरह तौ सनेह सरबसु, सुत !

औसर को चूकिबो सरिस न हानि ॥

आरज-सुवन के तो दया दुवनहुँ पर,

मोहिँ सोच मोते सब बिधि नसानि ।

आपनी भलाई भलो कियो नाथ सबही को,

मेरे ही दिन सब बिसरी बानि ॥

नेम तौ पपीहा ही के, प्रेम प्यारो मीन ही के,

तुलसी कही है नीके हृदय आनि ।

इतनी कही सो कही सीय, ज्योंहीं त्योंहीं,

रहो, प्रीति परी सही, बिधि सों न बसानि ॥७॥

मातु काहे को कहति अति बचन दीन ?

तब की तुहीं जानति, अब की हौं हीं कहत,

सब के जिय की जानत प्रभु प्रवीन ॥

ऐसे तो सोचहिँ न्याय-निठुर-नायक-रत

सलभ, खग, कुरंग, कमल, मीन ।

करुनानिधान को तो ज्यों ज्यों तनु छीन भयो

त्यों त्यों मनु भयो तेरे प्रेम पीन ॥

सिय को सनेह, रघुबर की दसा सुमिरि

पवनपूत देखि भयो प्रीति-लीन ।

तुलसी जन को जननी प्रबोध कियो,

“समुझि तात ! जग बिधि-अधीन” ॥ ८ ॥

राग जयतश्री

कहु कपि कब रघुनाथ कृपा करि, हरिहँ निज वियोग-संभव दुख ।

राजिवनयन मयन-अनेक-छवि रविकुल-कुमुद सुखद मयंक-मुख ॥

विरह-अनल स्वासा-समीर निज तनु जरिबे कहँ रही न कछु सक ।
 अति बल जल बरषत दोउ लोचन दिन अरु रैन रहत एकहिँ तक ॥
 सुदृढ़ ज्ञान अवलंबि सुनहु सुत ! राखति प्राण विचारि दहन मत ।
 सगुन रूप, लीला-बिलास-सुख सुमिरति करति रहति अंतरगत ॥
 सुनु हनुमंत ! अनंत-बंधु करुना सुभाव सीतल कोमल अति ।
 तुलसिदास यहि त्रास जानि जिय वरु दुख सहैं प्रगट कहि न संकति ॥६॥

राग केदारा

कबहूँ, कपि ! राघव आवहिंगे ? ।

मेरे नयन चकोर प्रीतिवस राकाससि मुख दिखरावहिंगे ॥
 मधुप मराल मोर चातक हैं लोचन बहु प्रकार धावहिंगे ।
 अंग अंग छवि भिन्न भिन्न सुख निरखि निरखि तहँ तहँ छावहिंगे ॥
 विरह-अग्नि जरि रही लता ज्यों कृपादृष्टि-जल पलुहावहिंगे ।
 निज-वियोग-दुख जानि दयानिधि मधुर बचन कहि समुभावहिंगे ॥
 रावनबध रघुनाथ-बिमल-जस नारदादि मुनिजन गावहिंगे ।
 यह अभिलाष रैन दिन मेरे राज बिभीषन कब पावहिंगे ॥
 तुलसिदास प्रभु मोहजनित भ्रम भेद बुद्धि कब बिसरावहिंगे ? ॥१०॥

सत्य बचन सुनु मातु जानकी ! ।

जन के दुख रघुनाथ दुखित अति, सहज प्रकृति करुनानिधान की ॥
 तुव वियोग-संभव दारुन दुख बिसरि गई महिमा सुबान की ।
 नतु कहु कहँ रघुपति-सायक-रवि, तम-अनीक कहँ जातुधान की ॥
 कहँ हम पसु साखामृग चंचल बात कहौं मैं बिद्यमान की ।
 कहँ हरि सिव-अज-पूज्य ज्ञानघन नहिं बिसरति वह लगनि कान की ॥
 तुव दरसन, सँदेस सुनि हरि को बहुत भई अवलंब प्राण की ।
 तुलसिदास गुन सुमिरि राम के प्रेम मगन नहिं सुधि अपान की ॥११॥

राग कान्हरा

रावन ! जु पै राम रन रोषे ।

को कहि सकै सुरासुर समरथ विसिष काल-दसननि तेँ चोषे ॥१॥

तपबल, भुजबल कै सनेह-बल सिव विरंचि नीकी बिधि तोषे ।

सो फल राजसभाज सुवन जन, आपुन नास आपने पोषे ॥

तुला पिनाक, साहु नृप, त्रिभुवन भट बटोरि सबके बल जोषे ।

परसुराम से सूर-सिरोमनि पल में भए खेत के धोषे ॥

कालि की बात बालि की सुधि करि समुझिहि ता हित खोलि झरोषे ।

कहगो कुमंत्रिन को न मानिए, बड़ी हानि, जिय जानि त्रिदोषे ॥

जासु प्रसाद जनमि जग पुरषनि सागर सृजे, खने अरु सोखे ।

तुलसिदास सो खामि न सूझ्यो नयन बीस मंदिर के से मोखे ॥१२॥

राग मारू

जो हैं प्रभु-आयसु लै चलतो ।

तौ यहि रिस तोहिं सहित दसानन जातुधान दल दलतो ॥

रावन सो रसराज सुभट-रस सहित लंक खल खलतो ।

करि पुटपाक नाक-नायकहित घने घने घर घलतो ॥

बड़े समाज लाज-भाजन भयो, बड़ो काज बिनु छल तो ।

लंकनाथ ! रघुनाथ-बैरु-तरु आजु फैलि फूलि फलतो ॥

कालकरम दिगपाल सकल जग जाल जासु करतल तो ।

ता रिपु सों पर भूमि रारि रन जीवन मरन सुथल तो ॥

देखी मैं दसकंठ-सभा संब, मोंतेँ कोउ न सबल तो ।

तुलसी अरि उर आनि एक अब एती गलानि न गलतो ॥ १३ ॥

१२—मोखे = गवाप्त, झरोखा ।

१३—रसराम = पारा । खलतो = खरल में डालकर घोट डालता । बिनु छल तो = बिना छल के या अर्थात् होता । अरि उर.....गलतो = इस प्रकार एक एक शत्रु को (अर्थात् उनके बल को) समझ बूझ कर भी ।

तौलों, मातु ! आपु नीके रहिबो ।

जौलों हौं ल्यावौं रघुबीरहिं, दिन दस और दुसह दुख सहिबो ॥

सोखि कै खेत कै, बाँधि सेतु करि, उतरिबो उदधि न बोहित चहिबो ।

प्रबल दनुज-दल दलि पल आध में, जीवत दुरित-दसानन गहिबो ॥

वैरि-वृंद-बिधवा-वनितनि को, देखिबो वारि-विलोचन वहिबो ।

सानुज सेन समेत स्वामिपद निरखि परम मुद मंगल लहिबो ॥

लंक-दाह उर आनि मानिबो साँचु राम सेवक को कहिबो ।

तुलसी प्रभु सुर सुजस गाइहैं, मिटि जैहै सबको सोचु दव दहिबो ॥१४॥

कपि के चलत सिय को मनु गहबरि आयो ।

पुलक सिथिल भयो सरीर, नीर नयनन्हि छायो ॥

कहनचह्योसंदेस, नहिंकह्यो, पियकेजियकीजानि हृदय दुसह दुख दुरायो ।

देखि दसा व्याकुल हरीस, ग्रीषम के पथिक ज्यों धरनि तरनि-तायो ॥

मीचते नीच लगी अमरता, छल को न बल को निरखि थल परुष प्रेम पायो ॥

कै प्रबोध मातु प्रीति सौं असीस दीन्हौं हूँ है तिहारोई मन भायो ॥

करुना कोप लाज भय भरो कियो गौन, मौन हौं चरन-कमल सीस नायो ।

यह सनेह-सरबस समौ तुलसीरसना रूखी ताही ते परत गायो ॥१५॥

राग वसंत

रघुपति ! देखो आयो हनुमंत । लंकेस-नगर खेल्यो बसंत ।

श्रीराम-काजहित सुदिन सोधि । साथी प्रबोधि लाँघ्यो पयोधि ॥

सिय-पाँय पूजि आसिषा पाइ । फल अमिय सरिस खायो अघाइ ॥

कानन दलि होरी रचि बनाइ । हठि तेल बसन बालधि बँधाइ ॥

१५—गहबरि आयो = करुण से भर आया । मीच ते नीच.....प्रेम पायो = (सीताजी का ऐसा विरह दुःख देखकर) हनुमान जी को अपनी अमरता मृत्यु से भी अधिक दुःखदायिनी लगी, और उन्होंने उस स्थल पर बल छल का अवसर न देख अपने प्रेम को बहुत कठोर और दारुण पाया । समौ = प्रसंग अवसर ।

लिए ढोल चले सँग लोग लागि । बरजोर दर्ई चहुँ ओर आगि ॥
 आखत आहुति किए जातुधान । लखि लपट भभरि भागे बिमान ॥
 नभतल कौतुक, लंका बिलाप । परिनाम पचहि पातकी पाप ॥
 हनुमान-हाँक सुनि बरषि फूल । सुर बार बार बरनहि लँगूर ॥
 भरि भुवन सकल कल्यान-धूस । पुर जारि वारिनिधि बोरि लूस ।
 जानकी तोषि पोषेउ प्रताप । जय पवन-सुवन दलि दुअन-दाप ॥
 नाचहि कूदहि कपि करि बिनोद । पीवत मधु मधुवन मगन मोद ॥
 यों कहत लषन गहे पाँय आइ । मुनि सहित मुदित भेंट्यो ठाढ़ ॥
 लगे सजन सेनभयो हिय हुलास । जय जय जसगावततुलसिदास ॥१६॥

राग जयतश्री

सुनहु राम विश्रामधाम ! हरि जनकसुता, अति विपति जैसे सहति ।
 हे सौमित्रि-बंधु करुनानिधि मन महँ, रटति प्रगट नहिं कहति ॥
 निजपद-जलज बिलोकि सोकरत नयननि बारि रहत न एक छन ।
 मनहुँ नील नीरज ससि-संभव रवि वियोग दोउ स्रवत सुधाकन ॥
 बहु राक्षसी सहित तरु के तर तुम्हरे विरह निज जनम बिगोवति ।
 मनहुँ दुष्ट इंद्रिय संकट महँ बुद्धि-विवेक-उदय मगु जोवति ॥
 सुनि कपि वचन बिचारि हृदय हरि अनपायनी सदा सो एक मन ।
 तुलसिदास दुख-सुखातीतहरि सोच करत मानहुँ प्राकृत जन ॥१७॥

राग केदारा

रघुकुल-तिलक वियोग तिहारे ।

मैं देखी जब नाइ जानकी मनहु विरह-मूरति मन मारे ॥
 चित्र से नयन अरु गढ़े से चरन कर, मढ़े से सवन नहिं सुनति पुकारे ।
 रसना रटति नाम, कर सिर चिर रहै, नित निजपद-कमल निहारे ॥
 दरसन-आस-लालसा मन महँ राखे प्रभु ध्यान प्रान-रखवारे ।
 तुलसिदास पूजति त्रिजटा नीके रावरे गुन-गन-सुमन साँवरे ॥१८॥

अतिहि अधिक दरसन की आरति ।

राम-वियोग असोक-बिटप तर सीय निमेष कलप सम टारति ।

बार बार बर बारिजलोचन भरि भरि बरत बारि उर ढारति ।

मनहुँ विरह के सद्य घाय हिये लखि तकि तकि धरि धीरज तारति ।

तुलसिदास जद्यपि निसि वासर छिन छिन प्रभु मूरतिहि निहारति ।

मिटति न दुसह ताप तउ तनु की, यह बिचारि अंतर्गति हारति ॥ १६ ॥

तुम्हरे विरह भई गति जौन ।

चित दै सुनहु, राम करुनानिधि ! जानौं कछु पै सकौं कहि हैं न ।

लोचन-नीर कृपिन के धन ज्यों रहत निरंतर लोचनन-कोन ।

‘हा धुनि’-खगी लाज-पिंजरी महुँ राखि हिये बड़े बधिक हठि मौन ।

जेहि बाटिका वसति तहुँ खग मृग तजि तजि भजे पुरातन मौन ।

स्वास-समीर भेंट भइ भोरेहुँ तेहि मग पगु न धरयो तिहुँ पौन ।

तुलसिदास प्रभु ! दसा सीय की मुख करि कहत होति अति मौन ।

दीजै दरस दूरि कीजै दुख है तुम्ह आरत-आरति-दौन ॥ २० ॥

कपि के सुनि कल कोमल बैन ।

प्रेम पुलकि सब गात सिथिल भए, भरे सलिल सरसीरुह नैन ।

सिय-वियोग-सागर नागर मनु बूढ़न लग्यो सहित चित चैन ।

लही नाव पवनज प्रसन्नता, बरबस तहाँ गह्यो गुन मौन ।

सकत न बूझि कुसल, बूझे बिन गिरा बिपुल व्याकुल उर ऐन ।

ज्यों कुलीन सुचि सुमति बियोगिनि सनमुख सहै बिरह सर पैन ।

धरि धरि धीर बीर कोसलपति किए जतन सके उत्तर दै न ।

तुलसिदास प्रभु सखा अनुज सों सैनहिं कहाँ चलहु सजि सैन ॥ २१ ॥

१६-बरत = तपता हुआ, गरम । तारति = तरेरा या पानी की धारा देती है ।

२०-गौन = गौण, अर्थात् कहने में उसका महत्व नहीं आ सकता कम सा हो जाता है ।

राग मारु

जब रघुवीर पयानो कीन्हों ।

छुमित सिंधु, डगमगत महीधर, सजि सारंग कर लीन्हों ।
 सुनि कठोर टंकोर घोर अति चौंके बिधि त्रिपुरारि ।
 जटापटल ते चली सुरसरी सकत न संभु सँभारि ।
 भए बिकल दिगपाल सकल, भय भरे भुवन दसचारि ।
 खरभर लंक, ससंक दसानन, गर्भ खवहिं अरि-नारि ।
 कटकटात भट भालु बिकट मरकट करि केहरि-नाद ।
 कूदत करि रघुनाथ-सपथ उपरी-उपरा बदि बाद ।
 गिरि-तरुधर नख मुख कराल रद कालहु करत विषाद ।
 चले दस दिसि रिस भरि, धरु धरु कहि, को बराक मनुजाद ?
 पवन पंगु, पावक पतंग ससि दुरि गए, थके बिमान ।
 जाचत सुर निमेष, सुरनायक नयन-भार अकुलान ।
 गए पुरि सर धूरि, भूरि भय अग थल जलधि समान ।
 नभ निसान हनुमान हाँक सुनि समुझत कोउ न अपान ।
 दिगज कमठ कोल सहसानन धरत धरनि धरि धीर ।
 बारहिं बार अमरषत करषत करकै परों सरीर ।
 चली चमू, चहुँ ओर सोर, कछु बनै न बरने भीर ।
 किलकिलात, कसमसत, कोलाहल होत नीरनिधि-तीर ।
 जातुधानपति जानि कालवस मिले बिभीषन आइ ।
 सरनागत-पालक कृपालु क्रियो तिलक, लियो अपनाइ ।
 कौतुकहीं बारिधि बँधाइ उतरे सुबेल तट जाइ ।
 तुलसिदास गढ़ देखि फिरे कपि प्रभु आगमन सुनाइ ॥ २२ ॥

राग आसावरी

आए देखि दूत सुनि सोच सठ मन मैं ।

बाहर बजावैँ गाल भालु कपि कालबस,
 मोसे बीर सों चहत जीत्यो रारि रन मैं ।
 राम छाम, लरिका लषन, बालि-बालकहि
 घालि को गनत ? रीछ जल ज्यौं न घन मैं ।
 काज को न कपिराज, कायर कपिसमाज,
 मेरे अनुमान हनुमान हरि गन मैं ।
 समय सयानी मृदु बानी रानी कहै 'पिय !
 पावक न होइ जातुधान-बेनु-वन मैं ।
 तुलसी जानकी दिए स्वामी सों सनेह किये
 कुसल, नतरु सब ह्वै है छार छन मैं ॥ २३ ॥
 आपनी आपनी भौंति सब काहू कही है ।
 मंदोदरी, महोदर, मालवान महामति,
 राजनीति-पहुँच जहाँ लौं जाकी रही है ।
 महामद-अंध दसकंध न करत कान;
 मीचु-बस नीच हठि कुगहनि गही है ।
 हँसि कहै सचिव 'सयाने मोसों यों कहत,
 चहै मेरु उड़न वड़ी वयारि वही है ।
 भालु, नर, वानर अहार निसचरनि को,
 सोऊ नृप-बालकनि माँगी धारि लही है ।
 देखो कालकौतुक पिपीलिकनि पंख लागो,
 भृग मेरे लोगनि के भई चित-चही है ।
 तोसों न तिलोक आजु साहस समाज-साजु,
 महाराज-आयसु भो जोई सोई सही है ।

२३--बालि = बलुआ अर्थात् कुछ नहीं । रीछ...वन मैं = जामवंत
 जलहीन बाढ़ल के समान अर्थात् निस्सार है ।

तुलसी प्रनाम कै विभीषन बिनती करै
 'ख्याल, बेधे ताल, कपि केलि लंका दहो है' ॥ २४ ॥

दूसरो न देखतु साहिब सम रामै ।

बेदऊ पुरान कवि कोविद विरद-रत,
 जाको जस सुनत, गावत गुन ग्रामै ।

माया, जीव, जग-जाल, सुभाउ, करमकाल,
 सबको सासकु, सबमैं; सब जामैं ।

बिधि से करनिहार, हरि से पालनिहार,
 हर से हरनिहार जपैं जाके नामैं ।

सोइ नरबेष जानि, जन की बिनती मानि,
 मतो नाथ सोई जा तेँ भलो परिनामै ।

सुभट-सिरोमनि कुठारपानि सारिखेदू
 लखी औ लखाई इहाँ किए सुभसामैं ।

बचन-विभूषन विभीषन-वचन सुनि
 लागे दुख दूषन से दाहिनेउ बामैं ।

तुलसी हुमुकि हिये हन्यो लात, भले तात
 चल्यो सुरतरु ताकि तजि घोर धामैं ॥ २५ ॥

जाय माय पायँ परि कथा सो सुनाई है ।

समाधान करति विभीषन को बार बार,
 'कहा भयो तात लात मारे, बड़ो भाई है ।

साहिब पितु समान, जातुधान को तिलक,
 ताके अपमान तेरी बड़िए बड़ाई है ।

मरत गलानि जानि सनमानि सिख देति,
 रोष किए दोष, सहैं समुझें भलाई है ।

इहाँ तेँ बिमुख भये, राम की सरन गए
 भलो नेकु लोक राखे निपट निकारि हैं ।

मातु पग सीस नाइ, तुलसी असीस पाइ
चले भले सगुन कहत मन भाई है ॥ २६ ॥
भाई को सो करौं डरौं कठिन कुफेरै ।
सुकृत-संकट परजो जात गलानिन्ह गरजो,
'कृपानिधि को मिलौं पै मिलि कै कुबेरै' ।
जाइ गहे पाँय, धाइ धनद उठाइ भेट्यां,
समाचार पाइ पोच सोचत सुमेरै ।
तहँई मिले महेस, दियो हित-उपदेस,
'राम की सरन जाहि, सुदिनु न हेरै ।
जाको नाम कुंभज कलेस-सिंधु सोखिबे को,
मेरो कह्यो मानि, तात ! बाँधै जिनि बेरै ।
तुलसी मुदित चले, पाए हैं सगुन भले,
रंक लूटिबे को मानों मनिगन-ढेरै ॥ २७ ॥

राग केदारा

संकर सिख आसिष पाइकै ।

चले मनहिं मन कहत बिभीषन सीस महेसहि नाइकै ।
गए सोच, भए सगुन सुमंगल दस दिसि देत देखाइकै ।
सजल नयन, सानंद हृदय तनु प्रेम पुलक अधिकाइकै ।
अंतहु भाव भलो भाई को कियो अनभलो मनाइकै ।
भइ कूबर की लात बिधाता राखी बात बनाइकै ।
नाहित क्यों कुबेर घर मिलि हर हितु कहते चित लाइकै ।
जो सुनि सरन राम ताके मैं निज वामता बिहाइकै ।
अनायास अनुकूल सूलधर मग मुदमूल जनाइकै ।

२७—सुकृत-संकट = धर्मसंकट ।

२८—कूबर की लात = ऐसी लात जिससे कुबड़ी पीठ सीधी हो जाय,
अर्थात् बात बन जाय ।

कृपासिंधु सनमानि जानि जन दीन लियो अपनाइकै ।
 स्वारथ परमारथ करतलगत समपथ गयो सिराइकै ।
 सपने कै सौतुक सुख-सस सुर सींचत देत निराइकै ।
 गुरु गौरीस साँइ सीतापति हित हनुमानहिँ जाइकै ।
 मिलिहौं मोहिँ कहा कीबे अब अभिमत अवधि अघाइकै ।
 मरतो कहाँ जाइ को जानै लटि लालची ललाइकै ।
 तुलसिदास भजिहौं रघुवीरहिँ अभय-निसान बजाइकै ॥ २८ ॥

पदपद्म गरीबनिवाज के ।
 देखिहौं जाइ पाइ लोचन-फल हित सुर साधु समाज के ।
 गई-वहोर, और निरवाहक, साजक बिगरे साज के ।
 सबरी सुखद, गीध गतिदायक, समनसोक कपिराज के ।
 नाहिँन मोहिँ और कतहूँ कछु जैसे काग जहाज के ।
 आयो सरन सुखद पदपंकज चौंथे रावन बाज के ।
 आरतिहरन सरन समरथ सब दिन अपने की लाज के ।
 तुलसी पाहिँ कहत नत-पालक मोहूँ से निपट निकाज के ॥ २९ ॥

महाराज राम पहुँ जाउँगो ।
 सुख स्वारथ परिहरि करिहौं सोइ ज्यों साहिबहिँ सुहाउँगो ।
 सरनागत सुनि बेगि बोलिहैं, हौं निपटहिँ सकुचाउँगो ।
 राम गरीबनिवाज निवाजिहैं, जानिहैं ठाकुर ठाउँ गो ।
 धरिहैं नाथ हाथ माथे एहि तेँ केहि लाभ अघाउँगो ?
 सपनो सो अपनो न कछु लखि लघु लालच न लोभाउँगो ।
 कहिहौं बलि, रोटिहा रावरो बिनु मोलही बिकाउँगो ।
 तुलसी पट उतरे ओढ़िहौं, उबरी जूठनि खाउँगो ॥ ३० ॥

२८—सस = शस्य, खेती बारी ।

३०—ठाकुर ठाउँ गो = ठाकुर और ठिकाना नहीं रह गया ।

आइ सचिव विभीषन के कही ।

कृपासिंधु दसकंधबंधु लघु चरन-सरन आयो सही ।
विषम-विषाद-बारिनिधि बूढ़त थाह कपीस कथा लही ।
गये दुख दोष देखि पदपंकज अब न साध एकौ रही ।
सिथिल सनेह सराहत नखसिख नीक निकाई निरवही ।
तुलसी मुदित दूत भयो मानहुँ अमिय-लाहु माँगत मही ॥ ३१ ॥

बिनती सुनि प्रभु प्रमुदित भए ।

रोछराज, कपिराज, नील, नल बेलि बालिनंदन लए ।
बूझिये कहा ? रजाइ पाइ नय धरम सहित ऊतर दए ।
वली बंधु ताको जेहि विमोह-वस वैर-बीज बरवस वए ।
वाँह-पगार द्वार तेरे तै' सभय न कवहुँ फिरि गए ।
तुलसी असरन-सरन स्वामि के बिरद बिराजत नित नए ॥ ३२ ॥

हिय बिहँसि कहत हनुमान सों ।

सुमति साधु सुचि सुहृद विभीषन, बूझि परत अनुमान सों ।
'हैं बलि जाउँ, और को जानै ?' कही कपि कृपानिधान सों ।
छली न होइ स्वामि सनमुख ज्यों तिमिर सातहय-जान सों ।
खोटो खरो सभीत पालिए सो सनेह सनमान सों ।
तुलसी प्रभु कीबो जो भलो सोइ बूझि सरासन बान सों ॥ ३३ ॥

साँचेहु विभीषन आइ है ?

बूझत बिहँसि कृपालु, लषन सुनि कहत सकुचि सिर नाइ है ।
ऐहै कहा, नाथ ? आयो ह्यौं, क्यों कहि जाँति वनाइ है ।
रावन-रिपुहि राखि रघुबर बिनु को त्रिभुवनपति पाइ है ।
प्रभु प्रसन्न सब सभा सराहति दूत-वचन मन भाइ है ।
तुलसी बोलिये बेगि लषन सों भइ महाराज रजाइ है ॥ ३४ ॥

३३—सातहय-जान—सात घोड़े जिसके यान में जुते हैं अर्थात् सूर्य ।

चले लेन लषन हनुमान हैं ।

मिले मुदित ब्रूमि कुसल परसपर सकुचत करि सनमान हैं ।

भयो रजायसु पाँउ धारिष, बोलत कृपानिधान हैं ।

दूरि ते दीनबंधु देखे जनु देत अभय वरदान हैं ।

सील सहस हिमभानु तेज सत कोटि भानुहूँ के भानु हैं ।

भगतनि को हित कोटि मातुपितु, अरिन्ह को कोटि कृसानु हैं ।

जन्म गुन रज गिरि गति सकुचत निज गुन गिरि रज परमानु हैं ।

बाँह-पगारु बोल को अविचल, बेद करत गुनगान हैं ।

चारु चाप तूनीर तामरस करनि सुधारत बान हैं ।

चरचा चलति विभीषन की सोइ सुनत सुचित दै कान हैं ।

हरषत सुर वरषत प्रसून सुभ सगुन कहत कल्यान हैं ।

तुलसी ते कृतकृत्य जे सुमिरत समय सुहावनो ध्यान हैं ॥ ३५ ॥

रामहिं करत प्रणाम निहारिकै ।

छठे उमँगि आनंद-प्रेम-परिपूरन बिरद बिचारिकै ।

भयां बिदेह विभीषन उत्त, इत प्रभु अपनपौ बिसारिकै ।

भली भाँति भावते भरत ज्यों भेंट्यौ भुजा पसारिकै ।

सादर सबहिं मिलाइ समाजहिं निपट निकट बैठारिकै ।

ब्रूमत छेम कुसल सप्रेम अपनाइ भरोसे भारिकै ।

नाथ ! कुसल कल्यान सुमंगल विधि सुख सकल सुधारिकै ।

देत लेत जे नाम रावरो बिनय करत मुख चारि कै ।

जो मूरति सपने न बिलोकत मुनि महेस मन मारिकै ।

तुलसी तेहि हौं लियो अंक भरि, कहत कछु न सँवारिकै ॥ ३६ ॥

करुनाकर की करुना भई ।

मिटी मीचु, लहि लंक संक गइ, काहू सों न खुनिस खई ।

दसमुख तज्यो दूध-माखी ज्यों आपु काढि साढ़ी लई ।

भव-भूषण सोइ कियो बिभीषण मुद-मंगल-महिमामई ।
 बिधि हरि हर मुनि सिद्ध सराहत, मुदित देव दुंदुभी दई ।
 बारहिं बार सुमन बरषत, हिय हरषत कहि जै जै जई ।
 कौसिक सिला जनक संकट हरि भृगुपति की टारी टई ।
 खग भृगु सबर निसाचर सबकी पूँजी बिनु बाढ़ी सई ।
 जुग जुग कोटि कोटि करतव करनी न कछू बरनी नई ।
 राम-भजन-महिमा हुलसी हिय तुलसीद्व की बनि गई ॥ ३७ ॥

मंजुल मूरति मंगलमई ।

भयो बिसोक बिलोकि बिभीषण नेह देह सुधिसीव गई ।
 उठि दाहिनी ओर तेँ सनमुख सुखद माँगि बैठक लई ।
 नखसिख निरखि निरखि सुख पावत, भावत कछु कछु और गई ।
 बार कोटि सिर काटि साटि लटि रावन संकर पै लई ।
 सोइ लंका लखि अतिथि अनवसर राम तृनासन ज्यों दई ।
 प्रीति-प्रतीति-रीति-सोभासरि थाहत जहँ जहँ तहँ घई ।
 बाहु-बली, बानैत बोल को, बीर बिखबिजयी जई ।
 को दयालु दूसरो दुनी जेहि जरनि दीन-हिय की हई ? ।
 तुलसी काको नाम जपत जग जगती जामति बिनु बई ॥ ३८ ॥

सब भाँति बिभीषण की बनी ।

कियो कृपालु अभय कालहु तेँ गइ संसृति साँसति बनी ।
 सखा लषन हनुमान संभु गुरु धनी राम कोसलधनी ।
 हिय ही और और कीन्हों बिधि, रामकृपा औरै ठनी ।
 कलुष-कलंक कलेस-कोस भयो जो पद पाय रावन रनी ।
 सोइ पद पाय बिभीषण भो भव-भूषण दलि दूषण-अनी ।
 बाँह-पगार उदार-सिरोमनि नत-पालक पावन-पनी ।
 सुमन बरषि रघुवर-गुन बरनत हरषि देव दुंदुभी हनी ।

रंक-निवाज रंक राजा किए, गए गरब गरि गरि गनी ।
 राम-प्रनाम महा-महिमा-खनि सकल सुमंगलमनि जनी ।
 होय भलो ऐसे ही अजहुँ गये राम-सरन परिहरि मनी ।
 भुजा उठाइ साखि संकर करि कसम खाइ तुलसी भनी ॥ ३६ ॥

कहो क्यों न बिभीषन की बनै ?

गयो छाँड़ि छल सरन राम की जो फल चारि चार्यों जनै ।
 मंगलमूल प्रनाम जासु जग मूल अमंगल के खनै ।
 तेहि रघुनाथ हाथ माथे दियो, को ताकी महिमा भनै ? ।
 नाम-प्रताप पतित-पावन किए जे न अघाने अघ अनै ।
 कोउ उलटो कोउ सूधो जपि भए राजहंस बायस-तनै ।
 हुतो ललात कृसगात खात खरि मोद पाइ कोदो-कनै ।
 सो तुलसी चातक भयौ जाँचत राम स्याम सुंदर घनै ॥ ४० ॥

अति भाग बिभीषन के भले ।

एक प्रनाम प्रसन्न राम भए दुरित दोष दारिद दले ।
 रावन कुंभकरन बर माँगत सिव बिरंचि बाचा छले ।
 राम-दरस पायो अबिचल पद, सुदिन सगुन नीके चले ।
 मिलनि बिलोकि स्वामि सेवक की उकठे तरु फूल फले ।
 तुलसी सुनि सनमान बंधु को दसकंधर हँसि हिये जले ॥ ४१ ॥

गये राम सरन सबकौ भलो ।

गनी-गरीब, बड़ो छोटी, बुध मूढ़, हीनबल अति बली ।
 पंगु अंध निरगुनी निसंबल जो न लहै जाँचे जलो ।
 सो निबह्यो नीके जो जनमि जग राम-राजमारग चलो ।
 नाम-प्रताप-दिवाकर-कर खर गरत तुहिन ज्यों कलिमलो ।
 सुच हित नाम लेत भवनिधि तरि गयो अजामिल सो खलो ।

प्रभुपद-प्रेम प्रनाम कामतरु सद्य बिभीषन को फलो ।

तुलसी सुमिरत नाम सबनि को मंगलमय नभ जल थलो ॥ ४२ ॥

सुजस सुनि स्रवन हौं नाथ ! आयों सरन ।

उपल केवट गोध सबरी संसृत-समन,

सोक स्रमसीव सुग्रीव आरतिहरन ।

राम राजीव लोचन बिमोचन विपति,

श्याम नव तामरस-दाम बारिद-बरन ।

लसत जट जूट सिर चारु मुनि चीर कटि,

धीर रघुबीर तूनीर-सर-धनु-धरन ।

जातुधानेस भ्राता बिभीषन नाम

बंधु अपमान गुरु ग्लानि चाहत गरन ।

पतितपावन प्रनतपाल करुनासिंधु !

राखिए मोहिं सौमित्रि-सेवित-चरन ।

दीनता प्रीति संकलित मृदुबचन सुनि

पुलकि तन प्रेम, जल नयन लागे भरन ।

बोलि, लंकेस कहि अंक भरि भेंटि प्रभु,

तिलक दियो दीन-दुख-दोष-दारिद-दरन ।

रातिचर-जाति आराति सब भाँति गत,

कियो सो कल्याण-भाजन सुमंगल करन ।

दास तुलसी सदय हृदय रघुबंसमनि

पाहि कहे काहि कीन्हों न तारनतरन ? ॥ ४३ ॥

दीन-हित विरद पुराननि गायो ।

आरत-बंधु, कृपालु, मृदुल-चित जानि सरन हौं आयो ।

तुम्हरे रिपु को अनुज बिभीषन, बंस निसाचर जायो ।

सुनि गुन सील सुभाउ नाथ को मैं चरननि चितु लायो ।

जानत प्रभु दुख सुख दासनि को ताते कहि न सुनायो ।

करि करुना भरि नयन बिलोकहु तब जानौं अपनायो ।
 बचन बिनीत सुनत रघुनायक हँसि करि निकट बुलायो ।
 भेंट्यो हरि भरि अंक भरत ज्यों लंकापति मन भायो ।
 कर पंक्रजं सिर परसि अभय कियो, जन पर हेतु दिखायो ।
 तुलसिदास रघुबीर भजन करि को न परमपद पायो ? ॥ ४४ ॥

राग धनाश्री

सत्य कहैं मेरो सहज सुभाउ ।

सुनहु सखा कपिपति लंकापति तुम्हसन कौन दुराउ ।
 सब विधि हीन दीन अति जड़मति जाको कतहुँ न ठाउँ ।
 आयो सरन भजौं, न तजोतिहि, यह जानत ऋषिराउ ।
 जिन्हके हैं हित सब प्रकार चित नाहिँन और उपाउ ।
 तिनहिँ लागि धरि देह करौं सब, डरौं न सुजस नसाउ ।
 पुनि पुनि भुजा उठाइ कहत हैं सकल सभा पतिआउ ।
 नहिँ कोऊ प्रिय मोहिँ दास सम कपट प्रीति बहि जाउ ।
 सुनि रघुपति के बचन बिभीषन प्रेम मगन मन चाउ ।
 तुलसिदास तजि आस त्रास सब ऐसे प्रभुकहँ गाउ ॥ ४५ ॥

नाहिन भजिवे जोग बियो ।

श्रीरघुबीर समान आन को पूरन कृपा हियो ।
 कहहु कौन सुर सिला तारि पुनि केवट मीत कियो ? ।
 कौने गीध अधम को पितु ज्यों निज कर पिंड दियो ? ।
 कौन देव सबरी के फल करि भोजन सलिल पियो ? ।
 बालित्रास-बारिधि बूडत कपि केहि गहि बाहँ लियो ? ।
 भजन प्रभाउ बिभीषन भाष्यौ सुनि कपि-कटक जियो ।
 तुलसिदास को प्रभु कोसलपति सब प्रकार बरियो ॥ ४६ ॥

राग जयतश्री

कब देखैंगी नयन वह मधुर मूरति ?

राजिवदल-नयन, कोमल-कृपाअनन, मयननि बहु छवि अंगनि दूरति ।
सिरसि जटा-कलाप पानि सायक चाप उरसि रुचिर बनमाल लूरति ।
तुलसिदास रघुबीर की सोभा सुमिरि, भई है मगन नहिं तनकी सूरति ॥४७॥

राग केदारा

कहु कबहुँ देखिहैं आली ! आरज सुवन ।

सानुज सुभग-तनु, जब तेँ बिछुरे बन, तब तेँ दब सी लगी तीनिहूँ भुवन ।
मूरति सूरति किये प्रगट प्रीतम हिये, मन के करन चाहैं चरन छुवन ।
चित चढ़िगो बियोग दसा न कहिबे जोग, पुलकगात, लागे लोचन चुवन ।
तुलसी त्रिजटा जानी सिय अति अकुलानी मृदु बानी कह्यौ ऐहैं दवन-दुवन ।
तमीचर-तमहारी सुरकंज सुखकारी, रविकुल-रवि अब चाहत उवन ॥४८॥

अबलों मैं तोसों न कहे री ।

सुन त्रिजटा ! प्रिय प्राननाथ बिनु बासर निसि दुख दुसह सहे री ।
बिरह विषम बिष-बेलि बढ़ी उर, ते सुख सकल सुभाय दहे री ।
सोइ सींचिबे लागि मनसिज के रहैट नयन नित रहत नहे री ।
सर-सरीर सुखे प्रान बारिचर जीवन आस तजि चलनु चहे री ।
तैं प्रभु-सुजस-सुधा सीतल करि राखे तदपि न तृप्ति लहै री ।
रिपु-रिस घोर नदी बिबेक बल, धीर सहित हुते जात बहे री ।
दै मुद्रिका-टेक तेहि औसर, सुचि समीरसुत पैरि गहे री ।
तुलसिदास सब सोच पोच मृग मन कानन भरि पूरि रहे री ।
अब सखि सिय संदेह परिहरु हिय आइ गए दोउ बीर अहेरी ॥४९॥

राग बिलावल

सो दिन सोने को कहु कब ऐहै ?

जा दिन बंध्यौ सिंधु त्रिजटा सुनु तू संभ्रम आनि मोहिं सुनैहै ।
बिखदवन सुर-साधु-सतावन रावन कियो आपनो पैहै ।

कनक-पुरी भयो भूप बिभीषन, बिबुध-समाज बिलोकन घैहै ।
 दिव्य दुंदुभी, प्रसंसिहैं मुनिगन, नभतल बिमल बिमाननि छैहैं ।
 बरषिहैं कुसुम भानुकुल-मनि पर, तब मोको पवनपूत लै जैहै ।
 अरुज सहित सोभिहैं कपिन महँ, तनु-छवि कोटि मनोज हितैहै ।
 इन नयनन्हि यहि भाँति प्रानपति, निरखि हृदय आनंद न समैहै ।
 बहुरो सदल, सनाथ, सलछिमन, कुसल कुसल बिधि अवध देखैहै ।
 गुरु, पुर लोग, सास, दोउ देवर, मिलत दुसह उर तपनि बुतैहै ।
 मंगल-कलस, बधावने घर घर, पै है माँगने जो जेहि भैहै ।
 विजय राम राजाधिराज को, तुलसिदास पावन जस गैहै ॥ ५० ॥

सिय ! धीरज धरिये राघौ अब ऐहैं ।

पवनपूत पै पाइ तिहारी सुधि सहज कृपालु बिलंब न लैहैं ।
 सेन साजि कपि भालु काल सम कौतुक ही पाथोधि बँधैहैं ।
 घेरोइ पै देखिबो लंकगढ़ बिकल जातुधानी पछितैहैं ।
 रावन करि परिवार अगमनो जमपुर जात बहुत सकुचैहैं ।
 तिलक सारि अपनाय बिभीषन अभय-बाँह दै अमर बसैहैं ।
 जय धुनि मुनि बरषिहैं सुमन सुर, व्योम बिमान निसान बजैहैं ।
 बंधु समेत प्रानवल्लभपद परसि सकल परिताप नसैहैं ।
 राम वाम दिसि देखि तुमहिं सब नयनवंत लोचन फल पैहैं ।
 तुम अति हित चितइहौ नाथ-तनु, बार बार प्रभु तुमहिं चितैहैं ।
 यह सोभा सुख समय बिलोकत काहू तो पलकैं नहिं लैहैं ।
 कपिकुल लखन सुजस जय जानकि सहित कुसल निज नगर सिधैहैं ।
 प्रेम पुलकि आनंद मुदित मन तुलसिदास कल कीरति गैहैं ॥ ५१ ॥

लंका कांड

राग मारू

मानु अजहूं सिष परिहरि क्रोधु ।

पिय पूरो आयो अब काहि कहु करि रघुबीर-विरोधु ।

जेहि ताडुका सुबाहु मारि मख राखि जनायो आपु ।

कौतुक ही मारीच-नीचमिस प्रगट्यौ विसिष-प्रतापु ।

सकल भूप बल गरव-सहित तोर्यौ कठोर सिवचापु ।

व्याही जेहि जानकी जीति जग हर्यौ परसुधर-दापु ।

कपट काक साँसति प्रसाद करि विनु स्रम वध्यो बिराधु ।

खर दूषन त्रिसिरा कबंध हति कियो सुखी सुर साधु ।

एकहि बान बालि मार्यो जेहि जो बल-उदधि अगाधु ।

कहु धौं कंत कुसल बीती कोहिँ किये राम-अपराधु ।

लाँधि न सके लोक-विजयी तुम जासु अनुज-कृत-रेषु ।

उतरि सिंधु जार्यो प्रचारि पुर जाको दूत बिसेषु ।

कृपासिंधु खलबन-कृसानु सम, जस गावत सुति शेषु ।

सोइ बिरुदैत बीर कोसलपति नाथ समुझि जिय देषु ।

मुनि पुलस्त्य के जस-मयंक महँ कत कलंक हठि होहि ।

और प्रकार उबार नहीं कहूँ मैं देख्यो जगु जोहि ।

चलु मिलु बेगि कुसल सादर सिय सहित अग्र करि मोहिँ ।

तुलसिदास प्रभु सरन सबद सुनि अभय करैगे तोहिँ ॥ १ ॥

राग कान्हरा

तू दसकंठ भले कुल जायो ।

तामहँ सिव-सेवा विरंचिबर, भुजबल विपुल जगत जस पायो ।

खर, दूषन, त्रिसिरा, कबंध रिपु जेहि बाली जमलोक पठायो ।
 ताको दूत पुनीत चरित हरि सुभ संदेस कहन हैं आयो ।
 श्रीमद नृप-अभिमान मोहबस जानत अनजानत हरि लायो ।
 तजि व्यलीक भजु कारुनीक प्रभु दै जानकिहि सुनहि समझायो ॥
 जाते तव हित होइ कुसल कुल अचल राज चलिहै न चलायो ।
 नाहिँत रामप्रताप-अनल मह है पतंग परिहै सठ धायो ।
 जद्यपि अंगद नीति परम हित कह्यौ तथापि न कछु मन भायो ।
 तुलसिदास सुनि बचन क्रोध अति पावक जरत मनहुँ धृत नायो ॥ २ ॥

तै मेरो मरम कछु नहि पायो ।

रे कपि कुटिल ढीठ पसु पाँवर ! मोहिं दास ज्यों डाटन आयो ।
 भ्राता कुंभकरन रिपुघातक, सुत सुरपतिहि बंदि कर ल्यायो ।
 निज भुजबल अति अतुल कहौ क्यों कंदुक लौं कैलास उठायो ।
 सुर नर असुर नाग खग किन्नर सकल करत मेरो मन भायो ।
 निसिचर रुचिर अहार मनुज-तनु ताको जस खल मोहि सुनायो ।
 कहा भयो बानर सहाय मिलि करि उपाय जो सिंधु बँधायो ।
 जो तरिहै भुज बीस घोरनिधि ऐसो को त्रिभुवन में जायो ? ।
 सुनि दससीस-बचन कपि-कुंजर बिहँसि ईसमायहि सिर नायो ।
 तुलसिदास लंकेस कालबस गनत न कोटि जतन समझायो ॥ ३ ॥

सुनु खल मैं तोहि बहुत बुझायो ।

एते मान सठ भयो मोहबस जानतहूँ चाहत विष खायो ।
 जगत-विदित अति बीर बालि-बल जानत हौ किधौ अब बिसरायो ।
 बिनु प्रयास सोड हत्यो एक सर सरनागत पर प्रेम देखायो ।
 पावहुगे निज करम जनित फल, भले ठौर हठि बैर बढ़ायो ।
 बानर भालु चपेट लपेटनि मारत तब हैहै पछितायो ।
 हैं ही दसन तोरिबे लायक कहा करौं जी न आयसु पायो ।
 अब रघुवीर बान बिदलित उर सोबहिगो रनभूमि सुहायो ।

अविचल राज्य विभीषन को सब जेहि रघुनाथ चरन चित लायो ।
तुलसिदास यहि भाँति वचन कहि गरजत चल्यो बालि-नृप-जायो ॥४॥

राग केदारा

राम लषन उर लाय लयें हैं ।

भरे नीर राजीवनयन सब अँग परिताप तये हैं ॥

कहत सशोक विलोकि बंधु-मुख बचन प्रोति गुथये हैं ।

सेवक सखा भगति भायप गुन चाहत अब अथये हैं ॥

निज कीरति करतूति, तात ! तुम सुकृती सकल जये हैं ।

मैं तुम्ह बिनु तनु राखि लोक अपने अपलोक लये हैं ॥

मेरे पन की लाज इहाँ लौं हठि प्रिय प्रान दये हैं ।

लागति साँगि विभीषन-ही पर सीपर आपु भये हैं ॥

सुनि प्रभु-बचन भालु कपि-गन सुर सोच सुखाइ गये हैं ।

तुलसी आइ पवनसुत-विधि मानो फिरि निरमये नये हैं ॥ ५ ॥

राग सोरठ

मोपै तौ न कछू हूँ आई ।

ओर निबाहि भली विधि भायप चल्यौ लषन सो भाई ॥

पुर पितु मातु सकल सुख परिहरि जेहि बन-बिपति बँटाई ।

ता सँग हैं सुरलोक सोक तजि सक्यौं न प्रान पठाई ॥

जानत हैं या उर कठोर तैं कुलिश कठिनता पाई ।

सुमिरि सँनेह सुमित्रा-सुत को दरकि दरार न जाई ॥

तात-भरन तिय-हरन गीध-बध भुज दाहिनी गँवाई ।

तुलसी मैं सब भाँति आपने कुलहि कालिमा लाई ॥ ६ ॥

मेरो सब पुरुषारथ थाको ।

बिपति बँटावन बंधु-बाहु बिनु करौं भरोसो काको ?

सुनु सुग्रीव साँचेहूँ मोपर फेरयो बदन बिधाता ।

५—सीपर=[फा० सिपर] ढाल ।

ऐसे समय समर-संकट हैं तज्यो लषन सो आता ॥
 गिरि कानन जैहैं शाखामृग हों पुनि अनुज सँघाती ।
 हूँहै कहा विभीषन की गति, रही सोच भरि छाती ॥
 तुलसी सुनि प्रभु-बचन भालु कपि सकल बिकल हिय हारे ।
 जामवंत हनुमंत बोलि तब औसर जानि प्रचारे ॥ ७ ॥

राग मारू

जो हों अब अनुसासन पावों ।
 तौ चंद्रमहि निचोरि चैल ज्यों आनि सुधा सिर नावों ॥
 कै पाताल दलों व्यालावलि अमृत-कुंड महि लावों ।
 भेदि भुवन करि भानु बाहिरो तुरत राहु दै तावों ॥
 विबुध-बैद बरबस आनों धरि तौ प्रभु अनुग कहावों ।
 पटकों मीच नीच मूषक ज्यों सबहि को पापु बहावों ॥
 तुम्हरिहि कृपा प्रताप तिहारेहि नेकु बिलंब न लावों ।
 दीजै सोइ आयसु तुलसीप्रभु जेहि तुम्हरे मन भावों ॥ ८ ॥

सुनि हनुमंत-बचन रघुबीर ।

सत्य समीर-सुवन सब लायक कह्यो राम धरि धीर ॥
 चाहिए बैद, ईस-आयसु धरि सीस कीस बलऐन ।
 आन्यो सदन-सहित सोवत ही जौलों पलक परै न ॥
 जियै कुँवर निसि मिलै मूलिका, कीन्हों विनय सुषेन ।
 उठ्यो कपीस सुमिरि सीतापति चल्यो सजीवनि लेन ॥
 कालनेमि दलि बेगि बिलोक्यौ द्रोनाचल जिय जानि ।
 देखी दिव्य ओषधी जहँ तहँ जरी न परि पहिचानि ॥
 लियो उठाय कुधर कंदुक ज्यों, बेग न जाइ बखानि ।
 ज्यों धाय गजराज उधारन सपदि सुदरसनपानि ॥
 आनि पहार जोहारे प्रभु, कियो बैदराज उपचार ।
 करुनासिंधु बंधु भेंट्यो, मिटि गयो सकल दुख भार ॥

मुदित भालु-कपि-कटक लह्यो जनु समर-पयोनिधि पार ।

बहुरि ठौरही राखि महीधर आयो पवनकुमार ॥

सेन सहित सेवकहि सराहत पुनि पुनि राम सुजान ।

बरषि सुमन हिय हरषि प्रसंसत बिबुध बजाइ निसान ॥

तुलसिदास सुधि पाइ निसाचर भए मनहुँ बिनु प्रान ।

परी भोरही रोर लंकगढ़, दई हाँक हनुमान ॥ ८ ॥

राग केदारा

कौतुक ही कपि कुधर लियो है ।

चल्यो नभ नाइ माथ रघुनाथहि, सरिस न बेग बियो है ॥

देख्यो जात जानि निसिचर बिनु फर सर हयो हियो है ।

परयो कहि राम, पवन राख्यो गिरि पुर तेहि तेज पियो है ॥

जाइ भरत भरि अंक भैंटि निज जीवन-दान दियो है ।

दुख लघु लषन मरम-घायल सुनि, सुख बड़ो कीस जियो है ॥

आयसु इतहि स्वामि-संकट उत, परत न कछू कियो है ।

तुलसिदास बिहरयो अकास सो कैसेकै जात सियो है ॥ १० ॥

भरत सत्रसुदन बिलोकि कपि चकित भयो है ।

राम लषन रन जीति अवध आए, कैधौ मोहिं भ्रम, कैधौ काहू कपट ठयो है ।

प्रेम पुलकि पहिचानि कै पदपदुम नयो है ।

कह्यो न परत जेहि भाँति दुहूँ भाइन सनेह सों सो उर लाय लयो है ॥

समाचार कहि गहरु भो, तेहि ताप तयो है ।

कुधर सहित चढ़ौ बिसिष, बेगि पठवों, सुनि हरिहिय गरव गूढ़ उपयो है ॥

तीर तेँ उतरि जस कह्यो चहै, गुनगननि जयो है ।

धनि भरत ! धनि भरत ! करत भयो मगन मौन रह्यो मन अनुराग रयो है ॥

यह जलनिधि खन्यो, मथ्यो, लँध्यो, बाँध्यो, अँचयो है ।

तुलसिदास रघुबीर-बंधु-महिमा को सिंधु तरि को कविं पाग गयो है ? ॥ ११ ॥

११—उपयो है = उत्पन्न हुआ है ।

होतो नहिं जो जग जनम भरत को ।
 तौ कपि कहत कृपान-धार-मग चलि आचरत बरत को ?
 धीरज-धरम-धरनि धर-धुरहू तैं गुरु धुर धरनि धरत को ?
 सब सद्गुन सनमानि आनि उर, अघ औगुन निदरत को ?
 सिबहु न सुगम सनेह रामपद सुजननि सुलभ करत को ।
 सृजि निज जस-सुरतरु तुलसी कह अभिमत फरनि फरत को ? ॥१२॥

सुनि रन घायल लषन परे हैं ।
 स्वामि-काज संग्राम सुभट साँ लोहे ललकारि लरे हैं ॥
 सुवन-सोक संतोष सुमित्रहि रघुपति-भगति बरे हैं ।
 छिन छिन गात सुखात छिनहि छिन हुलसत होत हरे हैं ॥
 कपि सों कहति सुभाय अंब के अंबक अंबु भरे हैं ।
 रघुनंदन बिनु बंधु कुअवसर जद्यपि धनु दुसरे हैं ॥
 'तात ! जाहु कपि सँग' रिपुसूदन उठि कर जोरि खरे हैं ।
 प्रमुदित पुलकि पैत पूरे जनु बिधिबस सुढर ढरे हैं ॥
 अंब-अनुज-गति लखि पवनज भरतादि गल्लानि गरे हैं ।
 तुलसी सब समुझाइ मातु तेहि समय सचेत करे हैं ॥१३॥

बिनय सुनाइबी परि पाय ।
 कहौ कहा कपीस तुम्ह सुचि सुमति सुहृद सुभाय ॥
 स्वामि-संकट-हेतु हौं, जड़ जननि जनम्यो जाय ।
 समौ पाइ कहाइ सेवक घट्यो तौ न सहाय ॥
 कहत सिथिल सनेह भो जनु धीर घायल घाय ।
 भरत-गति लखि मातु सब रहि ज्यों गुड़ी बिनु बाय ॥
 भेंट कहि कहिबो, कह्यो यों कठिन-मानस माय ।
 "लाल ! लोने लषन-सहित सुललित लागत नाँय" ॥
 देखि बंधु-सनेह अंब-सुभाउ, लषन कुठाय ।

तपत तुलसी तरनि त्रासकु एहि नये तिहुँ ताय ॥१४॥

हृदय-घाउ मेरे, पीर रघुबीरै ।

पाइ सजीवन जागि कहत यों प्रेमपुलकि बिसराय सरीरै ॥

मोहि कहा बूझत पुनि पुनि जैसे पाठ अरथ चरचा कीरै ।

सोभा सुख छति लाहु भूप कहँ, केवल कांति मोल हीरै ॥

तुलसी सुनि सौमित्रि-बचन सब धरि न सकत धीरौ धीरै ।

उपमा राम-लषन की प्रीति को क्यों दीजै खीरै-नीरै ॥ १५ ॥

राग कान्हरा

राजत राम काम-सत-सुंदर ।

रिपु रन जीति अनुज सँग सोभित, फेरत चाप विसिष बनरुह-कर ॥

स्याम सरीर रुचिर स्रमसीकर, सोनित-कन विच बीच मनोहर ।

जनु खद्योत-निकर हरिहित-गन भ्राजत मरकत-सैल-सिखर पर ॥

घायल बीर विराजत चहुँ दिसि, हरषित सकल ऋच्छ अरु वनचर ।

कुसुमित किंसुक-तरु-समूह महुँ तरुन तमाल बिसाल बिटप बर ॥

राजिव-नयन बिलोकि कृपा करि किए अभय मुनि नाग विबुध नर ।

तुलसिदास यह रूप अनूपम हिय सरोज वसि दुसह बिपतिहर ॥१६॥

राग आसावरी

अवधि आजु किधौ औरो दिन द्वै हैं ।

चढ़ि धौरहर बिलोकि दषिन दिसि बूझ धौं पथिक कहाँ ते आए वै हैं ॥

बहुरि बिचारि हारि हिय सोचति, पुलकिगात लागे लोचन च्वै हैं ।

निज बासरनि बरष पुरवैगो बिधि मेरे तहाँ करम कठिन कृत कै हैं ॥

बन रघुबीर, मातु गृह जीवति, निलज प्राण सुनि सुनि सुख स्वै हैं ।

तुलसिदास मोसी कठोर-चित कुलिससाल-भंजनि को द्वै हैं ॥१७॥

आली ! अब राम-लषन कित द्वै हैं ।

चित्रकूट तज्यौ तब तेँ न लही सुधि वधू-समेत कुसल सुत द्वै हैं ॥

बारि बयारि बिषम हिम आतप सहि बिनु बसन भूमितल स्वैहैं ।
 कंद मूल फल फूल असन बन, भोजन समय मिलत कैसे वैहैं ॥
 जिन्हहिं बिलोकि सोचिहैं लता द्रुम खग मृग मुनि लोचन जल च्वैहैं ।
 तुलसिदास तिन्हकी जननी हौं, मो सी निठुर चित औरो कहूँ ह्वैहैं ॥१८॥

राग सोरठ

बैठी सगुन मनावति माता ।

कब ऐहैं मेरे बाल कुसल घर कहहु काग फुरि बाता ॥
 दूध भात की दोनी दैहैं सोने चौंच मढ़ैहैं ।
 जब सिय सहित बिलोकि नयन भरि राम-लषन उर लैहैं ॥
 अवधि समीप जानि जननी जिय अति आतुर अकुलानी ।
 गनक बोलाइ पाँय परि पृच्छति प्रेम-मगन मृदु बानी ॥
 तेहि अवसर कोउ भरत निकट तेँ समाचार लै आयो ।
 प्रभु-आगमन सुनत तुलसी मनो मीन मरत जल पायो ॥ १९ ॥

राग गौरी

छेमकरी बलि बोलि सुबानी ।

कुसल छेम सिय राम लषन कब ऐहैं, अंब ? अवध रजधानी ॥
 ससिमुखि, कुंकुम-वरनि, सुलोचनि, मोचनि-सोचनि बेद वखानी ।
 देवि ! दया करि देहि दरसफल जोरि पानि बिनवहिं सब रानी ॥
 सुनि सनेहमय बचन निकट ह्वै मंजुल मंडल कै मढ़रानी ।
 सुभ मंगल आनंद गगन-धुनि अकनि अकनि उर जरनि जुड़ानी ॥
 फरकन लगे सुअंग बिदिसि दिसि, मन प्रसन्न दुख-दसा सिरानी ।
 करहिं प्रनाम सप्रेम पुलकि तनु मानि बिबिध बलि सगुन सयानी ॥
 तेहि अवसर हनुमान भरत सों कही सकल कल्याण-कहानी ।
 तुलसिदास सोइ चाह सजीवनि विषम वियोगव्यथा बड़ि भानी ॥२०॥

राग धनाश्री

मुनियत सागरसेतु बँधायो ।

कोसलपति की कुसल सकल सुधि कोंड इक दूत भरत पहुँ ल्यायो ॥

बध्मो विराध त्रिसिर खर दूषन, सुर्पनखा को रूप नसायो ।

हति कबंध, वल-अंध वालि दलि कृपासिंधु सुग्रीव बसायो ॥

सरनागत अपनाइ विभीषन रावन सकुल समूल बहायो ।

बिबुध-समाज निवाजि बाँह दै बंदिछोर बर बिरद कहायो ॥

एक एक सेाँ समाचार सुनि नगरलोग जहँ तहँ सब धायो ।

धन-धुनि अकनि मुदित मयूर ज्यों बूड़त जलधि पार सेा पायो ॥

‘अवधि आजु’, यों कहत परसपर बेगि बिमान निकट पुर आयो ।

उतरि अनुज अनुगनि समेत प्रभु गुरु द्विजगन सिर नायो ।

जो जेहि जोग राम तेहि बिधि मिलि सबके मन अति मोद बढ़ायो ।

भेंटी मातु, भरत, भरतानुज, क्यों कहैं प्रेम अमित अनमायो ।

तेही दिन मुनिवृंद अनंदित तुरत तिलक को साज सजायो ॥

महाराज रघुवंस-नाथ को सादर तुलसिदास गुन गायो ॥२१॥

राग जयतश्री

रन जीति राम राउ आए ।

सानुज सदल ससीय कुसल आजु अवध आनंद-बधाय ॥

अरिपुर जारि, उजारि, मारि रिपु, बिबुध सुबास बसाए ।

धरनि धेनु महिदेव साधु सबके सब सोच नसाये ॥

दई लंक, थिर थपे विभीषन, वचन पियूष पिआए ।

सुधा सींचि कपि, कृपा नगर-नर-नारि निहारि जिआए ॥

मिलि गुरु बंधु मातु जन परिजन भए सकल मन भाए ।

दरस-हरष दसचारि बरष के दुख पल में बिसराए ॥

बोलि सचिव सुचि सोधि सुदिन मुनि मंगल साज सजाए ।

महाराज अभिषेक बरषि सुर सुमन निसान बजाए ॥
 लै लै भेंट नृप अहिप लोकपति अति सनेह सिर नाए ।
 पूजि प्रीति पहिचानि राम आदरे अधिक अपनाए ॥
 दान मान सनमानि जानि रुचि जाचक जन पहिराए ।
 गये सोक-सर सूखि, मोद-सरिता-समुद्र गहिराए ॥
 प्रभु, प्रताप-रवि अहित-अमंगल-अघ-उलूक-तम ताए ।
 किये बिसोक हित-कोक-कोकनद, लोक सुजस सुभ छाए ॥
 राम राज कुलकाज सुमंगल सबनि सबै सुख पाए ।
 देहिं असीस भूमिसुर प्रमुदित प्रजा प्रमोद बढ़ाए ॥
 आसुम-धरम-बिभाग बेदपथ पावन लोग चलाए ।
 धर्म-निरत सिय-राम-चरन-रत मनहुँ राम-सिय-जाए ॥
 कामधेनु महि बिटप कामतरु कोउ बिधि बाम न लाये ।
 ते तब, अब तुलसी तेउ जिन्ह हित-सहित राम-गुन गाये ॥२२॥

राग टोड़ी

आजु अवध आनंद बधावन रिपु रन जीति राम आए ।
 सजि सुविमान निसान बजावत मुदित देव देखन धाए ॥
 घर घर चारु चौक चंदन मनि, मंगल-कलस सबनि साजे ।
 ध्वज पताक तोरन बितान बर, बिबिध भाँति बाजन बाजे ॥
 राम-तिलक सुनि दीप दीप के नृप आए उपहार लिये ।
 सीय सहित आसीन सिँहासन निरखि जोहारत हरष हिये ॥
 मंगल गान, वेदधुनि, जयधुनि मुनि-असीस-धुनि भुवन भरे ।
 बरषि सुमन सुर सिद्ध प्रसंसत, सबके सब संताप हरे ॥
 राम-राज भइ कामधेनु महि सुख संपदा लोक छाए ।
 जनम जनम जानकीनाथ के गुनगन तुलसिदास गाए ॥ २३ ॥

उत्तर कांड

राग सौरठ

वन ते' आइकै राजा राम भए भुवाल ।

मुदित चौदह भुवन, सब सुख सुखी सब सब काल ॥

मिटे कलुष कलैस कुलषन कपट कुपथ कुचाल ।

गए दारिद दोष दारुन दंभ दुरित दुकाल ॥

कामधुक महि, कामतरु तरु, उपल मनिगन लाल ।

नारि नर तेहि समय सुकृती भरे भाग सुभाल ॥

बरन-आस्रम-धरमरत, मन वचन वेष मराल ।

राम-सिय-सेवक सनेही साधु सुमुख रसाल ॥

राम-राज-समाज बरनत सिद्ध सुर दिगपाल ।

सुमिरि सो तुलसी अजहुँ हिय हरष होत बिसाल ॥ १ ॥

राग ललित

भोर जानकीजीवन जागे ।

सूत मागध प्रबीन, बेनु बीना धुनि द्वारे, गायक सरस राग रागे ॥

स्यामल सलोने गात, आलसबस जँभात प्रिया प्रेमरस पागे ।

उनों दे लोचन चारु, मुख सुषमा सिंगार हेरि हारे भार भूरि भागे ॥

सहज सुहाई छवि, उपमा न लहैं कवि, मुदित बिलोकन लागे ।

तुलसिदास निसि बासर अनूप रूप रहत प्रेम-अनुरागे ॥२॥

राग कल्यान

रघुपति राजीवनयन, सोसातनु कोटि मयन,

करुनारस-अयन चयन-रूप भूप, माई ।

देखो सखि अतुलित छवि, संत कंज-कानन-रवि

गावत कल कीरति कवि कोबिद समुदाई ॥

मज्जन करि सरजुतीर ठाढ़े रघुबंसबीर,
 सेवत पद कमल धीर निरमल चित लाई ।
 ब्रह्ममंडली-मुनींद्रवृंद-मध्य इंदुबदन
 राजत मुखसदन लोकलोचन-मुखदाई ॥
 बिशुरित सिररुह-बरुथ कुंचित बिच सुमन-जूथ,
 मनिजुत सिसु-फनि-अनीक ससि समीप आई ।
 जनु सभीत दै अँकोर राखे जुग रुचिर मोर,
 कुंडल-छवि निरखि चोर सकुचत अधिकाई ॥
 ललित भ्रुकुटि तिलक भाल चिबुक अधर द्विज रसाल,
 हास चारुतर, कपोल नासिका सुहाई ।
 मधुकर जुग पंकज बिच सुक बिलोकि नीरज पर
 लरत मधुप-अवलि मानो बीच कियो जाई ॥
 सुंदर पटपीत विसद, भ्राजत बनमाल उरसि,
 तुलसिका-प्रसून-रचित विविध विधि बनाई ।
 तरु तमाल अधबिच जनु त्रिविध कीरपाँति रुचिर,
 हेमजाल अंतर परि ताते न उड़ाई ॥
 शंकर-हृदि-पुंडरीक निसि बस हरि-चंचरीक,
 निर्व्यलीक मानस-गृह संतत रहे छाई ।
 अतिसय आनंदमूल तुलसिदास सानुकूल,
 हरन सकल सूल, अवध-मंडन रघुराई ॥ ३ ॥
 राजत रघुबीर धीर, भंजन भव-भीर, पीर
 हरन सकल सरजुतीर निरखहु, सखि ! सोहैं ।
 संग अनुज मनुज-निकर, दनुज-बल-विभंग-करन,
 अंग अंग छवि अनंग अगनित मन मोहैं ॥

३—बीच कियो = बीच बिचाव किया, बीच में पड़ कर रूगड़ा छुड़ाया ।
 निर्व्यलीक = कपट-रहित ।

सुखमा-सुख-सील-अयन नयन निरखि निरखि नील
 कुंचित कच, कुंडल कल नासिक चित पोहैं ।
 मनहुँ इंदुबिंब मध्य कंज मीन खंजन लखि
 मधुप मकर कीर आए तकि तकि निज गौ हैं ॥
 ललित गंड मंडल, सुविसाल भाल तिलक भल्लक
 मंजुतर मयंक-अंक, रुचिर बंक भौहैं ।
 अरुन अधर, मधुर बोल, दसन दमक दामिनि दुति,
 हुलसति हिय हंसनि चारु, चितवनि तिरछौ हैं ॥
 कंबु कंठ, भुज विसाल, उरसि तरुन तुलसिमाल,
 मंजुल मुक्तावलि जुत जागति जिय जोहैं ।
 जनु कलिंदनंदिनि मनि-इंद्रनील-सिखर परसि
 धंसति लसति हंससेनि संकुल अधिकौहैं ॥
 दिव्यतर दुकूल भव्य, नव्य रुचिर चंपक चय,
 चंचला कलाप कनक निकर अलि किधौ हैं ।
 संजन-चख-भल्ल-निकेत, भूषन मनिगन समेत,
 रूप-जलधि-वपुष लेत मन-गायंद बोहैं ॥
 अकनि वचन चातुरी, तुरीय पेखि प्रेम मगन
 पग न परत इत उत सब चकित तेहि समौ हैं ।
 तुलसिदास यह सुधि नहिं कौन की, कहाँ ते आई,
 कौन काज, काके ढिग, कौन ठाउँ को हैं ॥ ४ ॥
 देखु सखि ! आजु रघुनाथ सोभा बनी ।
 नील-नीरद-बरन-वपुष, भुवनाभरन,
 पीत-अंबर-धरन हरन दुति-दामिनी ॥
 सरजु मज्जन किए, संग सज्जन लिए,
 हेतु जन पर हिये, कृपा कोमल घनी ।

सजनि आवत भवन, मत्त-गजवर-गवन,
 लंक मृगपति ठवनि, कुंवर कोसलधनी ॥
 सघन चिक्कन कुटिल चिकुर बिलुलित मृदुल,
 करनि बिबरत चतुर सरस सुषमा जनी ।
 ललित अहि-सिसु-निकर मनहुँ ससि सन समर,
 लरत, धरहरि करत रुचिर जनु जुग फनी ॥
 भाल भ्राजत तिलक, जलज लोचन, पलक
 चारु भ्रू नासिका सुभग सुक-आननी ।
 चित्रुक सुंदर, अधर अरुन, द्विज दुति सुघर,
 बचन गंभीर, मृदुहास भव-भाननी ॥
 स्रवन कुंडल, विमल गंड मंडित चपल,
 कलित कल कांति अति भाँति कछु तिन्ह तनी ।
 जुगल कंचन-मकर मनहुँ विधुकर मधुर
 पियत पहिचानि करि सिंधुकीरति भनी ॥
 उरसि राजत पदिक, ज्योति रचना अधिक,
 माल सुविसाल चहुँ पास बनि गजमनी ।
 स्याम नव जलद पर निरखि दिनकर-कला
 कौतुकी मनहुँ रही घेरी उड़ु गन-अनी ॥
 मंदिरनि पर खरी नारि आनंद-भरी,
 निरखि वरषहिं विपुल कुसुम कुंकुम-कनी ।
 दास तुलसी राम परम करुनाधाम,
 काम सत कोटि मद हरत छवि आपनी ॥५॥
 आजु रघुबीर छवि जाति नहिं कछु कही ।
 सुभग सिंहासनासीन सीतारमन,
 सुवन अभिराम बहु काम सोभा सही ॥

चारु चामर व्यजन, छत्र मनिगन बिपुल,
 दाम मुकुतावली जोति जगमगि रही ।
 मनहुँ राकेस सँग हंस गडुगन बरहि
 मिलन आए हृदय जानि निज नाथही ॥
 मुकुट सुंदर सिरसि, भालवर तिलक भ्रू
 कुटिल कच, कुंडलनि परम आभा लही ।
 मनहुँ हर-डर जुगल मारध्वज के मकर
 लागि स्रवननि करत मेरु की बतकही ॥
 अरुन-राजीव-दल-नयन करुना-अयन,
 बदन सुषमासदन, हास त्रय-तापही ॥
 विविध कंकन हार, डरसि गजमनि-माल
 मनहुँ बग-पाँति जुग मिलि चली जलद ही ॥
 पीत निर्मल चैल, मनहुँ मरकत सैल,
 पृथुल दामिनि रही छाड़ तजि सहज ही ।
 ललित सायक चाप, पीन भुज बल अतुल
 मनुज तनु दनुजवन दहन मंडन-मही ॥
 जासु गुन रूप नहिं कलित निर्गुन सगुन,
 संभु सनकादि सुक भक्ति दृढ़ करि गही ।
 दास तुलसी राम-चरन-पंकज सदा
 वचन मन कर्म चहै प्रीति नित निर्वही ॥ ६ ॥

रामराज राजमौलि मुनिवर-मन-हरन सरन
 लायक, सुखदायक रघुनायक देखौ, री ।
 लोक लोचनाभिराम, नीलमनि-तमाल-स्याम,
 रूप सीलधाम, अंग छवि अनंग को री ? ॥

६—मेरु की बतकही = मेरु की बातचीत । त्रयतापही = तीनों तापों का
 हनन करनेवाला । तजि सहज = (चंचल) स्वभाव छोड़ कर ।

भ्राजत सिर मुकुट पुरट-निर्मित मनि-रचित चारु,
 कुंचित कच रुचिर परम, सोभा नहिं थोरी ।
 मनहुँ चंचरीक-पुंज कंजवृंद प्रीति लागि
 गुंजत कल गान तान दिनमनि रिभयो री ॥
 अरुनकंज-दल-बिसाल लोचन भ्रू तिलक भाल
 मंडित स्तुति कुंडल वर सुंदरतर जोरी ।
 मनहुँ संबरारि मारि, ललित मकर-जुग बिचारि,
 दीन्हें ससि कहँ पुरारि, भ्राजत दुहुँ ओरी ॥
 सुंदर नासा कपोल चिबुक, अधर अरुन बोल
 मधुरे दसन राजत जब चितवत मुख मोरी ।
 कंज-कोस भीतर जनु कंजराग-सिखर निकर,
 रुचिर रचित विधि बिचित्र तड़ित-रंग बोरी ॥
 कंबु कंठ, उर बिसाल तुलसिका नवीन माल,
 मधुकर वर वास बिबस उपमा सुनु सो री !
 जनु कलिंदजा सुनील सैल तें धसी समीप,
 कंद-वृंद बरषत छबि मधुर घोरि घोरी ॥
 निर्मल अति पीत चैल-दामिनि जनु जलद नील,
 राखी निज सोभाहित विपुल विधि निहोरी ।
 नयनन्हि को फल बिसेष ब्रह्म अगुन सगुन वेष
 निरखहु तजि पलक, सफल जीवन लेखौ री ॥
 सुंदर सीता समेत सोभित करुनानिकेत,
 सेवक मुख देत लेत चितवत चित चोरी ।
 बरनत यह अमित रूप शक्ति निगम नागभूप,
 तुलसिदास छबि बिलोकि सारद भइ भोरी ॥ ७ ॥

७—पुरट = साना, स्वर्ण । संबरारि = कामदेव, (प्रद्युम्न न जो काम के अवतार थे शंकर को मारा था) । कंजराग = पद्यराग मयि । कंद = बादल ।
 घोरि घोरी = गरज गरज कर ।

राग केदारा

सखि ! रघुनाथ-रूप निहार ।

सरद-विधु रवि-सुवन मनसिज-मान-भंजनिहार ॥
 स्याम सुभग सरीर जनु मन-काम-पूरनिहार ।
 चारु चंदन मनहुँ मरकत सिखर लसत निहार ॥
 रुचिर उर उपबीत राजत, पदिक गजमनि हार ।
 मनहुँ सुरधनु नखतगन बिच तिमिर-भंजनिहार ॥
 बिमल पीत दुकूल दामिनि-दुति-विनिंदनिहार ।
 बदन सुषमासदन सोभित मदन-मोहनिहार ॥
 सकल अंग अनूप नहिं कोउ सुकवि बरननिहार ।
 दासतुलसी निरखतहि सुख लहत निरखनिहार ॥८॥

सखि ! रघुवीर-मुखछवि देखु ।

चित्त-भीति सुप्रीति-रंग सुरूपता अवरेशु ॥
 नयन-सुषमा निरखि नागरि ! सफल जीवन लेखु ।
 मनहुँ बिधि जुग जलज विरचे ससि सुपूरन मेखु ॥
 भ्रुकुटि भाल बिसाल राजत रुचिर कुंकुम-रेखु ।
 भ्रमर द्वै रबिकिरनि ल्याए करन जनु उनमेखु ॥
 सुमुखि ! केस सुदेस सुंदर सुमन-संजुत पेशु ।
 मनहुँ उडुगन-निबह आए मिलन तम तजि द्वेषु ॥
 स्रवन कुंडल मनहुँ गुरु कवि करत बाद बिसेषु ।
 नासिका द्विज अधर जनु रह्यो मदनु करि बहु बेषु ॥
 रूप बरनि न सकत नारद संभु सारद सेषु ।
 कहै तुलसीदास क्यों मतिमंद-सकल-नरेशु ॥ ९ ॥

८—रविसुवन = अश्विनीकुमार ।

९—ससि पूरन मेखु = शरत् पूर्णिमा का चंद्रमा जो मेष राशि में होता है । निबह = समूह ।

राग जयतश्री

देखौ राघव-वदन विराजत चारु ।

जात न बरनि बिलोकत ही सुख, मुख किधौ छवि बर नारि सिंगार ॥
 रुचिर चिबुक, रद-जोति अनूपम, अंधर अरुन, सित हास निहार ।
 मनो ससिकर बस्यो चहत कमल महुँ प्रगटत दुरत न बनत बिचार ॥
 नासिक सुभग मनहुँ सुक सुंदर, चितवत चकि आचरज अपार ।
 कल कपोल, मृदु बोल मनोहर, रीझि चित चतुर अपनपौ वार ॥
 नयनसरोज, कुटिल कच, कुंडल भ्रुकुटि सुभाल तिलक सोभा-सार ।
 मनहुँ केतु के मकर, चाप सर गयो बिसारि भयो मोहित मार ॥
 निगम सेष सारद सुक शंकर बरनत रूप न पावत पार ।
 तुलसिदास कहै कहौ धौं कौन बिधि अति लघुमति जड़ कूर गँवार ॥१०॥

राग ललित

आज रघुपति-मुख देखत लागत सुख,
 सेवक सुरुष सोभा सरद-ससि सिहाई ।
 दसन-बसन लाल बिसद हास रसाल,
 मानो हिमकर-कर राखे राजीव मनाई ॥
 अरुन नैन विसाल, ललित भ्रुकुटि, भाल
 तिलक, चारु कपोल, चिबुक नासा सुहाई ।
 बिथुरे कुटिल कच, मानहुँ मधु लालच अलि
 नलिन-जुगल उपर रहे लोभाई ॥
 सवन सुंदर सम कुंडल कल जुगम,
 तुलसिदास अनूप उपमा कही न जाई ।
 मानो मरकत सीप सुंदर ससि समीप
 कनक मकरजुत बिधि बिरची बनाई ॥११॥

राग भैरव

प्रातकाल रघुवीर-वदन-छवि चितै चतुर चित मेरे ।
 होहिं विवेक-बिलोचन निर्मल सुफल सुसीतल तेरे ॥
 भाल विसाल विकट भ्रुकुटी बिच तिलक-रेख रुचिराजै ।
 मनहुँ मदन तम तकि मरकत धनु जुगुल कनक सर साजै ॥
 रुचिर पलक-लोचन जुग तारक स्याम, अरुन सित कोए ।
 जनु अलि नलिन-कोस महुँ बंधुक-सुमन सेज सजि सोए ॥
 विलुलित ललित कपोलनि पर कच मेचक कुटिल सुहाए ।
 मनो विधु महुँ वनरुह बिलोकि अलिबिपुल सकौतुक आए ॥
 सोभित स्रवन कनक-कुंडल कल लंबित विवि भुजमूले ।
 मनहुँ केकि तकि गहन चहत जुग उरग इंदु प्रतिकूले ॥
 अधर अरुन-तर, दसन-पाँति वर, मधुर मनोहर हासा ।
 मनहुँ सोन-सरसिज महुँ कुलिसनि तड़ित सहित कृत बासा ॥
 चारु चिबुक, सुकतुंड-बिनिंदक सुभग सुउन्नत नासा ।
 तुलसिदास छविधाम राममुख सुखद समन भवत्रासा ॥१२॥

राग कैदारा

सुमिरत श्री रघुवीर की बाहैं ।
 होत सुगम भव-उदधि अगम अति, कोउ लाँघत, कोउ उतरत थाहैं ॥
 सुंदर-स्याम-सरीर-सैल तैं धँसि जनु जुग जमुना अवगाहैं ।
 अमित अमल जल-बल परिपूरन जनु जनमी सिंगार-सविता हैं ॥
 धारैं वान, कूल धनु, भूषन जलचर, भँवर सुभग सब घाहैं ।
 बिलसति श्रीचि विजय-विरदावलि, कर-सरोज सोहत सुषमा हैं ॥
 सकल-भुवन-मंगल-मंदिर के द्वार विसाल सुहाई साहैं ।

१३-बाहैं = दो उँगलियों के बीच की धाई (संधिस्थान) । साहैं = द्वार के
 ढाँचे की दोनों खड़ी लकड़ियाँ । त्रपा = लज्जा से । धाहैं दिवाई = धाड़
 मार कर हलाया ।

जे पूजी कौसिक-मख ऋषयनि जनक गनप संकर गिरिजा हैं ॥
 भवधनु दलि जानकी बिवाही भए बिहाल नृपाल त्रपा हैं ।
 परसु पानि जिन्ह किए महामुनि जे चितए कबहूँ न कृपा हैं ॥
 जातुधान-तिय जानि वियोगिनि दुखई सीय सुनाइ कुचाहैं ।
 जिन्ह रिपु मारि सुरारि-नारि तेइ सीस उधारि दिवाई धाहैं ॥
 दसमुख-बिंबस तिलोक लोकपति बिकल बिनाए नाक चना हैं ।
 सुबस बसे गावत जिन्हके जस अमर-नाग-नर-सुमुखि सनाहै ॥
 जे भुज बेद पुरान सेष सुक सारद सहित सनेह सराहैं ।
 कल्पलताहु की कल्पलता वर, कामदुहहु की कामदुहा हैं ॥
 सरनागत आरत प्रनतनि को दै दै अभयपद ओर निबाहैं ।
 करि आई, करिहैं, करतीहैं तुलसिदास दासनि पर छाहैं ॥१३॥

राग भैरव

रामचंद्र-करकंज कामतरु वामदेव-हितकारी ।
 सियसनेह-बर-बेलि-वलित वर प्रेमबंधु वर बारी ॥
 मंजुल-मंगल मूल मूल-तनु करज मनोहर साखा ।
 रोम परन, नख सुमन, सुफल सब काल सुजन अभिलाषा ॥
 अविचल अमल अनामय अविरल ललित रहित-छल-छाया ।
 समन सकल संताप पाप रुज मोह मान मद माया ॥
 सेवहिं सुचि मुनि-भृंग-विहग मन-मुदित मनोरथ पाए ।
 सुमिरत हिय हुलसत तुलसी अनुराग उमंगि गुन गाए ॥१४॥

रामचरन अभिराम कामप्रद तीरथ-राज विराजै ।

- ० शंकर-हृदय भगति भूतल पर प्रेम-अछयवट आजै ॥
 स्यामबरन पद-पीठ, अरुन तल, लसति बिसद नखसेनी ।
 जनु रविसुता सारदा सुरसरि मिलि चलीं ललित त्रिबेनी ॥
 अंकुस कुलिस कमल-धुज सुंदर भँवर तरंग बिलासा ।
 मज्जहिं सुर सज्जन मुनिजन मन मुदित मनोहर बासा ॥

बिनु बिराग जप जाग जोग व्रत, बिनु तप, बिनु तनु त्यागे ।
सब सुख सुलभ सद्य तुलसी प्रभु-पद-प्रयाग अनुरागे ॥१५॥

राग बिलावल

रघुवर-रूप बिलोकु नेकु मन ।

सकल लोक-लोचन-सुखदायक नखसिख सुभग स्यामसुंदर तन ॥
चारु चरन-तल-चिह्न चारि फल चारि देत पर चारि जानि जन ।
राजत नखजनु कमल-दलनि पर अरुन-प्रभा-रंजित तुषार-कन ॥
जंघा जानु आनु केदलि उर, कटि किंकिनि, पटपीत सुहावन ।
रुचिर निषंग, नाभि रोमावलि त्रिवलि-वलित उपमा कछु आवन ॥
भृगुपद-चिह्न पदिक उर सोमित मुकुतमाल कुंकुम अनुलेपन ।
मनहुँ परस्पर मिलि पंकज रवि प्रगट्यो निज अनुराग सुजस घन ॥
बाहु बिसाल ललित सायक धनु, कर कंकन केयूर महाधन ।
बिमल दुकूल दलन दामिनि-दुति यज्ञोपवीत लसत अति पावन ॥
कंबुग्रीव, छबिसीवँ चिबुक द्विज, अधर कपोल, बोल भय-मोचन ।
नासिक सुभग कृपापरिपूरन, तरुन अरुन राजीव बिलोचन ॥
कुटिल भ्रुकुटिबर, भाल तिलक रुचि, सुचि सुंदरता स्रवन विभूषन ।
मनहुँ मारि मनसिज पुरारि दिय ससिहि चापसर मकर अदूषन ॥
कुंचित कच, कंचन-किरीट सिर जटित ज्योतिमय बहु विधि मनिगन ।
तुलसिदास रबिकुल-रवि-छवि कविकहि नसकतसुकसंभुसहसफन ॥१६॥

राग कान्हरा

देखो रघुपति-छवि अतुलित अति ।

जनु तिलोक सुखमा सकेलि बिधि राखी रुचिर अंग अंगनि प्रति ॥
पदुमराग रुचि मृदु पदतल, धुज अंकुस कुलिस कमल यहि सूरति ।
रही आनि चहुँ विधि भगतनि की जनु अनुराग भरी अंतरगति ॥
सकल सुचिह्न सुजन सुखदायक ऊरधरेख बिसेष बिराजति ।
मनहुँ भानु-मंडलहि सँवारत धरयो मृत बिधि-सुत बिचित्र मति ॥

सुभग अँगुष्ठ अंगुली अविरल, कछुक अरुन नख-ज्योति जगमगति ।
 चरन पीठ उन्नत नत-पालक, गूढ गुलुफ, जंघा कदलीजति ॥
 काम-तून-तल सरिस जानु जुग, उरु करि-कर करभहि बिलखावति ।
 रसना रचित रतन चामीकर, पीत बसन कटि कसे सरसावति ॥
 नाभी सर त्रिवली निसेनिका, रोमराजि सैवल छवि पावति ।
 उर मुकुतामनि-माल मनोहर मनहुँ हंस-अवली उड़ि आवति ॥
 हृदय पदिक भृगु-चरन-चिह्न वर, बाहु विसाल जानु लागि पहुँचति ।
 कल केयूर पूर-कंचन-मनि, पहुँची मंजु कंजकर सोहति ॥
 मुजस सुरेख सुनख अंगुलिजुत, सुंदर पानि मुद्रिका राजति ।
 अंगुलित्रान कमान वानछवि सुरनि सुखद असुरनि-उर सालति ॥
 स्याम सरीर सुचंदन-चर्चित, पीत दुकूल अधिक छवि छाजति ।
 नील जलद पर निरखि चंद्रिका दुरनि त्यागि दामिनि जनु दमकति ॥
 यज्ञोपवीत पुनीत विराजत गूढ जनु बनि पीन अंस तति ।
 सुगढ़ पुष्ट उन्नत कृकाटिका कंबु कंठ सोभा मन मानति ॥
 सरद-समय-सरसीरुह-निंदक मुख-सुखमा कछु कहत न बानति ।
 निरखत ही नयननि निरूपम सुख, रबिसुत, मदन, सोम-दुति निदरति ॥
 अरुन अधर द्विजपाँति अनूपम ललित हँसनि जनु मन आकरषति ।
 विद्रुम-रचित विमान मध्य जनु सुरमंडली सुमन-चय वरषति ॥
 मंजुल चिबुक मनोरम हनुथल, कल कपोल नासा मन मोहति ।
 पंकज-मान-विमोचन लोचन, चितवनि चारु अमृत-जल सीँचति ॥
 केस सुदेस गँभीर वचन वर, स्तुति कुंडल-डोलनि जिय जागति ।
 लखि नव नील पयोद रवित सुनि रुचिर मोर ज़ोरी जनु नाचति ॥

१५—सूत धरयो = कारीगरों के समान सीध नापने के लिए सूत रक्खा ।
 विधिसुत = विश्वकर्मा । कदली जति = कदलीजित । जनु = गले के नीचे की
 धन्वाकार हड्डी जिसे हँसली कहते हैं । अंस = कंध । तति = विस्तीर्ण । कृका-
 टिका = कंधे और गले का जोड़ ।

भौहैं बंक मयंक-अंक रुचि कुंकुमरेख भाल भलि भ्राजति ।
 सिरसि हेम-हीरक-मानिकमय मुकुट-प्रभा सब भुवन प्रकासति ॥
 बरनत रूप पार नहिं पावत निगम शेष सुक संकर भारति ।
 तुलसिदास केहि विधि बखानि कहै यह मन बचन अगोचर मूरति ॥१७॥

राग मलार

आली री ! रावौ के रुचिर हिंडोलना झूलन जैए ।
 फटिक भीति सुचारु चहुँ दिसि, मंजु मनिमय पौरि ।
 गच काँच लखि मन नाच सिखि जनु, पाँचसर सु फँसौरि ॥
 तोरन बितान पताक चामर धुज सुमन फल-धौरि ।
 प्रतिछाँह-छवि कविं साखि दै प्रति सों कहै गुरु हौं रि ! ॥
 मदन जय के खंभ से रचे खंभ सरल विसाल ।
 पाटीर पाटि विचित्र भँवरा वलित बेलिन लाल ॥
 डाँडो कनक कुंकुम-तिलक रेखैं सी मनसिज-भाल ।
 पटुली पदिक रति-हृदय जनु कलधौत-कोमल-भाल ॥
 उनये सघन घनघोर, मृदु भरि सुखद सावन लाग ।
 बगपाँति सुरधनु, दमक दामिनि, हरित भूमि-विभाग ॥
 दादुर मुदित, भरे सरित सर, महि उमंग जनु अनुराग ।
 पिक मोर मधुप चकोर चातक सोर उपवन वाग ॥
 सो समौ देखि सुहावनो नवसत सँवारि सँवारि ।
 गुन-रूप-जोबन सींव सुंदरि चलीं झुँडनि भारि ॥
 हिंडोल-साल विलोकि सब अंचल पसारि पसारि ।
 लागीं असीसन राम सीतहि सुख-समाजु निहारि ॥

१८—पाँचसर सु फँसौरि = कामदेव के फंदे सा है । फँसौरि = फंदा, पाश ।
 प्रतिछाँह.....गुरु हौं रि ! = प्रतिविंब कवियों का साक्ष्य दे कर मूल
 प्रति या बिंब (असल वस्तु) से कहता है कि मैं तुम से बड़ा हूँ । नवसत =
 सोलह शृंगार ।

भूलहिं भुलावहिं ओसरिन्ह गावैं सुहो गौंड-मलार ।
 मंजीर-नूपुर-बलय-धुनि जनु काम-करतल तार ॥
 अति चमुत समकन मुखनि बिथुरे चिकुर बिलुलित हार ।
 तम तड़ित उडुगन अरुन बिधु जनु करत व्योम बिहार ॥
 हिय हरषि बरषि प्रसून निरखति विबुध-तिय तन तूरि ।
 आनंद जल लोचन, मुदित मन, पुलक तनु भरिपूरि ॥
 सब कहहिं अबिचल राज नित, कल्याण मंगल भूरि ।
 चिरजियौ जानकिनाथ जग तुलसी सजीवनि मूरि ॥१८॥

राग सूहो

कोसलपुरी सुहावनी सरि सरजू क तीर ।
 भूपावली-मुकुटमनि नृपति जहाँ रघुबीर ॥
 पुनर नारि चतुर अति धरमनिपुन, रत-नीति ।
 सहज सुभाय सकल उर श्रीरघुबर-पद-प्रीति ॥
 श्रीरामपद-जलजात सब के प्रीति अविरल पावनी ।
 जो चाहत सुक सनकादि संभु बिरंचि मुनिमन-भावनी ॥
 सबही के सुंदर मंदिराजिर, राउ रंक न लखि परै ।
 नाकेस-दुर्लभ भोग लोग करहिं न मन बिषयनि हरै ॥१॥
 सब ऋतु सुखप्रद सो पुरी पावस अति कमनीय ।
 निरखत मनहिं हरत हठि हरित अवनि रमनीय ॥
 बीरबहूटि बिराजहीं, दादुर-धुनि चहुँ ओर ।
 मधुर गरजि घन बरषहिं, सुनि सुनि बोलत मोर ॥
 बोलत जो चातक मोर कोकिल कीर पाराबत घने ।
 खग बिपुल पाले बालकनि कूजत उड़ात सुहावने ॥
 बकराजि राजति गगन, हरिधनु तड़ित दिसि दिसि सोहहीं ।
 नभ-नगर की सोभा अतुल अवल्लोकि मुनि मन मोहहीं ॥ २ ॥
 गृह गृह रचे हिंडोलना महि गच काँच सुढार ।

चित्र विचित्र चहुँ दिसि परदा फटिक पगार ॥
 सरल बिसाल बिराजहीं बिद्रुम-खंभ सुजोर ।
 चारु पाटि पटी पुरट की भरकत मरकत भौर ॥
 मरकत भँवर डाँडी कनक मनि-जटित दुति जगमगि रही ।
 पटुली मनहुँ बिधि निपुनता निज प्रगट करि राखी सही ॥
 बहुरंग लसत बितान मुकुतादाम सहित-मनोहरा ।
 नव सुमन माल सुगंध लोभे मंजु गुंजत मधुकरा ॥ ३ ॥
 झुंड झुंड भूलन चलीं गजगामिनि वर नारि ।
 कुसुंभि चीर तनु सोहहिं भूषन बिबिध सँवारि ॥
 पिकवयनी मृगलोचनी सारद ससि सम तुंड ।
 राम-सुजस सब गावहीं सुसुर सुसारंग गुंड ॥
 सारंग गुंड मलार सोरठ सुहव सुधरनि बाजहीं ।
 बहु भाँति तान-तरंग सुनि गंधर्व किन्नर लाजहीं ॥
 अति मचत छूटत कुटिल कच छवि अधिक सुंदरि पावहीं ।
 पट उड़त भूषन खसत हँसि हँसि अपर सखी झुलावहीं ॥ ४ ॥
 फिरि फिरि झूलहिं भामिनी अपनी अपनी वार ।
 बिबुध-बिमान थकित भए देखत चरित अपार ॥
 बरषि सुमन हरषहिं उर बरनहिं हरिगुन-गाथ ।
 पुनि पुनि प्रभुहि प्रसंसहीं 'जय जय जानकिनाथ' ॥
 जय जानकीपति विसद कीरति सकल-लोक-मलापहा ।
 सुखबधू देहिं असीस चिरजिव राम सुख संपति महा ॥
 पावस समय कछु अवध बरनत सुनि अधौध नसावहीं ।
 रघुबीर के गुनगन नवल नित दास तुलसी गावहीं ॥५॥१६॥

राग आसावरी

साँझ समय रघुबीर पुरी की सोभा आजु बनी ।

१६-३ भौर = वह घूमनेवाली अँकड़ी जिसमें झूलने की डोरी बाँधी रहती है ।

ललित दीपमालिका बिलोकहिं हित करि अवधधनी ॥
 फटिक-भीत सिखरन पर राजति कंचन-दीप-अनी ।
 जनु अहिनाथ मिलन आयो मनि-सोभित सहस्रफनी ॥
 प्रति मंदिर कलसनि पर आजहिं मनिगन दुति अपनी ।
 मानहुँ प्रगटि विपुल लोहितपुर पठइ दिए अवनी ॥
 घर घर मंगलचार एकरस हरषित रंक गनी ।
 तुलसिदास कल कीरति गावहिं जो कलिमल-समनी ॥ २० ॥

राग गौरी

अवध नगर अति सुंदर वर सरिता के तीर ।
 नीति-निपुन नर तिय सबहिं धरम धुरंधर धीर ॥
 सकल श्रुतुन्ह सुखदायक तामहुँ अधिक वसंत ।
 भूप-मौलि-मनि जहुँ बस नृपति जानकीकंत ॥
 वन उपवन नव किसलय कुसुमित नाना रंग ।
 बोलत मधुर मुखर खग पिकवर, गुंजत शृंग ॥
 समय विचारि कृपानिधि देखि द्वार अति भीर ।
 खेलहु मुदित नारि नर बिहसि कहै रघुबीर ॥
 नगर नारि नर हरषित सब चले खेलन फागु ।
 देखि राम-छवि अतुलित उमगत उर अनुरागु ॥
 स्याम-तमाल-जलदतनु निर्मल पीत दुकूल ।
 अरुन-कंज-दल-लोचन सदा दास अनुकूल ॥
 सिर किरीट, सुति कुंडल, तिलक मनोहर भाल ।
 कुंचित केस, कुटिल भ्रू, चितवनि भगत-कृपाल ॥
 कल कपोल, सुक नासिक, ललित अधर द्विज-जोति ।
 अरुन कंज महुँ जनु जुग पाँति रुचिर गज मोति ॥
 वर दर-ग्रीव, अमितबल बाहु सुपीन बिसाल ।

कंकन हार मनोहर, उरसि लसति बनमाल ॥
 उर भृगु-चरन बिराजत, द्विज प्रिय चरित पुनीत ।
 भगत हेतु नर-विग्रह सुरवर गुन गोतीत ॥
 उदर त्रिरेख मनोहर सुंदर नाभि गँभीर ।
 हाटक-घटित जटित मनि कटितट रट मंजीर ॥
 उरु अरु जानु पीन मृदु मरकत खंभ समान ।
 नूपुर मुनि मन मोहत करत सुकोमल गान ॥
 अरुन बरन पदपंकज, नखदुति इंदु-प्रकास ।
 जनक-सुता-करपल्लव लालित विपुल विलास ॥
 कंज कुलिस धुज अंकुस रेख चरन सुभ चारि ।
 जन-मन-मीन हरन कहँ बंसी रची सँवारि ॥
 अंग अंग प्रति अतुलित सुषमा बरनि न जाइ ।
 एहि सुख मगन होइ मन फिरि नहिँ अनत लोभाइ ॥
 खेलत फागु अवधपति अनुज सखा सव संग ।
 बरषि सुमन सुर निरखहिँ, सोभा अमित अनंग ॥
 ताल मृदंग भौंभ डफ बाजहिँ पनव निसान ।
 सुधर सरस सहनाइन्ह गावहिँ समय समान ॥
 बीना बेनु मधुर धुनि सुनि किन्नर गंधर्व ।
 निज गुन गरुअ हरुअ अति मानहिँ मन तजि गर्व ॥
 निज निज अटनि मनोहर गान करहिँ पिकवैनि ।
 मनहुँ हिमालय सिखरनि लसहिँ अमर-मृगनैनि ॥
 धवल धाम तें निकसहिँ जहँ तहँ नारि वरूथ ।
 मानहुँ मथत पयोनिधि विपुल अपसरा-जूथ ॥
 किसुक बरन सुअंसुक सुषमा सुखनि समेत ।
 जनु बिधु-निबह रहे करि दामिनि-निकर निकेत ॥
 कुंकुम सुरस अबीरनि भरहिँ चतुर बर नारि ।

अतु सुभाय सुठि सोमित देहिं विविध विधि गारि ॥
 जो सुख जोग जाग जप तप तीरथ तेँ दूरि ।
 राम-कृपा तेँ सोइ सुख अवध गलिन्ह रख्यो पूरि ॥
 खेलि बसंत कियो प्रभु मज्जन सरजूनीर ।
 विविध भाँति जाचक-जन पाए भूषन चीर ॥
 तुलसिदास तेहि अवसर माँगी भगति अनूप ।
 मृदु मुसुकाइ दीन्हि तब कृपादृष्टि रघुभूप ॥ २१ ॥

राग वसंत

खेलत बसंत राजाधिराज । देखत नभ कौतुक सुर-समाज ॥
 सोहैं सखा अनुज रघुनाथ साथ । भोलिन्ह अबीर, पिचकारि हाथ ॥
 बाजहिं मृदंग डफ ताल बेनु । छिरकैं सुगंध-भरे मलय-रेनु ॥
 उत जुवति-जूथ जानकी संग । पहिरे पट भूषन सरस रंग ॥
 लिए छरी बेंत सोधै विभाग । चाँचरि भूमक कहैं सरस राग ॥
 नूपुर-किंकिनि-धुनि अति सोहाइ । ललना-गन जब जेहि धरई धाइ ॥
 लोचन आँजहिं फगुआ मनाइ । छाँड़हिं नचाइ हाहा कराइ ॥
 चढ़े खरनि विदूषक स्वाँग साजि । करैं कूटि, निपट गइ लाज भाजि ॥
 नर नारि परसपर गारि देत । सुनि हँसत राम भाइन समेत ॥
 वरषत प्रसून वर-विबुध-वृंद । जय जय दिनकर-कुल-कुमुद-चंद ॥
 ब्रह्मादि प्रसंसत अवध वास । गावत कल कीरति तुलसिदास ॥ २२ ॥

राग केदारा

देखत अवध को आनंद ।
 हरषि वरषत सुमन दिन दिन देवतनि को वृंद ।
 नगर-रचना सिखन को विधि तकत बहु विधिबंद ॥
 निपट लागत अगम ज्यों जलचरहि गमन सुछंद ।

२१—अंसुक = बछ । निवह = समूह ।

२३—विधिबंद = बंध अर्थात् रचना के भेद ।

मुदित पुर लोगनि सराहत निरखि सुखमाकंद ॥
जिन्हके सुअलि-चख पियत राम-मुखारविंद-मरंद ।
मध्य ज्योम बिलंबि चलत दिनेस उडुगन चंद ।
रामपुरी बिलोकि तुलसी मिटत सब दुख-द्वंद ॥ २३ ॥

राग सोरठ

पालत राज यों राजाराम धरमधुरीन ।

सावधान सुजान सब दिन रहत नय-लयलीन ॥
खान खग जति न्याउ देख्यो आपु बैठि प्रवीन ।
नीचु हति महिदेव बालक कियो मीचुबिहीन ॥
भरत ज्यों अनुकूल जग निरुपाधि नेह नवीन ।
सकल चाहत राम ही ज्यों जल अगाधहि मीन ॥
गाइ राज-समाज जाँचत दास तुलसी दीन ।
लेहु निज करि, देहु निज पदप्रेम पावन पीन ॥ २४ ॥

संकट सुकृत को सोचत जानि जिय रघुराउ ।

सहस द्वादस पंचसत में कछुक है अब आउ ॥
भोग पुनि पितु-आयु को, सोउ किए बनै बनाउ ।
परिहरे बिनु जानकी नहिं और अनघ उपाउ ॥
पालिबे असिधार-व्रत प्रिय प्रेम-पाल सुभाउ ।
होइ हित केहि भाँति, नित सुविचारु नहिं चित चाउ ॥
निपट असमंजसहु बिलसति मुख मनोहरताउ ।
परम धीर-धुरीन हृदय कि हरष बिसमय काउ ? ॥
अनुज सेवक सचिव हैं सब सुमति साधु सखाउ ।

२५—भोग पुनि पितु-आयु को = ऐसा प्रसिद्ध है कि राजा दशरथ अपनी आयु पूरी करने के पहले ही मर गए, उनकी शेष आयु को रामचंद्रजी ने भोगा । अपनी आयु भर तो राम ने जानकी को साथ रखा पर जब अपने पिता की आयु भोगने चले तब जानकी का परित्याग उन्होंने उचित विचारा ।

जान कोउ न जानकी बिनु अगम अलख लखाउ ॥

राम जोगवत सीय-मनु प्रिय मनहि प्रानप्रियाउ ।

परम पावन प्रेम-परमिति समुझि तुलसी गाउ ॥ २५ ॥

राम बिचारि कै राखी ठीक दै मन माहिं ।

लोक बेद सनेह पालत पेल कृपालहि जाहिं ॥

प्रियतमा-पति-देवता जिहि उमा रमा सिहाहिं ।

गुरुविनी सुकुमारि सिय तियमनि समुझि सकुचाहिं ॥

मेरेही सुख सुखी सुख अपनो सपनहूँ नाहिं ।

गेहिनी गुन-गेहिनी गुन सुमिरि सोच समाहिं ॥

राम सीय सनेह वरनत अगम सुकवि सकाहिं ।

रामसीय-रहस्य तुलसी कहत राम कृपाहिं ॥ २६ ॥

चरचा चरनि सों चरची जानमनि रघुराइ ।

दूत-मुख सुनि लोक-धुनि घर घरनि बूझी आइ ॥

प्रिया निज अभिलाष रुचि कहि कहति सिय सकुचाइ ।

तीय तनय समेत तापस पूजिहूँ बन जाइ ॥

जानि करुनासिंधु भावी-बिबस सकल सहाइ ।

धीरि धरि रघुवीर भोरहि लिए लषन बोलाइ ॥

“तात तुरतहि साजि स्यंदन सीय लेहु चढ़ाइ ।

बालमीकि मुनीस-आस्रम आइयहु पहुँचाइ ॥

‘भले हि नाथ’ सुहाथ माथे राखि राम-रजाइ ।

चले तुलसी पालि सेवक धरम-अवधि-अघाइ ॥ २७ ॥

आए लषन लै सौंपी सिय मुनीसहि आनि ।

नाइ सिर रहे पाइ आसिष जोरि पंकजपानि ॥

बालमीकि बिलोकि व्याकुल, लषन गरत गलानि ।

सर्वविद बूझत न विधि की बामता पहिचानि ॥

जानि जिय अनुमान ही सिय सहस बिधि सनमानि ।

राम सद्गुन-धाम, परमिति भई कछुक मलानि ॥

दोनबंधु दयालु देवर देखि अति अकुलानि ॥

कहति बचन उदास तुलसीदास त्रिभुवन-रानि ॥ २८ ॥

तौलौं बलि आपुही कीबी विनय समुझि सुधारि ।

जौलौं हैं सिखि लेउँ बन ऋषि-रीति वसि दिन चारि ॥

तापसी कहि कहा पठवति नृपनि को मनुहारि ।

बहुरि तिहि बिधि आइ कहिहै साधु कोउ हितकारि ॥

लषन लाल कृपाल ! निपटहि डारिबी न विसारि ।

पालवी सब तापसनि ज्यों राजधरम विचारि ॥

सुनत सीता-बचन मोचत सकल लोचन-बारि ।

बालमीकि न सके तुलसी सो सनेह सँभारि ॥ २९ ॥

सुनि व्याकुल भए उतरु कछु कह्यो न जाइ ।

जानि जिय बिधि बाम दीन्हों मोहिं सरुष सजाइ ॥

कहत हिय मेरी कठिनई लखि गई प्रीति लजाइ ।

आजु अवसर ऐसे हूँ जौं न चले प्रान बजाइ ॥

इतहि सीय-सनेह-संकट उत्तिहिं राम-रजाइ ।

मौनहीं गहि चरन गौने सिख सुआसिष पाइ ॥

प्रेम-निधि पितु को कहे मैं परुष-वचन अघाइ ।

पाप तेहि परिताप तुलसी उचित सहे सिराइ ॥ ३० ॥

गौने मौनही बारहि बार परि परि पाय ।

जात जुनु रथ चोर कर लछिमन मगन पछिताय ॥

असन बिनु बन, वरम बिनु रन, बच्यौ कठिन कुघाय ।

दुसह साँसति सहन को हनुमान ज्यायो जाय ॥

हेतु हैं सियहरन को तब, अबहुँ भयों सहाय ।

होत हठि मोहिं दाहिनी दिन दैव दारुन-दाय ॥

तज्यो तनु संग्राम जेहि लागि गीध जसी जटाय ।
 ताहि हौं पहुँचाइ कानन चल्थो अवध सुभाय ॥
 घोर हृदय कठोर करतव सृज्यो हौं विधि बायँ ।
 दास तुलसी जानि राख्यो कृपानिधि रघुराय ॥ ३१ ॥

पुत्रि ! न सोचिए आई हौं जनक-गृह जिय जानि ।
 कालिही कल्याण कौतुक, कुसल तव, कल्यानि ॥
 राजश्रुषि पितु ससुर, प्रभु पति, तू सुमंगल खानि ।
 ऐसेहूँ थल बामता, बड़ि बाम विधि की बानि ।
 बेलि मुनि कन्या सिखाई प्रीति-गति पहिचानि ॥
 आलसिन्ह की देवसरि सिय सेइयहु मन मानि ।
 न्हाइ प्रातहि पूजिबो बट बिटप अभिमत-दानि ॥
 सुवन-लाहु उछाहु, दिन दिन, देवि अनहित-हानि ॥
 पाप-ताप-विमोचनी कहि कथा सरस पुरानि ।
 बालमीकि प्रबोधि तुलसी गई गरुड़ गलानि ॥ ३२ ॥

जब तेँ जानकी रही रुचिर आस्रम आई ।
 गगन, जल, थल विमल तब तेँ सकल मंगलदाइ ॥
 निरस भूरुह सरस फूलत फलत अति अधिकाइ ।
 कंद मूल अनेक अंकुर स्वाद सुधा लजाइ ॥
 मलय मरुत, मराल-मधुकर-मोर-पिक-समुदाइ ।
 सुदित-मन मृग बिहग बिहरत बिषम बैर बिहाइ ॥
 रहत रवि अनुकूल दिन, ससि रजनि सजनि सुहाइ ।
 सीय मुनि सादर सराहति सखिन्ह भलो मनाइ ॥
 मोद-बिपिन-बिनोद चितवत लेत चितहिँ चोराइ ।
 राम बिनु सिय सुखद वन तुलसी कहै किमि गाइ ॥ ३३ ॥
 सुभ दिन, सुभ घरी, नीको नखत, लगन सुहाइ ।
 पृत जाये जानकी द्वै मुनिबधू उठों गाइ ॥

हरषि बरषत सुमन सुर गहगहे बधाए बजाइ ।
 भुवन कानन आस्रमनि रहे मोद मंगल छाइ ॥
 तेहि निसा तहँ सत्रुसूदन रहे बिधिबस आइ ।
 माँगि मुनि सौँ बिदा गवने भोर सो सुख पाइ ॥
 मातु मौसी बहिनिहूँ तैं सासु तैं अधिकाइ ।
 करहिं तापस-तीय-तनया सीय-हित चित लाइ ॥
 किए विधि व्यवहार मुनिवर विप्रवृंद बोलाइ ।
 कहत सब ऋषिकृपा को फल भयो आजु अधाइ ॥
 सुरुष ऋषि सुख सुतनि को, सिय सुखद सकल सहाइ ।
 सुल राम-सनेह को तुलसी न जिय ते जाइ ॥ ३४ ॥
 मुनिवर करि छठी कीन्हों बारहों की रीति ।
 बन-बसन पहिराइ तापस, तोषि पोषे प्रीति ॥
 नामकरन सुअन्नप्रासन बेदबाँधी नीति ।
 समय सब ऋषिराज करत समाज साज समीति ॥
 बाल लालहिं, कहहिं “करिहैं राज सब जग जीति” ।
 राम सिय सुत गुरु अनुग्रह उचित अचल प्रतीति ॥
 निरखि बाल-विनोद तुलसी जात बासर बीति ।
 पिय-चरित सिय-चित चितेरो लिखत नित हित-भीति ॥ ३५ ॥
 बालक सीय के बिहरत मुदित मन दोउ भाइ ।
 नाम लव कुस राम-सिय-अनुहरति सुंदरताइ ॥
 देत मुनि मुनि-सिसु खेलौना ते लै धरत दुराइ ।
 खेल खेलत नृप-सिसुन्ह के बालवृंद बोलाइ ॥
 भूप भूषन बसन बाहन राज-साज सजाइ ।
 बरम चरम कृपान सर धनु तून लेत बनाइ ॥
 दुखी सिय पिय-विरह तुलसी, सुखी सुत-सुख पाइ ।
 आँच पय उफनात सींचत सलिल ज्यों सकुचाइ ॥ ३६ ॥

कैकेयी जौलों जियति रही ।

तौलों बात मातु सों मुहँ भरि भरत न भूलि कही ॥
 मानी राम अधिक जननी ते' जननिहुँ गँस न गही ।
 सीय लषन रिपुदवन राम-रुख लखि सब की निवही ॥
 लोक-वेद-मरजाद दोष गुन गति चित चखन चही ।
 तुलसी भरत समुझि सुनि राखी राम सनेह सही ॥ ३७ ॥

राग रामकली

रघुनाथ तुम्हारे चरित मनोहर गावहिँ सकल अवधवासी ।
 अति उदार अवतार मनुज-वपु धरे ब्रह्म अज अविनासी ॥
 प्रथम ताड़का हति सुबाहु बधि, मख राख्यो द्विज-हितकारी ।
 देखि दुखी अति सिला सापबस रघुपति विप्रनारि तारी ॥
 सब भूपन को गरव हरयो हरि, भंज्यो संभु-चाप भारी ।
 जनकसुता समेत आवत गृह परसुराम अति मदहारी ॥
 तात-वचन तजि राजकाज सुर चित्रकूट मुनिवेष धरयो ।
 एक नयन कीन्हों सुरपतिसुत, बधि विराध ऋषि-सोक हरयो ॥
 पंचवटी पावन राघव करि सूपनखा कुरूप कीन्हों ।
 खर दूषन संहारि कपटमृग गोधराज कहँ गति दीन्हों ॥
 हति कबंध, सुग्रीव सखा करि, बेधे ताल, बालि मारयो ।
 वानर रीछ सहाय अनुज संग सिंधु बाँधि जस बिस्तारयो ॥
 सकुल पुत्र दल सहित दसानन मारि अखिल सुर-दुख टारयो ।
 परमसाधु जिय जानि विभीषन लंकापुरी तिलक सारयो ॥
 सीता अरु लछिमन संग लीन्हें औरहुँ जिते दास आए ।
 नगर निकट बिमान आए सब नर नारी देखन धाए ॥
 सिव विरंचि सुक नारदादि मुनि अस्तुति करत विमल बानी ।
 चौदह भुवन चराचर हरषित, आए राम राजधानी ॥

मिले भरत जननी गुरु परिजन चाहत परम अनंद भरे ।
 दुसह-बियोग-जनित दारुन दुख रामचरन देखत बिसरे ॥
 बेद पुरान बिचारि लगन सुभ महाराज अभिषेक कियो ।
 तुलसिदास जिय जानि सुअवसर भगति-दान तब माँगि लियो ॥३८॥

१. अथ विष्णुसहस्रनाम ॥ १ ॥
 २. अथ श्रीमद्भगवद्गीता ॥ २ ॥
 ३. अथ श्रीमद्भगवद्गीता टीका ॥ ३ ॥
 ४. अथ श्रीमद्भगवद्गीता टीका टीका ॥ ४ ॥
 ५. अथ श्रीमद्भगवद्गीता टीका टीका टीका ॥ ५ ॥

श्रीकृष्णगीतावली

लिफाफा नमूना

श्रीकृष्णगीतावली

राग बिलावल

माता लै उछंग गोबिंदमुख बार बार निरखै ।
पुलकित तनु आनंदधन छन छन मन हरषै ॥
पूछत तोतरात बात मातहि जदुराई ।
अतिसय सुख जाते तोहिं मोहिं कहु संभुभाई ॥
देखत तव बदन-कमल मन अनंद होई ।
कहै कौन रसन मौन जानै कोइ कोई ॥
सुंदर मुख मोहिं देखाउ, इच्छा अति मोरे ।
मम समान पुन्यपुंज बालक नहिं तेरे ॥
तुलसी प्रभु प्रेमबस्य मनुज-रूप धारी ।
बालकेलि लीलारस ब्रजजन-हितकारी ॥१॥

राग ललित

‘छोटी मोटी मीसी रोटी चिकनी चुपरि कै तू दे री मैया’
‘लै कन्हैया’ ‘सो कब ?’ ‘अबहिं तात’ ।
‘सिगरियै हैं हों खैहों, बलदाऊ को न देहों,’
‘सो क्यों भट्ट तेरो कहा कहि इत उत जात ॥
बाल बोलि डहकि बिरावत, चरित लखि,
गोपीगन महारि मुदित पुलकित गात ।
नूपुर की धुनि किंकिनि के कलरव सुनि,
कूदि कूदि किलकि किलकि ठाढ़े ठाढ़े खात ॥

तनियाँ ललित कटि, बिचित्र टेपारो सीस,
मुनि-मन हरत बचन कहै तोतरात ।
तुलसी निरखि हरषत बरषत फूल भूरिभागी,
ब्रजवासी बिबुध सिद्ध सिंहात ॥ २ ॥

राग आसावरी

तोहिं स्याम की सपथ जसोदा आइ देखु गृह मेरे ।
जैसी हाल करी यहि ढोटा छोटे निपट अनेरे ॥
गोरस-हानि सहैं न कहौं कछु यहि ब्रजवास बसेरे ।
दिनप्रति भाजन कौन बेसाहै ? घर निधि काहूके रे ॥
किए निहारो हँसत, खिमे तेँ डाटत नयन तरेरे ।
अबहीं तेँ ये सिखे कहाधौं चरित ललित सुत तेरे ॥
बैठो सकुचि साधु भयो चाहत मातुबदन तन हरे ।
तुलसिदास प्रभु कहौं ते बातैं जे कहि भजे सबेरे ॥ ३ ॥

मोकहँ भूठेहु दोष लगावहिं ।

मैया ! इन्हहिं बानि परगृह की, नाना जुगुति बनावहिं ॥
इन्हके लिये खेलिबो छाँड़्यौं तरु न उबरन पावहिं ।
भाजन फोरि, बेरि कर गोरस देन उरहनो आवहिं ॥
कबहुँक बाल रोवाइ पानि गहि मिस करि उठि उठि धावहिं ॥
करहिं आपु सिर धरहिं आन के बचन बिरंचि हरावहिं ॥
मेरी टेव बूमि हलधर को, संतत संग खेलावहिं ।
जे अन्याउ करहिं काहूको ते सिसु मोहिं न भावहिं ॥
मुनि मुनि बचन-चातुरी ग्वालनि हँसि हँसि बदन दुरावहिं ।
बाल गोपाल केलि-कल-कीरति तुलसिदास मुनि गावहिं ॥ ४ ॥

कबहुँ न जात पराये धामहिं ।

खेलत ही देखौं निज आँगन सदा सहित बलरामहिं ॥
मेरे कहौं थाकु गोरस, को नवनिधि मंदिर यामहिं ।

ठाली ग्वालि ओरहने के मिस आइ बकहि बेकामहिं ॥
हौं बलि जाउँ जाहु कितहूँ जनि मातु सिखावति स्यामहिं ।
बिनु कारन हठि दोष लगावति तात गए गृह तामहिं ॥
हरिमुख निरखि, परुष बानी सुनि अधिक अधिक अभिरामहिं ।
तुलसिदास प्रभु देख्योइ चाहति श्रीउरललित-ललामहि ॥ ५ ॥

अब सब साँची कान्ह तिहारी ।

जो हम तजे पाइ गौं मोहन गृह आए दै गारी ॥
सुसुकि सभीत सकुचि रखे मुख बातैं सकल सवारी ।
साधु जानि हँसि हृदय लगाए परम प्रीति महतारी ॥
कोटि जतन करि सपथ कहैं हम मानै कौन हमारी ?
तुमहिं बिलोकि आन की ऐसी क्यों कहिहै बर नारी ॥
जैसे है तैसे सुखदायक ब्रजनायक बलिहारी ।
तुलसिदास प्रभु मुखछवि निरखत मन सब जुगुति बिसारी ॥ ६ ॥

राग केदार

महरि तिहारे पाँय परौं अपना ब्रज लीजै ।
सहि देख्यो, तुम्हसों कह्यो, अब नाकहि आई, कौन दिनहु दिन छीजै ?
ग्वालनि तौ गोरस सुखी ता बिनु क्यों जीजै ।
सुत समेत पाउँ धारिये, आपुहि भवन मेरे देखिये जो न पतीजै ॥
अति अनीति नीकी नहीं अजहूँ सिख दीजै ।
तुलसिदास प्रभु सों कहै उर लाइ जसोमति ऐसी बलि कबहूँ नहिं कीजै । ७ ।

अबहिं उरहनो दै गई, बहुरो फिरि आई ।

सुनु मैया ! तेरी सौं करौं याकी टेव लरन की, सकुच बेंचि सी खाई ॥
या ब्रज में लरिका घने, हैँही अन्याई ।
मुँह लाए मूढ़हि चढ़ी अंतहु अहिरिनि तू सुधी करि पाई ॥

सुनि सुत की अति चातुरी जसुमति मुसुकाई ।
तुलसिदास ग्वालिनी ठगी, आयो न उतर कछु, कान्ह ठगौरी लाई॥८॥

राग गौरी

अब ब्रजबास महरि किमि कीबो ? ।

दूध दह्योड माखन ढारत हैं हुतो पोसात दान दिन दीबो ॥
अब तौ कठिन कान्ह के करतब, तुम्ह हो हँसति कहा कहि लीबो ?
लीजै गाँउ, नाउँ लै रावरो है जग ठाउँ कहूँ हूँ जीबो ॥
ग्वालिवचन सुनि कहति जसोमति 'भलों न भूमि पर वादर छीबो ।
दैअहि लागि कहौ तुलसी-प्रभु अजहुँ न तजत पयोधर पीबो' ॥ ८ ॥

जानी है ग्वालि परी फिरि फीके ।

मातुकाज लागी लखि डाटत, है वायनो दियो घर नीके ॥
अब कहि देउँ, कहति किन, यों कहि माँगत दहिउ धरयो जो है छीके ।
तुलसी प्रभुमुख निरखि रही चकि, रह्यो न सयानप तन मन ती के॥१०॥

जौलों हैं कान्ह ! रहैं गुन गोए ।

तौलों तुम्हहिँ पत्यात लोग सब, सुसुकि संभीत साँचु सो रोए ॥
हो भले नग-फँग परे गढ़ीबै, अब ए गढ़त महरि-मुख जोए ।
चुपकि न रहत, कह्यो कछु चाहत, हूँही कीच कोठिला धोए ॥
गरजति कहा तरजभिन्ह तरजति बरजति सैन नयन के कोए ।
तुलसी मुदित मातु सुतगति लखि बिथकी है ग्वालि मैन-मन-मोए॥११॥

भूलि न जात हैं काहूँके काऊ ।

साखि सखा सब सुबल, सुदामा, देखिधैं वृष्णि बोलि बलदाऊ ॥
यह तो मोहिँ खिझाइ कोटि बिधि उलटि बिबादन आइ अगाऊ ।
याहि कहा मैया मुँह लावति, गनति कि ए लँगरि भगराऊ ॥
कहति परसपर बचन जसोमति, लखि नहिँ सकति कपट सति भाऊ ।
तुलसिदास ग्वालिनि अति नागरि, नट नागरमनि नंदललाऊ ॥ १२ ॥

छाँड़ो मेरे ललित ललन लरिकाई ।

येहँ सुत देखुवार कालि तेरे, बवै व्याह की वात चलाई ॥

डरिहँ सासु ससुर चोरी सुनि, हँसिहँ नई दुलहिया सुहाई ।

उबटौ न्हाहु, गुहैं चोटिया, बलि, देखि भलो वर करिहि बड़ाई ॥

मातु कह्यो करि कहत बोलि दै, भई वढ़ि वार कालि तौ न आई ।

जब सोइबो तात यों हाँकहि, नयन मीचि रहे पौढ़ि कन्हआई ॥

उठि कह्यो भोर भयो भँगुली दै, मुदित महरि लखि आतुरताई ।

बिहँसी ग्वालि जानि तुलसी प्रभु सकुचि लगे जननी उर धाई ॥१३॥

राग केदारा

हरि को ललित बदन निहारु ।

निपटहि डाँटति निठुर ज्यों, लकुट कर तेँ डारु ॥

मंजु अंजन सहित अल-कन चुवत लोचन चारु ।

स्यामसारस मग मनो ससि स्रवत सुधा-सिंगारु ॥

सुभग उर दधिबुंद सुंदर लखि अपनपौ वारु ।

मनहुँ मरकत-मृदु-सिखर पर लसत बिसद तुषारु ॥

कान्हडू पर सतर भौहँ, महरि मनहिं बिचारु ।

दास तुलसी रहति क्यों रिस निरखि नंदकुमार ॥ १४ ॥

लेत भरि भरि नीर कान्ह कमलनैन ।

फरक अधर डर निरखि लकुट कर, कहि न सकत कछु बैन ॥

दुसह दाँवरी छोरि, थोरी खोरि कहा कीन्हों,

चीन्हो री सुभाय तेरो आजु लगे माई मैं न ।

तुलसिदास नंदललन ललित लखि रिस क्यों रहति उर-येन ॥ १५ ॥

हाहा री महरि बारो, कहा रिसबस भई, कोखि के

जाए सों रोषु केतो बड़ो कियो है ।

ढोली करि दाँवरी, बावरी साँवरेहि देखि,

सकुचि सहमि सिसु भारी भय भियो है ॥

दूध दधि माखन भो, लाखन गोधन धन
 जबते जनम हलधर हरि लियो है ।
 खायो, कै खवायो, कै बिगारयौ, ढारयौ लरिका री,
 ऐसे सुत पर कोह कैसो तेरो हियो है ॥
 मुनि कहैं सुकृती न नंद जसुमति सम,
 न भयो, न भावी, नहिं बिद्यमान बियो है ।
 कौन जानै कौनो तप, कौने जोग जाग जप
 कान्ह सो सुवन तोको महादेव दियो है ॥
 इन्हहीं को आएँ ते वधाए ब्रज नित नए,
 नादत बादत सब सब सुख जियो है ।
 नंदलाल-बाल-जस संत-सुर-सरबस
 गाइ सो अमिय रस तुलसिहु पियो है ॥ १६ ॥
 ललित लालन निहारि, महरि मन बिचारि,
 डारि दे घर-बसी लकुटी बेगि कर तेँ ।
 कछु न कहि सकत, सुसुकत सकुचत,
 डरहूँ को डर, कान्ह डरै तेरे डर तेँ ॥
 कहौ मेरो मानि, हित जानि तू सयानी बड़ी,
 बड़े भाग पायो पूत बिधि हरि हर तेँ ।
 ताहि बाँधिवे को धाई, ग्वालिनी गोरसहाँई,
 लै लै आईँ बावरी दाँवरी घर घर तेँ ॥
 कुल-गुरु-तिय के बचन कमनी य सुनि,
 सुधि भए बचन जे सुने मुनिबर तेँ ।
 छोरि लिये लाय उर, बरषैँ सुमन सुर,
 मंगल है तिहूँ पुर हरि हलधर तेँ ॥
 आनंद-वधावनो मुदित गोप-गोपीगन

आजु परी कुसल कठिन करवर ते ।

तुलसी जे तोरे तरु किए देव, दिये बरु;

कै न लह्यौ कौन फरु देव दामोदर ते ॥ १७ ॥

राग मलार

ब्रज पर घन घमंड करि आए ।

अति अपमान बिचारि आपनो कोपि सुरेस पठाए ॥

दमकति दुसह दसहुँ दिसि दामिनि, भयो तम गगन गँभीर ।

गरजत घोर बारिधर धावत प्रेरित प्रबल समीर ॥

बार बार पविपात, उपल घन बरषत वूँद बिसाल ।

सीत-सभीत पुकारत आरत गो गोसुत गोपी ग्वाल ॥

राखहु राम कान्ह यहि अवसर दुसह दसा भइ आइ ।

नंद बिरोध कियो सुरपति सेँ सो तुम्हरो बल पाइ ॥

सुनि हँसि उठ्यौ नंद को नाहरु, लियो कर कुधर उठाइ ।

तुलसिदास मधवा अपने सेँ करि गयो गर्व गँवाइ ॥ १८ ॥

राग गौरी

टेरि कान्ह गोबर्धन चढ़ि गैया ।

मथि मथि पियो वारि चारिक में भूख न जाति अघाति न घैया ॥

सैल-सिखर चढ़ि चितै चकित चित अति हित बचन कह्यौ बलभैया ।

बाँधि लकुट पट फेरि बोलाई सुनि कल बेनु धेनु धुकि घैया ॥

बलदाऊ देखियत दूरि ते आवति छाक पठाई मेरी मैया ।

किलकि सखा सब नचत मोर ज्यों, कूदत कपि कुरंग की नैया ॥

खेलत खात परसपर डहकत, छीनत कहत करत रोगदैया ।

तुलसी बालकेलि-सुख निरखत बरषत सुमन सहित सुरसैया ॥ १९ ॥

राग नट

गावत गोपाललाल नीके राग नट हैं ।

१९—रोगदैया = अन्याय; बेईमानी ।

चलि री आली देखन लोथन-लाहु पेखन ठाढ़े सुरतरु-तर तटिनी के तट हैं ॥
 मोरचंदा चारु सिर मंजु गुंजापुंज धरे बनि बन-धातु तन ओढ़े पीत पट हैं ।
 मुरली तान-तरंग मोढ़े कुरंग बिहंग, जोहैं मूरति त्रिभंग निपट निकट हैं ॥
 अंबर अमर हरषत बरषत फूल, सनेह-सिथिल गोप गाइन्ह के ठट हैं ।
 तुलसीप्रभुनिहारिजहाँतहाँब्रजनारिठगीठाढीमगलियेरीतेभरे घट हैं ॥२०॥

राग बिलावल

देखु सखी हरिबदन इंदु-पर ।

चिक्कन कुटिल अलक-अवली-छवि, कहि न जाइ सोभा अनूप बर ॥
 बाल-भुअंगिनि-निकर मनहुँ मिलि रहौ घेरि रस जानि सुधाकर ।
 तजिन सकहि नहिं करहिं पान कहो कारन कौन बिचारि डरहिं डर ॥
 अरुन बनज-लोचन, कपोल सुभ, स्मृति मंडित कुंडल अति सुंदर ।
 मनहुं सिंधु निज सुतहि मनावन पठए जुगुल बसीठ बारिचर ॥
 नंदनंदन मुख की सुंदरता कहि न सकत स्मृति सेष उमावर ।
 तुलसिदास त्रैलोक्य-बिमोहन रूप कपट नर त्रिविध सूलहर ॥२१॥

आजु उनींदे आए मुरारी ।

आलसवंत सुभग लोचन सखि छिन मूँदत, छिन देत उधारी ॥
 मनहुँ इंदु पर खंजरीट दोउ कछुक अरुन बिधि रचे सँवारी ।
 कुटिल अलक जनु मार फंद कर गहे सजग है रह्यो सँभारी ॥
 मनहुँ उड़न चाहत अति चंचल पलक पंख छिन देत पसारी ।
 नासिक कीर, बचन पिक सुनि करि संगति मनु गुनि रहति बिचारी ॥
 रुचिर कपोल, चारु कुंडल बर, भ्रुकुटि सरासन की अनुहारी ।
 परम चपल तेहि त्रास मनहुँ खग प्रगटत दुरत न मानत हारी ॥
 जदुपति मुखछवि कलप कोटि लागि कहि न जाइ जाके मुख चारी ।
 तुलसिदास जेहि निरखि ग्वालिनी भजीं तात पति तनय बिसारी ॥२२॥

राग गौरी

गोपाल गोकुल-बल्लभी-प्रिय गोप-गोसुत-बल्लभ ।

चरनारविंदमहं भजे भजनीय सुर-मुनि-दुर्लभं ॥
 धनश्याम काम अनेक छवि, लोकाभिराम मनोहरं ।
 किंजल्क-बसन, किसोर मूरति, भूरि गुन करुणाकरं ॥
 सिर केकि-पच्छ बिलोल कुंडल अरुन वनरुह-लोचनं ।
 गुंजावतंस बिचित्र, सब अंग धातु भवभय-मोचनं ॥
 कच कुटिल, सुंदर तिलक भ्रू राका-मयंक-समाननं ।
 अपहरन तुलसीदास त्रास बिहार वृंदाकाननं ॥२३॥

राग बिलावल

बिछुरत श्रीत्रजराज आजु इन नयनन की परतीति गई ।
 उड़ि न लगे हरि संग सहज तजि, हूँ न गए सखि स्याममई ॥
 रूपरसिक लालची कहावत, सो करनी कछु तौ न भई ।
 साँचेहु कूर कुटिल, सित मेचक, वृथा मीनछवि छीनि लई ॥
 अब काहे सोचत मोचत जल, समय गए चित सुल नई ।
 तुलसिदास तव अपहुँ से भए जड़, जब पलकनि हठ दगा दई ॥२४॥

राग कान्हरा

नहिं कछु दोष स्याम को माई !
 जो दुख मैं पायों सुजनी सो तो सबै मन की चतुराई ॥
 निज हित लागि तबहिं ए बंचक सब अंगनि बसि प्रीति बढ़ाई ।
 लियो जो सकल सुख हरि-अंग-संग को जहँ जिहि बिधि तह सोइ बनाई ॥
 अब नंदलाल-गवन सुनि मधुवन तनहि तजत नहिं बार लगाई ।
 रुचिर रूप-जल मों रसेस हूँ मिलि न फिरन की बात चलाई ॥
 एहि सरीर बसि सखि वा सठ कह कहि न जाइ जो निधि फबि आई ।
 तदपि कछु उपकार न कीन्हों निज मिलन्यौ नहिं मोहिं सिखाई ॥
 आपु मिल्यो यहि भाँति जाति तजि, तन मिलयो जल-पथ की नाई ।
 हूँ मराल आयो सुफलकसुत लै गयो छोर नीर बिलगाई ॥

मन हौं तजी, कान्ह हौं त्यागी, प्रानौ चलिहैं परिमिति पाई ।
तुलसिदास रीतेहु तनु ऊपर नयननि की ममता अधिकार्ई ॥ २५ ॥

राग धनाश्री

करी है हरि बालक की सी केलि ।
हरष न रचत, विषाद न बिगारत, डगरि चले हंसि खेलि ॥
बई बनाइ बारि वृं दावन प्रीति सजीवनि-बेलि ।
सींचि सनेहसुधा खनि काढ़ी लोक-वेद परहेलि ॥
चन ज्यों तजी, पालितनु ज्यों हम बिधि वासव बल पेलि ।
एतेहुँ पर भावत तुलसी प्रभु गए मोहनी मेलि ॥ २६ ॥

आली अब कहौ निज नेह निहारि ।
समुझे सहे हमारो है हित बिधि-वामता बिचारि ॥
सत्यसनेह सील सोभा सुख सब गुन-उदधि अपारि ।
देख्यो सुन्यो न कवहुँ काहु कहुँ मीन-बियोगी बारि ॥
कहियत काकु कूबरी हूँ को, सो कुबानि-बस नारि ।
बिष तेँ बिषम विनय अनहित की, सुधा सनेही गारि ॥
मन फेरियत कुतर्क कोटि करि कुबल भरोसे भारि ।
तुलसी जग दूजो न देखियत कान्हकुँवर अनुहारि ॥ २७ ॥

लागियै रहति, नयननि आगे तेँ न टरति मोहन मूरति ।
नीलनलिन स्याम, सोभा अगनित काम, पावन हृदय जेहि उर पूरति ॥
सारद अमित शेष नहिं कहि सकत अंग अंग सूरति ।
तुलसिदास बड़े भाग मन लागेहु तेँ सब सुख पूरति ॥ २८ ॥

जब तेँ ब्रज तजि गए कन्हार्ई ।
तब तेँ विरह-रवि उदित एकरस सखि बिछुरनि-वृष पाई ॥
घटत न तेज, चलत नाहिंन रथ, रह्यो उर-नभ पर छाई ।
इंद्रिय रूपरासि सोचहिं सुठि, सुधि सब की बिसराई ॥
भयो सोक-भय-कोक-कोकनद भ्रम-भ्रमरनि सुखदाई ।

चित-चकोर, मनमोर, कुमुद-मुद सकल विकल अधिकारी ॥

तनु-तड़ाग बलवारि सुखन लाग्यो परी कुरूपता-काई ।

प्रानमीन दिन दीन दूबरे, दसा दुसह अब आई ॥

तुलसीदास मनोरथ-मन-मृग भरत जहाँ तहँ धाई ।

राम स्याम सावन भादों विनु जिय की जरनि न जाई ॥ २६ ॥

ससि तेँ सीतल मोको लागै माई री ! तरनि ।

याके उप वरति अधिक अँग अँग दव, वाके उप मिटति रजनि-जनित जरनि ॥

सब विपरीत भए माधव विनु, हित जो करत अनहित की करनि ।

तुलसिदास स्यामसुंदर-विरहकी दुसहदसा सो मोपै परति नहीं वरनि ॥ ३० ॥

संतत दुखद सखी ! रजनीकर ।

स्वारथरत तब, अबहुँ एकरस, मोको कबहुँ न भयो तापहर ॥

निज अंसिक सुख लागि चतुर अति कीन्हों है प्रथम निसा सुभ सुंदर ।

अब विनु मन, तन दहत दया तजि, राखत रवि है नयन वारिधर ॥

जद्यपि है दारुन बड़वानल राख्यो है जलधि गँभीर धीरतर ।

ताहू तेँ परम कठिन जान्यो ससि तज्यो पिता तब भयो व्योमचर ॥

सकल बिकार-कोस विरहिनि-रिपु, कोहे तेँ याहि सराहत सुर नर ? ।

तुलसिदास त्रैलोक्य मान्य भयो कारन इहै गह्यौ गिरिजावर ॥ ३१ ॥

राग मलार

कोउ सखि नई चाह सुनि आई ।

यह ब्रजभूमि सकल सुरपति सों मदन मिलिक करि पाई ॥

घन-धावन, बगपाँति पटोसिर, बैरख-तड़ित सोहाई ।

बोलत पिक नकीव, गरजनि मिस मानहुँ फिरति दोहाई ॥

चातक मोर चकोर मधुप सुक सुमन समीर सहाई ।

चाहत कियो बास वृंदावन बिधि सों कछु न बसाई ॥

सीव न चाँपि सको कोऊ तब जब हुते राम कन्हई ।

अब तुलसी गिरिधर बिनु गोकुल कौन करिहि ठकुराई ? ॥ ३२ ॥

राग सोरठ

ऊधो या ब्रज की दसा बिचारो ।

ता पाछे यह सिद्धि आपनी जोगकथा बिस्तारो ॥

जा कारन पठए तुम माधव सो सोचहु मन माहीं ।

केतिक बीच बिरह परमारथ जानत है किधौं नाहीं ? ॥

परम चतुर निज दास स्याम के संतत निकट रहत हौ ।

जल बूझत अवलंब फेन को फिरि फिरि कहा कहत हौ ? ॥

वह अति ललित मनोहर आनन कौने जतन बिसारौं ।

जोग जुगुति अरु मुकुति बिबिध विधि वा मुरली पर वारौं ॥

जेहि घर बसत स्यामसुंदर धन तेहि निर्गुन कस आवै ।

तुलसिदास सो भजन बहाओ जाहि दूसरो भावै ॥ ३३ ॥

मधुकर कहहु कहन जो पारो ।

नाहिंन, बलि, अपराध रावरो, सकुचि साध जनि मारो ॥

नहिं तुम ब्रज बसि नंदलाल को बालबिनोद निहारो ।

नाहिंन रासरसिक रस चाख्यो, ताते डेल सो डारो ॥

तुलसी जौ न गए प्रीतम संग प्राण त्यागि तनु न्यारो ।

तौ सुनिबो देखिबो बहुत अब, कहा करम सों चारो ? ॥ ३४ ॥

ऊधोजू कह्यो तिहारोइ कीबो ।

नीके जिय की जानि अपनपौ समुझि सिखावन दीबो ॥

स्यामवियोगी ब्रज के लोगनि जोग जोग जो जानो ।

तौ सकोच परिहरि पालागौं परमारथहि बखानो ॥

गोपी गाय ग्वाल गोसुत सब रहत रूप-अनुरागे ।

दीन मलीन छीन तनु डोलत मीन मजा सों लागे ॥

तुलसी है सनेह दुखदायक, नहिं जानत ऐसो को है ? ।

३४—डेल सो डारो = पथर सा मारते हो ।

तऊ न होत कान्ह को सो मन, सबै साहिबहि सोहै ॥ ३५ ॥

राग बिलावल

सो कहौ मधुप जो मोहन कहि पठई ।

तुम सकुचत कत ? हैं हीं नीके जानति, नंदनंदन हो निपट करी सठई ॥

हुतो न साँचो सनेह, मिथ्यो मन को संदेह, हरि परे उघरि, संदेसहु ठठई ।

तुलसिदास कौन आस मिलन की, कहि गए सो तौ कछु एकौ न चित ठई ॥

मेरे जान और कछु न मन गुनिए ।

कूबरीरवन कान्ह कही जो मधुप सो,

सोई सिख सजनी ! सुचित दै सुनिए ॥

काहे को करति रोष, देहि धों कौने को दोष,

निज नयननि को बयो सब लुनिए ।

दारु सरीर, कीट पहिले सुख,

सुमिरि सुमिरि बासर निसि धुनिए ॥

ये सनेह सुचि अधिक अधिक रुचि,

बरज्यो न करत कितो सिर धुनिए ।

तुलसिदास अब नंदसुवन-हित

विषम-वियोग-अनल तनु हुनिए ॥ ३७ ॥

भली कही, आली ! हमहुँ पहिचाने ।

हरि निर्गुन निर्लेप निरपने निपट निठुर निज काज सयाने ॥

ब्रज को विरह, अरु संग महर को, कुबरिहि बरत न नेकु लजाने ।

समुझि सो प्रीति की रीति स्याम की सोइ बावरि जो परेषो उर आने ॥

सुनत न सिख लालची बिलोचन एतेहु पर रुचि रूप लोभाने ।

तुलसिदास इहै अधिक कान्ह पहिं, नीके ई लागत मन रहत समाने ॥ ३८ ॥

राग मलार

जोपै अलि ! अंत इहै करिबे हो ।

तौ अतुलित अहीर अबलनि को हठि न हियो हरिबे हो ॥

जौ प्रपंच परिनाम प्रेम फिरि अनुचित आचरिबे हो ।
 तौ मथुराहि महामहिमा लहि सकल ढरनि ढरिबे हो ॥
 दै कूबरिहि रूप ब्रजसुधि भए लौकिक डर डरिबे हो ।
 ज्ञान बिराग काल कृत करतब हमरेहि सिर धरिबे हो ॥
 उन्हहिं राग रवि नीरद-जल ज्यों, प्रभु-परमिति परिबे हो ।
 हमहुँ निठुर-निरुपाधि-नेहनिधि निज भुजबल तरिबे हो ॥
 भलो भयो सब भाँति हमारो एकवार मरिबे हो ।
 तुलसी कान्हविरह नित नव जर जरि जीवन भरिबे हो ॥ ३८ ॥

ऊधो ! यह ह्याँ न कछू कहिबे ही ।

ज्ञानगिरा कूबरीरवन की सुनि विचारि गहिबे ही ॥
 पाइ रजाइ नाइ सिर गृह हूँ गति परमिति लहिबे ही ।
 मति-मटुकी मृगजल भरि घृतहित मनहीं मन महिबे हो ॥
 गाढ़े भली, उखारे अनुचित, बनि आए बहिबे ही ।
 तुलसी प्रभुहिं तुम्हहिं हमहुँ हिय साँसति सी सहिबे ही ॥ ४० ॥

मधुकर ! कान्ह कहा ते न होँहीं ।

कै ये नई सिखी सिखई हरि निज-अनुराग-बिछोहीं ॥
 राखी सचि कूबरी पीठ पर ये बातैं बकुचौहीं ।
 स्याम सो गाहक पाइ सयानी खोलि देखाई है गौं हों ॥
 नागरमनि सोभासागर जेहि जग जुवती हँसि मोही ।
 लियो रूप दै ज्ञान-गाँठरी भलो ठग्यो ठगु ओहो ॥
 है निगुण सारी बारिक, बलि, घरी करौ, हम जोही ।

३८—उन्हहिं राग.....ज्यों = जैसे, सूर्य ही मेव रूप में जल को आक-
 र्षित करता है पर उससे कोई राग या संबंध नहीं रखता । प्रभु-परमिति परिबे
 हो = राजा की मर्यादा के पालन में पड़ना था ।

४०—बहिबे ही बनि आए = आ पड़ने पर निबाहना ही होगा ।

४१—बकुचौही = बकुचा या गठरी बाँधकर । बारिक = बारीक । घरी करौ =
 तह लगाकर रखो ।

तुलसी ये नागरिन्ह जोगपट जिन्हहिं आजु सब सोही ॥ ४१ ॥

मधुप तुम्ह कान्ह ही की कही क्यों न कही है ? ।

यह बतकही चपल चेरी की निपट चरेरीए रही है ॥

कब ब्रज तज्यौ, ज्ञान कब उपज्यौ ? कब बिदेहता लही है ।

गए बिसारि रीति गोकुल की, अब निर्गुन गति गही है ॥

आयसु देहु करहिं सोइ सिर धरि प्रीति-परमिति निरबही है ।

तुलसी परमेस्वर न सहैगो, हम अवलनि सब सही है ॥ ४२ ॥

दीन्हीं है मधुप सबहि सिख नीकी ।

सोइ आदरौ आस जाके जिय बारि बिलोवत घी की ॥

बूझी बात कान्ह कुबरी की, मधुकर कछु जनि पछौ ।

ठालीं ग्वालि जानि पठए, अलि, कद्यो है पछोरन छूछो ॥

हमहूँ कछुक लखी ही तव की औरैबै नंदलला की !

ये अब लही चतुर चेरी पै चोखी चालि चलाकी ॥

गए कर तेँ, घर तेँ, आँगन तेँ ब्रजहु तेँ ब्रजनाथ ।

तुलसी प्रभु गयो चहत मनहुँ तेँ सो तो है हमारे हाथ ॥ ४३ ॥

ताकी सिख ब्रज न सुनैगो कोउ भोरे ।

जाकी कहनि रहनि अनमिल, अलि, सुनत समुझियत थोरे ॥

आपु कंजमकरंद सुधाहृद हृदय रहत नित बोरे ।

हम सों कहत बिरह-सम जैहै गगन कूप खनि खोरे ॥

धान को गाँव पयार तेँ जानिय ज्ञान विषय मन मोरे ।

तुलसी अधिक कहे न रहै रस गूलरि को सो फल फोरे ॥ ४४ ॥

आली ! अति अनुचित उत्तर न दीजै ।

सेवक सखा सनेही हरि के जो कुछ कहैं सो कीजै ॥

देसकाल उपदेस सँदेसो सादर सब सुनि लीजै ।

४३—औरैबै = टेढ़ी चाले ।

४४—खोरे = स्नान करने से ।

कै समुझिबो, कै ये समुझैहै हारेहु मानि सहीजै ॥
 सखि सरोष प्रियदोष बिचारत प्रेम पीन पन छीजै ।
 खग मृग मीन सलभ सरसिज गति सुनि पाहनौ पसीजै ॥
 ऊधो परम हितू हित सिखवत परमिति पहुँचि पतीजै ।
 तुलसिदास अपराध आपनो, नंदलाल बिनु जीजै ॥४५॥

ऊधो हैं बड़े, कहैं सोइ कीजै ।

अलि, पहिचानि प्रेम की परमिति उतरु फेरि नहिं दीजै ॥
 जननी जनक जरठ जाने जन परिजन लोगु न छीजै ।
 दै पठयो पहिलो बिदितो ब्रज सादर सिर धरि लीजै ॥
 कंस मारि जदुबंस सुखी कियो, खवन सुजस सुनि जीजै ।
 तुलसी ल्यों ल्यों होइगी गरुई ज्यों ज्यों कामरि भीजै ॥ ४६ ॥

कान्ह, अलि ! भए नये गुरु ज्ञानी ।

तुम्हरे कहत आपने समुझत, बात सही उर आनी ॥
 लिए अपनाइ लाइ चन्दन तन, कछु कटु चाह उड़ानी ।
 जरी सुँघाइ कूबरी कौतुक करि जोगी बघा-जुड़ानी ॥
 ब्रज बसि रास-बिलास, मधुपुरी चेरी सों रति मानी ।
 जोग-जोग ग्वालिनी बियोगिनि जान-सिरोमनि जानी ॥
 कहिवे कछू कछू कहि जैहै, रहौ, अलि ! अरगानी ।
 तुलसी हाथ पराए प्रीतम, तुम्ह प्रिय-हाथ बिकानी ॥४७॥

सब मिलि साहस करिय सयानी ।

ब्रज आनियहि मनाइ पाँय परि कान्ह कूबरी रानी ॥
 बसैं सुबास, सुपास होहि सब फिरि गोकुल रजधानी ।
 महरि महर जीवहि सुख-जीवन खुलहि मोद-मनि-खानी ॥

४६—बिदितो = बिदित, कमाई ।

४७—चाह उड़ानी = खबर उड़ी है । बघा-जुड़ानी = व्याघ्र को ठंढा अर्थात् वश में करनेवाली क्रिया ।

तजि अभिमान अनख अपनो हित कीजिय मुनिवर बानी ।

देखिबो दरस दूसरेहु चौथेहु बड़ो लाभ, लघु हानी ॥

पावक परत निषिद्ध लाकरी होति अनल जग जानी ।

तुलसी सो तिहुँभुवन गाइबी नंदसुवन सनमानी ॥ ४८ ॥

कही है भली बात सब के मनमानी ।

प्रियसम प्रियसनेह-भाजन, सखि ! प्रीति-रीति जगजानी ॥

भूषन भूति गरल परिहरि कै हरमूरति उर आनी ? ।

मज्जन पान कियो कै सुरसरि कर्मनास-जल छानी ? ॥

पूछ सों प्रेम, विरोध साँग सों, यहि बिचार हितहानी ।

कीजै कान्ह-कूबरी सों नित नेह करम मन बानी ॥

तुलसी तजिय कुचालि आलि अब सुधरै सबइ नसानी ।

आगे करि मधुकर मथुरा कहँ सोधिय सुदिन सयानी ॥ ४९ ॥

राग कान्हरा

हे हम समाचार सब पाए ।

अब विशेष देखे तुम्ह देखे हैं कूबरी हाँक से लाए ॥

मथुरा बड़ो नगर नागर जन जिन्ह जातहि जदुनाथ पढ़ाए ।

समुझि रहनि, सुनि कहनि विरह व्रन अनष अभिय औषध सरुहाए ॥

मधुकर रसिक सिरोमनि कहियत कौने यह रसरीति सिखाए ।

बिनु आषर को गीत गाइ गाइ चाहत ग्वालनि ग्वाल रिम्हाए ॥

फल पहिले ही लख्यो ब्रजवासिन्ह, अब साधन उपदेसन आए !

तुलसी अलि, अजहूँ नहिं बूझत, कौन हेतु नंदलाल पठाए ॥ ५० ॥

कौन सुनै अलि को चतुराई ।

अपनिहि मतिविलास अकास महुँ चाहत सियनि चलाई ॥

सरल सुलभ हरिभगति-सुधाकर निगम पुराननि गाई ।

४९—कै = किसने ?

५०—सरुहाए = चंगा किया (?)

तजि सोइ सुधा मनोरथ करि करि को मरिहै, री माई ॥
 जद्यपि ताको सोइ मारगप्रिय जाहि जहाँ बनि आई ।
 मैन के दसन, कुलिस के मोदक कहत सुनत बौराई ॥
 सगुन छीरनिधि-तीर बसत ब्रज तिहुँ पर बिदित बड़ाई ।
 आक दुहन तुन्ह कछौ सो परिहरि हम यह मति नहिँ पाई ॥
 जानत हैं जदुनाथ सबन की बुधि विवेक जड़ताई ।
 तुलसिदास जनि बकहिं, मधुप सठ ! हठ निसि दिन अँवराई ॥५१॥

राग केदारा

गोकुल प्रीति नित नई जानि ।

जाइ अनत सुनाइ मधुकर ज्ञानगिरा पुरानि ॥
 मिलहिँ जोगी जरठ तिन्हहिँ दिखाउ निरगुन-खानि ।
 नवल नंदकुमार के ब्रज सगुन सुजस बखानि ॥
 तू जो हम आदरयो सो तो नव कमल की कानि ।
 तजहि तुलसी समुझि यह उपदेसिबे की बानि ॥ ५२ ॥

काहे को कहत बचन सवाँरि ।

ज्ञानगाहक नाहिनै ब्रज मधुप अनत सिधारि ॥
 जुगुति धूम बघारिबे की समुझिहैं न गँवारि ।
 जोगिजन मुनिमंडली में जाइ रीती ढारि ॥
 सुनै तिन्ह की कौन तुलसी जिन्हहिँ जीति न हारि ।
 सकति खारो कियो चाहत मेघहू को बारि ॥ ५३ ॥

ऐसे हैं हूँ जानति भृंग ।

नाहिनै काहू लहो सुख प्रीति करि इक अंग ॥
 कौन भीर जो नीरदहि जेहि लागि रटत बिहंग ?
 मीन जल बिनु तलफि तनु तजै, सलिल सहज असंग ॥
 पीर कछू न मनिहिँ जाके विरह-विकल भुअंग ।

व्याध-विसिष बिलोक नहिं कलगान-लुबुध कुरंग ॥

स्यामघन गुनवारि छविमनि मुरलि-तान-तरंग ।

लग्यो मन बहु भाँति तुलसी होइ क्यों रसभंग ? ॥ ५४ ॥

ऊधो ! प्रीति करि निरमोहियन सों को न भयो दुखदीन ?

सुनत समुझत कहत हम सब भई अति अप्रवीन ॥

अहि कुरंग पतंग पंकज चारु चातक मीन ।

बैठि इनकी पाँति अब सुख चहत मन मतिहीन ॥

निठुरता अरु नेह की गति कठिन परति कह्यो न ।

दासतुलसी सोच नित निज प्रेम जानि मलीन ॥ ५५ ॥

राग गौरी

सुनत कुलिस सम बचन तिहारे ।

चित दै मधुप सुनहु सोड कारन जाते जात न प्रान हमारे ॥

ज्ञान कृपान समान लगत उर, विहरत छिन छिन होत निनारे ।

अवधि-जरा जोरति हठि पुनि पुनि, याते तनु रहत सहत दुख भारे ॥

पावक-बिरह समीर-स्वास तनु-तूल मिले तुम्ह जारनिहारे ।

तिन्हहिं निदरि अपने हित कारन राखत नयन निपुन रखवारे ॥

जीवन कठिन, मरन की यह गति दुसह बिपति ब्रजनाथ निवारे ।

तुलसिदास यह दसा जानि जिय उचित होइ सो कहौ अलि, प्यारे ॥ ५६ ॥

छपद ! सुनहु बर बचन हमारे ।

बिनु ब्रजनाथ ताप नयनन की कौन हरै, हरि अंतर-कारे ॥

कनककुंभ भरि भरि पियूषजल बरषत सक्र कल्पसत हारे ।

कदलि सीप चातक को कारज स्वाति-बारि बिनु कोउ न सँवारे ॥

सब अँग रुचिर किसोर स्यामघन जेहि हृदि-जलज बसत हरि प्यारे ।

तेहि उर क्यों समात बिराटबपु स्यों महि सरित सिंधु गिरि भारे ॥

बढ़्यो अति प्रेम प्रलय के वट ज्यों बिपुल जोग-जल बोरी न पारे ।

तुलसिदास ब्रजबनितन को ब्रत समरथ को करि जतन निवारे ॥५७॥

मधुप ! समुक्ति देखहु मन माहीं ।

प्रेमपियूषरूप उडुपति बिनु कैसे हो ! अलि पैयत रवि पाहीं ॥

जद्यपि तुम हित लागि कहत सुनि सवन बचन नहि हृदय समाहीं ।

मिलहि न पावक महँ तुषार कन जो खोजत सत कलप सिराहीं ॥

तुम कहि रहे, हमहुँ पचि हारी, लोचन हठी तजत हठ नाहीं ।

तुलसिदास सोइ जतन करहु कछु बारक स्याम इहाँ फिरि जाहीं ॥५८॥

मोको अब नयन भए रिपु माई ।

हरि-बियोग तनु तजेहि परमसुख ए राखहि सोइ है वरियाई ॥

बरु मन कियो बहुत हित मेरो बारहिबार काम दब लाई ।

वरषि नीर ये तबहि बुझावाह स्वारथ निपुन अधिक चतुराई ॥

ज्ञानपरसु दै मधुप पठायो बिरहबेलि कैसेहु कठिनाई ।

सो थाक्यो बरह्यो एकहि तक देखत इनकी सहज सिंचाई ॥

हारत हू न हारि मानत, सखि, सठ सुभाव कंदुक की नाई ।

चातक जलज मीनहुँ ते भोरे समुझत नहि उन्हकी निठुराई ॥

ए हठ-निरत दरस लालचबस परे जहाँ बुधिबल न बसाई ।

तुलसिदास इन्हपर जो द्रवहि हरि तौ पुनि मिलौ बैरु बिसराई ॥ ५९ ॥

राग आसावरी

कहा भयो कपट जुआ जो हैं हारी ?

समरधीर महाबीर पाँचपति क्यों दैहैं मोहिं होन उधारी ॥

राजसमाज सभासद समरथ भीषम द्रोण धर्मधुरधारी ।

अबला अनघ अनवसर अनुचित होति, हेरि करिहैं रखवारी ॥

यों मन गुनति दुसासन दुरजन तमक्यो तकि गहि दुहुँ कर सारी ।

सकुचि गात गोवति कमठी ज्यों हहरी हृदय, बिकल भइ भारी ॥

अपनेनि को अपनो बिलोकि बल सकल आस विस्वास बिसारी ।


५९—बरह्यो = बरहे में । एकहि तक = एक ही तार, लगातार ।

हाथ उठाइ अनाथ नाथ सों 'प्राहि पाहि, प्रभु, पाहि !' पुकारी ॥
तुलसी परखि प्रतीति प्रीतिगति आरतपाल कृपालु मुरारी ।
बसनबेष राखी बिसेषि लखि बिरदावलि मूरति नरनारी ॥ ६० ॥

गहगह गगन दुंदुभी बाजी ।

बरषि सुमन सुरगन गावत जस हरष-मगन मुनि सुजन समाजी ॥
सानुज सगन ससचिव सुजोधन भए मुख मलिन खाइ खल खाजी ।
लाज गाज उनवनि कुचाल कलि परी बजाइ कहूँ कहूँ गाजी ॥
प्रीति प्रतीति दुपदतनया की भली भूरि भय भभरि न भाजी ।
कहि पारथ-सारथिहि सराहत गई-बहोरि गरीब-निवाजी ॥
सिथिल-सनेह मुदित मन ही मन बसन बीच बिच बधू बिराजी ।
सभासिंधु जटुपति जय जय जनु रमा प्रगटि त्रिभुवनभरि भ्राजी ॥
जुग जुग जग साके केसव के समन-कल्लेस कुसाज-सुसाजी ।
तुलसी को न होइ सुनि कीरति कृष्णकृपालु-भगतिपथ राजी ? ॥ ६१ ॥

६१—खाजी = खाद्य, अर्थात् अपने मुँह की खाकर ।



विनयपत्रिका

कविप्रदीप

विनयपत्रिका

—:०:—

राग बिलावल

गाइए गनपति जगबंदन । संकरसुवन भवानीनंदन ॥
 सिद्धिसदन गजबदन विनायक । कृपासिंधु सुंदर सब लायक ॥
 मोदकप्रिय मुद-मंगल-दाता । विद्यावारिधि बुद्धि-विधाता ॥
 माँगत तुलसिदास कर जोरे । बसहिं रामसिय मानस मोरे ॥१॥
 दीनदयालु दिवाकर देवा । कर मुनि मनुज सुरासुर सेवा ।
 हिम-तम-करि कोहरि करमाली । दहन दोष दुख दुरित रुजाली ॥
 कोक-कौकनद-लोक-प्रकासी । तेज-प्रताप-रूप-रस-रासी ।
 सारथि पंगु, दिव्य रथ-गामी । हरि-संकर-विधि-मूरति स्वामी ॥
 बेद पुरान प्रगट जस जागै । तुलसी रामभगति बर माँगै ॥२॥

को जाचिए संभु तजि आन ?

दीनदयालु भगतआरतिहर सब प्रकार समरथ भगवान ॥
 कालकूट-जुर जरत सुरासुर, निज पन लागि कियो विषपान ।
 दारुन दनुज जगत-दुखदायक जारयो त्रिपुर एक ही बान ॥
 जो गति अगम महामुनि दुर्लभ कहत संत स्तुति सकल पुरान ।
 सोइ गति मरन-काल अपने पुर देत सदासिव सबहिं समान ॥
 सेवत सुलभ उदार कलपतरु पारबती-पति परम सुजान ।
 देहु कामरिपु रामचरन-रति तुलसिदास कहँ कृपानिधान ॥३॥

१—नंदन = आनंद = देनेवाले ।

२—करमाली = किरणों की माला धारण करनेवाले । रुजाली =
 रोग-समूह ।

राग धनाश्री ।

दानी कहूँ संकर सम नार्हीं ।

दीनदायलु दिबोई भावै जाचक सदा सोहाहीं ॥
 मारि कै मार थप्यो जग में जाकी प्रथम रेख भट माहीं ।
 ता ठाकुर को रीझि निवाजिबो कह्यो क्यों परत मो पाहीं ? ॥
 जोग कोटि करि जो गति हरि सों मुनि माँगत सकुचाहीं ।
 बेदबिदित तेहि पद पुरारि-पुर कीट पतंग समाहीं ॥
 ईस उदार उमापति परिहरि अनत जे जाँचन जाहीं ।
 तुलसिदास ते मूढ़ माँगने कबहुँ न पेट अघाहीं ॥ ४ ॥

बावरो रावरो नाह, भवानी !

दानि बड़ो दिन, देत दए बिनु, बेद-बड़ाई भानी ॥
 निज घर की घरवात बिलोकहु, है तुम परम सयानी ।
 सिव की दर्ई संपदा देखत श्रीसारदा सिहानी ॥
 जिनके भाल लिखी लिपि मेरी सुख की नहीं निसानी ।
 तिन रंकन को नाक सँवारत हैं आयों नकवानी ॥
 दुख दीनता दुखी इनके दुख, जाचकता अकुलानी ।
 यह अधिकार सौँपिए औरहि, भीख भली मैं जानी ॥
 प्रेम-प्रसंसा-बिनय-व्यंग-जुत सुनि बिधि की बर बानी ।
 तुलसी मुदित महेस, मनहिं मन जगतमातु मुसुकानी ॥ ५ ॥

राग रामकली ।

जाचिए गिरिजापति कासी । जासु भवन अनिमादिक दासी ॥
 औढर-दानि द्रवत पुनि थोरे । संकत न देखि दीन कर जोरे ॥

४—दिन = प्रति दिव, सदा । सिहानी = ईश्या की । नाक = स्वर्ग ।
 नकवानी आयों = नाकों दम हो गया ।

६—औढर-दानि = मन मौजी (पात्रापात्र का विचार न करनेवाले)
 देनेवाले ।

सुख संपति मति सुगति सुहाई । सकल सुलभ संकर सेवकाई ॥
 गए जे सरन आरति-के-लीन्हे । निरखि निहाल निमिषि महँ कीन्हे
 तुलसिदास जाचक जस गावै । बिमल भगति रघुपति की पावै ॥६॥
 कस न दीन पर द्रवहु, उमावर । दारुन-विपति-हरन, करुनाकर ॥
 बेद-पुरान कहत उदार हर । हमरि बेर कस भयो कृपिनतर ॥
 कवनि भगति कीन्ही गुननिधि द्विज । ह्वै प्रसन्न दीन्हेउ सिव पद निज ॥
 जो गति अगम महामुनि गावहिं । तव पुर कीट पतंगहु पावहिं ॥
 देहु कामरिपु ! रामचरन-रति । तुलसिदास प्रभु हरहु भेद-मति ॥ ७ ॥

देव बड़े, दाता बड़े, संकर बड़े भोरे ।

किए दूर दुख सबनि के जिन जिन कर जोरे ॥

सेवा सुमिरन पूजिबो पात आखत थोरे ।

दियो जगत जहँ लगि सबै सुख गज रथ घेरे ॥

गाँव बसत, वामदेव, मैं कबहूँ न निहोरे ।

अधिभौतिक बाधा भई, ते किंकर तोरे ॥

बेगि बोलि, बलि, बरजिए करतूति कठोरे ।

तुलसी दलि रूँध्यो चहँ सठ साखि सिहोरे ॥८॥

सिव, सिव ! होइ प्रसन्न करु दाया ।

करुनामय, उदार-कीरति, बलि जाउँ ! हरहु निज माया ॥

जलज-नयन, गुन-अयन, मयन-रिपु, महिमा जान न कोई ।

बिन तव कृपा रामपद-पंकज सपनेहुँ भगति न होई ॥

६—आरति के लीन्हे = दुःखग्रस्त ।

७—गुणनिधि नामक ब्राह्मण ने शिव की मूर्ति पर चढ़कर मंदिर का घंटा चुराया था । शिव ने समझा कि और लोग तो पत्र पुष्प आदि चढ़ाते हैं, पर इसने अपने आपको हमारे अर्पण कर दिया । अतः प्रसन्न होकर उन्होंने उसे मुक्ति दे दी ।

८—साखि = शाखी, वृक्ष । सिहोर = थूहर, सेँहुड़ ।

ऋषय सिद्ध मुनि मनुज दनुज सुर अपर जीव जग माहीं ।
 तव-पद-विमुख न पार पाव कोउ कलप कोटि चलि जाहीं ॥
 अहिभूषन, दूषन-रिपु-सेवक, देव देव त्रिपुरारी ।
 मोह-निहार-दिवाकर संकर, सरन-सोक-भयहारी ॥
 गिरिजा-मन-मानस-मराल, कासीस, मसान-निवासी ।
 तुलसिदास हरिचरन-कमल, हर ! देहु भगति अविनासी ॥ ६ ॥

राग धनाश्री

देव ! मोहतम-तरणि, हर, रुद्र, शंकरशरण,
 हरण-भयशोक, लोकाभिरामं ।
 बालशशि भाल, सुविशाल लोचन-कमल,
 काम-शतकोटि-लावण्यधामं ॥
 कंबु, कुं देहु-कपूर्-विग्रह रुचिर,
 तरुण-रविकोटि तनु तेज आजै ।
 भस्म सर्वांग, अर्द्धांग शैलात्मजा,
 व्याल-नृकपाल-माला बिराजै ॥
 मौलि संकुल-जटामुकुट-विद्युच्छटा,
 तटिनि बर बारि हरिचरण-पूतं ।
 श्रवण कुंडल, गरलकंठ करुणाकंद,
 सच्चिदानंद वंदेऽवधूतं ॥
 मूल-सायक-पिनाकासिकर सत्रुवन-
 दहन इव धूमध्वज, वृषभ-यानं ।
 व्याघ्र-गज-चर्म परिधान, विज्ञान-धन,

६-निहार = कुहार ।

१०-विग्रह = शरीर । संकुल = भरा हुआ । छाया हुआ । पूतं = पवित्र ।
 पिनाकासि = धनुष और तलवार । धूमध्वज = अग्नि ।

सिद्ध-सुर-मुनि-मनुज-सेव्यमानं ॥
 तांडवित-नृत्य-पर, डमरु-डिमडिम-प्रवर,
 अशुभ इव भाति कल्याणराशी ।
 महाकल्पांत ब्रह्मांडमंडल-दवन,
 भवन कैलाश, आसीन काशी ॥
 तज्ञ, सर्वज्ञ, यज्ञेश, अच्युत, विभो,
 विश्व भवदंशसंभव, पुरारी ।
 ब्रह्मोद्भूत-चंद्रार्क-वरुणाग्नि-वसु-मरुत-यम,
 अर्चि भवदंघ्रि सर्वाधिकारी ॥
 अकल, निरुपाधि, निर्गुण, निरंजन, ब्रह्म,
 कर्मपथमेकमजनिर्विकारं ।
 अखिल विग्रह, उग्ररूप शिव भूपसुर,
 सर्वगत, शर्व, सर्वोपकारं ॥
 ज्ञान, वैराग्य, धन, धर्म, कैवल्य सुख,
 सुभग सौभाग्य शिव सानुकूलं ।
 तदपि नर मृदु आरूढ संसार-पथ
 अमृत भव विमुख-तव-पादमूलं ॥
 नष्टमति, दुष्ट अति, कष्टरत, खेदगत
 दासतुलसी शंभु शरण आया ।
 देहि कामारि श्रीरामपदपंकजे
 भक्तिमनवरत गतभेदमाया ॥ १० ॥

भीषणाकार, भैरव भयंकर, भूत-प्रेत-प्रमथाधिपति, विपतिहर्त्ता ।

१०—भाति = जान पड़ते हैं । तज्ञ = तत्व के जाननेवाले । भवदंश-
 संभव = तुम्हारे अंश से पैदा हुआ । अर्चि = पूजन करके । भवदंघ्रि = तुम्हारे
 चरण । निरंजन = माया रहित । अनवरत = सदा ।

११—प्रमथ = महादेवजी के एक प्रकार के गण ।

मोहमूषक-मार्जार, संसार-भय-हरण, तारणतरण, करण, कर्त्ता ॥
 अतुल बल विपुल विस्तार, विग्रह गौर, अमल अति धवल धरणीधरामं ।
 शिरसि संकुलित कल कूट पिंगल जटा-पटल शतकोटिविद्युच्छटाभं ॥
 आज विबुधापगा-आप पावन परम मौलिमालेव शोभाविचित्रं ।
 ललित लल्लाट पर राज रजनीश कल, कलाधर, नौमि हर धनद-मित्रं ॥
 इंदु-पावक-भानु-नयन, मर्दनमयन, ज्ञानगुण-अयन, विज्ञानरूपं ।
 रवन गिरिजा, भवन भूधराधिप सदा, श्रवणकुंडल, वदन-छवि अनूपं ॥
 चर्म-असिशूलधर, डमरु शर चाप कर, यान वृषभेश, करुणानिधानं ।
 जरत सुर असुर नरलोक शोकाकुलं मृदुलचित अजित कृत गरलपानं ॥
 भस्मतनुभूषणं, व्याघ्रचर्माम्बरं, उरग-नरमौलि-उरमालधारी ।
 डाकिनी-शाकिनी-खेचरं-भूचरं यंत्रमंत्र-भंजन, प्रबल कल्मषारी ॥
 काल अतिकाल, कलिकाल-व्यालाद-खग, त्रिपुरमर्दन, भीम-कर्म भारी ।
 सकल-लोकांत-कल्पांतशूलाप्रकृत दिग्गजाव्यक्त-गुण नृत्यकारी ॥
 पाप संताप घनघोर संसृति दीन भ्रमत जगयोनि नहिं कोपि त्राता ।
 पाहि भैरवरूप रामरूपी रुद्र, बंधु गुरु जनक जननी विधाता ॥
 यस्यगुणगण गनति विमलमति शारदा निगम नारद प्रमुख ब्रह्मचारी ।
 शेष सर्वेश आसीन आनंदवन, प्रणत-तुलसीदास-त्रासहारी ॥ ११ ॥
 सदा शंकरं, शंप्रदं, सज्जनानंददं, शैलकन्यावरं, परम रम्यं ।
 काममदमोचनं, तामरस-लोचनं वामदेवं भजे भावगम्यं ॥
 कंबु-कुंदेंदु-कर्पूरगौरं, शिवं, सुंदरं, सच्चिदानंदकंदं ।
 सिद्ध-सनकादि-योगींद्र-वृंदारका-विष्णु-विधि-वंध चरणारविंदं ॥
 ब्रह्मकुलवल्लभं, सुलभमतिदुर्लभं, विकटवेषं, विभुं, वेदपारं ।
 नौमि करुणाकरं, गरलगंगाधरं, निर्मलं, निर्गुणं, निर्विकारं ॥
 लोकनाथं, शोकशूलनिर्मूलिनं, शूलिनं, मोहतम-भूरि-भानुं ।

११—अतिकाल = काल के भी परे अर्थात् उसके भी काल । व्यालाद-
 खग = साँपलानेवाला पक्षी, गरुड़ । आनंदवन = काशी ।

कालकालं, कलातीतमजरं, हरं, कठिन-कलिकाल-कानन-कृशानुं ॥
तज्ज्ञमज्ञानपाथोधि-घटसम्भवं, सर्वगं, सर्वसौभाग्य-मूलं ।
प्रचुर-भव-भञ्जनं, प्रणत-जन-रञ्जनं, दासतुलसी शरण सानुकूलं ॥१२॥

राग वसंत

सेवहु सिवचरन सरोज-रेनु । कल्याण-अखिलप्रद कामधेनु ॥
कर्पूरगौर, करुणाउदार । संसार-सार, भुजगेंद्रहार ॥
सुख-जनम-भूमि महिमा अपार । निर्गुन, गननायक, निराकार ॥
त्रयनयन, मयन-मर्दन, महेस । अहंकार-निहार-उदित-दिनेस ॥
बर बाल-निसाकर मौलि भ्राज । त्रैलोक-सोकहर, प्रमथराज ॥
जिन कहैं विधि सुगति न लिखी भाल । तिनकी गति कासीपति कृपाल ॥
उपकारी को पर हर समान ? सुर असुर जरत कृत गरलपान ॥
बहु कल्प उपाय करिय अनेक । बिनु संभु-कृपा नहिं भव विवेक ॥
विज्ञान-भवन, गिरिसुता-रमन । कह तुलसिदास सम त्रास-समन ॥१३॥

देखो देखो बन बन्यो आजु उमाकंतामनो देखनतुमहिं आईअतुवसंत॥
जनु तनुदुति चंपक-कुसुममाल । वर बसन नील नूतन तमाल ।
कल कदलि जंघ, पद कमल लाल । सुचति कटि केहरि, गति मराल ।
भूषन प्रसून बहु विविध रंग । नूपुर किंकिनि कलरव-बिहंग ॥
कर नवल बकुल-पल्लव रसाल । श्रीफल कुच, कंचुकि लताजाल ॥
आनन सरोज, कच मधुपपुंज । लोचन बिसाल नव नीलकंज ॥
पिक-बचन चरित बर बरहि कीर । सित सुमन हास, लीला समीर ॥
कह तुलसिदास सुनु सिव सुजान । उर बसि प्रपंच रचै पंचवान ॥
करि कृपा हरिय भ्रमफंदकाम । जेहि हृदय बसहिं सुखरासि राम ॥१४॥ॐ

राग मारु

दुसह-दोष-दुख-दलनि करु देवि ! दाया ।
विश्वमूलासि, जन-सानुकूलासि, शरशूलधारिणि, महामूल माया ॥

*—इस पद में शिव के अर्द्धांग रूप पर वसंत ऋतु का रूपक बटाया है ।

तडितगर्भांग सर्वांग सुंदर लसत, दिव्य पट, भव्य भूषण विराजै ।
 बालमृगमंजु-खंजन-बिलोचनि, चंद्रवदनि, लखि कोटि रतिमार लाजै ॥
 रूप-सुख-शील-सीमासि भीमासि रामासि वामासि बर बुद्धि बानी ।
 छमुख-हेरंब-अम्बासि जगदम्बिके ! शंभुजायासि जय जय भवानी ॥
 चंड-भुजदंड-खंडनि विहंडनि, महिषमद-भंग करि अंग तोरे ।
 शुम्भ निःशुम्भ कुम्भीश रणकेशरिणि, क्रोधबारिधि बैरिवृंद बोरे ॥
 निगम-आगम-अगम, गुर्वि तव गुणकथन उर्विधर करै सहस जीहा ।
 देहि मा ! मोहिप्रण प्रेम, यह नेम निज राम घनश्याम, तुलसी पपीहा ॥ १५ ॥

राग रामकली

जय जय जगजननि, देवि, सुर-नर-मुनि-असुरसेवि,
 भक्ति-भुक्ति-दायिनि, भयहरनि, कालिका ।
 मंगल-मुद-सिद्धिसदनि, पर्वशर्वरीश-बदनि,
 ताप-तिमिर-तरुनतरनि-किरनमालिका ॥
 वर्मचर्मकर कृपान, सुलसेलधनुषबान-
 धरनि, दलनि दानवदल, रनकरालिका ।
 पृतना पिसाच प्रेत डाकिनि साकिनि समेत,
 भूत ग्रह वेताल खग मृगालि-जालिका ॥
 जय महेशभामिनी, अनेकरूप-नामिनी,
 समस्त-लोकस्वामिनी, हिमशैलबालिका ।
 रघुपति-पद परम प्रेम तुलसी चह अचल नेम,
 देहि है प्रसन्न, पाहि प्रणतपालिका ! ॥ १६ ॥
 जय जय भगीरथनंदिनि, मुनिचय-चक्रोरिचंदिनि,
 नर-नाग-विबुधबंदिनि, जय जह्नु बालिका ।

१५—हेरंब = गणेश ।

१६—पर्व-शर्वरीश = पूर्यमा का चंद्रमा ।

१७—चय = समूह ।

विष्णुपदसरोजजासि, ईस-सीस पर बिभासि,
 त्रिपथगासि, पुन्यरासि, पापछालिका ।
 विमल विपुल बहसि बारि, सीतल त्रयतापहारि,
 भँवर वर, विभंगतर तरंगमालिका ॥
 पुरजन-पूजोपहार सोभित ससि-धवल धार,
 भंजनि-भवभार, भक्तिकल्प-थालिका ।
 निजतटवासी बिहंग, जल-थलचर पसु पतंग,
 कीट, जटिल तापस सब सरिस पालिकां ॥
 तुलसी तव तीर तीर सुमिरत रघुवंश बीर,
 विचरत मति देहि मोह-महिष-कालिका ॥१७॥

राग धनाश्री

जयति जय सुरसरी जगदखिल-पावनी ।

विष्णु-पदकंज मकरंद-इव अंबु वर बहसि, दुख दहसि अघवृंद-विद्रावनी ॥
 मिलितजलपात्रअज-युक्तहरिचरनरज, विरजवरदारित्रिपुरारिसिर-धामिनी
 जहु-कन्या धन्य, पुन्यकृत सगरसुत, भूधर-द्रोनि-विहरनि बहुनामिनी ॥
 यक्ष गंधर्व मुनि किन्नरोरग दनुज मनुज मज्जहिं सुकृतपुंज जुतकामिनी ।
 स्वर्गसोपान, विज्ञान-ज्ञानप्रदे ! मोहमदमदन-पाथोज-हिमजामिनी ॥
 हरित गंभीर वानीर दुहुँ तीर वर, मध्य धारा विशद विश्वअभिरामिनी ।
 नील पर्यंक कृत शयन सर्पेश जनु सहस्रशीशावली स्रोत सुरस्वामिनी ॥
 अमितमहिमा अमितरूप भूपावली-मुकुटमनि-वंदिते ! लोकत्रयगासिनी ।
 देहिरघुबीरपदप्रीतिनिर्भरमातु ! दासतुलसीत्रासहरणिभवभामिनी ॥१८॥

राग रामकली

हरति पाप त्रिविधताप सुमिरत सुरसरित ।

बिलसति महि कल्पवेलि मुद-मनोरथ-फरित ॥

१७—विभंग = चंचल । थालिका = थाला, आलबाल ।

१८—अज = ब्रह्मा । विरज = निर्मल । द्रोति = घाटी । निर्भर = पूर्ण ।

सोहति ससिधवल-धार सुधा-सलिल-भरित ।
 विमलतर तरंग लसत रघुबर के से चरित ॥
 तो बिनु जगदंब गंग ! कलिजुग का करित ?
 बेर भव-अपार-सिंधु तुलसी कैसे तरित ? ॥१८॥

ईससीस बससि, त्रिपथ लससि नभ-पताल-धरनि ।
 मुनि, सुर, नर, नाग, सिद्ध, सुजन मंगल-करनि ॥
 देखत दुख-दोष-दुरित-दाह-दारिद-दरनि ।
 संगरसुवन-साँसति-समनि, जलनिधि-जल-भरनि ॥
 महिमा की अवधि करसि बहु विधि-हरि-हरनि ।
 तुलसी करु वानि विमल विमल-बारि-बरनि ॥२०॥

राग विलावल

जमुना ज्यों ज्यों लागी बाढ़न ।
 त्यों त्यों सुकृत सुभट कलि भूपहिं निदरि लगे बहि काढ़न ॥
 ज्यों ज्यों जल मलीन त्यों त्यों जमगन-मुख मलीन लहैं आढ़ न ।
 तुलसिदास जगदध जवास ज्यों अनघ-मेघ लागे डाढ़न ॥२१॥

राग भैरव

सेइय सहित सनेह देहभरि कामधेनु कलि कासी ।
 समनि-सोक-संताप-पाप-रुज, सकल-सुमंगल-रासी ॥
 मरजादा चहुँ ओर चरन बर सेवत सुरपुरबासी ।
 तीरथ सब सुभ अंग, रोम सिवलिंग अमित अबिनासी ॥
 अंतरअयन अयन भल, थन फल, बच्छ बेद-विस्वासी ।
 गलकंबल वरुना विभाति, जनु लूम लसति सरितासी ॥
 दंडपानि भैरव विषान, मलरुचि खलगन भयदा सी ।

२१—बहि = बहिः, बाहर । आढ़ = ओट । जगदध = जगत् + अध ।

२२—अंतर-अयन = अतगृही । अयन = आयन, दुग्धकोश । सरितासी = सरिता + असी ।

लोलदिनेस त्रिलोचन लोचन, करनघंट घंटा सी ॥
 मनिकर्निका-बदन-ससि सुंदर, सुरसरि मुखसुषमा सी ।
 स्वारथ-परमारथ-परिपूरन पंचकोस महिमा सी ॥
 बिखनाथ पालक कृपालुचित, लालति नित गिरिजा सी ।
 सिद्ध सची सारद पूजहिं, मन जोगवति रहति रमा सी ॥
 पंचाच्छरी प्रान, मुद माधव, गव्य सुपंचनदा सी ।
 ब्रह्म जीव सम राम नाम जुग आखर-बिखविकासी ॥
 चारितु चरति करम कुकरम कर मरत जीवगन घासी ।
 लहत परमपद पय पावन जेहि, चहत प्रपंच-उदासी ॥
 कहत पुरान रची केसव निज कर-करतूति-कला सी ।
 तुलसी बसि हरपुरी राम जपु जो भयो चहै सुपासी ॥२२॥

राग बसंत

सब सोचबिमोचन चित्रकूट । कलिहरन, करनकल्यान बूट ॥
 सुचि अवनि सुहावनि आलबाल । कानन बिचित्र, बारी बिसाल ॥
 मंदाकिनि-मालिनि सदा सींच । बर-बारि विषम नर नारि नीच ॥
 साखा, सुसृंग, भूरुह, सुपात । निरभर मधु, वर मृदु मलयबात ॥
 सुक-पिक-मधुकर-मुनिवर-बिहार । साधन-प्रसून, फलचारि चारु ॥
 भवघोरघाम-हर सुखद छाँह । शप्यो थिर प्रभाउ जानकीनाह ॥
 साधक सुपथिक बड़े भाग पाइ । पावत अनेक अभिमत अघाइ ॥
 रस एक, रहित-गुनकर्मकाल । सिय राम लषन पालक कृपाल ॥
 तुलसी जो राम-पद चाहिय प्रेम । सेइय गिरि करि निरुपाधि नेम ॥२३॥

२२—लोलदिनेस = लोलाकं (एक कुंड) । त्रिलोचन = एक स्थान ।
 करनघंट = करनघंटा । पंचनदा = पंचगंगा । माधव = विंदुमाधव ।
 चारितु = आरा ।

२३—बूट = वृक्ष । बारि = बारी, बगी ।

राग कान्हरा

अब चित चेति चित्रकूटहि चलु ।

कोपित कलि, लोपित मंगल-मरु, बिलसत बढ़त मोह-माया-मलु ॥
 भूमि बिलोकु राम-पद-अंकित, बन बिलोकु रघुवर-बिहार-थलु ।
 सैलसृंग भवभंगहेतु लखु, दलन कपट-पाखंड-दंभ-दलु ॥
 जहँ जनमे जगजनक जगतपति बिधि हरि हर परिहरि प्रपंच छलु ।
 सकृत् प्रवेस करत जेहि आस्रम बिगत-विषाद भए पारथ नलु ॥
 न करु बिलंब, बिचारु चारु मति, बरष पाछिले सम अगिलो पलु ।
 मंत्र सो जाइ जपहि जो जपत भे अजर अमर हर अँचइ हलाहलु ॥
 राम-नाम-जप-जाग करत नित, मज्जत पय पावन पीवत जलु ।
 करिहँ राम भावतो मन को, सुख-साधन अनयास महा फलु ॥
 कामदमन कामता-कल्पतरु सो जुग जुग जागत जगतीतलु ।
 तुलसी तोहि बिसेष वूमिए एक प्रतीति, प्रीति, एकै बलु ॥ २४ ॥

राग धनाश्री

जयति अंजनी-गर्भ-अंभोधि-संभूत-विधु विबुधकुल-कैरवानंदकारी ।
 केसरी-चारु-लोचन-चकोरक-सुखद, लोकपन-सोकसंतापहारी ॥
 जयति जय बालकपि-केलि-कौतुक-उदित-चंडकरमंडल-आसकर्त्ता ।
 राहु-रवि-सक्र-पवि-गर्व-खर्वीकरन, सरनभयहरन, जय भुवनभर्त्ता ॥
 जयति रनधीर रघुबीर-हित देवमनि रुद्र-अवतार संसारपाता ।
 विप्र-सुर-सिद्ध-मुनि-आसिषाकर-वपुष विमल-गुन-बुद्धि-बारिधि बिधाता ॥
 जयति सुग्रीव-सिच्छादि-रच्छन-निपुन, बालि-बलसालि-बध-मुख्य-हेतू ।
 जलधि-लंघन-सिंह, सिंहिका-मद-मथन, रजनिचर-नगर-उत्पातकेतू ॥
 जयति भूनंदिनी-सोच-मोचन, बिपिनदलन, घननादबस-विगतसंका ।

२४—पय = पयस्विनी ।

२५—चंडकर मंडल = सूर्य-मंडल । संसारपाता = संसार की रक्षा करनेवाला ।

लूमलीला-अनलज्वालमालाकुलित, होलिकाकरन-लंकेसलंका ॥
जयति सौमित्रिरघुनंदनानंदकर, रिच्छ-कपि-कटक-संघटविधार्ई ।
बद्ध-बारिधि-सेतु, अमरमंगलहेतु, भानुकुलकेतु-रनविजयदार्ई ॥
जयति जय बज्रतनु, दसन, नख, मुख विकट, चंड-भुजदंड-तरु, सैल-पानी ।
समर-तैलिकयंत्र तिल-तमीचर-निकर पेरि डारे सुभट घालि घानी ॥
जयति दसकंठ-घटकरन-वारिदनाद-कदन-कारन, कालनेमि-हंता ।
अघट-घटना-सुघट, सुघट-विघटन-विकट, भूमि-पाताल-जल-गगन-गंता ॥
जयति विख-विख्यात बानैत, विरुदावली विदुष बरनत वेद विमलवानी ।
दास तुलसीत्रास-समन सीतारमन-संग सोमित राम राजधानी ॥२५॥
जयति मर्कटाधीस मृगराज-विक्रम महादेव मुदमंगलालय कपाली ।
मोह-मद-कोह-कामादि-खल-संकुल-घोरसंसार-निसि-किरनमाली ॥
जयति लसदंजनादितिज कपि-केसरी-कस्यप-प्रभव-जगदार्तिहर्ता ।
लोक-लोकप-कोक-कोकनद-सोकहर-हंस हनुमान कल्याणकर्ता ॥
जयति सुविसाल विकराल-बिग्रह, बज्र-सार सर्वांग भुजदंड भारी ।
कुलिस नख दसन बर, लसति बालधि-बृहद् बैरि-सखाखधर-कुधरधारी ॥
जयति जानकी-सोचसंताप-मोचन, रामलछिमनानंद-बारिज-विकासी ।
कीस-कौतुक-केलि-लूम-लंका-दहन दलन-कानन-तरुन-तेजरासी ॥
जयति पाथोधि पाषाण-जलजान-कर जातुधान-प्रचुर-हरष-हाता ।
दुष्ट-रावन-कुंभकरन-पाकारिजित्-मर्मभित्-कर्म-परिपाक-दाता ॥
जयति भुवनैकभूषण, विभीषण-बरद-विहित-कृत, रामसंग्राम-साका ।
पुष्पकारुढ-सौमित्रि-सीता-सहित-भानुकुलभानु-कीरति-पताका ॥
जयति पर-जंत्रमंत्राभिचार-असन, कारमनि-कूट-कृत्यादि-हंता ।

२५—संघट-विधार्ई = एकत्र करनेवाला । घटकरन = कुंभकरण ।

कदन = मरण, विनाश ।

२६—हंस = सूर्य । बालधि = पूँछ । पाकारिजित् = इंद्रजीत (मेघनाद) ।

मर्मभित् = मर्मस्थानों को भेदनेवाले ।

साकिनी-डाकिनी-पूतना-प्रेत-बैताल-भूत-प्रमथ-जूथ-जंता ॥
 जयति वेदांतविद, विविधविद्या-विशद-वेदवेदांग-विद्, ब्रह्मवादी ।
 ज्ञान-त्रैराग्य-विज्ञान-भाजन विभो ! विमलगुण गनत सुक नारदादी ॥
 जयति काल-गुन-कर्म-माया-मथन, निश्चल-ज्ञानव्रत, सत्यरत, धर्मचारी ।
 सिद्ध-सुरवृंद-जोगींद्र-सेवित सदा दासतुलसी प्रनत-भय-तमारी ॥२६॥

जयति मंगलागार, संसारभारापहर बानराकार, बिप्रह-पुरारी ।
 राम-रोषानल-ज्वालमालामिस-ध्वांतचर-सलभ-संहारकारी ॥
 जयति मरुदंजनामोद-मंदिर, नतग्रीव-सुग्रीव-दुःखैक-बंधो ।
 यातुधानोद्धत-क्रुद्ध-कालाग्रिहर, सिद्ध-सुर-सज्जनानंदसिंधो ॥
 जयति रुद्राग्रणी, विश्वविद्याग्रणी, विश्वविख्यात भट-चक्रवर्ती ।
 सामगाताग्रणी, कामजेताग्रणी, रामहित, रामभक्तानुवर्ती ॥
 जयति संग्राम-जय, रामसंदेशहर, कोसला-कुसल-कल्याण-भाखी ।
 रामविरहार्कसंतप्त-भरतादिनरनारि-सीतलकरन-कल्पसाखी ॥
 जयति सिंहासनासीनसीतारमन निरखि निर्भर-हरष नृत्यकारी ।
 रामसम्राज-सोभा-सहित सर्वदा तुलसिमानस-रामपुर-बिहारी ॥२७॥

जयतिवातसंजात, विख्यात-विक्रम, बृहद्बाहु, बलविपुल, बालधिविसाला ।
 जातरूपाचलाकार-विग्रह लसत-लोमविद्युल्लता-ज्वालमाला ॥
 जयति बालार्क-बर-बदन, पिंगल नयन, कपिस-कर्कस-जटाजूटधारी ।
 विकट भ्रुकुटि, बज्र दसन नख, वैरि-मंदमत्त-कुंजर-पुंज-कुंजरारी ! ।
 जयति भीमार्जुन-व्यालसूदन-गर्बहर धनंजय-रथत्रानकेतू ।
 भीषम-द्रोन-करनादि-पालित, कालहृक, सुयोधन-चमू-निधनहेतू ॥
 जयति गतराज-दातार, हरतार-संसार-संकट, दनुज-दर्पहारी ।
 ईति अति भीति-ग्रह-प्रेत-चौरानल-व्याधिबाधा समन घोर मारी ॥

२७—ध्वांतचर = निश्चर । सलभ = फतिंगा । नतग्रीव = नीची गर्दन-
 वाले । कल्पसाखी = कल्पवृक्ष । निर्भर = भरा ।

२८—जातरूपाचल = सोने का पर्वत । कपिस = भूरा । व्यालसूदन = गरुड़ ।

जयति निगमागम-व्याकरण-करनलिपि काव्य-कौतुक-कला-कोटि-सिंधो ।
 सामगायक, भक्त-काम-दायक, वामदेव-श्रीराम-प्रियप्रेमबंधो ॥
 जयति धर्मासु-संदग्ध-संपाति-नवपच्छ-लोचन-दिव्यदेह-दाता ।
 कालकलि-पाप-संताप-संकुल-सदा-प्रनत-तुलसीदास-तात-माता ॥२८॥

जयति निर्भरानंद-संदोह कपिकेसरी केसरीसुवन भुवनैकभर्ता ।
 दिव्य-भूम्यंजना-मंजुलाकर-मणे, भगत-संताप-चिंतापहर्ता ॥
 जयति धर्मार्थकामापवर्गद विभो ! ब्रह्मलोकादि-बैभव-विरागी ।
 वचन-मानस-कर्म सत्य-धर्मव्रती जानकीनाथ-चरनानुरागी ॥
 जयति विहगोस-वल-बुद्धि-वेगाति-मद-मथन, मन्मथ-मथन, ऊर्ध्वरेता ।
 महानाटक-निपुन, कोटि-कबिकुल-तिलक, गानगुन-गर्व-गंधर्व-जेता ॥
 जयति मंदोदरी-केसकर्षण विद्यमान-दसकंठ-भटमुकुट-मानी ।
 भूमिजा-दुःख-संजात-रोषांतकृत् जातनाजंतु-कृत-जातुधानी ॥
 जयति रामायण-श्रवण-संजात-रोमांच-लोचनसजल-सिथिलबानी ।
 रामपदपद्म-मकरंद-मधुकर पाहि ! दासतुलसी-सरन सूलपानी ॥२९॥

राग सारंग

जाको गति है श्री हनुमान की ।
 ताकी पैज पृजि आई यह रेखा कुलिस पषान की ॥
 अघटित-घटन, सुघट-बिघटन, ऐसी बिरुदाबलि नहीं आन की ।
 सुमिरत संकट-सोच-बिमोचन मूरति मोदनिधान की ॥
 तापर सानुकूल गिरिजा, हर, लषन, राम, अरु जानकी ।

२८—करनलिपि = लेखक । धर्मांशु = सूर्य ।

२९—निर्भरानंद = पूर्णानंद । भूम्यंजनमंजुलाकरमाणे (भूमि +
 अंजना + मंजुल + आकर + मणि) = अंजना रूपी भूमि की सुंदर खानि के
 रत्न । ऊर्ध्वरेता = जिसका वीर्य कभी च्युत न हुआ हो । भूमिजा = सीता ।
 संजात = उत्पन्न । अंतकृत = यमराज । जातनाजंतु = वह जंतु जो मरणकाल
 का कष्ट भोग रहा हो ।

तुलसी कपि की कृपा-विलोकनि खानि सकल कल्याण की ॥ ३० ॥

राग गौरी

ताकिहै तमकि ताकी ओर को ।

जाके है सब भाँति भरोसो कपि केसरीकिसोर को ?
जनरंजन, अरिगन-गंजन, मुखभंजन खल बरजोर को ।
वेद पुरान प्रगट पुरुषारथ, सकल सुभट-सिरमोर को ॥
उथपे-थपन, थपे-उथपन पन विबुधवृंद-बंदिछोर को ।
जलधिलंधि, दहि लंक प्रबल-दल-दलन निसाचर घोर को ॥
जाको बालविनोद समुझि जिय डरत दिवाकर भोर को ।
जाकी चिबुकचोट चूरन किय रद-मद कुलिस कठोर को ॥
लोकपाल अनुकूल विलोकिबो चहत विलोचन-कोर को ।
सदा अभय, जय-मुद-मंगलमय जो सेवक रनरोर को ॥
भगत-कामतरु नाम राम परिपूरन चंद चकोर को ।
तुलसी फल चारो करतल, जस गावत गई-बहोर को ॥ ३१ ॥

राग बिलावल

ऐसी तोहिं न बूझिय हनुमान हठीले ।

साहेब कहूँ न राम से, तो से न वसीले ॥

तेरे देखत सिंह को सिसु-मेढक लीले ।

जानत हौं कलि तेरेऊ मनु गुनगन कीले ॥

हाँक सुनत दसकंध के भए वंधन ढीले ।

सो बल गयो, किधौं भए अब गर्व-गहीले ॥

३१—उथपे थपन = उखड़े हुए को स्थापित करनेवाले । बंदिछोर = बंदीखाने से छोड़ानेवाले । रदमद = अहंकार रूपी दांत । रनरोर = रण में विजयी । गई बहोर = गई हुई वस्तु को पुनः लौटानेवाले ।

३२—बूझिये = चाहिये । वसीले = जरिये, द्वारा । गर्वगहीले = घमंड़ी ।

सेवक को परदा फटै, तू समरथ सी ले ।
अधिक आपु ते आपनो सुनि मान सही ले ॥
साँसति तुलसीदास की सुनि सुजस तुही ले ।
तिहूँ काल तिनको भलो जे रामरँगिले ॥३२॥

समरथ सुवन समीर के रघुबीर पियारे ।
मोपर कीबे तोहि जो करि लेहि भिया, रे ॥
तेरी महिमा ते चलै चिंचिनी-चियाँ रे ।
अंधियारे मेरी बार क्यों ? त्रिभुवन-उजियारे ! ॥
केहि करनी जन जानि कै सनमान किया रे ।
केहि अघ अवगुन आपनो करि डारि दिया रे ॥
खायो खोंची माँगि मैं तेरो नाम लिया रे ।
तेरे बल, बलि, आजु लौं जग जागि जिया रे ॥
जो तोसें होतौ फिरौ मेरो हेतु हिया रे ।
तौ क्यों वदन देखावतो कहि बचन इया रे ॥
तो सो ज्ञाननिधान को सर्वज्ञ विया रे ? ।
हैं समुझत साईं-द्रोहि की गति छार-छिया रे ॥
तेरे स्वामी राम से, स्वामिनी सिया रे ।
तहँ तुलसी कं कौन को काको तकिया रे ? ॥ ३३ ॥

अति आरत, अति स्वारथी, अति दीन दुखारी ।
इनको बिलगु न मानिए बोलहिं न विचारी ॥
लोक-रीति देखी सुनी, व्याकुल नर नारी ।

३३—कीबे = करना । भिया = भैया (संबोधन) । चिंचिनी-चियाँ = इसली का बीज । डारि दिया = त्याग किया । खोंची = भिन्ना (बाजार की) । जागि = प्रसिद्ध होकर । इया = यह । विया = दूसरा । छिया = गलीज । तकिया = शरण, आश्रय ।

३४—बिलग न मानिए = बुरा न मानिए ।

अति वरषे अनवरपे हूँ देहिं दैवहिं गारी ॥
 ना कहि आयो नाथ सों साँसति भय भारी ।
 “कहि आयो, कीबी छमा निज ओर निहारी” ॥
 समय साँकरे सुमिरिष समरथ हितकारी ।
 सो सब विधि ऊपर करै अपराध बिसारी ॥
 बिगरी सेवक की सदा साहचरि सुधारी ।
 तुलसी पर तेरी कृपा निरुपाधि निरारी ॥३४॥

कटु कहिए गाढ़े परे सुनु समुझि सुसाई ।
 करहिं अनभले को भलो आपनी भलाई ॥
 समरथ सुभ जो पावई, बीर, पीर पराई ।
 ताहि तकै सब ज्यों नदी बारिधि न बुलाई ॥
 अपने अपने को भलो चहै लोग लुगाई ।
 भावै जो जेहिं तेहिं भजै सुभ असुभ सगाई ॥
 बाँहबोल दै थापिए जो निज बरिआई ॥
 बिन सेवा सो पालिए सेवक की नाई ॥
 चूक चपलता मेरियै, तू बड़ो बड़ाई ।
 होत आदरे ढीठ हैं अति नीच निचाई ॥
 बंदिछोर विरुदावली निगमागम गाई ।
 नीकों तुलसीदास को तेरी ही निकाई ॥३५॥

राग गौरी

मंगलमुरति - मारुतनंदन । सकल-अमंगल-मूल-निकंदन ॥
 पवनतनय संतन-हितकारी । हृदय बिराजत अवधविहारी ॥

३४—ऊपर करे = पत्र ग्रहण करता है, सहायता करता है । निरारी = निराली, अनाली ।

३५—सगाई = संबंध । बाँहबेलि = भुजबल का मरोसा ।

मातुपिता गुरु गनपति सारद । सिवा समेत संभु सुक नारद ॥
चरन बंदि विनवौ सब काहू । देहु रामपद-नेह-निबाहू ॥
बंदौ राम लषन वैदेही । जं तुलसी के परम सनेही ॥३६॥

राग दंडक

लाल लाड़िले लषन हितु हौ जन के ।

सुमिरे संकटहारी, सकल सुमंगलकारी, पालक कृपालु आपने पन के ॥
धरनी-धरनहार भंजन-भुवनभार, अवतार साहसी सहसफन के ।
सत्य-संध, सत्यव्रत, परमधरभरत, निरमल करम बचन अरु मन के ॥
रूप के निधान, धनुवान पानि, तूनकटि, महावीर-बिदित, जितैयाबड़ेरन के ।
सेवक-सुखदायक, सबल, सब लायक, गायक जानकीनाथ-गुनगन के ॥
भावते भरत के, सुमित्रा सीता के दुलारे, चातक चतुर राम-स्यामघन के ।
बल्लभ उर्मिला के सुलभ सनेहवस, धनी धनु तुलसी से निरधन के ॥३७॥

राग धनाश्री

जयति लक्ष्मणानंत भगवंत भूधर, भुजगराज, भुवनेश, भूभारहारी ।
प्रलयपावक-महाज्वाल-माला-बमन, शमन-संताप, लीलावतारी ॥
जयति दाशरथि, समर-समरथ, सुमित्रासुवन, शत्रुसूदन, रामभरतबंधो ।
चारु-चंपकबरन, बसनभूषनौ-धरन दिव्यतर, भव्य, लावण्यसिंधो ॥
जयति गांधेय-नौतम-जनक सुखजनक विखकंटक-कुटिल-कोटिहंता ।
बचन-चय-चातुरी-परसुधर-गर्वहर, सर्वदा रामभद्रानुगता ॥
जयति सीतेस-सेवासरस, विषयरस-निरस, निरुपाधि, धुरधर्मधारी ।
विपुल-बलमूल, शार्दूलविक्रम, जलदनादमर्दन, महावीर भारी ॥
जयति संग्राम-सागर-भयंकर-तरण-रामहित-करण-बरबाहु-सेतू ।
उर्मिलारमण, कल्याणमंगलभवन, दासतुलसी-दोष-दवन-हेतू ॥ ३८ ॥

३८—भूधर = पृथ्वी को धारण करनेवाले । ज्वालामालाबमन = लपट का समूह मुँह से निकलनेवाले । गांधेय = विश्वामित्र ।

जयति भूमिजारमण-पदकंज-मकरंद-रस-रसिक-मधुकर-भरत भूरिभागी ।
भुवन-भूषण-भानुवंश-भूषण, भूमिपाल-मणि-रामचंद्रानुरागी ॥

जयति बिबुधेश-धनदादिदुर्लभ महा-राज-सम्राज-सुखप्रद-विरागी ।
खड्गधाराव्रतीप्रथमरेखा प्रकट, शुद्ध-मति-युवति-वतप्रेम-पागी ॥

जयति निरुपाधि, भक्तिभावयंत्रित-हृदय, बंधुहित-चित्रकूटाद्रिचारी ।
पादुकानृपसचिव पुहुमिपालक परम धीर गंभीर बर बीर भारी ॥

जयति संजीवनी-समय-संकट हनुमान धनु बान महिमा बखानी ॥
बाहुबल-बिपुल, परमिति पराक्रम अतुल, गूढ़गति जानकी जानि जानी ॥

जयति रनअजिर-गंधर्वगनगर्वहर फेरि किये राम-गुनगाथ-गाता ।
मांडवी-चित्ताचातक-नवांबुदवरण, सरन-तुलसीदास-अभयदाता ॥३६॥

जयति जय सत्रु-करि-कैसेरी सत्रुहन सत्रु-तम-तुहिनहर-किरनकेतू ।
देव ! महिदेव-महि-धेनु-सेवक-सुजन-सिद्ध-मुनि सकल-कल्याण-हेतू ॥

जयति सर्वांगसुंदर सुमित्रासुवन भुवनविख्यात भरतानुगामी ।
वर्म-चर्मासि-धनु-बाण-तूषीरधर सत्रुसंकट-समन यत्प्रनामी ॥

जयति लवणांबुनिधि-कुम्भसम्भव, महादनुज-दुर्जन-दवन, दुरितहारी ।
लक्ष्मणानुज, भरत-राम-सीता-चरनरेनु-भूषित-भालतिलकधारी ॥

जयति श्रुतिकीर्ति-वल्लभ सुदुर्लभ सुलभ नमत नर्मद-भक्ति-मुक्तिदाता ।
दासतुलसी चरनसरन सीदत, विभो ! पाहि ! दीनार्त्त-संताप-हाता ॥४०॥

३६—बिबुधेश = इंद्र । यंत्रित = ताला लगा हुआ । परमिति = हृदय से परे, बेहद । गंधर्वगर्वहर = भरतजी के मामा युधाजित् को जब गंधर्वों ने तंग किया था तब उनकी सहायता के लिए भरतजी गए थे ।

४०—किरनकेतु = सूर्य । वर्म, चर्म, असि = कवच, ढाल और तलवार । यत्प्रनामी = जो प्रणाम करनेवाले हैं उनको । लवणांबुनिधि = लवणासुर रूपी समुद्र । कुम्भसंभव = अगस्त्य मुनि जिन्होंने समुद्र को सोख लिया था । श्रुतिकीर्त्ति = शत्रुघ्न की स्त्री । नर्मद = सुखदाता । सीदत = दुःख पाता है ।

वैजनाथ की सटीक विनय पत्रिका में ४१वां पद निम्नलिखित है, जो अन्य-प्रतियों में नहीं है—

राग केदार

कबहुँक अंब अवसर पाइ ।

मेरिऔ सुधि आवबी कछु करुन-कथा चलाई ॥

दीन सब अँगहीन छीन मलीन अघी अघाइ ।

नाम लै भरै उदर एक प्रभु-दासी-दास कहाइ ॥

बूझिहैं 'सो है कौन' ? कहिबौं नाम दसा जनाइ ।

सुनत रामकृपालु के मेरी विगारिऔ बनि जाइ ॥

जानकी जगजननि जन की किए बचन-सहाइ ।

तरै तुलसीदास भव तव-नाथ-गुनगन गाइ ॥ ४१ ॥

जयति श्रीजानकी भानुकुल-भानु की प्राणप्रिय-वत्सलभे तरणि भूपे ?

राम-आनंद-चैतन्यधन-विग्रहा-शक्ति अह्लादनी साररूपे ॥

चित्त चरण चिंतनि जेहि धरत ही दूर हो काम भय कोह मद मोह माया ।

रुद्र बिधि विष्णु सुरसिद्धि बंदित पदे जयति सर्वेश्वरी रामजाया ॥

कर्म जप योग विज्ञान चैराग्य लहि मोक्ष हित योगि जे प्रभु मनावैं ।

जयति वैदेही सब-शक्ति-शिरभूषणे ते न तव दृष्टि बिन कबहुं पावैं ॥

कोटि ब्रह्मांड जगदीश को ईस जेहि निगम मुनि बुद्धि ते अगम गावैं ।

विदित यह गाय अहदान कुलमाथ सो नाथ तव दान लै हाथ आवैं ॥

दिव्य शत वर्ष जप ध्यान जब शिव धर्यो राम गुरुरूप मिले पथ बतायो ।

चितै हित लीन लखि कृपा कीनी तबै, देवि, अति दुल'भहि' दरस पायो ॥

जयति श्री स्वामिनी सीय शुभनामिनी, दामिनी कोटि निज देह दरसै ।

इंदिरा आदि दै मत्त-गजगामिनी देव-भामिनी सबै पांव परसै ॥

दुखित लखि भक्त बिन दरस निज रूप तप यजन जप यतन ते सुलभ नाहीं ।

कृपा करि पूर्ण नवकंज-दल-लोचना प्रगट भइ जनकनृप-अजिर साहीं ॥

रमित तव विपिन प्रियप्रेम प्रकटन करन ल'कपति व्याज कछु खेळ ठान्यो ।

गोपिका कृष्ण तव तुल्य बहु यतन करि तोहि' मिलि ईश आनंद मान्यो ॥

हीन तव सुमुख के संग रहि र'क सो बिमुख जो देव नहि' नाह नेरो ।

अधम उद्धरणि यह जानि गहि शरण तव दास तुलसी भयो आय चरो ॥४१॥

४१—आवबी = देना, दिलाइयेगा । अघाइ = भरपेट । प्रभुदासीदास = तुलसी । बचन सहाइ किए = वचनों द्वारा की गई सहायता से ।

कबहुँ समय सुधि द्यौबी मेरी मातु जानकी ।
जन कहाइ नाम लेत हैं किए पन चातक ज्यों, प्यास प्रेम-पान की ॥
सरलप्रकृति आपु जानिए करुना-निधान की ।
निजगुन अरि-कृत अनहितौ दास-दोष सुरति चित रहति न दिए दान की ॥
बानि बिसारनसील है मानद अमान की ।
तुलसीदास न बिसारिए मन क्रम बचन जाके सपनेहुँ गति न आन की ॥४२॥

जयति सच्चिद्व्यापकानंद यद्ब्रह्म-विग्रह-न्यक्त लीलावतारी ।
विकल-ब्रह्मादि-सुर-सिद्ध-संकोचवश-बिमल-गुण-गोह-नरदेह-धारी ॥
जयति कोशलधीश-कल्याण, कोशलसुता-कुशल, कैवल्य-फल-चारु चारी ।
बेदबोधित-कर्म-धर्म-धरणी-धेनु-विप्र-सेवक-साधु-मोदकारी ।
जयति ऋषि-मख-पाल, शमन सज्जनशाल, शापवश-मुनिबधू-पापहारी ।
भंजि भवचाप, दलि दाप भूपावली, सहित भृगुनाथ नतमाथ भारी ॥
जयति धार्मीक-धुर धीर रघुवीर ! गुरु-मातु-पितु-बंधु-बचनानुसारी ।
चित्रकूटाद्रि-विंध्याद्रि-दंडकविपिन-धन्यकृत, पुन्यकानन-बिहारी ॥
जयति पाकारिसुत-काक-करतूति-फलदानि, खनि गर्त गोपित बिराधा ।
दिव्य-देवी-वेष देखि, लखि निशिचरी जनु बिडंबित करी विश्वबाधा ॥
जयति खर-त्रिशिर-दूषण-चतुर्दशसहस-सुभट-मारीच-संहारकर्ता ।
गृध्र-शवरी-भक्ति-विवश करुणासिंधु, चरित-निरुपाधि, त्रिविधार्ति-हर्ता ॥
जयति मदग्रंध कुकबंध बधि, बालि-बलशालि बधि, करण-सुग्रीव-राजा ।
सुभट-मर्कट-भालु-कटक-संघट सजत, नमत पद रावणानुज निवाजा ॥
जयति पाथोधि-कृत-सेतु-कौतुक-हेतु, काल-मन-अराम लई ललकि लंका ।
सकुल सानुज सदल दलित दशकंठ रण, लोक-लोकप किए रहितशंका ॥

४२—बिसारनसील = विस्मरणशील, भूलने योग्य ।

४३—कोशलधीश = राजा दशरथ । कोशलसुता = कौशल्या । पाकारिसुत = इंद्र का पुत्र जयंत । गर्त = गड्ढा । बिडंबित करी = लज्जित की । संघट = समूह ।

जयति सौमित्रि-सीता-सचिव-सहित चले पुष्पकारुढ़ निज राजधानी ।
दासतुलसी मुदित अवधवासी सकल, राम भे भूप, वैदेहि रानी ॥४३॥

जयति राजराजेंद्र-राजीवलोचन-राम-नाम-कलिकामतरु, सामशाली ।
अनय-अंभेधि-कुंभज, निशाचर-निकर-तिमिर-धनधोर-खर-किरणमाली ॥
जयति मुनिदेव नरदेव दशरत्थ के, देव-मुनि-वंध किए अवधवासी ।
लोकनायक-क्रोक-सोक-संकट-समन, भानुकुल-कमल-कानन-विकासी ॥
जयति शृङ्गार-सर-तामरस-दाम-द्युति-देह, गुणगेह, विश्वोपकारी ।
सकल-सौभाग्य-सौंदर्य-सुषमारूप, मनोभव कोटि-गर्वापहारी ॥
जयति सुभग शारंग-सु-निखंग-सायक-सक्ति-चारु-चर्मासि-बरबर्म-धारी ।
धर्मधुर धीर रघुवीर भुजबल-अतुल, हेलया दलित भूभार भारी ॥
जयति कलधौत-मणि-मुकुट-कुंडल, तिलक-भलक-भलिभाल, विधुबदन शोभा
दिव्य-भूषन-वसन, पीत उपवीत, किए ध्यान कल्याण-भाजन न को भा ? ॥
जयति भरत-सौमित्रि-शत्रुघ्न-सेवित सुमुख, सचिव-सेवक-सुखद-सर्वदाता ॥
अधम आरत दीन पतित पातक-पीन, सकृत् नतमात्र कहे पाहि पाता ॥
जयति जय भुवन दसचारि जस जगमगत, पुण्यमय, धन्य जय राम-राजा ।
चरित-सुरसरित-कवि-मुख्य-गिरि निःसरित-पिवत मज्जत मुदित सत समाजा
जयति वर्णाश्रमाचार-पर-नारिनर, सत्य-शम-दम-दया-दान-शीला ।
विगत-दुखदोष, संतोष सुख सर्वदा, सुनत गावत राम-राजलीला ॥
जयति वैराग्य-विज्ञान-वारांनिधे नमत नर्मद पाप-ताप-हर्ता ।
दासतुलसी चरणशरण संशयहरण देहि अवलंब वैदेहिभर्ता ॥ ४४ ॥

राग गौरी

श्रीरामचंद्र कृपालु भजु मन हरण-भवभय-दारुण ।

४४—सामशाली = साम नीतिवाले । अनय = अनीति । किरणमाली =
सुख । मनोगत = कामदेव । हेलया = खेल ही में, सहज ही में । कलधौत =
सोना । सकृत् = एक बार । पाता = रचक । कविमुख्य = वात्सीकि । निःस-
रित = निकली हुई । वारांनिधि = समुद्र । नर्मद = सुखदाता ।

नवकंज-लोचन, कंजमुख, करकंज, पदकंजारुण ॥
 कंदर्प-अगणित-अमित-छवि, नवनील-नीरज-सुंदर ॥
 पटपीत मानहु तडित-रुचि शुचि नौमि जनकसुता-वर ॥
 भजु दीनबंधु दिनेश दानव-दैत्यवंश-निकंदन ॥
 रघुनंद आनंदकंद कोशलचंद दशरथ-नंदन ॥
 सिर मुकुट, कुंडल तिलक चारु, उदार अंग विभूषण ॥
 आजानुभुज, सरचाप-धर, संग्रामजित-खरदूषण ॥
 इति बंदत तुलसीदास संकर-सेष-मुनि-मनरंजन ॥
 मम हृदयकंज निवास करु कामादि-खल-दल-गंजन ॥ ४५ ॥

राग रामकली ।

सदा राम जपु, राम जपु, राम जपु, राम जपु, राम जपु, मूढ़ मन बारवारं ।
 सकल-सौभाग्य-सुख-खानि जिय जानि, सठ ! मानिबिस्वासवदवेदसारं ॥
 कोशलेंद्र नव-नीलकंजाभ-तनु मदनरिपु-कंजहृद-चंचरीकं ।
 जानकीरमन, सुखभवन, भुवनैक प्रभु, समर-भंजन, परम कारुणीकं ॥
 दनुज-वन-धूमध्वज, पान-आजानु-भुजदंड-कोदंडवर-चंड-बानं ।
 अरुन कर चरन मुख, नयन राजीव, गुनअयन, बहु-मयन-शोभानिधानं ॥
 वासना-वृंद-कैरव-दिवाकर, काम-क्रोध-मद-कंज-कानन-तुषारं ।
 लोभ-अति-मत्तनागेंद्र-पंचाननं, भक्तहित-हरन-संसारभारं ॥
 केशवं क्लेशहं केश-वंदित-पदद्वंद्व-मंदाकिनी-मूलभूतं ।
 सर्वदानंद-संदोह, मोहापहं, घोर-संसार-पाथोधि-पोतं ॥
 शोक-संदेह-पाथोद-पटलानिलं, पाप-पर्वत-कठिन-कुलिसरूपं ।
 संतजन-कामधुक-धेनु विश्रामप्रद, नाम-कलिकलुष-भंजन अनूपं ॥

४५—रुचि = शोभा ।

४६—धूमध्वज = अग्नि । केश = क + ईश = ब्रह्मा और महादेव । अनिल = वायु । पथि-संबल = मुसाफिरों के लिये कच्चे वा राह खर्च । मूलम् + इदम् + इव + एकम् = यही एकमात्र मूल है ।

धर्म-कल्पद्रुमाराम, हरिधाम-पथि-संबलं, मूलमिदमेव एकं ।
भक्ति वैराग्य विज्ञान सम दान दम नाम-आधोन साधन अनेकं ॥
तेन तप्तं हुतं दत्तमेवाखिलं, तेन सर्वं कृतं कर्मजालं ।
येन श्रीराम-नामामृतं पानकृतमनिशमनवद्यमवलोक्य कालं ॥
श्रवण-खल भिन्न यवनादि हरिलोक-गत नामबल विपुलमति मलिन-परसी ।
त्यागि सब आस संत्रास भवपास-असि-निसित हरिनाम जपु दासतुलसी ॥

ऐसी आरती राम रघुवीर की करहि मन ।

हरन दुखद्वंद गोविंद आनंदधन ॥

अचर-चर-रूप हरि सर्वगत सर्वदा बसत, इति बासना धूप दीजै ।
दीप निज-बोध, गत क्रोध मद मोह तम, प्रौढ़ अभिमान-चित्तवृत्ति छीजै ॥
भाव अतिसय बिसद प्रवर नैवेद्य सुभ श्रीरामन परम-संतोषकारी ।
प्रेम तांबूल, गतसूल संसय सकल, विपुल-भवबासना-बीज-हारी ॥
असुभ-सुभकर्म घृत-पूर्ण दस वर्तिका, त्याग पावक, सतोगुण-प्रकाशं ।
भगति-वैराग-विज्ञान-दीपावली अर्पि नीराजनं जगनिवासं ॥
बिमल-हृदि-भवन कृत सांति-पर्यंक सुभसयन बिस्राम श्रीरामराया ।
छमा करुना प्रमुख तत्र परिचारिका, यत्र हरि तत्र नहिं भेदमाया ॥
एहि आरती निरत सनकादि श्रुति सेष सिव देव ऋषिअखिलमुनितत्वदरसी ।
करै सोइ तरै, परिहरै कामादि मल, वदति इति अमलमति दासतुलसी । ४७।

हरति सब आरती आरती राम की ।

दहति दुख दोष निर्मूलिनी काम की ॥

४६—तेन तप्तं हुतं.....कालं = उसी ने तप, होम, और सब दान कर लिए और उसीने सब कर्म समूह कर लिए, जिसने समय को देख कर रात दिन रामनाम-रूपी पवित्र अमृत का पान किया । निसित = पैनी ।

४७—इति बासना = इस बासना की । निजबोध = आत्मज्ञान । प्रवर = श्रेष्ठ । वर्तिका = बत्ती । नीराजन = आरती, दीपदान । प्रमुख = आदि ।

४८—आरती = आर्ति, दुःख, पीड़ा ।

सुभग सौरभ धूप दीप वर मालिका ।

उडत अघ विहग सुनि ताल करतालिका ॥

भक्त-हृदि-भवन अज्ञान-तम-हारिनी ।

विमल-विज्ञानमय, तेज-विस्तारिनी ।

मोह-मद-कोह-कलि-कंज-हिमजामिनी ।

मुक्ति की दूतिका, देह-दुति दामिनी ॥

प्रनतजन-कुमुदवन-इंदुकर-जालिका ।

तुलसि अभिमान-महिषेस बहु कालिका ॥ ४८ ॥

दनुज-वन-दहन, गुनगहन, गोविंद, नंदादि-आनंददाता विनासी ।

संभु सिव रुद्र संकर भयंकर भीम घोर-तेजायतन क्रोधरासी ॥

अनंत भगवंत जगदंत-अंतक-त्रास-समन श्रीरमन भुवनाभिराम ।

भूधराधीस जगदीस ईसान विज्ञानधन ज्ञानकल्याण-धाम ।

वामनाव्यक्त पावन परावर विभो, प्रगट परमात्मा प्रकृति-स्वामी ।

चंद्रसेखर सुलपानि हर अनघ अज अमित अविच्छिन्न वृषभेशगामी ॥

नीलजलदाम-तनु स्याम बहु-काम-छबि, राम राजीवलोचन कृपाला ।

कंबु-कर्पूर-वपु-धवल निर्मल मौलि, जटा सुरतटिनि, सित सुमनमाला ॥

वसन-किंजल्क-धर चक्र-सारंग-दर-कंज-कौमोदकी अति विसाला ।

मार-करि-मत्त-मृगराज त्रयनयन हर नौमि अपहरन-संसारज्वाला ॥

कृष्ण करुणाभवन, दवन-कालीय-खल विपुल-कंसादि-निर्वसकारी ।

४८-हिमजामिनी = जाड़े की रात । जालिका = समूह । महिषेश = महिषासुर ।

४९-अंतक = यमराज । परावर विभो = सर्वत्र व्यापक । परावर = दूर और पास, सर्वत्र । किंजल्क = कमल की केसर के समान, जो पीले रंग की होती है । अंधकोरग = अंधक दैत्य रूपी सर्प । गुणवृत्ति = त्रिगुण व्यापार । सिंधुसुत = जलंधर । विरज = रजोगुण के प्रभाव से रहित । अनवद्य = दोष से रहित ।

त्रिपुर-मद-भंगकर, मत्तगज-चर्म-धर, अंधकोरग-असन-पन्नगारी ॥
 ब्रह्म व्यापक अकल सकलपर परम हित ज्ञानगोतीत गुणवृत्तिहर्ता ।
 सिंधुसुत-गर्व-गिरि-वज्र, गौरीस, भव, दक्षमख-अखिल-विध्वंसकर्ता ॥
 भक्तिप्रिय भक्तजन-कामधुक-धेनु हरि हरन-विकट-विपत्ति-भारी ।
 सुखद नर्मद वरद विरज अनवद्यऽखिल, विपिन-आनंद-वीथिन-विहारो
 रुचिर हरिसंकरी-नाम मंत्रावली द्वंद्वदुख-हरनि आनंदखानी ।
 विष्णुसिवलोक-सोपान-सम सर्वदा वदति तुलसीदास विसद वानी ॥४६॥
 भानुकुल-कमल-रवि, कोटि-कन्दर्प-छावि, कालकलि-व्यालमिववैनतेयं
 प्रबल-भुजदंड-परचंड कोदंडधर, तूनवर विसिष, वलमप्रमेयं ॥
 अरुन राजीवदल-नयन सुषमा-अयन स्याम-तनुकांति वर-वारिदामं ।
 तप्तकांचन-वस्त्र शस्त्रविद्या-निपुन सिद्धसुर-सेव्य पाथोजनाभं ॥
 अखिल लावन्यगृह विश्वविग्रह परम प्रौढ़ गुणगूढ महिमा उदारं ।
 दुर्द्धर्ष, दुस्तर, दुर्ग, स्वर्ग-अपवर्ग-पति, भग्न-संसार-पादप-कुठारं ॥
 सापबस-मुनिवधू-मुक्तकृत, विप्रहित-यज्ञरच्छन-दच्छ पच्छकर्ता ।
 जनकनृप-सदसि-सिवचाप-भंजन, अग्र-भार्गवागर्व-गरिमापहर्ता ॥
 गुरुगिरा-गौरवामरसुदुस्त्यज-राज्य त्यक्त श्री सहित; सौमित्रि-भ्राता ।
 संग जनकात्मजा, मनुजमनुसृत्य, अज, दुष्टवधनिरत, त्रैलोक्य-त्राता ॥
 दंडकारन्य-कृत-पुन्य-पावनचरन, हरन-भारीच-मायाकुरंगं ।
 वालिबल-मत्तगजराज-इव केसरी सुहृद-सुग्रीव-दुखरासि-भंगं ॥
 रिच्छ मर्कट विकट सुभट उद्भट, समर-सैल-संकास रिपु-त्रासकारी ।
 बद्ध पाथोधि, सुर-निकर-मोचन, सकुल-दलन-दससीस-भुजबीस-भारी ॥

यह पद रामभक्तों में हरिशंकरों के नाम से प्रसिद्ध है क्योंकि विष्णु और शिव के नाम साथ साथ आते गए हैं ।

१०—दुर्ग = दुर्गम । सदसि = सभा में । भार्गव = परशुराम । आगर्व = पूर्णागर्व । दुस्त्यज = कठिनता से त्यागने योग्य । अनुसृत्य = अनुसार, नाई । भंग = काटने के हेतु । वदति = जहाज ।

दुष्टबिबुधारि-संघात-महिभार-अपहरन अवतार कारन अनूप ।
 अमल अनवद्य अद्भुत निर्गुन सगुन ब्रह्म सुमिरामि नरभूपरूप ॥
 सेव स्रुति सारदा संभु नारद सनक गनत गुन, अंत नहिं तव चरित्रं ।
 सोइ राम कामारि-प्रिय अवधपति सर्वदा दासतुलसी-त्रासनिधि वहित्रं ५०

जानकीनाथ रघुनाथ रागादितम-तरणि, तारुण्यतनु तेजधाम ।
 सबिदानंद आनंदकंदाकर* विस्वविस्लाम रामाभिरामं ॥
 नीलनव-वारिधर सुभग-सुभ-कांतिकर पीतकौशेय-बरबसन-धारी ।
 रत्नहाटक-जटित मुकुट मंडित मौलि भानुसत-महस-उद्योतकारी ॥
 स्रवन कुंडल, भाल तिलक, भ्रू रुचिर अति, अरुन अंभोज लोचन विसालं ।
 वक्त्र-आलोक त्रैलोक्य-सोकापहं, माररिपु-हृदय-मानस-मरालं ॥
 नासिका चारु, सुकपोल, द्विज वज्रद्युति, अधर बिंबोपमा, मधुर हासं ।
 कंठ दर, चिबुक बर, वचन गम्भीरतर, सत्यसंकल्प सुरत्रासनासं ॥
 सुमन-सुविचित्र-नवतुलसिका-दलजुत* मृदुल वनमाल उर आजमानं ।
 अमृत आमोदबस मत्तमधुकर-निकर मधुरतर मुखर कुर्वन्ति-गानं ॥
 सुभग श्रीवत्स केयूर कंकन हार किंकिनी-रटनि कटितट रसालं ।
 वाम दिसि जनकजासीन-सिंहासनं कनक-मृदुपल्लवत तरु-तमालं ॥
 आजानुभुजदंड, कोदंड मंडित वाम बाहु, दक्षिण पानि वानमेकं ।
 अखिल मुनिनिकर सुरसिद्ध गंधर्व वर नमत नर नाग अवनित अनेकं ।
 अनघ अविच्छिन्न सर्वज्ञ सर्वेश खलु सर्वतोभद्र दाताऽसमाकं ।
 प्रणतजन-खेदविच्छेद-विद्या-निपुन नौमि श्रीराम सौमित्रि-साकं ॥
 युगल पदपद्म सुखसदा पद्मालयं, चिह्न कुलिसादि सोभातिभारी ।
 हनुमंत-हृदिविमल-कृतपरममंदिरसदादासतुलसीसरन-सोकाहारी ॥ ५१ ॥

५१—कौशेय = रेशमी । वक्त्र = मुख । दर = शंख । आमोद = सुगंध ।
 श्रीवत्स = श्री का चिह्न । केयूर = विजायठ । अविच्छि = पूर्ण । खलु =
 निश्चय करके । सर्वतोभद्र = सब प्रकार से कल्याण रूप । असमाकं =
 अस्माकं, हमको । साकं = सहित । सदा = घर ।

कोसलाधीस जगदीस जगदेकहित अमितगुन, विपुल विस्तारलीला ।
 गायंति तव चरित सुपवित्रश्रुति सेस सुक संभु सनकादि मुनि मननसीला ॥
 चारिचर-वपुषधर, भक्त-निस्तार-पर, धरनि कृत नाव महिमातिगुर्वी ।
 सकल यज्ञांसमय उग्र-विग्रह क्रोड, मर्दि दनुजेस उद्धरन उर्वी ॥
 कमठ अति विकट-तनु, कठिन पृष्ठोपरि भ्रमत मंदर कंडु-सुख मुरारी ।
 प्रगटकृत अमृत, गो, इंदिरा, इंदु वृंदारका-वृंद-आनंदकारी ॥
 मनुज-मुनि-सिद्ध-सुर-नाग-त्रासक दुष्ट दनुज द्विजधर्म-मर्याद-हर्ता ।
 अनुल मृगराजवपु धरित, विहरित अरि, भक्त-प्रह्लाद-अह्लादकर्ता ॥
 छलन बलि कपट बहुरूप वामन ब्रह्म, भुवन-पर्यंत पद-तीनि-करण ।
 चरन-नख-नीर त्रैलोक्यपावन परम, विबुधजननी-दुसह-शोकहरण ॥
 छत्रियाधीस-करिनिकर-वर-केसरी परसुधर विप्र-ससि-जलदरूप ।
 बीस-भुजदंड-दससीसखंडन चंडवेग-सायक नैमि राम-भूषं ॥
 भूमि-भर-भारहर प्रगट परमातमा ब्रह्म नररूपधर-भक्तहेतू ।
 वृष्णिकुल-कुमुद-राकेस राधारमन कंस-वंसाटवी-धूमकेतू ॥
 प्रवल-पाखंड-महिमंडलाकुल देखि निंचकृत-अखिल-मखकर्म-जालं ।
 शुद्धबोधैक घनज्ञान गुनधाम अज बुद्ध अवतार बंदे कृपालं ॥
 कालकलि-जनित-मल-मलिनमन सर्वनर, मोहनिषि-निविडयमनांधकारं ।
 विष्णुयश-पुत्र कल्कीदिवाकर उदित दासतुलसी हरन विपति-भारं ॥५२॥
 सर्व-सौभाग्यप्रद, सर्वतोभद्र-निधि, सर्व सर्वेस सर्वाभिरामं ।
 शर्व-हृदि-कंज-मकरंदमधुकर रुचिररूप भूपालमनि नैमि रामं ॥
 सर्व सुखधाम गुनग्राम विश्रामपद नाम सर्वास्पद मति पुनीतं ।
 निर्मलं सांत सुविसुद्ध बोधायतन क्रोध-मद-हरन करुना-निकेतं ।
 अजित निरुपाधि गोतीतमव्यक्त विभुमेकमनवद्यमजमद्वितीयं ।

५२—गुर्वी = बड़ी । क्रोड = शूकर । उर्वी = पृथ्वी । कंडुसुख = खुजलाने का सुख । विबुधजननी = अदिति । ससि = खेती । भर = भारी । अटवी = जंगल । विष्णुयश = एक ब्राह्मण जिसके पुत्ररूप में कल्कि अवतार होगा ।

प्राकृतं प्रकट परमातमा परमहित प्रेरकानंत बंदे तुरीयं ॥
 भूधरं सुंदरं श्रीवरं मदन-मद-मथनं, सौंदर्य-सीमातिरम्यं ।
 दुष्प्राप्य दुष्प्रेक्ष्य दुस्तर्क्य दुष्पार संसारहर सुलभ मृदुभावगम्यं ॥
 सत्यकृत सत्यरत सत्यव्रत सर्वदा पुष्ट संतुष्ट संकष्टहारी ।
 धर्मवर्मणि ब्रह्मकर्मबोधैक द्विजपूज्य ब्रह्मण्य जनप्रिय मुरारी ॥
 नित्य निर्मम, नित्य मुक्त निर्मान हरि ज्ञानघन सच्चिदानंद मूलं ।
 सर्वरक्तक सर्वभक्तकाध्यक्ष कूटस्थ गूढार्चि भक्तानुकूलं ॥
 सिद्धिसाधक साध्य, वाच्य वाचकरूप, मंत्र-जापक जाप्य, सृष्टि स्रष्टा ।
 परमकारन, कंजनाभ, जलदाभतनु, संगुन निर्गुन, सकल-दृश्य-द्रष्टा ॥
 व्योम-व्यापक विरज ब्रह्म वरदेस बैकुण्ठ वामन विमल ब्रह्मचारी ।
 सिद्ध वृंदारकावृंद-वन्दित सदा खंडि पाखंड निमूलकारी ॥
 पूरनानंद-संदोह अपहरन-संमोह-अज्ञान-गुनसन्निपातं ।
 वचन मन कर्म गतसरन तुलसीदास, त्रास-पाथोधि-इव कुंभजातं ॥५३॥

विश्वविख्यात विश्वेश विश्वायतन विश्वमर्याद व्यालादगामी ।
 ब्रह्म वरदेश वागीश व्यापक विमल विपुल बलवान् निर्वानस्वामी ॥
 प्रकृति, महत्त्व, सब्दादि, गुण, देवता, व्योम मरुदग्नि, अमलांबु, उर्वी ।

५३—शर्व = महादेव । सर्वास्पद = सब वस्तुओं का मूलस्थान । प्राकृत = प्रकृति से बद्ध, मनुष्यरूपधारी । तुरीय = मोक्षरूप । भूधर = भूमि को धारण करनेवाले । ब्रह्मकर्म = ब्रह्म विद्या और कर्मकांड । निर्मान = बेहद, अपार । गूढार्चि = गुप्त तेजवाला । वाच्य = अर्थ । वाचक = शब्द । स्रष्टा = सृष्टि का रचयिता । विरज = रजोगुण रहित (शुद्ध सत्व-स्वरूप) । वरद + ईश = देवताओं के स्वामी । संमोह = भारी मोह । सन्निपात = समूह, ढेर ।

५४—जिष्णो = हे जयशील । सर्पसंग = सर्प में भाला के समान अर्थात् अमर-रूप वस्तु में सत्य वस्तु के समान । वेदांत के अनुसार इस मिथ्या संसार की जो सत्ता प्रतीत होती है वह ब्रह्मरूप सत्य वस्तु के कारण । ज्ञानप्रिय = ज्ञाता । अतिकल्प = कल्प से परे । तल्प = शय्या । वेदगर्भ = ब्रह्मा । अर्भक = पुत्र । वेदगर्भाभक्त = सनकादिक । अर्वाक पर = यह और वह अर्थात् परा अपरा विद्या । तमी = रात्रि । बंदारु = बंदना करनेवाले ।

बुद्धि मन इन्द्रिय प्राण चित्तात्मा काल-परमानु चिच्छक्ति गुर्वी ॥
 सर्वमेवात्र-त्वद्रूप भूपालमनि व्यक्तमव्यक्त गतभेद, विष्णो ।
 भुवन भवदंस कामारि-वन्दित-पदद्वन्द-मन्दकिनी-जनक जिष्णो ॥
 आदिमध्यांत भगवंत त्वं सर्वगतमीस पश्यन्ति ये ब्रह्मवादी ।
 यथा पट-तंतु, घट-मृत्तिका, सर्प-स्रग, दारु-करि, कनक-कटकांगदादी ॥
 गंभीर गर्वन्न गूढार्थवित गुप्त गोतीत गुरु ज्ञान ज्ञाता ।
 ज्ञेय ज्ञानप्रिय प्रचुर गरिमागार घोर-संसार-परपार-दाता ॥
 सत्यसंकल्प अतिकल्प कल्पांतकृत कल्पनातीत अहि-तल्पवासी ।
 वनज-लोचन वनज-नाभ वनदाभ-वपु वनचर-ध्वज-कोटि लावन्यरासी ॥
 सुकर दुष्कर दुराराध्य दुर्व्यसनहर दुर्ग दुर्द्धर्ष दुर्गार्ति-हर्ता ।
 वेदगर्भाभकादभ्रगुण-गर्व-अर्वापर-गर्व-निर्वापकर्ता ॥
 भक्त-अनुकूल, भवसूल-निर्मूलकर, तूलअघ-नामपावक-समानं ।
 तरल-तृष्णा-तमी-तरणि धरनीधरन सरन-भय-हरन करुनानिधानं ॥
 बहुल वन्दारु-वृन्दारकावृन्द-पद-द्वन्द, मन्दारमालोरधारी ।
 पाहिमामीस संतापसंकुल सदा दासतुलसी प्रनत रावनारी ॥५४॥
 संत-संतापहर विश्वविश्रामकर राम कामारि-अभिरामकारी ।
 सुद्धबोधायतन सच्चिदानन्दधन सज्जनानन्दवर्द्धन खरारी ॥
 सील-समता-भवन विषमता-मति-समन राम रमारमन रावनारी ।
 खड्गकर चर्मवर-वर्मधर, रुचिर कटि तूण, सर-सक्ति-सारंगधारी ॥
 सत्यसंधान निर्वाणप्रद सर्वहित सर्वगुण-ज्ञान-विज्ञानसाली ।
 सधन-तम-घोर-संसार-भर-शर्वरी-नामदिवसेस-खर-किरनमाली ॥
 तपन तीक्ष्ण तरुन, तीव्रतापन्न तपरूप तनुभूष तमपर तपस्वी ।
 मान-मद-मदन-मत्सर-मनोरथ-मथन मोह-अंभोधि-मन्दर मनस्वी ॥

५५—अभिराम = आनन्द । सत्यसंधान = सत्यप्रतिज्ञ । तपन = सूय्य ।
 तमपर = तमोगुण के परे । श्रुतिमाथ = वेदों के मस्तक अर्थात् मुख्य तत्त्व ।
 दुराण = कठिनता से मिलनेवाले । करन = सामग्री ।

वेदविख्यात बरदेस वामन बिरज विमल वागीस वैकुण्ठस्वामी ।
 काम-क्रोधादि-मर्दन विवर्धन-क्षमा शांतविप्रह विहंगराज-गामी ॥
 परम पावन, पापपुंज-मुंजाटवी-अनल-इव-निमिष-निर्मूलकर्ता ।
 भुवनभूषण, दूषणारि, भुवनेस, भूनाथ श्रुतिमाथ जय भुवनभर्ता ॥
 अमल अविचल अकल सकल संतप्त-कलि-बिकलता-भंजनानंदरासी ।
 उरग-नायक-सयन, तरुन-पंकज-नयन, क्षीरसागर-अयन, सर्ववासी ॥
 सिद्ध-कवि-कोविदानंददायक पदद्वंद, मंदात्ममनुजैर्दुराप ।
 यत्र संभूत अति पूत जल सुरसरी दर्शनादेव अपहरति पापं ॥
 नित्य निर्युक्त संयुक्तगुण निर्गुनानंत भगवंत न्यायमक नियंता ।
 विश्व-पोषण-भरण विश्वकारण-करण, सरन-तुलसीदास-त्रासहंता ॥५५॥

दनुजसूदन दयासिंधु दंभापहन दहन-दुर्दोष दुःपापहर्ता ।
 दुष्टतादमन, दमभवन, दुःखौघहर दुर्ग-दुर्वासना-नासकर्ता ॥
 भूरिभूषण भानुमंत भगवंत भवभंजनाभयद भुवनेस भारी ।
 भावनातीत भवबंध भव-भक्तहित भूमि-उद्धरण भूधरन-धारी ॥
 वरद वनदाभ वागीस विश्वात्मा विरज वैकुण्ठ-मंदिर-विहारी ।
 व्यापकव्योम बंधांघ्रि वामन बिभों ब्रह्मविद्-ब्रह्मचिंतापहारी ॥
 सहज सुंदर सुमुख सुमन सुभ सर्वदा सुद्ध सर्वज्ञ स्वच्छंदचारी ।
 सर्वकृत सर्वश्रुत सर्वजित् सर्वहित सत्यसंकल्प कल्पांतकारी ॥
 नित्य निर्मोह निर्गुन निरंजन निजानंद निर्वाण निर्वाणदाता ।
 निर्भरानंद निःकंप निःसीम निर्युक्त निरुपाधि निर्मम विधाता ॥
 महामंगलमूल मोद-महिमायतन मुग्ध-मधु-मथन मानद अमानी ।

५६—भानुमंत = सूर्य के समान प्रकाशवाले । ब्रह्मचिंता = ब्राह्मणों की चिंता । निजानंद = आत्मानंद स्वरूप । मानाथ = लक्ष्मीपति । अविरल = अनवच्छिन्न । आपन्न = प्रसन्न । इहलोक = संसार का दुःख । अभोदनाद = मेघनाद + न्न = नाशक अर्थात् लक्ष्मणजी । आपन्न = विपद प्रसन्न । इह = संसार । उर्विषति = पृथ्वी के मालिक । दुर्विनीत = नञ्प्रतारहित ।

मदनमर्दन मदातीत मायारहित मंजु मानाथ पाथोज-पानी ॥
 कमललोचन, कलाकोस, कोदंडधर, कोसलाधीस, कल्यानरासी ।
 यातुधान-प्रचुर-मत्तकरि-केसरी भक्त-मनपुन्य-आरन्यवासी ॥
 अनघ अद्वैत अनवद्य अव्यक्त अज अमित अविकार आनंदसिंधो !
 अचल अनिकेत अविरल अनामय अनारंभ अंभोदनादन्न बंधो ॥
 दासतुलसी खेदखिन्न, आपन्न, इह-सोकसंपन्न अतिसय समीत ।
 प्रनतपालक राम परम करुणाधाम पाहि मामुर्विपति दुर्विनीत ॥ ५६ ॥

देहि सतसंग निजअंग, श्रीरंग, भवभंग-कारन, सरन-सोकहारी ।
 येतु भवदंघ्रि-पल्लव-समाश्रित सदा भक्तिरत विगतसंसय मुरारी !
 असुर सुर नाग नर यत्त गंधर्व खग रजनिचर सिद्ध ये चापि अन्ये ।
 संतसंसर्ग त्रयवर्गपर परमपद प्राप, निःप्राप्य गति त्वयि प्रसन्ने ॥
 वृत्र बलि बाण प्रह्लाद मय व्याध गज गृद्ध द्विजबंधु निजधर्म-त्यागी ।
 साधुपद-सलिल-निर्धूत-कल्मष सकल, स्वपच यवनादि कैवल्यभागी ॥
 शांत निरपेक्ष निर्मम निरामय अगुन शब्द-ब्रह्मैक पर-ब्रह्म-ज्ञानी ।
 इक्ष, समदृक् स्वदृक् विगत-अति-स्वपरमति परमरति तव विरति चक्रपानी ॥
 विश्व-उपकारहित व्यग्र-चित्त सर्वदा, त्यक्तमदमन्यु, कृत-पुन्यरासी ।
 यत्र तिष्ठति तत्रैव अज शर्व हरि सहित गच्छति क्षीराब्धिवासी ॥
 वेद-पय-सिंधु, सुविचार-मंदर महा, अखिल-मुनिवृंद निर्मथनकर्ता ।
 सार-सतसंगमुद्धृत्य इति निश्चितं वदति श्रीकृष्णैवैर्भिर्भर्ता ॥
 सोक संदेह भय हर्षतम तर्षण साधु-सद्युक्ति-विच्छेदकारी ।

५७—श्रीरंग = लक्ष्मीपति । येतु = जो । भवत् + अंगि = तुम्हारे चरण ।
 त्रयवर्गपर = अर्थ, धर्म और काम से परे । प्राप = पाते हैं । द्विजबंधु =
 नीचब्राह्मण । स्वदृक् = अपनी ओर अर्थात् अपने दयालु स्वभाव की ओर
 देखनेवाले ।

* यथा भागवत में—न रोधयति मां योगो न सांख्यं धर्म उद्धव !.....
 यथा बरुधोसत्संगः सर्वसंगापहोहि माम् ।

यथा रघुनाथ-सायक निसाचरचमू-निचय-निर्दलन-पट्ट वेग भारी ॥
 यत्रकुत्रापि मम जन्म निज कर्मवश भ्रमत जगयोनि संकट अनेकम् ।
 तत्र त्वद्भक्ति सज्जन-समागम सदा भवतु मे रामविश्राममेकम् ॥
 प्रबल भवजनित-त्रैव्याधि-भेषज भक्ति, भक्त भैषज्यमद्रै तदरसी ।
 संत-भगवंत अंतर निरंतर नहीं किमपि मतिमलिन कह दासतुलसी ॥५७॥

देहि अवलंब करकमल कमलारमन दमनदुख समन-संताप-भारी ।
 अज्ञान-राकेस-ग्रासन विधुंतुद, गर्व-काम-करिमत्त-हरि दूषनारी ॥
 वपुष ब्रह्मांड सो, प्रवृत्ति-लंकादुर्ग रचित मन-दनुज-मयरूपधारी ।
 विविध कोसौध अति रुचिर मंदिरनिकर सत्वगुन-प्रमुख त्रय-कटककारी
 कुनप-अभिमान-सागर भयंकर घोर विपुल अवगाह दुस्तर अपारम् ।
 नक्र-रागादि-संकुल मनोरथ सकल संगसंकल्प-बीची-बिकारम् ॥
 मोह दसमैलि, तद्भात अहंकार, पाकारिजित्-काम विश्रामहारी ।
 लोभ अतिकाय, मत्सर महोदर दुष्ट, क्रोध-पापिष्ट बिबुधांतकारी ॥
 द्वेष-दुर्मुख, दंभ-खर, अकंपन-कपट, दर्प मनुजाद-मद-सुलपानी ।
 अमितबल परम दुर्जय निसाचर-निकर सहित षड्वर्ग गो-यातुधानी ॥
 जीव भवदंघ्रि-सेवक-बिभीषन वसत मध्य दुष्टाटवी प्रसितचिंता ।
 नियम यम सकल-सुरलोक-लोकेस लंकेसबस नाथ ! अत्यंत भीता ॥
 ज्ञान अवधेस, गृह-गोहिनी भक्ति सुभ, तत्र अवतार भूभारहर्ता ।
 भक्त संकष्ट अवलोकि पितुवाक्य-कृत गमन किय गहन वैदेहि-भर्ता ॥
 कैवल्य-साधन अखिल भालु मर्कट विपुल, ज्ञान-सुग्रीव-कृत जलधिसेतू ।
 प्रबल वैराग्य दारुण प्रभंजनतनय विषय-वन-दहनमिव धूमकेतू ॥
 दुष्ट-दनुजेस निर्वंस कृत दासहित विश्वदुख-हरन बोधैकरासी ।
 अनुज निज जानकी सहित हरिसर्वदादासतुलसी-हृदय-कमलवासी ॥५८॥

दीनउद्धरन रघुवर्य करुणाभवन समनसंताप पापौघ-हारी ।
 विमल-विज्ञान-विग्रह अनुग्रहरूप भूपवर बिबुध-नर्मद खरारी ॥

संसारकतार अतिघोर गंभीर घन गहन तरुर्म-संकुल, मुरारी ।
 बासना-बल्लि खर-कंटकाकुल विपुल निविड बिटपाटवी कठिन भारी ॥
 विविध चितवृत्ति खग-निकर सेनालूक काक बक गृध्र आमिष-अहारी ।
 अखिलखल निपुन-छल-छिद्र निरखत सदा जीव-जन-पथिक-मन-खेदकारी
 क्रोध करि मत्त, मृगराज कंदर्प, मद-दर्प वृक भालु अति उग्रकर्मा ।
 महिष मत्सर क्रूर, लोभ सूकर रूप, फेरु छल, दंभ मार्जार-धर्मा ॥
 कपट मर्कट, विकट व्याघ्र पाखंडमुख दुखद-मृगत्रात उत्पातकर्त्ता ।
 हृदय अवलोकि यह सोक सरनागत, पाहि, मां पाहि, भो विश्वभर्त्ता ॥
 प्रबल अहंकार दुर्घट महीधर, महामोह गिरिगुहा निविडांधकारम् ।
 चित्त बैताल, मनुजाद मन, प्रेतगन रोग, भोगौघ वृश्चिक-विकारम् ॥
 विषय-सुख-लालसा दंस-मसकादि, खलभिल्लि, रूपादि सब सर्प स्वामी ।
 तत्र आत्तिप्र तव विषम माया, नाथ ! अंध मैं मंद व्यालादगामी ॥
 घोर अवगाह भव-आपगां, पापजल-पूर, दुष्प्रेक्ष्य, दुस्तर अपारा ।
 मकर षड्वर्ग, गो नक्र, चक्राकुला, कूल सुभ-असुभ, दुख तीव्र धारा ॥
 सकल संघट पोच, सोचबस सर्वदा दासतुलसी विषय-गहन-अस्तम् ।
 त्राहि रघुवंसभूषन कृपाकर कठिनकाल-विकराल-कलि-त्रासत्रस्तम् ५६

नैमि नारायणं नरं करुणायनं ध्यानपारायणं ज्ञानमूलम् ।

अखिल-संसार-उपकार-कारन सदय-हृदय तपनिरत प्रणतानुकूलम् ॥
 श्याम-नव-तामरस-दाम-द्युतिवपुष-छवि, कोटि-मदनार्कअगणितप्रकाशम् ।
 तरुण रमणीय राजीव लोचन बदन राकेश, करनिकर हासम् ॥
 सकल-सौंदर्य-निधि, विपुल-गुण-धाम विधि-वेदबुधशंभुसेवित अमानम्
 अरुण-पदकंज-मकरंद-मंदाकिनी मधुप-मुनिवृंद कुर्वन्ति पानम् ॥
 शक्र-प्रेरित-घोर-मारमद-भंगकृत, क्रोधगत, बोधरत, ब्रह्मचारी ।
 मारकंडेय मुनिवर्य हित कौतुकी, विनहिं कल्पांत प्रभु प्रलयकारी ॥

५६—कांतार = जंगल । खर = तीक्ष्ण । त्रात = कुँड । भो = हे । चक्रा-
 कुला = भँवरवाली । संघट = जमघट, जमावड़ा ।

पुन्यवन शैल सरि बदरिकाश्रम सदाऽसीनपद्मासनं एकरूपं ।
 सिद्ध-योगीन्द्र-वृन्दारकानन्दप्रद भद्रदायक दरस अति अनूपं ॥
 मान मनभंग, चितभंग मद, क्रोध लोभादिपर्वतदुर्ग, भुवनभर्त्ता ।
 द्वेष मत्सर-रागप्रबल प्रत्यूह प्रति, भूरि निर्दय, क्रूर-कर्म-कर्त्ता ॥
 बिकटतर बक्र क्षुरधार प्रमदा, तीव्र-दर्प कंदर्प खर खड्गधारा ।
 धीर-गंभीर-मन-पीरकारक तत्र के वराका वयं विगतसारा ॥
 परम दुर्घट पंथ, खल असंगत साथ, नाथ नहिं हाथ बर विरति-यष्टी ।
 दर्शनारत दास, त्रसित-माया-पास, त्राहि त्राहि ! दास कष्टी ॥
 दासतुलसी दीन, धर्मवंसलहीन श्रमित अति खेद, मति मोहनाशी ।
 देहि अवलंब न विलंब अंभोजकर-चक्रधर तेज-वलशर्म-राशी ॥६०॥

सकलसुखकंद आनंदवन-पुण्यकृत बिंदुमाधव द्वंद्व-विपति-हारी ।
 यस्याधिपाथोज अज शंभु सनकादि सुक शेष मुनिवृंद अलि निलयकारी ॥
 अमलमरकत श्याम, काम-सतकोटि-छवि, पीतपट तडित इव जलदनीलम् ।
 अरुणशतपत्र-लोचन, विलोकनिचारु, प्रणतजन-सुखद, करुणाद्रंशीलम् ॥
 काल-गजराज-मृगराज, दनुजेश-वन-दहन-पावक, मोह-निशि-दिनेशम् ।
 चारिभुज चक्र कौमोदकी जलज दर सरसिजोपरि यथा राजहंसम् ॥
 मुकुट कुंडल तिलक, अलकअलित्रातइव, भृकुटिद्विजअधरबरचारुनासा ।
 रुचिर सुकपोल, दर ग्रीव सुखसींव, हरि, इंदुकर-कुंदमिव मधुरहासा ॥
 उरसि बनमाल सुविशाल, नव मंजरी भ्राज श्रीवत्स-लांछन, उदारम् ।
 परम ब्रह्मण्य, अति धन्य गतमन्यु अज अमित बल विपुल महिमाअपारम् ॥
 हार केयूर, कर कनक-कंकण, रतनजटित मणि मेखला कटिप्रदेशम् ।
 युगल पद नूपुरा मुखर कलहंसवत, सुभग सर्वांग, सौंदर्यवेषम् ॥

६०—मारकंडेय..... = मारकंडेय जी के कहने से नारायण ने उन्हें प्रलय
 का दृश्य दिखाया था । मनभंग, चितभंग, क्षुर धार, खड्ग धार = बदरिकाश्रम के
 पर्वतों के नाम । वराका = बेचारा । यष्टी = छड़ी । कष्टी = कष्टवाला ।

सकल-सौभाग्य-संयुक्त त्रैलोक्यश्री, दक्षदिशि रुचिर बारीशकन्या ।
 बसत विबुधापगा निकट तट सदन बर, नयन निरखंति नर तेऽतिधन्या ॥
 अखिल-मंगल-भवन, निबिड-संशय-शमन, दमन ब्रजिनाटवी कष्टहर्ता ।
 विश्वधृत विश्वहित अजित गोतीत शिव विश्व-पालन-हरण, विश्वकर्ता ॥
 ज्ञानविज्ञान-वैराग्यऐश्वर्य-निधि, सिद्धि अणिमादि दे भूरि दानम् ।
 प्रसित-भवल्यालअतित्रासतुलसीदासत्राहिश्रीरामउरगारियानम् ॥६१॥

राग आसावरी ।

इहै परम फल परम बड़ाई ।

नखसिख रुचिर बिंदुमाधव-छवि निरखहिं नयन अघाई ॥
 बिसद किसोर पीन सुंदर बपु स्याम मुरुचि अधिकारी ।
 नीलकंज बारिद तमाल मनु इन तनु तेँ दुति पाई ॥
 मृदुलचरन सुभ चिन्ह पदज नख अति अदमुत उपमाई ।
 अरुन नील पाथोज प्रसव जनु मनिजुत दल समुदाई ॥
 जातरूप मनिजटित मनोहर नूपुर जन-सुखदाई ।
 जनु हर डर हरि विविध रूप धरि रहे बर भवन बनाई ॥
 कटितट रटति चारु किंकिनि, रव अनुपम बरनि न जाई ।
 हेमजलज कल कलिन मध्य जनु मधुकर मुखर सोहाई ॥
 डर बिसाल भृगुचरन चारु अति सूचत कोमलताई ।
 कंकन चारु विविध भूषन बिधि रचि निज कर मन लाई ॥
 गजमनि-माल बीच आजत कहि जाति न पदिक-निकाई ।
 जनु उडुगन-मंडल बारिद पर नवग्रह रची अथाई ॥

६१-दक्षदिशि = दक्षिण की ओर । बिंदुमाधव की मूर्ति के साथ लक्ष्मी की मूर्ति दाहिनी ओर थी । यह पुरानी मूर्ति अभी तक है । ब्रजिनाटवी = पापों का जंगल ।

६२-हरि = कामदेव । पदिक छाती पर पहिने का एक भूषण विशेष । अघाई = बैठक, सभा ।

भुजंग-भोग भुजदंड, कंज दर चक्र गदा बनि आई ।
 सोभासीवँ ग्रीव चिबुकाधर बदन अमित छवि छाई ॥
 कुलिस-कुंदकुडमल-दामिनि-दुति दसननि देखि लजाई ।
 नासा नयन कपोल ललित, श्रुति-कुंडल भू मोहिं भाई ॥
 कुंचित कच सिर मुकुट भाल पर तिलक कहों समुभाई ।
 अलप तड़ित जुगरेख इंदु महीं रहि तजि चंचलताई ॥
 निर्मल पीत दुकूल अनूपम उपमा हिय न समाई ।
 बहु मनियुत गिरिनील-सिखर पर कनक-वसन रुचिराई ॥
 दच्छभाग अनुराग सहित इंदिरा अधिक ललितार्थ ।
 हेमलता जनु तरु तमाल ढिग नील निचोल ओढ़ाई ॥
 सत सारदा सेस स्तुति मिलि करि सोभा कहि न सिराई ।
 तुलसिदास मतिमंद द्वंद्वत कहै कौन बिधि गाई ? ॥६२॥

राग जयतिश्री

मन इतनोई या तनु को परम फलु ।

सब अँग सुभग बिंदु-माधव-छवितजि सुभाव अवलोकु एक पलु ॥
 तरुन अरुन अंभोज चरन मृदु, नख-दुति हृदय-तिमिरहारी ।
 कुलिस-केतु-जव-जलज-रेख बर, अंकुस मन-गज-बसकारी ॥
 कनक-जटित मनि नूपुर, मेखल कटितट रटति मधुर बानी ।
 त्रिवली उदर गँभीर नाभि-सर जहँ उपजे विरंचि ज्ञानी ॥
 उर बत-भाल पदिक अति सोभित, विप्रचरन चित कहँ करपै ।
 स्याम-तामरस-दाम-वरन बपु, पीत बसन सोभा बरषै ॥
 कर कंकन कैयूर मनोहर, देति मोद मुद्रिक न्यारी ।
 गदा-कंज-दर-चारु-चक्रधर, नागसुंड सम भुज चारी ॥
 कंबु-ग्रीव, छविसीव चिबुक द्विज, अधर अरुन, उन्नत नासा ।

६२-भुजंगभोग = भुजग = नाग = हाथी + भोग = सुँड़, अर्थात् हाथी
 की सुँड़ । कुडमल = कली ।

नव-राजीव-नयन, ससि-आनन, सेवक-सुखद विसद हासा ॥
 रुचिर कपोल, स्रवन कुंडल, सिर मुकुट, सुतिलक भाल आजै ।
 ललित मुकुटि, सुंदर चितवनि, कच निरखि मधुप-अवली लाजै ॥
 रूप-मील-गुन-खानि दच्छदिसि सिंधुसुता रत-पदसेवा ॥
 जाकी कृपा-कटाक्ष चहत सिव, विधि, मुनि, मनुज, दनुज, देवा ॥
 तुलसिदास भवत्रास मिटै तब जब मति यहि सरूप अटकै ।
 नाहिं त दीन मलीन हीन-सुख कोटि जनम भ्रमि भ्रमि भटकै ॥६३॥

राग बसंत

बंदौं रघुपति करुनानिधान । जाते छूटै भव भेदज्ञान ॥
 रघुवंस-कुमुद सुखप्रद निसेस । सेवित पदपंकज अज महेस ॥
 निज-भगत-हृदय-पाथोज-भृंग । लावन्य वपुष अगन्ति अनंग ॥
 अति प्रबल मोह-तम-मारतंड । अज्ञान-गहन-पावक प्रचंड ॥
 अभिमान-सिंधु-कुंभज उदार । सुररंजन, भंजन भूमिभार ॥
 रागादि-सर्पगन-पन्नगारि । कंदर्प-नाग-मृगपति मुरारि ॥
 भवजलधि-पोत चरनारविंद । जानकी-रमन आनंदकंद ॥
 हनुमंत-प्रेमवापी-मराल । निष्काम-कामधुक गो दयाल ॥
 त्रैलोक्य-तिलक गुनगहन राम । कह तुलसिदास विश्रामधाम ॥६४॥

राग भैरव

राम राम रसु, राम राम रटु, राम राम जपु जीहा ।
 रामनाम-नव-नेह-मेह को मन हठि होहिं पपीहा ॥
 सब साधनफल कूप-सरित-सर-सागर-सलिल निरासा ।
 रामनाम-रति स्वाति-सुधा सुभ-सीकर प्रेम-पियासा ॥
 गरजि तरजि पाषाण बरषि पबि प्रीति परखि जिय जानै ।
 अधिक अधिक अनुराग डमंग उर, पर परमिति पहिचानै ॥
 रामनाम गति, रामनाम मति, रामनाम-अनुरागी ।
 है गए, हैं, जे होहिंगे आगे तेइ गनियत बड़भागी ॥

एकअंग मग अगम गवन करि बिलसु न छिन छिन छाहैं ॥
तुलसी हित अपनेो अपनी दिसि निरुपधि नेम निबाहैं ॥६५॥

राम जपु, राम जपु, राम जपु, बावरे !

घोर भव-नीरनिधि नाम निजु नाव, रे !
एकहि साधन सब रिधि सिधि साधि, रे !
ग्रसे कलि रोग जोग संयम समाधि, रे !
भलो जो है, पोच जो है, दाहिने जो वाम, रे !
रामनाम हो सों अंत सबही को काम, रे !
जग-नभवाटिका रही है फलि फूलि, रे !
धुवाँ के से घौरहर देखि तू न भूलि, रे !
रामनाम छाँड़ि जो भरोसो करै और, रे ! ॥ ६६ ॥

तुलसी परोसो त्यागि माँगै कूर कौर, रे !

रामनाम जपु जिय सदा सानुराग, रे !
कलि न बिराग जोग जाग तप त्याग, रे !
राम-सुमिरन सब बिधि ही को राज, रे !
राम को बिसारिबो निषेध-सिरताज, रे !
रामनाम महामनि, फनि जगजाल, रे !
मनि बिना फनि जियै व्याकुल बिहाल, रे !
रामनाम कामतरु देत फल चारि, रे !
कहत पुरान, बेद, पंडित, पुरारि, रे !
रामनाम प्रेम परमारथ को सार, रे !
रामनाम तुलसी को जीवन-अधार, रे ! ॥ ६७ ॥

राम राम राम जीव जौलों तू न जपिहै ।

६५—एक अंग = अनन्य, एकांगी ।

६७—बिधि को राज = वेदशास्त्र की सारी विधियों या आज्ञाओं में श्रेष्ठ ।
निषेध-सिरताज = सब निषिद्ध बातों से बढ़कर ।

तौ लौं तू कहूँ जाय तिहूँ ताप तपिहै ॥
 सुरसरि-तीर बिनु नीर दुख पाइहै ।
 सुरतरु-तर तोहिं दुःख दारिद सताइहै ॥
 जागत बागत सपने न सुख सोइहै ।
 जनमि जनमि जुग जुग जग रोइहै ॥
 छूटिबे की जतन बिसेष बाँध्यो जायगो ।
 हैहै बिष भोजन जो सुधा सानि खायगो ॥
 तुलसी तिलोक तिहूँ काल तोसे दीन को ।
 रामनाम ही की गति जैसे जल मीन को ॥ ६८ ॥

सुमिरु सनेह सों तू नाम रामराय को ।
 संबर निसंबर को, सखा असहाय को ॥
 भाग है अभागो हू को, गुन गुनहीन को ।
 गाँहक गरीब को दयालु दानि दीन को ॥
 कुल अकुलीन को सुन्यो है, बेद साखि है ।
 पाँगुरे को हाथ पाँय, आँधरे को आँखि है ॥
 माय बाप भूखे को, अधार निराधार को ।
 सेतु भवसागर को, हेतु सुखसार को ॥
 पतित-पावन रामनाम सों न दूसरो ।
 सुमिरि सुभूमि भयो तुलसी सो ऊसरो ॥ ६९ ॥

भलो भली भाँति है जो मेरे कहे लागिहै ।
 मन रामनाम सों स्वभाव अनुरागिहै ॥
 रामनाम को प्रभाव जानु जूड़ी आगिहै ।
 सहित सहाय कलिकाल भीरु भागिहै ॥
 राग रामनाम सों, बिराग जोग जागिहै ।
 वाम बिधि भाल हू न कर्म-दाग दागिहै ॥

रामनाम-मोदक सनेह-सुधा पागिहै ।
 पाइ परितोष नून द्वार द्वार बागिहै ॥
 कामतरु रामनाम, जोइ जोइ माँगिहै ।
 तुलसिदास स्वारथ परमारथ न खाँगिहै ॥ ७० ॥

ऐसेउ साहब की सेवा सों होत चोर, रे !
 आपनी न बूझि, ना कहे को राढ़रोर, रे !
 मुनि-मन-अगम, सुगम माइ बाप सो ।
 कृपासिंधु, सहज सखा, सनेही आप सों ॥
 लोक-वेद-विदित बड़ो न रघुनाथ सों ।
 सब दिन, सब देस, सबही के साथ सो ॥
 स्वामी सर्वज्ञ सों चलै न चोरी चार की ।
 प्रीति-पहिचानि, ग्रह रीति दरबार की ॥
 काय न कलेस लेस, लेत मानि मन की ।
 सुमिरे सकुचि रुचि जोगवत जन की ॥
 रीझे बस होत, खीझे देत निज धाम, रे !
 फलत सकल फल कामतरु-नाम, रे !
 बेंचे खोटो दाम न मिलै, न राखे काम, रे !
 सोंउ तुलसी निवाज्यो ऐसो राजा राम, रे ! ॥ ७१ ॥

मेरो भलो कियो राम आपनी भलाई ।
 हौं तो साई-द्रोही, पै सेवक-हितु साँ ॥
 राम सा बड़ो है कौन ? मोसों कौन छोटो ?
 राम सों खरो है कौन ? मो सों कौन खोटो ?
 लोक कहै राम को गुलाम हौं, कहावों ।
 एतो बड़ो अपराध, भो न मन बाँवों ॥

७०-खाँगिहै = कम होगा ।

७१-राढ़ + रोर = बेकाम और उड़-ड । चार = नौकर, दूत ।

पाथ-माथे चढ़ै तन तुलसी जो नीचो ।
 बोरत न बारि ताहि जानि आपु सींचो ॥७२॥
 जागु जागु जीव जड़ जोहै जग-जामिनी ।
 देह गेह नेह जानु जैसे धन-दामिनी ॥
 सोवत सपने सहै संसृति-संताप, रे
 बूढ़ो मृगबारि, खायो जे वरी को साँप, रे !
 कहैं बेद बुध तू तौ बूझि मन माहिँ रे
 दोष दुख सपने के जागे ही पै जाहिँ, रे !
 तुलसी जागे ते जाइ ताप तिहुँ ताय, रे !
 रामनाम सुचि रुचि सहज सुभाय, रे ! ॥७३॥

राम विभास

जानकीस की कृपा जगावती, सुजान जीव !
 जागि त्यागु मूढ़तानुरागु श्री हरे ।
 करु विचार, तजु विकार, भजु उदार रामचंद्र,
 भद्रसिंधु दीनबंधु, बेद बदत, रे !
 मोहमय कुहू-निसा बिसाल काल बिपुल सोयो,
 खोयो सो अनूप रूप खज्ज हू परे ।
 अब प्रभात प्रगट ज्ञान-भानु के प्रकास,
 बासना-सरोग-मोह-द्वेष-निबिड़-तम टरे ॥
 भागे मद-मान-चोर भोर जानि जातुधान,
 काम-क्रोध-लोभ-छोभ-निकर अपडरे ।
 देखत रघुबर-प्रताप बीते संताप पाप,
 ताप त्रिविध प्रेम-आप दूर ही करे ।
 सखन सुनि गिरा गँभीर जागे अति धीर,

७२-बाँवो = रखते हैं । पाथ माथे = पानी के ऊपर ।

७३-प्रेम-आप = प्रेम रूपी जल ।

बीर बर विराग तोष सकल संत आदरे ।
 तुलसिदास प्रभु कृपालु निरखि जीवजन,
 बिहालु भंज्यो भवजालु परम मंगलाचरे ॥७४॥

राग ललित

खोटो खरो रावरो हौं, रावरी सौं;
 रावरे सौं झूठ क्यों कहोंगो ? जानौ सबही के मन की ।
 करम बचन दिये कहैं न कपट किये,
 ऐसी हठ जैसी गाँठि पानी परे सन की ॥
 दूसरो भरोसो नाहिं, बासना उपासना को
 बासव, बिरंचि, सुर, नर, मुनिगन की ।
 स्वारथ के साथी, मेरे हाथ सों न लेवा देई,
 काहू तो न पीर रघुबीर दीनजन की ॥
 साँप सभा साबर लवार भए देव दिव्य,
 दुसह सांसति कीजै आगे दै या तन की ।
 साँचे परे पाऊँ पान, पंचन में पन प्रमान,
 तुलसी-चातक-आस राम-स्याम-घन की ॥ ७५ ॥
 राम को गुलाम नाम रामबोला राख्यो राम,
 काम यहै नाम द्वै हौं कबहुँ कहत हौं ।
 रोटी लूगा नीके राखैं, आगे हू को बेद भाषैं
 भलो हैहै तेरो, तातैं आनंद लहत हौं ॥
 बाँधो हैं करम जड़ गरभ गूढ़ निगड़,
 सुनत दुसह हैं तो साँसति सहत हैं ।
 आरत-अनाथ-नाथ कोसलपाल कृपाल

७५—साँप सभा = दिव्य परीक्षा जिसमें सर्प, अग्नि आदि द्वारा अभियुक्त के दोषी या निर्दोष होने का निश्चय किया जाता था । दिव्य देना = परीक्षा देना । रोटी लूगा = अन्न वस्त्र ।

लीन्हों छीनि दीन देख्यो दुरित दहत हैं ॥
 बूझ्यो ज्योंहीं, कइयो 'मैं हूँ चैरो हूँहौ रावरो जू,
 मेरो कोऊ कहूँ नाहिँ, चरन गहत हैं ।
 मीजो गुरु पीठ अपनाइ गहि बाँह बोलि,
 सेवक-सुखद सदा विरद बहत हैं ॥
 लोग कहैं पोचु, सो न सोचु न संकोचु,
 मेरे व्याह न वरेखी, जाति पाँति न चहत हैं ।
 तुलसी अकाज काज राम ही के रीझे खीझे,
 प्रीति की प्रतीति मन मुदित रहत हैं ॥ ७६ ॥
 जानकी-जीवन, जगजीवन, जगतहित,
 जगदीस, रघुनाथ, राजीव-लोचन राम ।
 सरद-बिधु-बदन, सुखसील, श्रीसदन,
 सहज सुंदर तनु, सोभा अगनित काम ॥
 जग सुपिता, सुमातु, सुगुरु, सुहित सुमीत,
 सबको दाहिना, दीनबंधु काहू को न वाम ।
 आरतहरन, संरनद, अतुलित दानि,
 प्रनतपाल, कृपालु पतित-पावन नाम ॥
 सकल-बिख-बंदित, सकल-सुर-सेवित,
 आगम निगम कहैं रावरे ई गुनग्राम ।
 इहै जानिकै तुलसी तिहारो जन भयो,
 न्यारो कै गनिबो जहाँ गने गरीब गुलाम ॥ ७७ ॥
 राग टोडी
 दीन को दयालु दानि दूसरो न कोऊ ।
 जाहि दीनता कहैं हैं दीन देखैं सोऊ ॥
 मुनि सुर नर नाग असुर साहिब तौ घनेरे ।
 पै तौलौ जौलौ रावरे न नेकु नयन फेरे ॥

त्रिभुवन तिहुँ काल विदित, बदत बेद चारी ।
 आदि अंत मध्य राम साहिबी तिहारी ॥
 तोहि माँगि माँगनो न माँगनो कहायो ।
 सुनि सुभाव सील सुजस जाचन जन आयो ॥
 पाहन, पसु, बिटप, बिहँग अपने करि लीन्हें ।
 महाराज दसरथ के ! रंक राय कीन्हें ॥
 तू गरीब को निवाज, हैं गरीब तेरो ।
 बारक कहिये कृपालु ! तुलसिदास मेरो ॥ ७८ ॥

तू दयालु, दीन हैं, तू दानि, हैं भिखारी ।
 हैं प्रसिद्ध पातकी, तू पापपुंज-हारी ॥
 नाथ तू अनाथ को, अनाथ कौन मोखो ?
 मो समान आरत नहिं, आरतिहर तोसो ॥
 ब्रह्म तू, हैं जीव, तुही ठाकुर, हैं चरो ।
 तात, मात, गुरु, सखा तू सब बिधि हितु मेरो ॥
 तोहि मोहि नाते अनेक मानिये जो भावै ।
 ज्यों ल्यों तुलसी कृपालु ! चरन-सरन पावै ॥ ७९ ॥

और काहि माँगिए, को माँगिबो निवारै ?
 अभिमतदातार कौन दुखदरिद्र दारै ?
 धरम-धाम राम काम-कोटि-रूप रुरो ।
 साहिब सब बिधि सुजान, दान-खज्ज-सुरो ॥
 सुसमय दिन द्वै निसान सब को द्वार बाजै ।
 कुसमय दसरथ के दानि ! तैं गरीब निवाजै ॥
 सेवा बिनु, गुन-बिहीन दीनता सुनाए ।
 जे जे तैं निहाल किए फूले फिरत पाए ॥
 तुलसिदास जाचक-रुचि जानि दान दीजै ।

रामचंद्र चंद्र तू ! चकोर मोहिं कीजै ॥ ८० ॥

दीनबंधु, सुखसिंधु, कृपाकर, कारुणीक रघुराई ।

सुनहु नाथ ! मन जरत त्रिविध ज्वर, करत फिरत बैराई ॥

कबहुँ जोगरत, भोगनिरत सठ, हठ बियोग बस होई ।

कबहुँ मोहबस द्रोह करत बहु, कबहुँ दया अति सोई ॥

कबहुँ दीन मतिहीन रंकतर, कबहुँ भूप अभिमानी ।

कबहुँ मूढ़ पंडित बिडंब-रत, कबहुँ धरम-रत ज्ञानी ॥

कबहुँ देख जग धनमय रिपुमय, कबहुँ नारिमय भासै ।

संसृति-सन्निपात दारुन दुख बिनु हरिकृपा न नासै ॥

संजम जप तप नेम धरम ब्रत बहु भेषज समुदाई ।

तुलसिदास भवरोग रामपद-प्रेमहीन नहीं जाई ॥ ८१ ॥

मोहजनित मल लाग बिबिध विधि, कोटिहु जतन न जाई ।

जनम जनम अभ्यास-निरत चित अधिक अधिक लपटाई ।

नयन मलिन परनारि निरखि, मन मलिन बिषय सँग लागे ।

हृदय मलिन बासना मान मद, जीव सहज सुख त्यागे ॥

परनिंदा सुनि स्रवन मलिन भए, बचन दोष पर गाए ।

सब प्रकार मलभार लाग निज नाथ-चरन बिसराए ॥

तुलसिदास ब्रत दान ज्ञान तप सुद्धिहेतु सुति गावै ।

रामचरन-अनुराग-नीर बिनु मल अति नास न पावै ॥ ८२ ॥

राग जयतश्री

कछु हूँ न आई गयो जनम जाय ।

अति दुर्लभ तनु पाइ कपट तजि भजे न राम मन बचन काय ॥

लरिकाई बीती अचेत चित, चंचलता चौगुनी चाय ।

जोबन-जर जुवती-कुपथ्य करि भयो त्रिदोष भरि मदन-बाय ॥

मध्य बयस धनहेतु गँवाई कृषी बनिज नाना उपाय ।

रामबिमुख सुख लह्यो न सपनेहुँ, निसि बासर तयो तिहूँ ताय ॥

सेये नहिं सीतापति-सेवक साधु सुमति भले भगति भाय ।
 सुने न पुलकि तनु, कहे न मुदित मन, किए जे चरित रघुवंसराय ।
 अब सोचत मनि बिनु भुजंग ज्यों विकल अंग दले जरा घाय ।
 सिर धुनि धुनि पछितात मींजि कर, कोउ न मीत हित दुसह दाय ॥
 जिन्ह लागि निज परलोक बिगारयो ते लजात होत ठाढ़ ठायँ ।
 तुलसी अजहुँ सुमिरि रघुनाथहिं तरो गयंद जाके अर्द्ध नायँ ॥ ८३ ॥

तौ तू पछितैहै मन मींजि हाथ ।

भयो सुगम तो को अमर-अगम तनु समुझि घौं कत खोवत अकाथ ।
 सुखसाधन हरि विमुख वृथा, जैसे श्रम-फल धृतहित मथे पाथ ।
 यह विचारि तजि कुपथ कुसंगति चलु सुपंथ मिलि भले साथ ॥
 देखु राम-सेवक सुनु कीरति, रटहि नाम करि गान गाथ ।
 हृदय आनु धनुवान-पानि प्रभु लसे मुनिपट कटि कसे भाथ ॥
 तुलसिदास परिहरि प्रपंच सब नाउ रामपद-कमल साथ ।
 जनि डरपहि तो से अनेक खल अपनाये जानकीनाथ ॥ ८४ ॥

राग घनाछरी

मन माधव को नेकु निहारहि ।

सुनु, सठ-सदा रंक के धन ज्यों छनछन प्रभुहिं सँभारहि ॥
 सोभासील ज्ञान-गुन-मंदिर सुंदर परम उदारहि ।
 रंजन-संत अखिल-अघ-गंजन-भंजन-विषय-विकारहि ॥
 जौ बिनु जोग जज्ञ व्रत संजम गयो चहहि भव पारहि ।
 तौ जनि तुलसिदास निसि वासर हरिपद-कमल विसारहि ॥ ८५ ॥

इहै कह्यो सुत ब्रह्म चहुँ ।

श्री रघुबीर-चरन-चितन तजि नाहिंन ठौर कहूँ ॥
 जाके चरन विरंचि सेइ सिधि पाई संकर हूँ ।
 सुक सनकादि मुक्त विचरत तेउ भजन करत अजहुँ ॥

जद्यपि परम चपल श्री संतत, थिर न रहति कतहूँ ।
हरिपद-पंकज पाइ अचल भइ करम बचन मनहूँ ॥
करुनासिंधु भगत-चिंतामनि सोभा सेवत हूँ ।
और सकल सुर असुर ईस सब खाए उरग छहूँ ॥
सुरुचि कह्यो सोई सत्य, तात ! अति परुष बचन जबहूँ ।
तुलसिदास रघुनाथ-विमुख नहिं मिटै बिपति कबहूँ ॥८६॥

सुनु मन मूढ़ सिखावन मेरो ।
हरिपद-विमुख लह्यो न काहु सुख सठ यह समुझि सबेरो ॥
बिछुरे ससि रवि, मन ! नयननि तें पावत दुख बहुतेरो ।
भ्रमत स्मिमत निसि दिवस गगन महँ, तहँ रिपु राहु बड़ेरो ॥
जद्यपि अति पुनीत सुरसरिता तिहुँ पुर सुजस घनेरो ।
तजे चरन अजहूँ न मिटत नित बहिबो ताहूँ केरो ॥
छुटै न बिपति भजे बिनु रघुपति स्तुति संदेह निबेरो ।
तुलसिदास सब आस छाँड़ि करि होहि राम कर चरो ॥८७॥

कबहूँ मन बिसाम न मान्यो ।
निसि दिन भ्रमत बिसारि सहज सुख जहँ तहँ इंद्रिन-तान्यो ॥
जद्यपि बिषय सँग सहे दुसह दुख बिषम जाल अरुभान्यो ।
तदपि न तजत मूढ़ ममताबस, जानत हूँ नहिं जान्यो ॥
जनम अनेक किए नाना विधि करम-कीच चित सान्यो ।
होइ न बिमल बिबेक-नीर बिनु, बेद पुरान बखान्यो ॥
निज हित नाथ पिता गुरु हरि सों हरषि हृदय नहिं आन्यो ।
तुलसिदास कब तृषा जाइ ? सर खनतहिं जनम सिरान्यो ॥८८॥

८७—उरग छाहूँ = काम, क्रोध आदि षड् रिपु । सुरुचि = ध्रुव की सौतेली माता । यह भजन ध्रुव की माता के उपदेश के रूप में हैं जो उन्होंने ध्रुव को दिया था ।

मेरो मन हरि ! हठ न तजै ।

निसि दिन नाथ ! देखै सिख बहु बिधि करत सुभाव निजै ॥
ज्यों जुवती अनुभवति प्रसव अति दारुन दुख उपजै ।
हैं अनुकूल बिसारि सुल सठ पुनि खल पतिहिं भजै ॥
लोलुप भ्रम गृहपसु ज्यों जहँ तहँ सिर पदत्रान बजै ।
तदपि अधम विचरत तेहि मारग कबहुँ न मूढ़ लजै ॥
हौं हारयो करि जतन विविध बिधि, अतिसय प्रबल अजै ।
तुलसिदास बस होइ तबहिं जब प्रेरक प्रभु बरजै ॥८६॥

ऐसी मूढ़ता या मन की ।

परिहरि रामभगति सुरसरिता आस करत ओसकन की ॥
धूमसमूह निरखि चातक ज्यों तृषित जानि मति बन की ।
नहिं तहँ सीतलता न बारि, पुनि हानि होति लोचन की ॥
ज्यों गच-काँच बिलोकि सेन जड़ छाँह आपने तन की ।
दूटत अति आतुर अहार बस छति बिसारि आनन की ॥
कहँ लौं कहौं कुचाल कृपानिधि जानत हौ गति मन की ।
तुलसिदास प्रभु हरहु दुसह दुख, करहु लाज निज पन की ॥८७॥

नाचत ही निसि दिवस मरयो ।

तब हीं ते न भयो हरि ! थिर जवँ ते जिव नाम धरयो ॥
बहु बासना, विविध कंचुक-भूषन-लोभादि भरयो ।
चर अरु अचर गगन जल थल में कौन स्वाँगु न करयो ?
देव दनुज मुनि नाग मनुज नहिं जाँचत कोउ उबरयो ।
मेरो दुसह दरिद्र दोष दुख काहू तो न हरयो ॥
थके नयन पद पानि सुमति बल, संग सकल बिछुरयो ।
अब रघुनाथ सरन आयो जन भवभय-बिकल डरयो ॥

८६—गृहपसु = कुत्ता ।

८७—मति = सद्यः (प्रबो-मतिन) ।

जेहि गुन तेँ बस होहु रीझिकरि सो मोहि सब बिस रयो ।
तुलसीदास निज भवनद्वार प्रभु दीजै रहन परयो ॥६१॥

माधव जू मो सम मंद न कोऊ ।

जद्यपि मीन पतंग हीनमति मोहिं नहिं पूजहिं ओऊ ॥
रुचिर रूप-आहार-बस्य उन पावक लोह न जान्यो ।
देखत बिपति बिषय न तजत हैं, तातेँ अधिक अजान्यो ॥
महामोह-सरिता अपार महुँ संतत फिरत बह्यो ।
श्रीहरिचरन-कमल-नौका तजि फिरि फिरि फेन गह्यो ॥
अस्थि पुरातन छुधित खान अति ज्यों भरि मुख पकरो ।
निज तालूगत रुधिर पान करि मन संतोष धरो ॥
परम-कठिन-भवब्याल-असित हैं, त्रसित भयो अतिभारी ।
चाहत अभय भेक सरनागत खगपति-नाथ बिसारी ॥
जलचर-वृंद जाल-अंतरगत होत सिमिटि इक पासा ।
एकहिं एक खात लालच-बस, नहिं देखत निज नासा ॥
मेरे अघ सारद अनेक जुग गनत पार नहिं पावै ।
तुलसीदास पतित-पावन प्रभु यह भरोस जिय आवै ॥६२॥

कृपा सो धौं कहाँ बिसारी राम ?

जेहि करुना सुनि श्रवन दीन-दुख धावत है तजि धाम ॥
नागराज निज बल बिचारि हिय हारि चरन चित दीन ।
आरत गिरा सुनत खगपति तजि चलत बिलंब न कीन ॥
दितिसुत-त्रास-त्रसित निसि दिन प्रहलाद प्रतिज्ञा राखी ।
अतुलित बल मृगराज-मनुज तनु दनुज हत्यो श्रुति साखी ॥
भूप सदसि सब नृप बिलोकि प्रभु राखु कह्यो नर-नारी ।
बसन पूरि, अरि-दरप दूरि करि भूरि कृपा दनुजारी ॥

एक एक रिपु ते त्रासित जन तुम राखे रघुबीर ।
 अब मोहिं देत दुसह दुख बहु रिपु कस न हरहु भवपीर ॥
 लोभ ग्राह, दनुजस क्रोध, कुरुराज-बंधु खल मार ।
 तुलसिदास प्रभु यह दारुन दुख भंजहु राम उदार ॥८३॥
 काहे ते हरि मोहिं बिसारो ।

जानत निज महिमा, मेरे अघ, तदपि न नाथ सँभारो ॥
 पतितपुनीत दीनहित असरन-सरन कहत श्रुति चारो ।
 है नहिं अघम समीत दीन ? किधौं वेदन मृषा पुकारो ? ॥
 खग-नानिका-गज-व्याध-पाँति जहँ तहँ है हूँ बैठारो ।
 अब केहि लाज कृपानिधान परसत पनवारो टारो ॥
 जो कलिकाल प्रबल अति होतो तुव निदेस ते न्यारो ।
 तौ हरि रोस भरोस दोस गुन तेहिं भजते तजि गारो ॥
 मसक विरंचि, विरंचि मसक सम करहु प्रभाव तुम्हारो ।
 यह सामर्थ्य अछत मोहिं त्यागहु, नाथ तहाँ कछु चारो ॥
 नाहिं नरक परत मोकहँ डर, जद्यपि है अति हारो ।
 यह बड़ि त्रास दासतुलसी प्रभु नामहुँ पाप न जारो ॥८४॥

तऊ न मेरे अघ अवगुन गनिहैं ।

जौ जमराज काज सब परिहरि यही ख्याल उर अनिहैं ॥
 चलिहैं छूटि पुंज पापिन के असमंजस जिय जनिहैं ।
 देखि खलल अधिकार प्रभू सो मेरी भूरि भलाई भनिहैं ॥
 हँसि करिहैं परतीत भगत की भगतसिरोमनि मनिहैं ।
 ज्यों लों तुलसिदास कोसलपति अपनायहि पर बनिहैं ॥ ८५ ॥

जौ पै जिय धरिहौ अवगुन जन के ।

तौ क्यों कटत सुकृत-नख ते मोपै बिटप-वृंद अघ-वन के ॥

कहिहै कौन कलुष मेरे कृत करम बचन अरु मन के ।
हारहिं अमित सेष सारद सुति गिनत एक एक छन के ॥
जौ चित चढ़ै नाम-महिमा निज गुन-गन पावन पन के ।
तौ तुलसिहिं तारिहौ विप्र ज्यों दसन तोरि जमगन के ॥ ६६ ॥

जो पै हरि जन के अवगुन गहते ।

तौ सुरपति कुरुराज बालि सों कत हठि बैर बिसहते ?
जौ जप-जाप-जोग-व्रत-वरजित केवल प्रेम न चहते ।
तौ कत सुर मुनिबर बिहाय व्रज गोपगेह बसि रहते ?
जौ जहँ तहँ पन राखि भगत को भजन-प्रभाव न कहते ।
तौ कलि कठिन करम-मारग जड़ हम केहि भाँति निबहते ?
जौ सुतहित लिए नाम अजामिल के अघ अमित न दहते ।
तौ जमभट साँसति-हर हम से वृषभ खोजि खोजि नहते ॥
जौ जग-बिदित पतित-पावन अति बाँकुर बिरद न बहते ।
तौ बहुकल्प कुटिल तुलसी से सपनेहुँ सुगति न लहते ॥ ६७ ॥

ऐसी हरि करत दास पर प्रीती ।

निज प्रभुता बिसारि जन के वस होत सदा यह रीती ॥
जिन बाँधे सुर असुर नाग नर प्रबल करम की डोरी ।
सोइ अबिछिन्न ब्रह्म जसुमति बाँध्यो हठि सकत न छोरी ॥
जाकी मायावस बिरंचि सिव नाचत पार न पायो ।
करतल ताल बजाइ ग्वाल-जुवतिन तेहि नाच नचायो ॥
विश्वंभर, श्रीपति, त्रिभुवन-पति बेद-बिदित यह लीख ।
बलि सों कछु न चली प्रभुता बरु हूँ द्विज माँगी भीख ॥
जाको नाम लिए छूटत भव जनम-मरन-दुखभार ।
अंबरीष हित लागि कृपानिधि सोइ जनम्यौ दस बार ॥

६७—नहते = नाधते, जोतते । ६८—लीख = लकीर, पक्की बात ।

जोग बिराग ध्यान जप तप करि जेहि खोजत मुनि ज्ञानी ।
 बानर भालु चपल पसु पाँवर, नाथ तहाँ रति मानी ॥
 लोकपाल, जम, काल, पवन, रवि, ससि सब आज्ञाकारी ।
 तुलसिदास प्रभु उग्रसेन के द्वार बेंत-करवारी ॥८८॥

बिरद गरीबनिवाज राम को ।

गावत वेद पुरान संभु सुक प्रगट प्रभाव नाम को ।
 ध्रुव, प्रह्लाद, बिभीषन, कपि जदुपति पांडव सुदाम को ।
 लोक सुजस, परलोक सुगति इनमें को हो राम काम को ॥
 गनिका, कोल, किरात, आदि-कवि, इनतेँ अधिक बाम को ?
 बाजिमेध कब कियो अजामिल, गज गायो कल साम को ?
 छली मलीन हीन सबही अँग, तुलसी सो छीन छाम को ?
 नाम-नरेश-प्रताप प्रबल जग जुग जुग चालत चाम को ॥८९॥

मुनि सीतापति सील सुभाउ ।

मोद न मन, तन पुलक, नयन जल सो नर खेहर खाउ ॥
 सिसुपन तेँ पितु मातु बंधु गुरु सेवक सचिव सखाउ ।
 कहत राम-विधु-बदन रिसोहैं सपनेहुँ लख्यो न काउ ॥
 खेलत संग अनुज बालक नित जोगवत अनट अपाउ ।
 जीति हारि चुचुकारि दुलारत, देत दिवावत दाउ ॥
 सिला साप-संताप-बिगत भइ परसत पावन पाउ ।
 दई सुगति सो न हेरि हरष हिय, चरन छुए पछिताउ ॥
 भवधनु भंजि निदरि भूपति भृगुनाथ खाइ गए ताउ ।
 छमि अपराध, छमाइ पाँइ परि, इतौ न अनत समाउ ॥
 कह्यो राज, बन दियो नारिबस, गरि गलानि गयो राउ ।

८८—बेंत-करवारी = छड़ी बरदार ।

८९—जदुपति = उग्रसेन । सुदाम = सुदामा । चाम को चालत = चमड़े का सिक्का चलाता है ।

ता कुमातु को मन जोगवत ज्यों निज तनु मरम कुघाड ॥
 कपि सेवाबस भए कनौड़े, कछो, पवनसुत आड ।
 देवे को न कछू रिनियाँ हैं, धनिक तु पत्र लिखाड ॥
 अपनाए सुग्रीव बिभीषन, तिन न तज्यो छल-छाड ।
 भरतसभा सनमानि सराहत होत न हृदय अघाड ॥
 निज करुना करतूति भगत पर चपत चलत चरचाड ।
 सकृत प्रनाम प्रनत-जस बरनत सुनत कहत फिरि गाड ॥
 संमुक्ति समुक्ति गुनग्राम राम के उर अनुराग बढ़ाड ।
 तुलसिदास अनयास रामपद पाइहै प्रेम-पसाड ॥ १०० ॥

जाउँ कहाँ तजि चरन तुम्हारे ?

काको नाम पतितपावन जग ? केहि अति दीन पियारे ?
 कौने देव बराय विरद-हित हठि हठि अधम उधारे ?
 खग, मृग, व्याध, पषान, बिटप, जड़ जमन कवन सुर तारे ?
 देव, दनुज, मुनि, नाग, मनुज सब माया-बिबस बिचारे ।
 तिनको हाथ दासतुलसी प्रभु कहा अपनपौ हारे ? ॥ १०१ ॥

हरि तुम बहुत अनुग्रह कीन्हों ।

साधन-धाम बिबुध-दुर्लभ तनु मोहि कृपा करि दीन्हों ॥
 कोटिहुँ मुख कहि जायँ न प्रभु के एक एक उपकार ।
 तदपि नाथ कछु और माँगिहैं दीजै परम उदार ॥
 बिषय-वारि मन-मीन भिन्न नहिँ होत कबहुँ पल एक ।
 तातेँ सहिय बिपति अति दारुन जनमत जोनि अनेक ॥
 कृपा-डोरि, बंसी-पद-अंकुस, परम प्रेम-मृदु-चारो ।
 हिय बिधि बेधि हरहु मेरो दुख, कौतुक राम तिहारो ॥

१००—अनट = अन्याय । अपाड = नटखटी । समाड = समाई, चमता,
 सहन शक्ति । पसाड = प्रसाद ।

१०१—बराय = चुन चुन कर ।

हैं स्तुति-विदित उपाय सकल, सुर केहि केहि दीन निहोरै ?
तुलसिदास यहि जीव मोह-रजु जोइ बाँध्यो सोइ छोरै ॥१०२॥

यह विनती रघुबीर गुसाई ।

और आस बिस्वास भरोसो हरौ जीव-जड़ताई ॥
चहैं न सुगति सुमति, संपति, कछु रिधि सिधि, विपुल बढ़ाई ।
हेतुरहित अनुराग रामपद बढ़ौ अनुदिन अधिकाई ॥
कुटिल करम लै जाय मोहिं जहँ जहँ अपनी वरिआई ।
तहँ तहँ जिनि छिन छोह छाँड़िए कमठ-अंड की नाई ॥
यहि जग में जहँ लगि या तनु की प्रीति प्रतीति सगाई ।
ते सब तुलसिदास प्रभु ही सों होहु सिमिटि एक ठाई ॥१०३॥

जानकीजीवन की बलि जैहैं ।

चित कहै रामसीय-पद परिहरि अब न कहूँ चलि जैहैं ।
उपजी उर प्रतीति, सपनेहुँ सुख प्रभुपद बिमुख न पैहैं ॥
मन समेत या तन के वासिन इहै सिखावन दैहैं ।
स्रवननि और कथा नहिं सुनिहैं, रसना और न गैहैं ॥
रोकिहैं नयन बिलोक्त औरहिं, सीस ईस ही नैहैं ।
नातो नेह नाथ सों करि सब नातो नेह बहैहैं ॥
यह छरभार ताहि तुलसी जग जाको दास कहैहैं ॥१०४॥

अब लौं नसानी अब न नसैहैं ।

रामकृपा भवनिसा सिरानी जागे फिर न डसैहैं ॥
पायो नाम चारु चिंतामनि, उर-कर तेँ न खसैहैं ।
स्यामरूप सुचि रुचिर कसौटी चित कंचनहिं कसैहैं ॥
परबस जानि हँस्यो इन इंद्रिन, निज बस है न हँसैहैं ।
मन-मधुकर पन करि तुलसी रघुपति-पद कमल बसैहैं ॥ १०५ ॥

राग रामकली

महाराज रामादर्यो धन्य सोई ।

गरुड, गुनरासि, सर्वज्ञ, सुकृती, सूर, सीलनिधि, साधु तेहि सम न कोई ॥
 कीस, केवट, उपल, भालु, निसिचर, सबरि, गीधसम-दम-दया-दान-हीने ।
 नाम लिए राम किए परमपावन सकल तरत नर तिनके गुनगान कीने ॥
 व्याधअपराध की साध राखी कौन ? पिंगला कौन मति भक्ति भेई ?
 कौन धौं सोमजागी अजामिल अधम ? कौन गजराज धौं बाजपेई ?
 पंडुसुत, गोपिका, विदुर, कुबरी सबहिं सोध किए सुद्धता लेस कैसो ।
 प्रेम लखि कृष्ण किए आपने तिनहुँ को, सुजस संसार हरिहर को जैसो ॥
 कोल, खस, भिल्ल जमनादि खल राम कहि नीच हूँ ऊँच पद को न पायो ।
 दीन-दुख-दमन श्रीरमन करुनाभवन पतित-पावन विरद बेद गायो ॥
 मंदमति कुटिल खल-तिलक तुलसी सरिस भोनि तिहुँलोक तिहुँकाल कोऊ ।
 नाम की कानि पहिचानि जन आपने

प्रसत कलिव्याल राखो सरन सोऊ ॥ १०६ ॥

राग बिलावल

है नीको मेरो देवता कोसलपति राम ।

सुभग सरोरुह-लोचन सुठि सुंदर स्याम ॥
 सिय समेत सोभित सदा, छवि अमित अनंग ।
 भुज बिसाल सर धनु धरे, कटि चारु निषंग ॥
 बलि पूजा चाहत नहीं, चाहै एक प्रीति ।
 सुमिरत ही मानै भलो, पावन सब रीति ॥
 देइ सकल सुख, दुख दहै आरतजन-बंधु ।
 गुन गहि अथ अवगुन हरै, अस करुनासिंधु ॥
 देस काल पूरन सदा, बंद बेद पुरान ।
 सब को प्रभु, सब में बसै, सब की गति जान ॥

१०६—भेई = भिगोई, डुबाई । सोमजागी = सोम याग करनेवाला ।

को करि कोटिक कामना पूजै बहु देव ?
तुलसिदास तेहि सेइए संकर जेहि सेव ॥ १०७ ॥

बीर महा अवराधिए साधे सिधि होय ।
सकल काम पूरन करै जानै सब कोय ॥
बेगि, बिलंब न कीजिए, लीजै उपदेस ।
बीज-मंत्र जपिए सोई जो जपत महेस ॥
प्रेमबारि तर्पन भलो, घृत सहज सनेह ।
संसय समिधि, अग्नि छमा, ममता बलि देह ॥
अघ उचाटि मन बस करै, मारै मद मार ।
आकरवै सुख संपदा संतोष बिचार ॥
जे यहि भाँति भजन किए मिले रघुपति ताहि ।
तुलसिदास प्रभुपथ चढ्यो, जो लेहु निवाहि ॥ १०८ ॥

कस न करहु करुना हरे ! दुखहरन मुरारि !
त्रिविध-ताप-संदेह-सोक-संसय-भय-हारि ॥
यह कलिकाल-जनित मल मतिमंद मलिनमन ।
तेहि पर प्रभु नहिँ कर सँभार, केहि भाँति जियै जन ?
सब प्रकार समरथ, प्रभो ! मैं सब बिधि दीन ।
यह जिय जानि द्रवहु नहीं मैं करम-बिहीन ॥
भ्रमत अनेक जोनि रघुपति ! पति आन न मोरे ।
दुख सुख सहैँ रहैँ सदा सरनागत तोरे ॥
तो सम देव न कोउ कृपालु समुझौँ मन माहीं ।
तुलसिदास हरि तोषिए सो साधन नाहीं ॥ १०९ ॥

कहु केहि कहिए कृपानिधे ! भवजनित बिपति अति ।
इंद्रिय सकल विकल सदा निज निज सुभाउ रति ॥
जो सुख संपति, सरग नरक संतत सँग लागी ।

हरि परिहार सोइ जतन करत मन मोर अभागी ॥
 मैं अति दीन, दयालु देव, सुनि मन अनुरागे ।
 जो न द्रवहु, रघुबीर धीर ! काहे न दुख लागे ॥
 जद्यपि मैं अपराध-भवन, दुखसमन मुरारे ।
 तुलसिदास कहँ आस इहै बहु पतित उधारे ॥११०॥

केसव कहि न जाइ का कहिए ?

देखत तव रचना विचित्र अति समुक्ति मनहिं मन रहिए ॥
 सुन्य भीति पर चित्र, रंग नहिं, तनु बिनु लिखा चितेरे ।
 धोए मिटै न, मरै भीति-दुख, पाइय यहि तनु हरे ॥
 रविकर-नीर बसै अति दारुन मकररूप तेहि माहीं ।
 बदनहीन सो ग्रसै चराचर पान करन जे जाहीं ॥
 कोउ कह सत्य, भूठ कह कोऊ, जुगल प्रबल करि मानै ।
 तुलसिदास परिहरै तीनि भ्रम सो आपन पहिचानै ॥ १११॥

केसव कारन कौन गुसाई ।

जेहि अपराध असाधु जानि मोहिं तजेहु अज्ञ की नाई ॥
 परम पुनीत संत कोमलचित तिनहिं तुमहिं बनि आई ।
 तौ कत विप्र व्याध गनिकहिं तारेहु ? कछु रही सगाई ?
 काल कर्म, गति अगति जीव की सब हरि हाथ तुम्हारे ।
 सोइ कछु करहु रहहु ममता मम, फिरहुँ न तुमहिं बिसारे ॥
 जौ तुम तजहु भजौं न आन प्रभु, यह प्रमान पन मोरे ।
 मन क्रम वचन नरक सुरपुर जहँ तहँ रघुबीर निहोरे ॥
 जद्यपि नाथ उचित न होत अस प्रभु सों करौं ढिठाई ।
 तुलसिदास सीदत निसि दिन देखत तुम्हारि निठुराई ॥ ११२ ॥

१११—रविकर-नीर = मृगतृष्णा का जल । कोउ कह.....मानै = न्याय, वेदांत और सांख्य के अनुसार संसार और ब्रह्म के सत्यासत्य के सिद्धांत अर्थात् नाना दार्शनिक वाद ।

११२—सीदत = दुःख पाता है ।

माधव ! अब न द्रवहु केहि लेखे ?

प्रनतपाल प्रन तोर, मोर प्रन जिअउँ कमलपद देखे ॥
जब लगि मैं न दीन, दयालु तैं, मै न दास, तैं स्वामी ।
तब लगि जो दुख सहेउँ कहेउँ नहिं, जद्यपि अंतरयामी ॥
तै उदार, मैं कृपन, पतित मैं, तैं पुनीत स्मृति गावै ।
बहुत नात रघुनाथ तोहिं मोहिं, अब न तजे बनि आवै ॥
जनक जननि, गुरु बंधु, सुहृद पति सब प्रकार हितकारी ।
द्वैतरूप तमकूप परौं नहिं अस कछु जतन बिचारी ॥
सुनु अदभ्र-करुना, बारिज-लोचन, मोचन-भय-भारी ।
तुलसिदास प्रभु तब प्रकास बिनु संसय टरै न टारी ॥ ११३ ॥

माधव ! मो समान जग माहीं ।

सब विधि हीन, मलीन, दीन अति लीन-विषय कोउ नाहीं ॥
तुम सम हेतु-रहित, कृपालु, आरत-हित, ईसहि त्यागी ।
मैं दुख-सोक-विकल कृपालु ! केहि कारन दया न लागी ?
नाहिंन कछु अवगुन तुम्हार, अपराध मोर मैं माना ।
ज्ञानभवन तनु दिएहु, नाथ ! सोउ पाय न मैं प्रभु जाना ॥
बेनु करील, श्रीखंड वसंतहिं दूषन मृषा लगावै ।
सार-रहित, हतभाग्य सुरभि पल्लव सो कहु कहँ पावै ॥
सब प्रकार मैं कठिन, मृदुल हरि, दृढ़ बिचार जिय मोरे ।
तुलसिदास प्रभु मोह-शृंखला छुटिहि तुम्हारे छारे ॥ ११४ ॥

माधव ! मोह फाँस क्यों टूटै ?

बाहिर कोटि उपाय करिय, अभ्यंतर ग्रंथि न छूटै ॥
घृतपूरन कराह अंतरगत ससि-प्रतिबिंब दिखावै ।
ईधन अनल लगाइ कलप सत औटत नास न पावै ॥
तरु-कोटर महुँ बस बिहंग, तरु काटे मरै न जैसे ।
साधन करिय बिचार-हीन मन सुद्ध होइ नहिं तैसे ॥

अंतर मलिन, विषय मन अति, तन पावन करिय पखारे ।
मरै न उरग अनेक जतन बलभीक बिबिध विधि मारे ॥
तुलसिदास हरि-गुरु-करुना-बिनु विमल बिबेक न होई ।
बिनु बिबेक संसार घोर निधि पार न पावै कोई ॥११५॥

माधव ! अस तुम्हारि यह माया ।

करि उपाय पचि मरिय, तरिय नहिं जब लगि करहु न दाया ॥
सुनिय, गुनिय, समुझिय, समुझाइय दसा हृदय नहिं आवै ।
जेहि अनुभव बिनु मोह-जनित दारुन भव-विपति सतावै ॥
ब्रह्म पियूष मधुर सीतल जौ पै मन सो रस पावै ।
तौ कत मृगजल-रूप विषय कारन निसि बासर धावै ॥
जेहि के भवन विमल चिंतामनि सो कत काँच बटोरै ।
सपने परबस पर्यो जागि देखत केहि जाइ निहोरै ?
ज्ञान भगति साधन अनेक सब सत्य, भूठ कछु नार्हीं ।
तुलसिदास हरिकृपा मिटै भ्रम, यह भरोस मन मारहीं ॥११६॥

हे हरि ! कवन दोष तोहिं दोजै ?

जेहि उपाय सपनेहुँ दुर्लभ गति सोइ निसि बासर कीजै ॥
जानत अर्थ अनर्थ-रूप, तमकूप परब यहि लागे ।
तदपि न तजत खान, अज, खर ज्यों फिरत विषय-अनुरागे ॥
भूत-द्रोह-कृत मोह-बस्य हित आपन मैं न विचारो ।
मद, मत्सर, अभिमान, ज्ञान-रिपु इन महुँ रहनि अपारो ॥
बेद पुरान सुनत समुझत रघुनाथ सकल जगव्यापी ।
भेदत नहिं श्रीखंड बेनु इव सारहीन मन पापी ॥
मैं अपराध-सिंधु करुनाकर ! जानत अंतरजामी ।
तुलसिदास भवव्याल-असित तव सरन उरग-रिपु-गामी ॥११७॥

हे हरि ! कवन जतन सुख मानहु ?

जिमि गज-दसन तथा मम करनी सब प्रकार तुम जानहु ॥
जो कछु कहिय करिय भवसागर तरिय बत्सपद जैसे ।
रहनि आन बिधि, कहिय आन, हरिपद-सुख पाइय कैसे ॥
देखत चारु मयूर नयन-सुभ, बोलि सुधा इव सानी ।
सविष उरग आहार निठुर अस, यह करनी वह बानी ॥
अखिल-जीव-बत्सल निर्मत्सर चरन-कमल-अनुरागी ।
ते तव प्रिय रघुवीर ! धीरमति अतिसय निज-पर-त्यागी ॥
जद्यपि मम अवगुन अपार संसार-जोग्य रघुराया ।
तुलसिदास निज गुन विचारि करुना-निधान करु दाया ॥११८॥

हे हरि ! कवन जतन भ्रम भागै ?

देखत सुनत विचारत यह मन निज सुभाव नहिं त्यागै ॥
भगति, ज्ञान, वैराग्य सकल साधन यहि लागि उपाई ।
कोउ भल कहहु, देउ कछु कोऊ, असि बासना न उर ते जाई ॥
जेहि निसि सकल जीव सुतहिं तव कृपापात्र जन जागै ।
निज करनी विपरीत देखि मोहिं समुझि महा भय लागै ॥
जद्यपि भगन-मनोरथ बिधि-वस सुख इच्छत दुख पावै ।
चित्रकार करहीन जथा स्वारथ बिनु चित्र बनावै ॥
हृषीकेश सुनि नाउँ जाउँ बलि, अति भरोस जिय मोरे ।
तुलसिदास इंद्रिय-संभव दुख हरे बनिहि प्रभु तोरे ॥११९॥

हे हरि ! कस न हरहु भ्रम भारी ?

जद्यपि मृषा सत्य भासै जब लागि नहिं कृपा तुम्हारी ॥
अर्थ अविद्यमान जानिय संसृति नहिं जाइ गोसाईं ।
बिनु बाँधे निज हठ सठ परबस पर्यो कीर की नाई ॥
सपने व्याधि बिबिध बाधा भइ, मृत्यु उपस्थित आई ।

वैद्य अनेक उपाय करहिँ, जागे बिनु पीर न जाई ॥
 सुति-गुरु-साधु-सुमृति-संमत यह दृश्य सदा दुखकारी ।
 तेहि बिनु तजे, भजे बिनु रघुपति बिपति सकै को टारी ?
 बहु उपाय संसार-तरन कहँ बिमल गिरा श्रुति गावै ।
 तुलसिदास 'मैं मोर' गए बिनु जिय सुख कबहुँ न पावै ॥१२०॥

हे हरि यह भ्रम की अधिकाई ।

देखत सुनत कहत समुझत संसय संदेह न जाई ॥
 जौ जग मृषा, ताप-त्रय-अनुभव होहिँ कहहु केहि लेखे ।
 कहि न जाइ मृगवारि सत्य, भ्रम तेँ दुख होई बिसेखे ॥
 सुभग सेज सोवत सपने वारिधि बूझत भय लागै ।
 कोटिहुँ नाव न पार पाव कोउ जब लगि आपु न जागै ॥
 अनविचार रमनीय सदा, संसार भयंकर भारी ।
 सम संतोष दया बिबेक ते व्यवहारी सुखकारी ॥
 तुलसिदास सब विधिप्रपंच जग जदपि भूठ सुति गावै ।
 रघुपति-भगति संत-संगति बिनु को भवत्रास नसावै ॥ १२१ ॥

मैं हरि साधन करै न जानी ।

जस आमय भेषज न कीन्ह तस, दोस कहा दिरमानी ॥
 सपने नृप कहँ घटै विप्रबध, बिकल फिरै अघ लागे ।
 बाजिमेघ सत कोटि करै नहिँ सुद्ध होय बिनु जागे ॥
 स्रग महुँ सर्प विपुल भयदायक प्रगट होइ अविचारे ।
 बहु आयुध धरि, बल अनेक करि हारहि मरै न मारे ॥
 निज भ्रम तेँ रबिकर-संभव सागर अति भय उपजावै ।
 अवगाहत बोहित नौका चढ़ि कबहुँ पार न पावै ॥
 तुलसिदास जग आपु सहित जब लगि निर्मूल न जाई ।
 तब लगि कोटि कलप उपाय करि मरिय, तरिय नहिँ भाई ॥१२२॥

अस कछु समुझि परत, रघुराया !

बिनु तव कृपा दयालु दासहित मोह न छूटै माया ॥

वाक्यज्ञान अत्यंत निपुन भवपार न पावै कोई ।

निसि गृह मध्य दीप की बातन तम निवृत्त नहिं होई ॥

जैसे कोउ इक दीन दुखी अति असन-हीन दुख पावै ।

चित्र कल्पतरु कामधेनु गृह लिखे न बिपति नसावै ॥

षट रस बहु प्रकार भोजन कोउ दिन अरु रैनि बखानै ।

बिनु बोले संतोष-जनित सुख खाइ सोइ पै जानै ॥

जब लगि नहिं निज हृदि प्रकास, अरु बिषय-आस मन माहीं ।

तुलसिदास तब लगि जगजोनि भ्रमत, सपनेहुँ सुख नाहीं ॥१२३॥

जौ निज मन परिहरै बिकारा ।

तो कत द्वैत-जनित संसृति-दुख, संसय, सोक अपारा ॥

सत्रु मित्र मध्यस्थ तीनि ये मन कीन्हें बरिआई ॥

त्यागब गहब उपेच्छनीय अहि हाटक तन की नाई ॥

असन, बसन, बसु, वस्तु विविध विधि सब मन महुँ रह जैसे ।

सरग, नरक, चर अचर लोक बहु बसत मध्य मन तैसे ॥

बिटप मध्य पुत्रिका, सूत्र महुँ कंचुक बिनहिं बनाए ।

मन महुँ तथा लीन नाना तनु, प्रगटत अवसर पाए ॥

रघुपति-भगति-बारि-छालित चित बिनु प्रयास ही सृझै ।

तुलसिदास कह चिद-विलास जग बूझत बूझत बूझै ॥१२४॥

मैं केहि कहैं बिपति अति भारी । श्रीरघुबीर धीर हितकारी ॥

मम हृदय भवन प्रभु तोरा । तहुँ बसे आइ बहु चोरा ॥

अति कठिन करहिं बरजोरा । मानहिं नहिं बिनय निहोरा ॥

तम, मोह, लोभ, अहंकारा । मद, क्रोध, बोध-रिपु, मारा ॥

१२४—बसु = धन । पुत्रिका = पुतली । छालित = प्रच्छालित, धोखा

अति करहिं उपद्रव नाथा । मरदहिं मोहिं जानि अनाथा ॥
 मैं एक, अमित बटपारा । कोउ सुनै न मोर पुकारा ॥
 भागेहु नहिं नाथ उबारा । रघुनायक करहु सँभारा ॥
 कह तुलसिदास सुनु रामा । लूटहिं तस्कर तव धामा ॥
 चिंता यह मोहिं अपारा । अपजस नहिं होय तुम्हारा ॥१२५॥
 मन मेरे मानहि सिख मेरी । जो निजु भगति चहै हरि केरी ॥
 उर आनहि प्रभु कृत हित जेते । सेवहि तजे अपनपौ, चेते ॥
 दुख सुख अरु अपमान बढ़ाई । सब सम लेखहिं बिपति बिहाई ॥
 सुनु सठ काल-ग्रसित यह देही । जनि तेहि लागि बिदूषहिं केही ॥
 तुलसिदास बिनु असि मति आये । मिलहिं न राम कपट लय लाये ॥१२६॥
 मैं जानी हरिपद-रति नार्हीं । सपनेहु नहिं बिराग मन माहीं ॥
 जे रघुवीर-चरन अनुरागे । तिन्ह सब भोग रोग सम त्यागे ॥
 काम, भुअंग डसत जब जाही । बिषय-नोंब कटु लगति न ताही ॥
 असमंजस अस हृदय बिचारी । बढ़त सोच नित नूतन भारी ॥
 जब कब रामकृपा दुख जाई । तुलसिदास नहिं आन उपाई ॥१२७॥
 सुमिरु सनेह सहित सीतापति । रामचरन तजि नहिंन आन गति ॥
 जप, तप, तीरथ, जोग, समाधी । कलि मति बिकल, न कछु निरुपाधी ॥
 करतहुँ सुकृत न पाप सिराहीं । रक्तबीज जिमि बाढ़त जाहीं ॥
 हरनि एक अघ-असुर-जालिका । तुलसिदास प्रभुकृपा-कालिका ॥१२८॥

रुचिर रसना तू राम राम राम क्यों न रटत ।

सुमिरत सुख सुकृत बढ़त, अघ अमंगल घटत ॥

बिनु सम कलि-कलुष-जाल कटु कराल कटत ।

दिनकर के उदय जैसे तिमिर-तोम फटत ॥

जोग, जाग, जप, बिराग, तप, सुतीरथ अटत ।

बाँधिबे को भवगयंद रेनु की रजु बटत ॥

परिहरि सुरमनि सुनाम गुंजा लखि लटत ।
लालच लघु तेरो लखि तुलसी तोहि हटत ॥ १२६ ॥

राम, राम, राम, राम, राम, राम जपत ।
मंगल मुद उदित होत, कलिमल छल छपत ॥
कहु केहि लहे फल रसाल बबुर-बीज बपत ।
हारहि जनि जनम जाय गालगूल गपत ॥
काल, करम, गुन, सुभाव सबके सीस तपत ।
रामनाम-महिमा की चरचा चले चपत ॥
साधन बिनु सिद्धि सकल बिकल लोग लपत ।
कलिजुग बर वनिज बिपुल नाम नगर खपत ॥
नाम सो प्रतीति प्रीति हृदय सुथिर थपत ।
पावन किय रावन-रिपु तुलसिहु से अपत ॥ १३० ॥

पावन प्रेम-रामचरन जनम लाहु परम ।
रामनाम लेत होत सुलभ सकल धरम ॥
जोग, मख, बिबेक बिरति वेद-बिहित करम ।
करिबे कहँ कटु कठोर, सुनत मधुर नरम ॥
तुलसी सुनि जानि बूझि भूलहि जनि भरम ।
तेहि प्रभु को होहि जाहि सबड़ी की सरम ॥ १३१ ॥

राम से प्रीतम की प्रीति-रहित जीव जाय जियत ।
जेहि सुख सुख मानि लेत सुख सो समुझ कियत ॥

१२६—लटत = ललचाता है । हटत = हटकता है, मना करता है (कि
ऐसा मत कर) ।

१३०—गाल गूल = अनाप शनाप, व्यर्थ की बात । गापत = गप मारते
हुए, बकते हुए । लपत = लपकते हैं । अपत = पति-हीन, गया बीता ।

१३२—कियत = कितना है ।

जहँ जहँ जेहि जोनि जनम महि पताल बियत ।
तहँ तहँ तू बिषय-सुखहिँ चहत, लहत नियत ॥
कत बिमोह लख्यो फट्यो गगन मगन सियत ।
तुलसी प्रभु-सुजस गाइ क्यों न सुधा पियत ॥१३२॥

तोसो हैं फिरि फिरि हित सत्य बचन कहत ।
सुनि मन गुनि समुझि क्यों न सुगम सुमग गहत ॥
छोटो बड़ो, खोटो खरो जग जो जहँ रहत ।
अपने अपने को भलो कहहु को न चहत ?
बिधि लागि लघु कीट अवधि सुख सुखी, दुख दहत ।
पसु लौं पसुपाल ईस बाँधत छोरत नहत ॥
बिषय मुद निहारि भार सिर ज्यों काँधे बहत ।
योही जिय जानि मानि सठ तू साँसति सहत ॥
पायो केहि घृत विचारु हरिनबारि महत ।
तुलसी तकु तासु सरन जाते सब लहत ॥ १३३ ॥

ताते हैं बार बार देव ! द्वार परि पुकार करत ।
आरत नत दीनता कहे प्रभु संकट हरत ॥
लोकपाल सोकबिकल रावन-डर डरत ।
का सुनि सकुचे कृपालु नरसरीर धरत ?
कौसिक, मुनितीय, जनक सोच-अनल जरत ।
साधन केहि सीतल भये सो न समुझि परत ॥
केवट, खग, सबरि सहज चरनकमल न रत ।
सनमुख तोहिँ होत नाथ कुतरु सुफर फरत ॥
बंधुबैर कपि विभीषन गुरु गलानि गरत ।
सेवा केहि रीझि राम किए सरिस भरत ?

१३२—बियत = आकाश ।

१३३—हरिनबारि = मृगतृष्णा का जल । मथत = मथते हुए ।

सेवक भयो पवनपूत साहिब अनुहरत ।
 ताको लिए नाम राम सबको सुढर ढरत ॥
 जाने बिनु राम-रीति पचि पचि जग मरत ।
 परिहरि छल सरन गए तुलसिहु से तरत ॥ १३४ ॥

राग सूहो बिलावल

राम सनेही सों तैं न सनेह कियो ।
 अगम जो अमरनि हूँ सो तनु तोहि दियो ॥
 दियो सुकुल जनम सरीर सुंदर हेतु जो फल चारि को ।
 जो पाइ पंडित परमपद पावत पुरारि मुरारि को ॥
 यह भरतखंड समीप सुरसरि, थल भलो, संगति भली ।
 तेरी कुमति कायर कलपबल्ली चहति बिषफल फली ॥ १ ॥

अजहूँ समुक्ति चित्त दै सुनु परमारथ ।

है हित सों जगहूँ जाहि तेँ खारथ ॥

खारथहि प्रिय, खारथ सो काते, कौन बेद बखानई ।
 देखु खल अहिखेल परिहरि सो प्रभुहि पहिचानई ॥
 पितु, मातु, गुरु, स्वामी, अपनपो, तिय, तनय, सेवक, सखा ।
 प्रिय लगत जाके प्रेम सों बिनु हेतु हित नहिँ तैं लखा ॥ २ ॥

दूरि न सो हितु हेरि हिये ही है ।

छलहि छाँड़ि सुमिरे छोह किए ही है ॥

किए छोह छाया कमल कर की भगत पर भजतहि भजै ।
 जगदीस जीवन जीव को जो साज सब सबको सजै ॥
 हरिहि हरिता विधिहि विधिता, सिवहि सिवता जो दई ।
 सोइ जानकी-पति मधुर मूरति मोदमय मंगलमई ॥ ३ ॥

ठाकुर अतिहि बड़ो सील सरल सुठि ।

ध्यान-अगम सिव हूँ, भैँट्यो केवट उठि ॥

भरि अंक भैँट्यो सजल नयन सनेह सिथिल सरीर सों ।

सुर सिद्ध मुनि कवि कहत कोउ न प्रेमप्रिय रघुबीर सो ॥
 खग सबरि निसिचर भालु कपि किए आपु तेँ बंदित बड़े ।
 तापर तिनकी सेवा सुमिरि जिय जात जु सङ्कुचनि गड़े ॥४॥
 स्वामी को सुभाव कह्यो सो जब उर आनि है ।
 सोच सकल मिटिहैं, राम भलो मानिहै ॥
 भलो मानिहैं रघुनाथ जारि जो हाथ माथो नाइहै ।
 ततकाल तुलसिदास जीवन जनम को फल पाइहै ॥
 जपि नाम करहि प्रनाम कहि गुनग्राम रामहिं धरि हिये ।
 बिचरहि अवनि अवनीस-चरन-सरोज मन मधुकर किये ॥५॥१३५॥

जिय जब तेँ हरितेँ बिलगान्यो । तब तेँ देह गेह निज जान्यो ॥
 मायाबस सरूप बिसरायो । तेहि भ्रम तेँ दारुन दुख पायो ॥
 पायो जो दारुन दुसह दुख सुखलेस सपनेहुँ नहिं मिल्यो ।
 भवसुल सोक अनेक जेहि तेहि पंथ तू हठि हठि चलयौ ॥
 बहु जोनि जन्म जरा बिपति, मतिमंद हरि जान्यो नहीं ।
 श्रीराम-बिनु विश्राम मूढ़ ! बिचारि लखि पायो कहीं ॥१॥
 आनँदसिंधु मध्य तव बासा । बिनु जाने कस मरसि पियासा ॥
 मृगभ्रम-बारि सत्य जिय जानी । तहँ तू मगन भयो सुख मानी ॥
 तहँ मगन मज्जसि पान करि त्रयकाल जल नहीं जहाँ ।
 निज सहज अनुभव रूप तव खल भूलि चलि आया तहाँ ॥
 निर्मल निरंजन निर्विकार उदार सुख तैँ परिहर्यौ ।
 निःकाज राज बिहाय नृप इव स्वप्न-कारागृह पर्यो ॥ २ ॥
 तैँ निज कर्मडोरि दृढ़ कीन्हि । अपने करनि गाँठि गहि दोन्ही ॥
 तातेँ परब्रह्म पर्यो अभागे । ता फल गर्भबास दुख आगे ॥
 आगे अनेक समूह संसृति, उदरगति जान्यो सोऊ ।
 सिर हेठ, ऊपर चरन, संकट बात नहिं पृछै कोऊ ॥

सोनित पुरीष जो मूत्र मल कृमि कर्दमावृत सोवही ।
 कोमल सरीर, गँभीर बेदन, सीस धुनि धुनि रोवही ॥ ३ ॥
 तू निज कर्मजाल जहँ घेरो । श्रीहरि संग तज्यो नहिं तेरो ॥
 बहु बिधि प्रतिपालन प्रभु कीन्हो । परम कृपालु ज्ञान तोहिं दीन्हो ॥
 तोहिं दियो ज्ञान विवेक जन्म अनेक की तब सुधि भई ।
 तेहि ईस की हैं सरन जाकी विषम माया गुनमई ॥
 जेहि किए जीव-निकाय बस रस हीन दिन दिन अति नई ।
 सो करौ बेगि सँभार श्रीपति बिपति महुँ जेहि मति दर्ई ॥ ४ ॥
 पुनि बहु बिधि गलानि जिय मानी । अब जग जाइ भजौ चक्रपानी ।
 ऐसेहि करि बिचार चुप साधी । प्रसवपवन प्रेरेउ अपराधी ॥
 प्रेरो जो परम प्रचंड मारुत कष्ट नाना तैं सह्यो ।
 सो ज्ञान ध्यान बिराग अनुभव जातना-पावक दह्यो ॥
 अति खेद-व्याकुल अल्प बल छिन एक बोलि न आवई ।
 तब तोत्र कष्ट न जान कोउ सब लोग हर्षित गावई ॥ ५ ॥
 वाल-दसा जेते दुख पाए । अति अनीस नहिं जाए गनाए ।
 छुधा व्याधि व्याधा भइ भारी । बेदन नहिं जानै महतारी ॥
 जननी न जानै पीर सो केहि हेतु सिसु रोदन करे ।
 सोइ करै विविध उपाय जाते अधिक तुव छाती जरै ॥
 कौमार, सैसव अरु किसोर अपार अघ को कहि सकै ।
 व्यतिरेक तोहि निर्दय महा खल आन कहु को सहि सकै ? ॥ ६ ॥
 जौवन जुवति-सँग रंग राख्यो । तब तू महा मोहमद माख्यो ।
 ताते तजी धर्म मरजादा । बिसरे तब सब प्रथम विषादा ॥
 बिसरे विषाद निकाय-संकट समुझि नहिं फाटत हियो ।
 फिरि गर्भगत-आवृत्त संसृति-चक्र जेहि होइ सोइ कियो ॥
 कृमि-भस्म-बिट-परिनाम तनु तेहि लागि जगु बैरी भयो ।

परदार परधन द्रोहपर संसार बाढ़ै नित नयो ॥ ७ ॥
 देखत ही आई बिरुधार्ई । जो तैं सपनेहु नाहिं बुलाई ।
 ताके गुन कछु कहे न जाहीं । सो अब प्रगट देखु तन माहीं ॥
 सों प्रगट तनु जर्जर जराबस व्याधि सूल सतावई ।
 सिरकंप, इंद्रिय-सक्ति प्रतिहत वचन काहु न भावई ॥
 गृहपाल हू तैं अति निरादर, खान पान न पावई ।
 ऐसिहु दसा न बिराग, तहँ तृष्णा-तरंग बढ़ावई ॥ ८ ॥
 कहि को सकै महा भव तेरे । जन्म एक के कछुक गनेरे ।
 खानि चारि संतत अवगाही । अजहुँ तो करु विचार मन माहीं ॥
 अजहुँ विचारि विकार तजि भजु राम जनसुख-दायकं ।
 भवसिंधु दुस्तर जलरथं, भजु चक्रधर सुर-नायकं ॥
 विनु हेतु करुनाकर उदार अपार-माया-तारनं ।
 कैवल्य, पति, जगपति, रमापति, प्रानपति गतिकारनं ॥ ९ ॥
 रघुपति भक्ति सुलभ सुखकारी । सो त्रयताप-सोक-भय-हारी ।
 विनु सतसंग भगति नहिं होई । तेतब मिलै द्रवै जब सोई ॥
 जब द्रवै दीनदयालु राघव साधु-संगति पाइए ।
 जेहि दरस परस समागमादिक पापरासि नसाइए ॥
 जिन्हके मिले सुख दुख समान, अमानतादिक गुन भए ।
 मद मोह लोभ विषाद क्रोध सुबोध ते सहजहि गए ॥ १० ॥
 सेवत साधु द्वैत-भय भागे । श्रीरघुबीर-चरन लय-लागे ॥
 देहजनित विकार सब त्यागे । तब फिरि निज स्वरूप अनुरागे ॥
 अनुराग सो निज रूप जो जग ते बिलच्छन देखिए ।
 संतोष सम सीतल सदा दम देहवंत न लेखिए ॥

१३६-८-गृहपाल = कुत्ता ।

१३६-९-भव = जन्म । खानि चारि = स्वेदज, अंडज, पिंडज, जस्मज, ये चार प्रकार के जीव ।

निर्मल निरामय एकरस, तेहि हर्ष सोक न व्यापई ।
 त्रैलोक्य-पावन सो सदा जाकी दसा ऐसी भई ॥ ११ ॥
 जो तेहि पंथ चलै मन लाई । तौ हरि काहे न होहिँ सहाई ॥
 जो मारग स्तुति साधु बतावै । तेहि पथ चलत सबै सुख पावै ॥
 पावै सदा सुख हरिकृपा, संसार-आसा तजि रहै ।
 सपनेहुँ नहीं दुख देत दरसन, बात कोटिक को कहै ॥
 द्विज देव गुरु हरि संत बिनु संसार पार न पावई ।
 यह जानि तुलसीदास त्रासहरन रमापति गावई ॥ १२ ॥ १३ ॥

राग बिलावल

जोपै कृपा रघुपति कृपालु की बैर और के कहा सरै ?
 होइ न बांको बार भगत को जो कोउ कोटि उपाय करै ॥
 तकै नीच जो मीच साधु की सोइ पामर तेहि मीच मरै ।
 बेद-विदित प्रह्लाद कथा सुनि को न भगति-पथ पाउँ धरै ?
 गज उधारि हरि शप्यो विभीषन, ध्रुवअबिचल कबहुँ न टरै ।
 अंबरीष की साप सुरति करि अजहुँ महामुनि ग्लानि गरै ॥
 सो न कहा जो कियो सुजोधन अबुध आपने मान जरै ॥
 प्रभुप्रसाद सौभाग्य बिजय-जस पांडु-तनय बरिआई बरै ॥
 जो जो कूप खनैगो पर कह सो सठ फिरि तेहि कूप परै ।
 सपनेहु सुख न संतद्रोही कहँ, सुरतरु सोउ विष-फरनि फरै ॥
 हैं काके द्वै सीस ईस के जो हठि जन की सीम चरै ?
 तुलसीदास रघुवीर-बाहुबल सदा अभय काहू न डरै ॥ १३ ॥

कबहुँ सो कर-सरोज रघुनायक धरिहौ, नाथ ! सीस मेरे ।
 जेहि कर अभय किए जन आरत बारक बिबस नाम टेरे ॥
 जेहि कर-कमल कठोर संभुधनु भंजि जनक संसय मेढ्यो ।
 जेहि कर-कमल उठाइ बंधु ज्यों परम प्रीति केवट भेँट्यो ॥
 जेहि कर-कमल कृपालु गीध कहँ पिंडोदक दै धाम दियो ।

जेहि कर बालि बिदारि दास-हित कपिकुल-पति सुग्रीव कियो ॥
 आयो सरन समीत बिभीषन जेहि कर-कमल तिलक कीन्हों ।
 जेहि कर गहि सर चाप असुर हति अभयदान देवन दीन्हों ॥
 सीतल सुखद छाँह जेहि कर की मेटति पाप, ताप, माया ।
 निसि बासर तेहि कर-सरोज की चाहत तुलसिदास छाया ॥१३८॥

दीनदयालु दुरित दारिद दुख दुनी दुसह तिहुँताप तई है ।
 देव-दुआर पुकारत आरत सब की सब सुखहानि भई है ॥
 प्रभु के बचन बेद-बुध-सम्मत मम मूरति महिदेव-मई है ।
 तिन्हकी मति रिस, राग, मोह, मद, लोभ लालची लीलि लई है ॥
 राज-समाज कुसाज कोटि कटु कल्पत कलुष कुचाल नई है ।
 नीति प्रतीति प्रीति परमिति पति हेतु-वाद हठि हेरि हई है ॥
 आसम-बरन-धरम-विरहित जग लोक-बेद-मरजाद गई है ।
 प्रजा पतित पाखंड पापरत, अपने अपने रंग रई है ॥
 सांति सत्य सुभ रीति गई घटि, बढ़ी कुरीति कपट-कलई है ।
 सीदत साधु, साधुता सोचति, खल बिलसत, हुलसति खलई है ॥
 परमारथ स्वारथ-साधन भए अफल सकल, नहीं सिद्धि सई है ।
 कामधेनु-धरनी कलि-गोमर-बिबस बिकल, जामति न बई है ॥
 कलि करनी वरनिए कहाँ लौं करत फिरत बिनु टहल टई है ।
 तापर दाँत पीसि कर मीजत, को जानै चित कहा ठई है ॥
 त्यों त्यों नीच चढ़त सिर ऊपर ज्यों ज्यों सीलबस ढील दई है ।
 सरुष बरजि तरजिए तरजनी, कुम्हलै है कुम्हड़े की जई है ॥
 दीजै दादि देखि नातो बलि, मही-मोद-मंगल-रितई है ।

१३६—दुनी = दुनिया । हेतुवाद = तर्क । रई है = रँगी है, मग्न है ।
 सिद्धि सई = सिद्धि और सार । बिनु टहल टई = बिना काम का काम । ढील दई
 है = जाने देते हैं, छोड़ देते हैं, ध्यान नहीं देते हैं, रोक टोक नहीं करते हैं ।

भरे भाग अनुराग लोग कहैं राम अबध चितवनि चितई है ॥
 बिनती सुनि सानंद हेरि हँसि करुना-वारि भूमि भिजई है ।
 रामराज भयो काज सगुन सुभ, राजा राम जगत-विजई है ॥
 समरथ बड़ो सुजान सुसाहिब सुकृत-सेन हारत जितई है ।
 सुजन सुभाव सराहत सादर अनायास साँसति बितई है ॥
 उथपे-थपन, उजार-वसावन, गई-वहोर बिरद सदई है ।
 तुलसी प्रभु आरत-आरतिहर अभय-बाँह केहि केहि न दई है ? ॥१३८॥

ते नर नरकरूप जीवत जग भव-भंजन-पद बिमुख अभागी ।
 निसि वासर रुचि पाप, असुचि मन, खल मति-मलिन निगमपथ-त्यागी ।
 नहिं सतसंग भजन नहिं हरि को सवन न राम-कथा अनुरागी ।
 सुत-बित-दार-भवन-ममता-निसि सोवत अति, न कबहुँ मति जागी ।
 तुलसिदास हरि-नाम-सुधा तजि सठ हठि पियत-बिषय-बिष मांगी ।
 सुकर खान सृगाल सरिस जन जनमत जगत जननि-दुख लागी ॥१४०॥

रामचंद्र रघुनायक ! तुम सेां हैं बिनती केहि भाँति करौं ?
 अब अनेक अवलोकि आपने अनघ नाम अनुमानि डरौं ॥
 परदुख दुखी, सुखी परसुख तें संतसील नहिं हृदय धरौं ।
 देखि आन की बिपति परम सुख, सुनि संपति बिनु आगि जरौं ॥
 भक्ति, विराग, ज्ञान साधन कहि बहु बिधि डहँकत लोग फिरौं ।
 सिव-सर्वस सुखधाम नाम तव बैचि नरकप्रद उदर भरौं ॥
 जानत हूँ निज पाप-जलधि जिय जल-सीकर सम सुनत लरौं ।
 रज सम पर अबगुन सुमेरु करि गुन-गिरि सम रज ते निदरौं ॥
 नाना बेष बनाइ दिवस निसि परबित जेहि तेहि जुगुति हरौं ।
 एकौ पल न कवहुँ अलोल-चित हित दै पद-सरोज सुमिरौं ॥

१३९—जई = फल का अंकुर । नातो बलि = बलि से आपने पृथ्वी दान में ली है, इससे उसकी देखभाल रखनी चाहिए । रितई = खाली की हुई, रहित की हुई । अबध = अबाध्य । सदई = सदैव ।

जो आचरन बिचारहु मेरो कलप कोटि लागि अवटि मरौं ।

तुलसिदास प्रभु-कृपा-बिलोकनि गोपद ज्यों भवसिंधु तरौं ॥ १४१ ॥

सकुचत हैं अति, राम कृपानिधि ! क्यों करि विनय सुनावैं ?

सकल धर्म बिपरीत करत, केहि भाँति नाथ मन भावैं ?

जानत हूँ हरि रूप चराचर मैं हठि नयन न लावैं ।

अंजन-केस-सिखा जुवती तहँ लोचन-सल्लभ पठावैं ॥

खवनन को फल कथा तिहारी यह समुझौं समुझावैं ।

तिन्ह खवनन परदोष निरंतर सुनि सुनि भरि भरि तावैं ॥

जेहि रसना गुन गाइ तिहारे बिनु प्रयास सुख पावैं ।

तेहि मुख पर-अपवाद भेक ज्यों रटि रटि जनम नसावैं ॥

‘करहु हृदय अति बिमल बसहिं हरि’ कहि कहि सबहि सिखावैं ।

हैं निज उर अभिमान-मोह-मद-खलमंडली बसावैं ॥

जो तनु धरि हरिपद साधहिं जन सो बिनु काज गवावैं ।

हाटक घट भरि धर्यौ सुधा गृह तजि नभ कूप खनावैं ॥

मन क्रम बचन लाइ कीन्हें अथ ते करि जतन दुरावैं ।

पर-प्रेरित इरषा-बस कबहुँक कियो कछु सुभ, सो जनावैं ॥

बिप्रद्रोह जुनु बाँट पर्यो, हठि सब सों बैर बढ़ावैं ।

ताहू पर निज मति-बिलास सब संतन माँझ गनावैं ॥

निगम, सेष, सादर निहोरि जो अपने दोष कहावैं ।

तौ न सिराहिं कल्पसत लागि, प्रभु, कहा एक मुख गावैं ? ॥

जो करनी आपनी बिचारैं तौ कि सरन हैं आवैं ?

मृदुल सुभाव सील रघुपति को, सो बल मनहिं दिखावैं ॥

१४१—अवटि = भरम कर, चक्कर खाकर ।

१४२—अंजन-केस = दीपक । तावैं = मूँदता हूँ, बंद करके यत्न से रखता हूँ । बाँट पर्यो = मेरे हिस्से में आया है । मति-बिलास = मन की मौज से ।

तुलसिदास प्रभु सो गुन नहिं जेहि सपनेहु तुमहिं रिभावैं ।
नाथकृपा भवसिंधु धेनुपद सम जिय जानि सिरावैं ॥ १४२ ॥

सुनहु राम रघुबीर गुसाई ! मन अनीति-रत मेरो ।
चरन-सरोज बिसारि तिहारे निसि दिन फिरत अनेरो ॥
मानत नाहिं-निगम-अनुसासन, त्रास न काहू केरो ।
भूल्यो सूल कर्म-कोलहुन तिल ज्यों बहु बारनि पेरो ॥
जहँ सतसंग कथा माधव की सपनेहु करत न फेरो ।
लोभ-मोह-मद-काम-क्रोधरत तिन सों प्रेम घनेरो ॥
पर-गुन सुनत दाह, पर-दूषन सुनत हर्ष बहुतेरो ।
आप पाप को नगर बसावत, सहि न सकत पर खेरो ॥
साधन-फल, स्तुति-सार नाम तव, भव-सरिता कहँ बेरो ।
सो पर कर काँकिनी लागि सठ बेंचि होत हठि चेरो ॥
कबहुँक हैं संगति-प्रभाव ते जाउँ सुमारग नेरो ।
तव करि क्रोध संग कुमनोरथ देत कठिन भट-भेरो ॥
इक हैं दीन मलीन हीनमति बिपति-जाल अति घेरो ।
तापर सहि न जात करुनानिधि मन को दुसह दरेरो ॥
हारि परयो करि जतन बहुत बिधि, तातेँ कहत सबेरो ।
तुलसिदास यह त्रास मिटै जब हृदय करहु तुम डेरो ॥ १४३ ॥

सो धौँ को जो नाम-लाज तें नहीं राख्यो रघुबीर ?
कारुणीक बिनु कारन ही हरि, हरौ सकल भवभीर ॥
बेद-बिदित जग-बिदित अजामिल बिप्रबंधु अध-धाम ।
घोर जमालय जात निवारयो सुत-हित सुमिरत नाम ॥

१४३—अनेरो = व्यर्थ । खेरो = खेड़ा, गाँव । काँकिनी = कौड़ी ।

१४४—बिप्रबंधु = नीच ब्राह्मण ।

पसु पाँवर अभिमान-सिंधु गज प्रस्थो आइ जब ग्राह ।
 सुमिरत सकृत् सपदि आए प्रभु हरयो दुसह उर-दाह ॥
 ब्याध, निषाद, गीध, गनिकादिक अगनित अवगुन-मूल ।
 नाम-ओट तेँ राम सबनि की दूरि करी सब सूल ॥
 केहि आचरन घाटि हैं तिन्ह तेँ, रघुकुलभूषन भूप !
 सीदत तुलसिदास निसि बासर परयो भीम तमकूप ॥१४४॥

कृपासिंधु ! जन दीन दुवारे दादि न पावत काहे ?
 जब जहँ तुमहिं पुकारत आरत तब तिन्हके दुख दाहे ॥
 गज, प्रह्लाद, पांडुसुत, कपि सब के रिपु-संकट मेढ्यो ।
 प्रनत बंधुभय-बिकल बिभीषन उठि सो भरत ज्यों भेट्यो ॥
 मैं तुम्हरो लै नाम ग्राम इक उर आपने बसावौं ।
 भजन, विवेक, विराग लोग भले करम करम करि ल्यावौं ॥
 सुनि रिस भरे कुटिल कामादिक करहिं जोर बरिआई ।
 तिन्हहिं उजारि नारि अरि धन पुर राखहिं राम गुसाई ॥
 सम सेवा छल दान दंड हैं रचि उपाय पचि हारयो ।
 बिनु कारन के कलह बड़ो दुख, प्रभु सों प्रगटि पुकारयो ॥
 सुर स्वारथी, अनीस, अलायक, निठुर, दया चित नाहीं ।
 जाउँ कहाँ, को विपति-निवारक भव-तारक जग माहीं ? ॥
 तुलसी जदपि पोच तउ तुम्हरो, और न काहू केरो ।
 दीजै भगति बाँह बैरक ज्यों, सुबस बसै अब खेरो ॥१४५॥

हैं सब विधि राम रावरो चाहत भयो चेरो ।
 ठौर ठौर साहिबी होति है ख्याल कालकलि केरो ॥
 काल कर्म इंद्रिय-विषय गाहकगन घेरो ।

१४५—करम करम करि = क्रम क्रम से, धीरे धीरे । अनीस = अच्छे
 स्वामी नहीं । अलायक = [हिं० अ + फा० लायक] अयोग्य । बैरक = (अरबी)
 झंडा, पताका ।

हैं न कबूलत बाँधि कै मोल करत करेरो ॥
 बंदि-छोर तेरो नाम है, बिरुदैत बड़ेरो ।
 मैं कह्यो तब छल-प्रीति कै माँगै उर डेरो ॥
 नाम-ओट अब लगि बच्यो मलजुग जग जेरो ।
 अब गरीब जन पोषिए, पायबो न हेरो ॥
 जेहि कौतुक बक खान को प्रभु न्याव निबेरो ।
 तेहि कौतुक कहिए कृपालु तुलसी है मेरो ॥ १४६ ॥

कृपासिंधु ताते रहैं निसि दिन मन मारे ।
 महाराज लाज आपुही निज जाँघ उधारे ॥
 मिले रहैं, मार्यो चहैं कामादि सँघाती ।
 मो बिनु रहैं न, मेरियै जारैं छल छाती ॥
 बसत हिये हित जानि मैं सबकी रुचि पाली ।
 कियो कथिक को दंड हौं जड़ कर्म कुचाली ॥
 देखी सुनी न आजु लौं अपनायत ऐसी ।
 करहिं सबै, सिर मेरेही फिरि परै अनैसी ॥
 बड़े अलेखी लखि परैं, परिहरे न जाहीं ।
 असमंजस में मगन हौं, लीजै गहि बाहीं ॥
 बारक बलि अवलोकिए कौतुक जन जी को ।
 अनायास मिटि जाइगो संकट तुलसी को ॥ १४७ ॥
 कहैं कौन मुँह लाइ कै, रघुबीर गुसाई !
 सकुचत समुझत आपनी सब, साईं दोहाई !
 सेवत बस, सुमिरत सखा, सरनागत सो हौं ।

१४६—मलजुग = कलियुग । जेरो = जेर किया है; वशीभूत किया है, जीत लिया है ।

१४७—अलेखी = बेदब, अन्यायी ।

गुनगन सीतानाथ के चित करत न हैं हैं ॥
 कृपासिंधु बंधु दीन के आरत-हितकारी ।
 प्रनतपाल बिरुदावली सुनि जानि बिसारी ॥
 सेइ न धेइ न सुमिरि कै पदप्रीति सुधारी ।
 पाइ सुसाहिब राम सो भरि पेट बिगारी ॥
 नाथ गरीबनिवाज हैं, मैं गहो न गरीबी ।
 तुलसी प्रभु निज और ते बनि परै सो कीबी ॥ १४८ ॥

कहाँ जाऊँ, कासों कहाँ और ठौर न मेरो ?

जनम गँवायो तेरेहि द्वार, मैं किंकर तेरो ॥
 मैं तो बिगारी नाथ सो आरति के लीन्हें ।
 तोहि कृपानिधि क्यों वनै मेरी सी कीन्हें ?
 दिन दुरदिन, दिन दुरदसा, दिन दुख, दिन दूषन ।
 जब लौं तू न बिलोकिहै रघुवंस-बिभूषन ॥
 दर्ई पीठ बिनु डीठ मैं, तुम बिस्व-बिलोचन ।
 तोसों तुही न दूसरो नत-सोच-बिमोचन ॥
 पराधीन देव, दीन हैं, स्वाधीन गुसाई ।
 बोलनिहारे सों करै, बलि, विनय कि भाई ॥
 आपु देखि मोहि देखिये जन मानिय सांचो ।
 बड़ी ओट राम नाम की जेहि लई सो बाँचो ॥
 रहनि रीति राम रावरी नित हिय हुलसी है ।
 ज्यों भावै त्यों करु कृपा तेरो तुलसी है ॥ १४९ ॥

रामभद्र मोहि आपनो सोच है अरु नाहीं ।

जीव सकल संताप के भाजन जग माहीं ॥

१४८—आपनी = अपनी कानी । धेइ = ध्याइ, ध्यान करके ।

१४९—बोलनिहारा = बोलता शुद्ध आत्मा, चैतन्य । भाई = प्रतिबिम्ब स्वरूप जीव ।

नातो बड़े समर्थ सों एक ओर किधौं हूँ ।
 तोको मोसे अति घने, मोकों एकै तू ॥
 बड़ी गलानि हिय हानि है, सर्वज्ञ गुसाई ?
 कूर कुसेवक कहत हैं सेवक की नाई ॥
 भलो पोच राम को कहै मोहि सब नर नारी ।
 बिगरे सेवक खान ज्यों साहिब-सिर गारी ॥
 असमंजस मन को मिटै, सो उपाय न सूझै ।
 दीनबंधु कीजै सोई वनि परै जो बूझै ॥
 बिरुदावली बिलोकिए तिन्ह में कोउ हैं हैं ।
 तुलसी प्रभु को परिहरयो सरनागत सो हैं ॥१५० ॥

जो पै चेराई राम की करतो न लजातो ।
 तौ तू दाम कुदाम ज्यों कर कर न बिकातो ॥
 जपत जीह रघुनाथ को नाम नहिं अलसातो ।
 वाजीगर के सुम ज्यों, खल ! खेह न खातो ॥
 जौ तू मन मेरे कहे राम-नाम कमातो ।
 सीतापति-सनमुख सुखी सब ठाँव समातो ॥
 राम सोहाते तोहिं जौ तू सबहिं सोहातो ।
 काल करम कुल कारनी कोऊ न कोहातो ॥
 राम-नाम-अनुराग ही जिय जो रतिआतो ।
 स्वारथ-परमारथ-पथी तोहिं सब पतिआतो ॥
 सेइ साधु, सुनि समुझि कै पर-पीर पिरातो ।
 जनम कोटि को कँदौलो हृद-हृदय थिरातो ॥
 भव-भग अगम अनंत है बिनु समहि सिरातो ।
 महिमा उलटे नाम की मुनि कियो किरातो ॥

१११—कुल कारनी = सब के कारण । रतिआतो = प्रीति करता । हृद =
 ताल । कँदौलो = कीचड़वाला । जाय = व्यर्थ ।

अमर अगम तनु पाइ सो जड़ जाय न जातो ।
 होतो मंगलमूल तू, अनुकूल बिधातो ॥
 जो मन प्रीति प्रतीति सों राम नामहि रातो ।
 तुलसी रामप्रसाद सों तिहुँताप न तातो ॥ १५१ ॥

राम भलाई आपनी भल कियो न काको ?

जुग जुग जानकि-नाथ को जग जागत साको ॥
 ब्रह्मादिक बिनती करी कहि दुख बसुधा को ।
 रविकुल-कैरव-चंद भो आनंद-सुधा को ॥
 कौसिक गरत तुषार ज्यों तकि तेज तिया को ।
 प्रभु अनहित-हित को दियो फल कोप-कृपा को ॥
 हरयो पाप आप जाइकै संताप सिला को ।
 सोच-मगन काढ्यो सही साहिव मिथिला को ॥
 रोषरासि भृगुपति धनी अहमिति ममता को ।
 चितवत भाजन करि लियो उपसम समता को ॥
 मुदित मानि आयसु चले बन मातु पिता को ।
 धरम-धुरंधर धीरधुर गुन-सील जिता को ?
 गुह गरीब गत-ज्ञाति हूं जेहि जिउ न भखा को ॥
 पायो पावन प्रेम ते सनमान सखा को ?
 सदगति सबरी गिद्ध की सादर करता को ।
 सोच-सींव सुग्रीव के संकट-हरता को ॥
 राखि विभीषन को सकै अस काल-गहा को ।
 आज बिराजत राज है दसकंठ जहाँ को ॥
 बालिस बासी अवध को बूझिए न खाको ।
 सो पाँवर पहुँचो तहाँ जहँ मुनि मन थाको ॥

१५२—जागत साको = साका जगता है, कीर्ति चली जाती है । तिया =
 ताड़का । काल-गहा = कालग्रस्त ।

गति न लहै रामनाम सों बिधि सो सिरजा को ?
 सुमिरत कहत प्रचारि कै बल्लभ गिरिजा को ॥
 अकनि अजामिल की कथा सानंद न भा को ?
 नाम लेत कलिकाल हूं हरिपुरहिं न गा को ?
 रामनाम-महिमा करै काम-भूरुह आको ।
 साखी बेद पुरान है तुलसी तन ताको ॥ १५२ ॥

मेरे रावरिये गति है रघुपति बलि जाउँ ।
 निलज, नीच, निरधन, निरगुन कहँ जग दूसरो न ठाकुर ठाउँ ॥
 हैं घर घर बहु भरे सुसाहिब, सूझत सबनि आपनो दाउँ ।
 वानर-बंधु, बिभीषन-हित बिनु कोसलपाल कहूँ न समाउँ ॥
 प्रनतारति-भंजन जनरंजन सरनागत पवि-पंजर नाउँ ।
 कीजै दास दास तुलसी अब कृपासिंधु बिनु मोल बिकाउँ ॥ १५३ ॥

देव ! दूसरो कौन दीन को दयालु ?
 सील-निधान, सुजान-सिरोमनि, सरनागत-प्रिय, प्रनत-पालु ॥
 को समर्थ सबज्ञ सकल प्रभु सिब-सनेह-मानस-मरालु ?
 को साहिब किए मीत-प्रीति बस खग निसिचर कपि भील भालु ?
 नाथ-हाथ माया-प्रपंच सब जीव दोष गुन करम कालु ।
 तुलसिदास भलो पाच रावरो, नेकु निरखि कीजै निहालु ॥ १५४ ॥

राग सारंग

बिस्वास एक राम नाम को ।

मानत नहिं परतीति अनत ऐसोइ सुभाव मन बाम को ॥
 पढ़िबो परयो न छठी छ मत, ऋगु, जजुर, अथर्वन, साम को ।
 व्रत तीरथ, तप सुनि सहमत, पचि मरै करै तन छाम को ?

१५२-गलिस = मूर्ख । कामभूरुह = कल्पवृक्ष । आको = आक या मदार भी ।

१५३-पवि-पंजर = रक्षा के लिए वज्र का पिँजरा ।

करमजाल कलिकाल कठिन आधीन सुसाधित दाम को ।
ज्ञान, विराग, जोग, जप, तप, भय, लोभ, मोह, कोह, काम को ॥
सब दिन सब लायक भयो गायक रघुनायक-गुन-ग्राम को ।
बैठे नाम-कामतरु तर डर कौन घोर घन धाम को ?
को जानै को जैहै जमपुर को सुरपुर परधाम को ।
तुलसिहि बहुत भलो लागत जग जीवन रामगुलाम को ॥१५५॥

कलि नाम कामतरु राम को ।

दलनिहार दारिद दुकाल दुख दोष घोर घन धाम को ।
नाम लेत दाहिनों होत मन बाम बिधाता बाम को ।
कहत मुनीस महेस महातम उलटे सूधे नाम को ।
भलो लोक परलोक तासु जाके बल ललित-ललाम को ।
तुलसी जग जानियत नाम ते सोच न कूच मुकाम को ॥१५६॥

सेइए सुसाहिब राम सो ।

सुखद, सुसील, सुजान, सुर, सुचि, सुदर कोटिक काम सो ॥
सारद, सेस, साधु महिमा कहैं, गुनगन-गायक साम सो ।
सुमिरि सप्रेम नाम जासैं रति चाहत चंद्र-ललाम सो ॥
गमन विदेस न लेस कलेस को सकुचत सकृत प्रनाम सो ।
साखी ताको बिदित विभीषन बैठो है अविचल धाम सो ॥
टहल सहज जन महल महल जागत चारो जुग जाम सो ।
देखत दोष न खीभत रीभत सुनि सेवक गुनग्राम सो ॥
जाके भजे तिलोक-तिलक भए त्रिजग-जोनि तनु तामसो ।
तुलसी ऐसे प्रभुहि भजै जो न, ताहि बिधाता बाम सो ॥१५७॥

१५५—छठी न पर्यो = भाग्य में न लिखा गया । मत = शास्त्र ।
दाम = धन ।

१५६—ललित ललाम = सुंदर राम नाम ।

१५७—तनु तामसो = तामस शरीरवाले (राक्षस) भी ।

कैसे देऊँ नाथहिं खोरि ?

काम-लोलुप भ्रमत मन हरि-भगति परिहरि तोरि ॥
 बहुत प्रीति पुजाइबे पर, पूजिबे पर शोरि ।
 देत सिख, सिखयो न मानत, मूढ़ता असि मोरि ॥
 किये सहित सनेह जे अघ हृदय राखे चोरि ।
 संग बस किये सुभ सुनाए सकल लोक निहोरि ॥
 करौं जो कछु धरौं सचि पचि सुकृत-सिला बटोरि ।
 पैठि उर बरबस दयानिधि दंभ लेत अँजोरि ॥
 लोभ मनहिं नचाव कपि ज्यों गरे आसा-डोरि ।
 बात कहैं बनाइ बुध ज्यों बर बिराग निचोरि ॥
 एतेहुँ पर तुम्हरो कहावत लाज अँचई घोरि ।
 निलजता पर रीफि रघुबर देहु तुलसिहिं छोरि ॥१५८॥

है प्रभु मेरोई सब दोसु ।

सीलसिंधु, कृपालु, नाथ, अनाथ-आरत पोसु ॥
 बेष, बचन, बिराग, मन, अघ, अवगुननि को कोसु ।
 राम-प्रीति-प्रतीति पोली, कपट करतब ठोसु ॥
 राग रंग कुसंग ही सों, साधु-संगति रोसु ।
 चहत केहरि-जसहिं सेइ सृगाल ज्यों खरगोसु ॥
 संभु-सिखवन रसन हूँ नित रामनामहिं घोसु ।
 दंभ हूँ कलि नाम-कुंभज सोच-सागर-सोसु ॥
 मोद-मंगल-मूल अति अनुकूल निज निरजोसु ।
 रामनाम-प्रभाव सुनि तुलसिहुँ परम संतोसु ॥१५९॥

१५८—अँजोरि लेत = खोज लेता है ।

१५९—निरजोसु = निरचय ।

मैं हरि पतित पावन सुने ।

मैं पतित, तुम पतितपावन, दोउ बानक बने ॥

व्याध, गनिका, गज, अजामिल साखि निगमनि भने ।

और अधम अनेक तारे, जात कापै गने ?

जानि नाम अजानि लीन्हें नरक जमपुर मने ।

दास तुलसी सरन आयो राखिए आपने ॥१६०॥

राग मलार

तोसों प्रभु जो पै कहूँ कोउ हेतो ।

तौ सहि निपट निरादर निसि दिन रटि लट ऐसो घटि को तो ॥

कृपासुधा जलदान माँगिबो कहैं सो साँच निसेतो ।

खाति-सनेह-सलिल-सुख चाहत चित-चातक को पेतो ॥

काल करम बस मन कुमनोरथ कबहुँ कबहुँ कछु भो तो ।

ज्यों मुदमय बसि मीन बारि तजि उछरि भभरि लेत गोतो ॥

जितो दुराउ दास तुलसी उर क्यों कहि आवत ओतो ।

तेरें राज राय दसरथ के लयो बयो बिनु जोतो ॥१६१॥

राग सौरठ

ऐसो को उदार जग माहीं ?

बिनु सेवा जो द्रवै दीन पर राम सरिस कोउ नाहीं ॥

जो गति जोग बिराग जतन करि नहिं पावत मुनि ज्ञानी ।

सो गति देत गीध सबरी कहँ प्रभु न बहुत जिय जानी ॥

जो संपति दससीस अरपि करि रावन सिव पहुँ लीन्हैं ।

सो संपदा बिभीषन कहँ अति सकुच सहित हरि दीन्हैं ॥

तुलसिदास सब भाँति सकल सुख जो चाहसि मन मेरो ।

तौ भजु राम, काज सब पूरन करै कृपानिधि तेरो ॥१६२॥

१६०—मने = वज्रित हुआ, ले जाना मना किया गया ।

१६१—को तो = कौन था ? निसेतो = खरा । पेतो = बचा ।

एकै दानि-सिरोमनि साँचे ।

जोइ जाच्यो सोइ जाचकता-यस फिरि बहु नाच न नाच्यो ॥
सब स्वारथी असुर, सुर, नर, मुनि; कोउ न देत बिनु पाए ।
कोसलपाल कृपालु कलपतरु द्रवत सकृत् सिर नाए ॥
हरिहु और अवतार आपने राखी बेद-बड़ाई ।
लै चिउरा निधि दई सुदामहिं जद्यपि बाल-मिताई ॥
कपि, सबरी, सुग्रीव, विभीषन को नहिं कियो अजाँची ।
अब तुलसिहि दुख देति दयानिधि ! दारुन आस-पिसाची ॥१६३॥

जानत प्रीति रीति रघुराई ।

नाते सब हाते करि राखत राम-सनेह-सगाई ॥
नेह निबाहि देह तजि दसरथ कीरति अचल चलाई ।
ऐसेहुँ पितु ते अधिक गीध पर ममता गुन गरुआई ॥
तिय-बिरही सुग्रीव सखा लखि प्रानप्रिया विसराई ।
रन परयो बंधु विभीषन ही को सोच हृदय अधिकाई ॥
घर गुरुगृह प्रियसदन सासुरे भइ जब जहँ पहुनाई ।
तब तहँ कहि सबरी के फलनि की रुचि माधुरी न पाई ॥
सहज सरूप कथा मुनि बरनत रहत सकुचि सिर नाई ।
केवट-मीत कहे सुख मानत, बानर बंधु-बड़ाई ॥
प्रेम-कनौड़ो राम सो प्रभु त्रिभुवन तिहुँ काल न भाई ।
तेरो रिनी कह्यो हैं कपीस सों, ऐसी मानिहि को सेवकाई ॥
तुलसी राम सनेह सील लखि जो न भगति डर आई ।
तौ तोहिं जनमि जाय जननी जड़ तनु-तरुनता गँवाई ॥१६४॥
रघुवर ! रावरि यहै बड़ाई ।

निदरि गनी आदर गरीब पर करत कृपा अधिकाई ॥

१६४-हाते करि राखत = अलग रखते हैं, दूर करते हैं । जनमि = जनमा
कर, जन कर ।

थके देव साधन करि सब, सपनेहुँ नहिं देत दिखाई ।
 केवट कुटिल भालु कपि कौनप कियो सकल सँग भाई ॥
 मिलि मुनिवृंद फिरत दंडकवन, सो चरचौ न चलाई ।
 वारहि बार गोध सवरी की वरनत प्रीति सुहाई ॥
 खान कहे तेँ कियो पुर बाहिर जती गयंद चढ़ाई ।
 तिय-निंदक मतिमंद प्रजा रज निज नय नगर बसाई ॥
 यहि दरवार दीन को आदर, रीति सदा चलि आई ।
 दीनदयालु दीन तुलसी की काहु न सुरति कराई ॥ १६५ ॥

ऐसे राम दीनहितकारी ।

अति कोमल करुनानिधान बिनु कारन पर-उपकारी ॥
 साधनहीन दीन निज अघबस सिला भई मुनि-नारी ।
 गृह तेँ गवनि पंरसि पद पावन घोर साप तेँ तारी ॥
 हिंसारत निषाद तामस वपु पसु समान वनचारी ।
 भेंट्यो हृदय लगाइ प्रेमबस नहिं कुल जाति विचारी ॥
 जद्यपि द्रोह कियो सुरपति-सुत कहि न जाइ अति भारी ।
 सकल लोक अवलोकि सोक-हत सरन गए भय टारी ॥
 बिहँगजोनि आमिष अहार-पर, गोध कौन व्रतधारी ।
 जनक समान क्रिया ताकी निज कर सब भाँति सँवारी ॥
 अधम जाति सबरी जोषित जड़ लोक बेद तेँ न्यारी ।
 जानि प्रीति दै दरस कृपानिधि सोड रघुनाथ उधारी ॥
 कपि सुग्रीव बंधुभय-व्याकुल आयो सरन पुकारी ।
 सहि न सके दारुन दुख जन के हत्यो बालि सहि गारी ॥
 रिपु को अनुज बिभीषन निसिचर कौन भजन अधिकारी ।
 सरन गए आगे है लीन्हों भेंट्यो भुजा पसारी ॥
 असुभ होइ जिनके सुमिरे तेँ बानर रीछ विकारी ।

बेदविदित पावन किए ते सब, महिमा नाथ तुम्हारी ॥
 कहँ लगि कहैं दीन अगनित जिन्हकी तुम बिपति निवारी ।
 कलिमल-असित दास तुलसी पर काहे कृपा बिसारी ॥ १६६ ॥

रघुपति ! भक्ति करत कठिनाई ।

कहत सुगम, करनी अपार, जानै सोइ जेहि बनि आई ॥
 जौ जेहि कला कुसल ता कहँ सोइ सुलभ सदा सुखकारी ।
 सफरी सनमुख जल प्रवाह, सुरसरी बहै गज भारी ॥
 ज्यों सर्करा मिलै सिकता महुँ बल तेँ न कोउ बिलगावै ।
 अति रसज्ञ सूच्छम पिपीलिका बिनु प्रयास ही पावै ॥
 सकल दृश्य निज उदर मेलि सोवै निद्रा तजि जोगी ।
 सोइ हरिपद अनुभवै परम सुख अतिसय द्वैत-वियोगी ॥
 सोक, मोह, भय, हरष, दिवस निसि, देस काल तहुँ नाहीं ।
 तुलसिदास यहि दसाहीन संसय निर्मूल न जाहीं ॥ १६७ ॥

जौ पै रामचरन रति होती ।

तौ कत त्रिविध मूल निसि बासर सहते बिपति निसोती ॥
 जौ संतोष सुधा निसि बासर सपनेहुँ कबहुँक पावै ।
 तौ कत विषय विलोकि भूँठ जल मन कुरंग ज्यों धावै ॥
 जौ श्रीपति-महिमा बिचारि उर भजते भाव बढ़ाए ।
 तौ कत द्वार द्वार कूकर ज्यों फिरते पेट खलाए ॥
 जे लोलुप भए दास आस के ते सबही के चरे ।
 प्रभु-बिश्वास आस जीती जिन्ह ते सेवक हरि करे ॥
 नहिँ एकौ आचरन भजन को बिनय करत हैं ताते ।
 कीजै कृपा दासतुलसी पर, नाथ ! नाम के नाते ॥ १६८ ॥

१६७—यहि दसा-हीन = इस दशा को प्राप्त हुए बिना ।

१६८—निसोती = शुद्ध, खालिस ।

जो मोहिं राम लागते सीठे ।

तौ नवरस, षटरस-रस अनरस हैं जाते सब सीठे ॥
 वंचक विषय विविध तनु धरि अनुभवे सुने अरु डीठे ।
 यह जानत हैं हृदय आपने सपने न अघाइ उबीठे ॥
 तुलसिदास प्रभु सों एकहि बल बचन कहत अति डीठे ।
 नाम की लाज राम करुनाकर केहि न दिये करि चीठे ॥१६६॥

यों मन कबहूँ तुमहि न लाग्यो ।

ज्यों छल छाँड़ि सुभाव निरंतर रहत विषय अनुराग्यो ॥
 ज्यों चितई परनारि, सुने पातक-प्रपंच घर घर के ।
 त्यों न साधु, सुरसरि-तरंग-निर्मल गुनगन रघुबर के ॥
 ज्यों नासा सुगंधरस-वस, रसना षटरस-रति मानी ।
 रामप्रसाद-माल, जूँठनि लगि त्यों न ललकि ललचानी ॥
 चंदन चंद्रबदनि भूषन पट ज्यों चह पाँवर परस्यो ।
 त्यों रघुपति-पद-पदुम परस को तनु पातकी न तरस्यो ॥
 ज्यों सब भाँति कुदेव कुठाकुर सेए वपु वचन हिये हूँ ।
 त्यों न राम सुकृतज्ञ जे सकुचत सकृत प्रनाम किए हूँ ॥
 चंचल चरन लोभ लगि लोलुप द्वार द्वार जग वागे ।
 रामसीय-आस्रमनि चलत त्यों भए न श्रमित अभागे ॥
 सकल अंग पद-विमुख नाथ मुख नाम की ओट लई है ।
 है तुलसिहि परतीति एक प्रभु-मूरति कृपामई है ॥१७०॥

कीजै मोको जमजातनामई ।

राम तुम से सुचि सुहृद साहिबहिं मैं सठ पीठि दई ॥
 गरभबास दस मास पालि पितुमातुरूप हित कीन्हों ।
 जड़हिं बिबेक, सुसील खलहिं, अपराधिहिं आदर दीन्हों ॥

कपट करौ अंतरजामिहुँ सों, अघ व्यापकहिँ दुरावौं ।
 ऐसेहु कुमति कुसेवक पर रघुपति न कियो मन बावै ॥
 उदर भरौं किंकर कहाइ, बेच्यो विषयनि हाथ हियो है ।
 मोसे बंचक को कृपालु छल छाँड़ि कै छोह कियो है ॥
 पल पल के उपकार रावरे जानि बूझि सुनि नीके ।
 भिद्यो न कुलिसहु तेँ कठोर चित कबहुँ प्रेम सिय-पीके ॥
 स्वामी की सेवक-हितता सब, कछु निज साँइ-द्रोहाई ।
 मैं मति-तुला तौलि देखी भइ मेरिहि दिसि गरुआई ॥
 एतेहु पर हित करत नाथ मेरो, करि आयो अरु करिहैं ।
 तुलसी अपनी ओर जानियत प्रभुहि कनौड़ो भरिहैं ॥१७१॥

कबहुँक हौं यहि रहनि रहैंगो ।

श्रीरघुनाथ-कृपालु-कृपा ते संत सुभाव गहैंगो ॥
 यथालाभ संतोष सदा काहुँ सों कछु न चहैंगो ।
 परहित-निरत निरंतर मन क्रम बचन नेम निबहैंगो ॥
 परुषबचन अतिदुसह सवन सुनि तेहि पावक न दहैंगो ।
 बिगत मान, सम सीतल मन, पर-गुन, नहिँ दोष कहैंगो ॥
 परिहरि देहजनित चिंता, दुख सुख समबुद्धि सहैंगो ।
 तुलसिदास प्रभु यहि पथ रहि अबिचल हरिभक्ति लहैंगो ॥१७२॥

नाहिंन आवत आन भरोसो ।

यहि कलिकाल सकल साधनतरु है सम-फलनि फरो सो ॥
 तप, तीरथ, उपवास, दान, मख जेहि जो रुचै करो सो ।
 पापहि पै जानिबो करम-फल, भरि भरि बेद परोसो ॥
 आगम-विधि, जप, जाग करत नर सरत न काज खरो सो ।
 मुख सपनेहु न जोग-सिधि-साधन, रोग बियोग धरो सो ॥

काम, क्रोध, मद, लोभ मोह मिलि ज्ञान विराग हरो सो ।
 बिगरेत मन संन्यास लेत जल नावत आम धरो सो ॥
 बहु मत सुनि बहु पंथ पुराननि जहाँ तहाँ भगरो सो ।
 गुरु कह्यो रामभजन नीको मोहिं लगत राज-डगरो सो ॥
 तुलसी बिनु परतीति प्रीति फिरि फिरि पचि मरै मरो सो ।
 रामनाम बोहित भवसागर, चाहै तरन तरो सो ॥१७३॥

जाके प्रिय न राम बैदेही ।

सो छाँड़ि ए कोटि बैरी सम जद्यपि परम सनेहो ॥
 तज्यो पिता प्रह्लाद, बिभीषन बंधु, भरत महतारी ।
 बलि गुरु तज्यो, कंत ब्रज-बनितनि, भए मुदमंगलकारी ॥
 नाते नेह राम के मनियत सुहृद सुसेव्य जहाँ लौं ।
 अंजन कहा आँखि जेहि फूटै बहुतक कहौं कहाँ लौं ॥
 तुलसी सो सब भाँति परम हित पुँजी प्राण ते प्यारो ।
 जासों होय सनेह रामपद; एतो मतो हमोरा ॥ १७४ ॥

जो पै रहनि राम सों नाहीं ।

तौ नर खर कूकर सूकर से जाय जियत जग माहीं ॥
 काम, क्रोध, मद, लोभ, नींद, भय, भूख, प्यास सबही के ।
 मनुज देह सुर साधु सराहत सो सनेह सिय-पी के ॥
 सूर, सुजान, सपूत सुलच्छन गनियत गुन गरुआई ।
 बिनु हरिभजन ईनारुन के फल, तजत नहीं करुआई ॥
 कीरति, कुल, करतूति, भूति भलि, सील, सरूप सलोने ।
 तुलसी प्रभु-अनुराग-रहित जस सालन साग अलोने ॥१७५॥

राख्यो राम सुखामी सों नीच नेह न नातो ।

एते अनादर हूँ तोहि तेँ न हातो ॥
 जोरे नए नाते नेह फोकट फीके ।
 देह के दाहक, गाहक जी के ॥
 अपने अपने को सब चाहत नीको ।
 मूल दुहूँ को दयालु दूलह सी को ॥
 जीव को जीवन, प्राण को प्यारो ।
 सुखहूँ को सुख राम सो विसारो ॥
 कियो, करैगो तोसे खल को भलो ।
 ऐसे सुसाहिब सेाँ तू कुचाल क्यों चलो ॥
 तुलसी तेरी भलाई अजहूँ बूमै ।
 राढ़उ राउत होत फिरि कै जूमै ॥१७६॥

जौ तुम त्यागो राम हौं तो नहिं त्यागों ।
 परिहरि पाँय काहि अनुरागों ॥
 सुखद सुप्रभु तुमसों जग माहीं ।
 खवन-नयन-मन-गोचर नाहीं ॥
 हौं जड़ जीव, ईस रघुराया ।
 तुम मायापति, हौं बस माया ॥
 हौं तो कुजाचक, स्वामि सुदाता ।
 हौं कुपुत, तुमहीं पितु माता ॥
 जौ पै कहूँ कोउ बूझत बातो ।
 तौ तुलसी बिनु मोल बिकातो ॥१७७॥

भए हूँ उदास राम मेरे आस रावरी ।
 आरत स्वारथी सब कहैं बात बावरी ॥
 जीवन को दानी घन कहा ताहि चाहिए ।
 प्रेम-नेम के निबाहे चातक सराहिए ॥

मीन तेँ न लाभ-लेस पानी पुन्य-पीन को ?
 जल बिनु थल कहा मीच-बिनु मीन को ?
 बड़े ही की ओट, बलि, बाँचि आए छोटे हैं ।
 चलत खरे के संग जहाँ तहाँ खोटे हैं ॥
 यहि दरबार भलो दाहिनेहु-वाम को ।
 मोको सुभदायक भरोसो रामनाम को ॥
 कहत नसानी हैहै हिये नाथ नीकी है ।
 जानत कृपानिधान तुलसी के जी की है ॥१७८॥

राग बिलावल

कहाँ जाउँ ? कासों कहाँ ? को सुनै दीन की ?
 त्रिभुवन तुही गति सब अंगहीन की ॥
 जग जगदीस घर घरनि घनेरे हैं ।
 निराधार को आधार गुनगन तेरे हैं ॥
 गजराज-काज खगराज तजि धायो को ।
 मोसे दोस-कोस पोसे, तोसे माय जायो को ॥
 मोसे कूर कायर कुपूत कौड़ी आध के ।
 किए बहुमोल तैं करैया गीधस्नाध के ॥
 तुलसी की तेरे ही बनाए, बलि, बनैगी ।
 प्रभु की बिलंब-अंब दोष दुख जनैगी ॥ १७९ ॥

बारक बिलोकि बलि कीजै मोहि आपनो ।

राय दसरथ के तू उथपन-थापनो ॥
 साहिब सरनपाल सबल न दूसरो ।
 तेरो नाम लेत ही सुखेत होत असरो ॥
 बचन करम तेरे मेरे मन गड़े हैं ।
 देखे सुने जाने मैं जहान जेते बड़े हैं ॥
 कौने कियो समाधान सनमान सीला को ?

भृगुनाथ सो ऋषी जितैया कौन लीला को ?
 मातु-पितु-बंधु-हित, लोक-वेदपाल को ?
 बोल को अचल, नत करत निहाल को ?
 संग्रही सनेहबस अधम असाधु को ?
 गीध सवरी को, कहो, करिहै सराध को ?
 निराधार को अधार, दीन को दयालु को ?
 मीत कपि केवट, रजनिचर भालु को ॥
 रंक निरगुनी नीच जितने निवाजे हैं ।
 महाराज सुजन, समाज ते बिराजे हैं ॥
 साँची बिरुदावली न बढ़ि कहि गई है ।
 सीलसिंधु ढील तुलसी की बार भई है ॥१८०॥

केहू भाँति कृपासिंधु मेरी ओर हेरिए ।
 मोको और ठौर न, सुटेक एक तेरिए ॥
 सहस सिला तेँ अति जड़ मति भई है ।
 कासों कहैं, कौने गति पाहनहिं दर्ई है ?
 पद-राग-जाग चहैं कौसिक ज्यों कियो हैं ।
 कलिमल खल देखि भारी भीति भियो हैं ॥
 करम-कपीस बालि बली त्रास त्रस्यो हैं ।
 चाहत अनाथ-नाथ तेरी बाँह बस्यो हैं ॥
 महामोह-रावन बिभीषन ज्यों हयो हैं ।
 त्राहि तुलसीस ! त्राहि तिहुँ ताप तयो हैं ॥१८१॥

नाथ-गुनगाथ सुनि होत चित चाउ सो ।
 राम रीझिबे को जानो भगति न भाउ सो ॥
 करम सुभाव काल ठाकुर न ठाँउ सो ।

सुधन न, सुतन न, सुमन सुआउ सो ॥
 जाँचों जल जाहि कहै अमिय पिआउ सो ।
 कासों कहैं काहू सों न बढ़त हिआउ सो ॥
 बाप बलि जाउँ आपु करिए उपाय सो ।
 तेरेहि निहारे परै हारेउ सुदाउ सो ॥
 तेरेहि सुभाए सूम्मे असुम्ह सुभाउ सो ।
 तेरे ही बुभाए बूम्मे अबुम्ह बुभाउ सो ॥
 नाम-अवल ब-अंबु दीन मीन-राउ सो ।
 प्रभु सों बनाइ कहैं जीह जरि जाउ सो ॥
 सब भाँति बिगरी है एक सुबनाउ सो ।
 तुलसी सुसाहिबहिं दियो है जनाउ सो ॥१८२॥

राग असावरी

राम प्रीति की रीति आप नीके जनियत है ।
 बड़े की बड़ाई, छोटे की छोटाई दूर करै
 ऐसी बिरुदावलि बलि बेद मनियत है ॥
 गीध को कियो सराध, भीलिनी को खाये फल
 सोऊ साधु-सभा भली भाँति मनियत है ।
 रावरे आदरे लोक बेद हूँ आदरियत
 जोग ज्ञान हूँ तेँ गरु गनियत है ॥
 प्रभु की कृपा कृपालु कठिन कलिहूँ काल
 महिमा समुम्हि उर अनियत है ।
 तुलसी पराये बस भये रस अनरस,
 दीनबंधु-द्वारे हठ ठनियत है ॥ १८३ ॥
 रामनाम के जपे जाइ जिय की जरनि ।
 कलिकाल अपर उपाय ते अपाय भए

जैसे तम नासिबे को चित्र के तरनि ॥
 करम-कलाप, परिताप, पाप साने सब
 ज्यों सुफूल फूलै तरु फोकट फरनि ।
 दंभ, लोभ, लालच उपासना विनासि नीके
 सुगति साधन भई उदर भरनि ॥
 जोग न समाधि निरुपाधि न बिराग ज्ञान
 बचन विसेष वेष, कहूँ न करनि ।
 कपट कुपथ कोटि, कहनि रहनि खोटि
 सकल सराहूँ निज निज आचरनि ॥
 मरत महेस उपदेस हैं कहा करत
 सुरसरि-तीर कासी धरम-धरनि ।
 रामनाम को प्रताप हर कहूँ, जपै आपु,
 जुग जुग जाने जग बेदहूँ बरनि ॥
 मति रामनाम ही सों, रति रामनाम ही सों,
 गति रामनाम ही की बिपति-हरनि ।
 रामनाम सों प्रतीति प्रीति राखे कबहुँक
 तुलसी ढरै गे राम आपनी ढरनि ॥१८४॥

लाज न आवत दास कहावत ।

सो आचरन बिसारि सोच तजि जो हरि तुम कहूँ भावत ।
 सकल संग तजि भजत जाहि मुनि जप तप जाग बनावत ।
 सो सम मंद महा खल पाँवर कौन जतन तेहि पावत ?
 हरि निर्मल, मल-ग्रसित हृदय, असमंजस मोहिं जनावत ।
 जेहि सर काक कंक बक सूकर क्यों मराल तह आवत ॥
 जाकी सरन जाइ कोविद दारुन त्रयताप बुझावत ।
 तहूँ गए मद मोह लोभ अति सरगहूँ मिटाति न सावत ॥

भव-सरिता कहँ नाव संत यह कहि औरनि समुझावत ।
हैं तिन सेां करि परम बैर हरि तुम सेां भलो मनावत ॥
नाहिंन और ठहर मो कहँ तातेँ हठि नातो लावत ।
राखु सरन उदार-चूड़ामनि तुलसिदास गुन गावत ॥ १८५ ॥

कौन जतन बिनती करिए ।

निज आचरन बिचारि हारि हिय मानि जानि डरिए ॥
जेहि साधन हरि द्रवहु जानि जन सो हठि परिहरिए ।
जातेँ विपत्ति-जाल निसि दिन दुख तेहि पथ अनुसरिए ॥
जानत हूँ मन बचन कर्म पर हित कीन्हें तरिए ।
सो विपरीत देखि परसुख बिनु कारन ही जरिए ॥
सुति पुरान सब को मत यह सतसंग सुदृढ़ धरिए ।
निज अभिमान मोह ईर्षा बस तिनहि न आदरिए ॥
संतत सोइ प्रिय मोहिं सदा जातेँ भव-निधि परिए ।
कहो अब नाथ ! कौन बल तेँ संसार-सोक हरिए ॥
जब कब निज करुना सुभाव तेँ द्रवहु तो निस्तरिए ।
तुलसिदास बिस्वास आन नहिं, कत पचि पचि मरिए ॥ १८६ ॥

ताहि तेँ आयो सरन सबेरे ।

ज्ञान-बिराग-भगति साधन कछु सपनेहु नाथ न मेरे ॥
लोभ, मोह, मद, काम, क्रोध रिपु फिरत रैन दिन घेरे ।
तिनहिं मिले मन भयो कुपथ-रत फिरै तिहारेहि फेरे ॥
दोष-निलय यह बिषय सोकप्रद कहत संत सुति टेरे ।
जानत हूँ अनुराग तहाँ अति सो हरि तुम्हरेहि प्रेरे ॥
बिष पियूष सम करहु, अगिन हिम, तारि सकहु बिनु बेरे ।
तुम सम ईस कृपालु परम हित पुनि न पाइहौं हेरे ॥
यह जिय जानि रहौं सब तजि रघुबीर भरोसे तेरे ।

तुलसिदास यह विपत्ति-बाँगुरो तुमहि सौं बनै निबेरे ॥१८७॥

मैं तोहि अब जान्यों, संसार !

बाँधि न सकहि मोहिं हरि के बल प्रगट कपट-आगार ॥

देखत ही कमनीय, कछू नाहिंन पुनि किए विचार ॥

ज्यों कदलीतरु मध्य निहारत कबहुँ न निकसत सार ॥

तेरे लिये जनम अनेक मैं फिरत न पायों पार ॥

महामोह-मृगजल-सरिता महँ बेरयो हैं बारहि बार ॥

सुनु खल छल बल कोटि किए बस होहिं न भगत उदार ॥

सहित सहाय तहाँ बसि अब जेहि हृदय न नंदकुमार ॥

तासों करहु चातुरी जो नहिं जानै मरम तुम्हार ॥

सो परि डरै मरै रजु अहि तेँ वृष्मै नहिं व्यवहार ॥

निज हित सुनु सठ ! हठ न करहि जो चहहि कुसल परिवार ॥

तुलसिदास प्रभु के दासन तजि भजहि जहाँ मद मार ॥१८८॥

राग गौरी

राम कहत चलु, राम कहत चलु, राम कहत चलु, भाई रे ।

नाहिं तो भव बेगारि महँ परिहौ छूटत अति कठिनाई रे ॥

बाँस पुरान साज सब अटखट सरल तिकोन खटोला रे ।

हमहिं दिहल करि कुटिल करमचंद मंद मोल बिनु डोला रे !

विषम कहार मार-मदमाते, चलहिं न पाउँ बटोरा रे !

मंद बिलंद अमेरा दलकन पाइय दुख भकभोरा रे !

काँट कुरायँ लपेटन लोटन ठाँवहिं ठाँउँ बभाऊ रे !

१८७—बाँगुरो = जाल ।

१८८—अटखट = गड़बड़ । सरल = सड़ा हुआ । दिहल = दिया । मंद = नीचा । बिलंद = ऊँचा । अमेरा = धक्का । दलकन = झटका । कुरायँ = कंकड़ी । लपेटन = पैरों में लिपटजानेवाला तृण । लोटन = सरीसृप, साँप । बभाऊ = बम्मान, उलझन ।

जस जस चलिय दूरि तस तस निज बास न भेंट लगाऊ रे !
मारग अगम, संग नहिं संबल, नाउँ गाउँ कर भूला रे !
तुलसिदास भवत्रास हरहु अब, होहु राम अनुकूला रे ! ॥१८६॥

सहज सनेही राम सो तैं कियो न सहज सनेह ।

तातेँ भव-भाजन भयो, सुनु अजहुँ सिखावन एह ॥
ज्यौँ मुख मुकुर बिलोकिए अरु चित न रहै अनुहारि ।
त्यौँ सेवतहुँ न आपने ये मातु पिता सुत नारि ॥
दै दै सुमन तिल वासि कै अरु खरि परिहरि रस लेत ।
स्वारथ हित भूतल भरे, मन मेचक, तनु सेत ॥
करि बीत्यो, अब करतु है, करिबे हित भीत अपार ।
कबहुँ न कोउ रघुबीर सो नेह निबाहनिहार ॥
जासों सब नातो फुरै तासों न करी पहिचानि ।
तातेँ कछु समझ्यो नहीं कहा लाभ कह हानि ॥
साँचो जान्यो भूठ को, भूठे कहँ साँचो जानि ।
को न गयो, को न जात है, को न जैहै करि हितहानि ॥
वेद कह्यो, बुध कहत हैं अरु हैंहुँ कहत हैं टेरि ।
तुलसी प्रभु साँचो हि तू, तू हिये की आँखिन हेरि ॥१८७॥

एक सनेही साँचिलो केवल कोसलपालु ।

प्रेम कनौड़ो राम सो नहिं दूसरो दयालु ॥
तन साथी सब स्वारथी, सुर व्यवहार-सुजान ।
आरत अधम अनाथ हित को रघुबीर समान ॥
नाद निठुर, समचर सिखी, सलिल सनेह न सूर ।
ससि सरोग, दिनकर बड़े, पयद प्रेमपथ कूर ॥
जाको मन जासों बँध्यो ताको सुखदायक सोइ ।

१८०—खरि = खज्जी, सीठी ।

१८१—समचर = एक सा व्यवहार करनेवाला । सिखी = मोर ।

सरल सील साहिब सदा सीतापति सरिस न कोइ॥
 सुनि सेवा सही को करै, परिहरै को दूषन देखि ।
 केहि दिवान दिन दीन को आदर अनुराग बिसेखि ॥
 खग सबरी पितुमातु ज्यों माने, कपि को किए मीत ।
 केवट भेट्यों भरत ज्यों ऐसो को कहु पतित-पुनीत ॥
 देइ अभागहिं भाग को, को राखै सरन समीत ।
 वेदबिदित विरुदावली, कवि कोविद गावत गीत ॥
 कैसेउ पाँवर पातकी जेहि लई नाम की ओट ।
 गाँठी बाँध्यो दाम सो परयो न फिरि खर खोट ॥
 मन-मलीन, कलि किलविषी होत सुनत जासु कृत काज ।
 सो तुलसी कियो आपनो रघुबीर गरीबनिवाज ॥१६१॥
 जो पै जानकिनाथ सों नातो नेह न नीच ।
 स्वारथ परमारथ कहौ ? कलि कुटिल बिगोयो बीच ॥
 धरम बरन आस्रमनि के पैयत पोथिही पुरान ।
 करतब बिनु बेष देखिए ज्यों सरीर बिनु प्रान ॥
 बेद-बिदित साधन सबै सुनियत दायक फल चारि ।
 राम-प्रेम बिनु जानिबो जैसे सर सरिता बिनु बारि ॥
 नाना पथ निरबान के, नाना बिधान बहु भाँति ।
 तुलसी तू मेरे कहे जपु रामनाम दिन राति ॥१६२॥
 अजहुँ आपने राम के करतब समुझत हित होइ ।
 कहँ तू, कहँ कोसलधनी, तोको कहा कहत सब कोइ ॥
 रीझि निवाज्यो कबहिं तू, कब खीझि दई तोहिं गारि ।
 दरपन बदन निहारि कै सुबिचार मान हिय हारि ॥
 बिगरी जनम अनेक की सुधरत पल लगे न आधु ।
 'पाहि कृपानिधि !' प्रेम सों कहे को न राम कियो साधु ॥

बालमीकि-कैवट-कथा, कपि-भील-भालु-सनमान ।
 सुनि सनमुख जो न राम सेों तिहि को उपदेसहि ज्ञान ॥
 का सेवा सुग्रीव की, का प्रीति-रीति-निरबाहु ?
 जासुबंधु बध्यो व्याध ज्यों सो सुनत सोहात न काहु ॥
 भजन बिभीषन को कहा, फल कहा दियो रघुराज !
 राम गरीबनिवाज के बड़ी बाँह-बोल की लाज ॥
 जपहि नाम रघुनाथ को चरचा दूसरी न चालु ।
 सुमुख सुखद साहिब सुधी समरथ कृपालु नतपालु ॥
 सजल नयन, गदगद गिरा, गहबर मन पुलक सरीर ।
 गावत गुनगन राम के केहि की न मिटी भवभीर ?
 प्रभु कृतज्ञ सरवज्ञ हैं, परिहर पाछिली गलानि ।
 तुलसी तोसेों राम सेों कछु नई न जान पहिचानि ॥१६३॥
 जो अनुराग न राम सनेही सेों । तो लह्यो लाहु कहा नर देही सेों ॥
 जो तनु धरि परिहरि सब सुख भए सुमति राम अनुरागी ।
 सो तनु पाइ अघाइ किए अघ अवगुन-उदधि अभागी ॥
 ज्ञान विराग जोग जप तप मख जग मुद-मग नहि थोरे ।
 राम-प्रेम बिनु नेम जाय जैसे मृग-जल-जलधि हिलोरे ॥
 लोक बिलोकि, पुरान बेद सुनि, समुक्ति वृक्ति गुरु ज्ञानी ।
 प्रीति प्रतीति रामपद-पंकज सकल सुमंगल-खानी ॥
 अजहुँ जानि जिय मानि हारि हिय होइ पलक महँ नीको ।
 सुमिरु सनेह सहित हित रामहिं मानु मतो तुलसी को ॥१६४॥
 बलि जाउँ हैं राम गुसाई । कीजै कृपा आपनी नाई ॥
 परमारथ सुरपुर-साधन सब स्वारथ सुखद भलाई ।
 कलि सकोप लोपी सुचाल, निज कठिन कुचाल चलाई ॥
 जहँ जहँ चित चितवत हित तहँ नित नव विषाद अधिकाई ।

१६४—मुद-मग = मंगल के मार्ग ।

रुचि-भावती भभरि भागहि, समुहाहिं अमित अनभाई ॥
 आधि-मगन मन, व्याधि-विकल तन, बचन मलीन झुठाई ।
 एतेहुँ पर तुम सों तुलसी की प्रभु सकल सनेह सगाई ॥१८५॥

काहे को फिरत मन करत बहु जतन,
 मिटै न दुख विमुखरघुकुल-बीर ।
 कीजै जो कोटि उपाइ त्रिविध ताप न जाइ,
 कह्यो जो भुज उठाइ मुनिवर-कीर ॥
 सहज टेव बिसारि तुहीं धौं देखु विचारि,
 मिलै न मथत वारि घृत बिनु छीर ।
 समुझि तजहि भ्रम भजहि पद जुगम,
 सेवत सुगम गुन गहन गँभीर ॥
 आगम निगम ग्रंथ, ऋषि मुनि सुर संत
 सबही को एक मत सुनु, मतिधीर ।
 तुलसिदास प्रभु बिनु पियास मरै पसु
 जद्यपि है निकट सुरसरि-तीर ॥१८६॥
 नाहिन चरन रति ताहि तें सहौं बिपति
 कहत स्मृति सकल मुनि मतिधीर ।
 बसे जो ससि-उच्छंग सुधा-स्वादित कुरंग
 ताहि क्यों भ्रम निरखि रविकर-नीर ? ॥
 सुनिय नाना पुरान मिटत नाहिं अज्ञान
 पढ़िय न समुझिय जिमि खग कीर ।
 बभूत बिनहि पास सेमर-सुमन-आस
 करत चरत तेइ फल बिनु हीर ॥
 कछु न साधन सिधि, जानौं न निगम, बिधि

नहिं जप तप बस मन, न समीर ।

तुलसीदास भरोस परम करुना-कोस

प्रभु हरिहैं विषम भवभीर ॥१८७॥

भैरवी

मन पछितैहै अवसर बीते ।

दुर्लभ देह पाइ हरिपद भजु करम बचन अरु ही ते ॥

सहसबाहु दसबदन आदि नृप वचे न काल बली ते ।

हम हम करि धन धाम सँवारे, अंत चले उठि रीते ॥

सुत बनितादि जानि स्वारथ-रत न करु नेह सबही तेँ ।

अंतहुँ तोहिं तजैंगे, पामर ! तू न तजै अबही तेँ ॥

अब नाथहिं अनुरागु जागु जड़ त्यागु दुरासा जी तेँ ।

बुझै न काम-अग्निनि तुलसी कहूँ विषय-भोग बहु वी तेँ ॥१८८॥

काहे को फिरत मूढ़ मन धायो ।

तजि हरिचरन-सरोज सुधारस रविकर-जल लय लायो ॥

त्रिजग, देव, नर, असुर, अपर जग जोनि सकल भ्रमि आयो ।

गृह, बनिता, सुत, बंधु भए बहु मातु पिता जिन्ह जायो ॥

जातेँ निरय-निकाय निरंतर सोइ इन्ह तोहिं सिखायो ।

तुव हित होइ कटै भवबंधन, सो मगु तोहिं न बतायो ॥

अजहुँ विषय कहँ जतन करत जद्यपि बहु बिधि डहँकायो ।

पावक-काम भोग-घृत तेँ सठ कैसे परत बुझायो ?

विषयहीन दुख, मिले विपति अति, सुख सपनेहु नहिं पायो ।

उभय प्रकार प्रेत-पावक ज्यों धन दुखप्रद स्तुति गायो ॥

छिन छिन छीन होत जीवन, दुर्लभ तनु बृथा गँवायो ।

१८७—समीर = प्राण वायु, जिसे योगी वश में करते हैं ।

१८८—निरय = नरक । प्रेत-पावक = दलदलों और मैदानों में रात को दिखाई देता हुआ लुक जिसे आग समझकर लोग धोखा खाते हैं ।

तुलसिदास हरि भजहि आस तजि, काल-उरग जग खायो ॥१६६॥

ताँबे सों पीठि मनहुँ तनु पायो ।

नीच ! मीचु जानत न सीस पर, ईस निपट बिसारयो ॥
अवनि, रवनि, धन, धाम, सुहृद, सुत को न इन्हहि अपनायो
काके भए गए सँग काके सब सनेह छल-छायो ॥
जिन्ह भूपनि जग जीति, बाँधि जम अपनी बाँह बसायो ।
तेऊ काल कलेऊ कीन्हँ, तू गिनती कब आयो ?
देखु बिचारि सार का सांचो, कहा निगम निजु गायो ।
भजहि न अजहुँ समुझि तुलसी तेहि जेहि महेस मन लायो ॥२००॥

लाम कहा मानुष तनु पाए ।

काय, बचन, मन सपनेहु कबहुँक घटत न काज पराए ॥
जो सुख सुरपुर नरक गेह बन आवत विनहिं बुलाए ।
तेहि सुख कहँ बहु जतन करत मन, समुझत नहिं समुझाए ॥
परदारा, परद्रोह, मोहबस किए मूढ़ मन भाए ।
गर्भवास दुखरासि जातना तीव्र बिपति बिसराए ॥
भय निद्रा मैथुन अहार सब के समान जग जाए ।
सुर-दुरलभ तनु धरि न भजे हरि, मद अभिमान गवाए ॥
गई न निज-पर-बुद्धि, सुद्ध हैं रहे न राम-लय लाए ।
तुलसिदास यह अवसर बीते का पुनि के पछिताए ? ॥२०१॥

काज कहा नरतनु धरि सारयो ?

पर-उपकार सार श्रुति कों जो सो धोखेहु न बिचारयो ॥
द्वैत मूल, भय सुल, सोग फल, भवतरु टरै न टारयो ।
राम-भजन तीछन कुठार लै सो नहिं काटि निवारयो ॥

२००—ताँबे...पायो=मानो ताँबे से मढ़ी पीठ लेकर आया, अर्थात् शरीर का नाश नहीं होगा । निजु=प्रधानतः, विशेष रूप से ।

२०१—घटत=काम आता है ।

संसय-सिंधु नाम-बोहित भजि निज आतमान तारयो ।
जनम अनेक विवेकहीन बहु जोनि भ्रमत नहिं हारयो ॥
देखि आन की सहज संपदा द्वेष-अनल मन जारयो ।
सम दम दया दीन-पालन सीतल हिय हरि न सँभारयो ॥
प्रभु गुरु पिता सखा रघुपति तैं मन क्रम वचन बिसारयो ।
तुलसिदास यहि त्रास सरन राखिहि जेहि गीध उधारयो ॥२०२॥

श्रीहरि-गुरु-पद-कमल भजहु मन तजि अभिमान ।

जेहि सेवत पाइय हरि सुख-निधान भगवान ॥
परिवा प्रथम प्रेम बिनु राम मिलन अति दूरि ।
जद्यपि निकट हृदय निज रहे सकल भरि पूरि ॥
दुइज द्वैत-मति छाँड़ि चरहि महि-मंडल धीर ।
विगत मोह माया मद हृदय बसत रघुवीर ॥
तीज त्रिगुन-पर परम पुरुष श्रीरमन मुकुंद ।
गुन सुभाव त्यागे बिनु दुरलभ परमानंद ॥
चौथि चारि परिहरहु बुद्धि मन, चित अहंकार ।
विमल विचार परमपद निज सुख सहज उदार ॥
पाँचई पाँच परस, रस, सच्च, गंध अरु रूप ॥
इन्ह कर कहा न कीजिए बहुरि परब भवकूप ॥
छठि षड्वर्ग करिय जय जनकसुता पति लागि ।
रघुपति-कृपा-बारि बिनु नहिं बुताइ लोभागि ॥
सातै सप्तधातु-निर्मित तनु करिय विचार ।
तेहि तनु केर एक फल, कीजै पर-उपकार ॥
आठई आठ-प्रकृति-पर निर्विकार श्रीराम ।
केहि प्रकार पाइय हरि, हृदय बसहिं बहु काम ॥
नवमी नवद्वारपुर बसि जेहि न आपु भल कीन्ह ।
ते नर जोनि अनेक भ्रमत दारुन दुख दीन्ह ॥

दसईँ दसहु कर संयम जो न करिय जिय जानि ।
 साधन वृथा होईँ सब मिलहिं न सारँगपानि ॥
 एकादसी एक मन बस कै सेवहु जाइ ।
 सोइ व्रत कर फल पावै आवागमन नसाइ ॥
 द्वादसि दान देहु अस अभय होइ त्रैलोक ।
 परहित-निरत सो पारन बहुरि न व्यापत सोक ॥
 तेरसि तीन अवस्था तजहु भजहु भगवंत ।
 मन-क्रम-बचन-अगोचर, व्यापक, व्याप्य, अनंत ॥
 चौदसि चौदह भुवन अचरचर रूप गोपाल ।
 भेद गए बिनु रघुपति अति न हरहिं जगजाल ॥
 पुनो प्रेमभगति-रस हरिरस जानहिं दास ।
 सम सीतल गत-मान ज्ञानरत विषय उदास ॥
 त्रिविध सूल होलिय जरै, खेलिय अस फागु ।
 जो जिय चहसि परम सुख तो यहि मारग लागु ॥
 श्रुति-पुरान-बुध-संमत चौंचरि चरित मुरारि ।
 करि विचार भव तरिय, परिय न कबहुँ जमधारि ॥
 संसय-समन दमन-दुख सुखनिधान हरि एक ।
 साधुकृपा बिनु मिलहिं न करिय उपाइ अनेक ॥
 भवसागर कहँ नाव सुद्ध संतन के चरन ।
 तुलसिदास प्रयास बिनु मिलहिं राम दुखहरन ॥ २०३ ॥

राग कान्हरा

जौ मन लागै रामचरन अस ।

देह, गेह, सुत, वित, कलत्र महुँ मगन होत बिनु जतन किए जस ॥
 द्वंद्व-रहित, गत-मान, ज्ञानरत, विषय-विरत खटाइ नाना कस ।

२०३—चौंचरि = फाग के स्वांग ।

२०४—खटाइ = परीक्षा में पूर्ण उत्तरे । कस = जाँच, परीक्षा ।

सुखनिधान सुजान कोसलपति हूँ प्रसन्न कहूँ क्यों न होहिँ बस ?
सर्व भूतहित निर्व्यलीक चित भगति प्रेम दृढ़ नेम एक-रस ।
तुलसिदास यह होइ तबहिँ जब द्रवै ईस जेहि हतो सीसदस ॥२०४॥

जौ मन भज्यो चहै हरि सुरतरु ।

तौ तजि विषय विकार सार भजु, अजहूँ जो मैं कहौ सोइ करु ॥
सम, संतोष, विचार विमल अति, सतसंगति, ए चारि दृढ़ करि धरु ।
काम क्रोध अरु लोभ मोह मद राग द्वेष निसष करि परिहरु ॥
स्वप्न कथा, मुख नाम, हृदय हरि, सिर प्रनाम, सेवा कर अनुसरु ।
नयनन निरखि कृपा-समुद्र हरि अगजग-रूप भूष सीताबरु ॥
इहै भगति बैराग्य ज्ञान यह हरि-तोषन यह सुभ व्रत आचरु ।
तुलसिदास सिवमत मारग यहि चलत सदा सपनेहुँ नाहिँन डरु ॥२०५॥
नाहिँन और कोउ सरन लायक दूजो श्रीरघुपति सम विपति-निवारन ।
काको सहज सुभाउ सेवक-बस, काहि प्रनत पर प्रीति अकारन ?
जन-गुन अलप गनत सुमेरु करि, अवगुन कोटि बिलोकि बिसारन ।
परम कृपालु, भगत-चिंतामनि विरद पुनीत पतितजन-तारन ॥
सुमिरत सुलभ, दास दुख सुनि हरि चलत तुरत पट पीत सँभार न ।
साखि पुरान निगम आगम सब, जानत दुपदसुता अरु बारन ॥
जाको जस गावत कवि कोविद, जिन्हके लोभ मोह मद मार न ।
तुलसिदास तजि आस सकल भजु कोसलपति मुनिबधू-वधारन ॥२०६॥

भजिबे लायक सुखदायक रघुनायक सरिस सरनप्रद दूजो नाहिँन ।
आनँदभवन दुखदमन सोकसमन रमारमन गुन गनत सिराहिँ न ॥
आरत अधम कुजाति कुटिल खल पतित सभीत कहूँ जे समाहिँ न ।
सुमिरत नाम बिबस हू बारक पावत सो पद जहाँ सुर जाहिँ न ॥
जाके पद-कमल लुब्ध मुनि-मधुकर विरत जे परम सुगतिहुँ लुभाहिँ न ।
तुलसिदास सठतेहिँ न भजसि कस कारुणीक जोअनाथहिदाहिना ॥२०७॥

राग कल्याण

नाथ सों कौन विनती कहि सुनावौ ?

विविध अनगनित अवलोकि अघ आपने

सरन सनमुख होत सकुचि सिर नावौ ॥

विरचि हरि-भगति को वेष बर टाटिका

कपट-दल हरित पल्लवनि छावौ ।

नाम-लगि लाइ, लासा-ललित-बचन कहि

व्याध ज्यों विषय-बिहूँगनि बभावौ ॥

कुटिल सत कोटि मेरे रोम पर वारियहि,

साधुगनती में पहिलेहि गनावौ ।

परम बर्वर खर्वगर्व-पर्वत चढ़्यो

अज्ञ सर्वज्ञ जनमनि जनावौ ॥

साँच किधौ भूठ मोको कहत कोउ

कोउ राम रावरो हौंहुँ तुम्हरो कहावौ ।

विरद की लाज करि दासतुलसिहि, देव !

लेहु अपनाइ अब देहु जनि बावौ ॥२०८॥

नाहिनै नाथ अवलंब मोहिं आन की ।

करम मन बचन पन सत्य, करुनानिधे !

एक गति राम भवदीय पदत्रान की ॥

कोह मद मोह ममतायतन जानि मन,

वात नहिं जाति कहि ज्ञान बिज्ञान की ।

काम-संकल्प उर निरखि बहु बासनहि

आस नहिं एक हू आँक निरवान की ॥

२०८—टाटिका = टट्टी । लगि = लगी, बाँस की लंबी छड़ । जनमनि = मनुष्यों में श्रेष्ठ ।

२०९—एक हू आँक = सोलह आने में एक आना भी, कुछ भी ।

वेद-बोधित करम धरम बिनु, अगम अति
 जदपि, जिय लालसा अमरपुर जान की ।
 सिद्ध सुर मनुज दनुजादि सेवत कठिन
 द्रवहिं हठजोग दिए भोग बलि प्रान की ॥
 अगति दुरलभ परम, संभु सुक मुनि मधुप,
 प्यास पदकंज-मकरंद-मधु पान की ।
 पतित-पावन सुनत नाम विश्रामकृत
 भ्रमत पुनि समुझि चित ग्रंथि अभिमान की ॥
 नरक अधिकार मम घोर संसार-तम-कूपकहिं,
 भूप ! मोहिं सक्ति आपान की ।
 दासतुलसी सोउ त्रास नहिं गनत मन
 सुमिरि गुह गीध गज ज्ञाति हनुमान की ॥२०६॥
 और कहँ ठौर, रघुवंसमनि मेरे ?
 पतित-पावन प्रनत-पाल असरन सरन
 बाँकुरे बिरद बिरुदैत केहि करे ॥
 समुझि जिय दोष अति रोष करि राम कै
 करत नहिं कान बिनती वदन फेरे ।
 तदपि ह्वै निडर हैं कहैं, करुनासिंधु !
 क्योंऽव रहि जात सुनि बात बिन हरे ॥
 मुख्य रुचि होति बसिबे की पुर रावरे,
 राम तेहि रुचिहि कामादि गन घेरे ।
 अगम अपवर्ग, अरु स्वर्ग सुकृतैक फल,
 नाम-बल क्यों बसौं जमनगर नेरे ?
 कतहुँ नहिं ठाउँ कहँ जाउँ, कोसलनाथ !
 दीन बितहीन हैं विकल बिनु डेरे ।

दास तुलसिहिं बास देहु अव करि कृपा,
 बसत गज गीध व्याधादि जेहि खेरे ॥ २१० ॥
 कबहुँ रघुवंस-मनि सो कृपा करहुगे ?
 जेहि कृपा व्याध गज बिप्र खल नर तरे
 तन्हहिं सम मानि मोहिं नाथ उद्धरहुगे ॥
 जोनि बहु जनमि किए करम खल बिबिध बिधि,
 अधम आचरन कछु हृदय नहिं धरहुगे ।
 दीनहित अजित सर्वज्ञ समरथ प्रनतपाल,
 चित-मृदुल निज गुननि अनुसरहुगे ॥
 मोह मद मान कामादि खल-मंडली,
 सकुल निरमूल करि दुसह दुख हरहुगे ।
 जोग जप ज्ञान बिज्ञान तेँ अधिक अति,
 अमल दृढ़ भगति दै परम सुख भरहुगे ॥
 मंदजन-मौलि-मनि, सकल-साधनहीन,
 कुटिल-मन, मलिन-जिय जानि जो डरहुगे ।
 दासतुलसी वेद-विदित विरुदावली,
 बिमल जस नाथ केहि भाँति बिस्तरहुगे ? ॥ २११ ॥
 राग केदारा

रघुपति बिपति-दवन ।

परम कृपालु प्रनत-प्रतिपालक पतित-पवन ॥
 कूर कुटिल कुलहीन दीन अति मलिन जवन ।
 सुभिरत नाम राम पठए सब अपने भवन ॥
 गज पिंगला अजामिल से खल गनै धौँ कवन ?
 तुलसिदास प्रभु केहि न दीन्हि गति जानकी-खन ॥ २१२ ॥
 हरि सम आपदाहरन ।
 नहिं कोउ सहज कृपालु दुसह-दुखसागर-तरन ॥

गज निज बल अवलोकि कमल गहि गयो सरन ।
 दीन बचन सुनि चले गरुड़ तजि सुनाभ-धरन ॥
 दुपदसुता को लग्यो दुसासन नगन करन ।
 'हा हरि पाहि !' कहत पूरे पट विविध बरन ॥
 इहै जानि सुर नर मुनि कोविद सेवत चरन ।
 तुलसिदास प्रभु को न अभय कियो नृग-उद्धरन ॥२१३॥

राग कल्याण

ऐसी कौन प्रभु की रीति ।

विरद हेतु पुनीत परिहरि पाँवरनि पर प्रीति ॥
 गई मारन पूतना कुच कालकूट लगाइ ।
 मातु की गति दई ताहि कृपालु जादवराइ ॥
 काम-मोहित गोपिकनि पर कृपा अतुलित कीन्ह ।
 जगतपिता विरंचि जिन्हके चरन की रज लीन्ह ॥
 नेम तैं सिसुपाल दिन प्रति देत गनि गनि गारि ।
 कियो लीन सु आपु में हरि राजसभा मँभारि ॥
 व्याध चित दै चरन मारयो मूढ़मति मृग जानि ।
 सो सदेह सुलोक पठयो प्रगट करि निज बानि ॥
 कौन तिन्हकी कहै जिन्हके सुकृत अरु अघ दोड ।
 प्रगट पातक-रूप तुलसी सरन राख्यो सोड ॥ २१४ ॥

श्री रघुवीर की यह बानि ।

नीचहूँ सो करत नेह सुप्रीति मन अनुमानि ॥
 परम अधम निषाद पाँवर, कौन ताकी कानि ?
 लियो सो उर लाइ सुत ज्यों प्रेम को पहिचानि ॥
 गीध कौन दयालु जो विधि रच्यो हिंसा सानि ?
 जनक ज्यों रघुनाथ ता कहँ दियो जल निज पानि ॥

प्रकृति-मलिन कुजाति सबरी सकल अवगुन-खानि ।
 खात ताके दिए फल अति रुचि बखानि बखानि ॥
 रजनिचर अरु रिपु विभीषन सरन आयो जानि ।
 भरत ज्यों उठि ताहि भेंटत देह-दसा भुलानि ॥
 कौन सुभग सुसील बानर जिनहिं सुमिरत हानि ।
 किए ते सब सखा, पूजे भवन अपने आनि ॥
 राम सहज कृपालु कोमल दीनहित दिन दानि ।
 भजहि ऐसे प्रभुहि तुलसी कुटिल कपट न ठानि ॥२१५॥

हरि तजि और भजिए काहि ?

नाहिनै कोउ राम सो ममता प्रनत पर जाहि ॥
 कनक-कसिपु विरंचि को जन करम मन अरु बात ।
 सुतहिं दुखवत विधि न बरज्यो काल के घर जात ॥
 संभु-सेवक जान जग, बहु बार दिए दस सीस ।
 करत राम-विरोध सो सपनेहु न हटक्यो ईस ॥
 और देवन की कहा कहाँ स्वारथहि के मीत ।
 कबहुँ काहु न राखि लियो कोउ सरन गयउ समीत ॥
 को न सेवत देत संपति ? लोक हू यह रीति ।
 दास तुलसी दीन पर एक राम ही की प्रीति ॥२१६॥

जो पै दूसरो कोउ होइ ।

तो हौं बारहि बार प्रभु कत दुख सुनावैं रोइ ?
 काहि ममता दीन पर, को पतितपावन नाम ?
 पापमूल अजामिलहि केहि दियो अपना धाम ?
 रहे संभु विरंचि सुरपति लोकपाल अनेक ।
 सोक-सरि वूडत करीसहिं दई काहु न टेक ॥
 बिपुल भूपति-सदसि महँ नर-नारि कह्यो 'प्रभु पाहि!'

सकल समरथ रहे काहु न बसन दीन्हों ताहि ॥
 एक मुख क्यों कहैं करुना-सिंधु के गुनगाथ ?
 भगतहित धरि देह काह न कियो कोसलनाथ ॥
 आप से कहूँ सौंपिए मोहिं जौ पै अतिहि धिनात ।
 दासतुलसी और बिधि क्यों चरन परहरि जात ? ॥२१७॥

कबहिं देखाइहौ हरि चरन ?

समन सकल कलेश कलिमल, सकल-मंगल-करन ॥
 सरदभव सुंदर तरुनतर अरुन बारिज-बरन ।
 लच्छि लालित ललित करतल छवि अनूपम धरन ॥
 गंग-जनक, अनंग-अरि-प्रिय, कपटु वटु बलि-छरन ।
 विप्रतिय, नृग, बधिक के दुख दोष दारुन दरन ॥
 सिद्ध-सुर-मुनि-वृंद-बंदित सुखद सब कहूँ सरन ।
 सकृत् उर आनत जिनहिं जन हेत तारनतरन ॥
 कृपासिंधु सुजान रघुबर प्रनत-आरति-हरन ।
 दरस-आस-पियास तुलसीदास चाहत मरन ॥२१८॥

द्वार हैं भोर ही को आज ।

रटत रिरिहा आरि और न कौर ही तें काज ॥
 कलि कराल दुकाल दारुन सब कुभाँति कुसाज ।
 नीच जन, मन ऊँच, जैसी कोढ़ में की खाज ॥
 हहरि हिय मैं सद्य बूझ्यो जाइ साधु-समाज ।
 मोहूँ से कहूँ कतहुँ कोउ तिन्ह कह्यो कोसलराज ॥
 दीनता दारिद दलै को कृपा बारिधि बाज ।
 दानि दसरथ राय के तुम बानइत-सिरताज ॥

२१८—लच्छि = लक्ष्मी ।

२१९—रिरिहा = रट लगा कर और गिड़ गिड़ा कर माँगनेवाला । आरि =
 टेक, हठ । बाज = बिना, बगैर ।

जनम को भूखो भिखारी हैं गरीबनेवाज ।
पेट भरि तुलसिहि जेवाइय भगति-सुधा सुनाज ॥२१६॥

करिय सँभार, कोसलराय !

और ठौर, न और गति, अवलंब नाम बिहाय ॥
बूझि अपनी आपनो हित आप बाप न माय ।
राम राखर नाम गुरु सुर स्वामि सखा सहाय ॥
रामराज न चले मानस-मलिन के छल-छाय ।
कोप तेहि कलिकाल कायर मुएहि घालत घाय ॥
लेत कैहरि को बयर ज्यों भेक हनि गोमाय ।
ल्योहि रामगुलाम जानि निकाम देत कुदाय ॥
अकनि याके कपट करतव अमित अनय अपाय ।
सुखी हरिपुर बसत होत परीछितहिँ पछिताय ॥
कृपासिंधु बिलोकिए जन-मन की साँसति साय ।
सरन आयो, देव दीनदयालु ! देखन पाय ॥
निकट बोलि न बरजिए बलि जाउँ हनिय न हाय ।
देखिहैं हनुमान गोमुख-नाहरनि के न्याय ॥
अरुन मुख, भ्रू बिकट, पिंगल नयन रोष कषाय ।
बीर सुमिरि समीर को घटिहै चपल चित चाय ॥
बिनय सुनि बिहँसे अनुज सेों वचन के कहि भाय ।
भली कही कह्यो लषन हूँ हँसि, बने सकल बनाय ॥
दई दीनहिँ दादि सो सुनि सुजन-सदन बघाय ।
मिटे संकट सोच पोच प्रपंच पाप-निकाय ॥
पेखि प्रीति प्रतीति जन पर अगुन अनघ अमाय ।

२१०—गोमाय=गोमायु, गीदड़ । कुदाय देत=घात करता है ।
साय=जाय या शांत हो । गोमुख नाहर न्याय=ऊपर से गाय की तरह
सीधा, पर असल में व्याघ्र के समान क्रूर ।

दास तुलसी कहत मुनिगन, 'जयति जय उरगाय' ॥२२०॥

नाथ-कृपा ही को पंथ चितवत दीन हैं दिन राति ।
 होइ धौं कहि काल दीनदयालु जानि न जाति ॥
 सुगुन, ज्ञान, विराग, भगति सुसाधननि की पाँति ।
 भजे बिकल बिलोकि कलि अध-अवगुननि की थाति ॥
 अति अनीति कुरीति भइ भुई तरनि हूँ तेँ ताति ।
 जाउँ कहँ बलि जाउँ ? कहूँ न ठाउँ मति अकुलाति ॥
 आप सहित न आपनो कोड, बाप ! कठिन कुभाँति ।
 स्यामघन सीँचिए तुलसी सालि सफल सुखाति ॥ २२१ ॥

बलि जाउँ, और कासों कहैं ?

सदगुन-सिंधु स्वामि सेवक-हितु कहूँ न कृपानिधि सो लहैं ॥
 जहँ जहँ लोभ लोल लालचबस निजहित चित चाहनि चहैं ।
 तहँ तहँ तरनि तकत उलूक ज्यों भटक कुतर-कोटर गहैं ॥
 काल सुभाव करम विचित्र फलदायक सुनि सिर धुनि रहैं ।
 मोको तो सकल सदा एकहि रस दुसह दाह दारुन दहैं ॥
 उचित अनाथ होइ दुखभाजन, भयो नाथ-किंकर न हैं ।
 अब रावरो कहाय न बूझिए सरनपाल सांसति सहैं ॥
 महाराज राजीव-विलोचन मगन-पाप-संताप हैं ।
 तुलसी-प्रभु जब तब जेहि तेहि विधि राम निबाहे निरबहैं ॥२२२॥

आपनो कबहुँ करि जानिहौ ।

राम गरीब-निवाज राजमनि बिरद-लाज उर आनिहौ ॥
 सील सिंधु सुंदर सब लायक समरथ सदगुन-खानि हौ ।
 पाल्यो है, पालत, पालहुगे प्रभु प्रनत-प्रेम पहिचानिहौ ॥
 बेद पुरान कहत, जग जानत, दीनदयालु दिन दानि हौ ।
 कहि आवत, बलि जाउँ, मनहुँ मेरी बार बिसारे बानि हौ ॥

आरत दीन अनाथनि के हित मानत लौकिक कानि हैं ।

है परिनाम भलो तुलसी को सरनागत-भय भानिहौ ॥ २२३ ॥

रघुबरहिं कबहुँ मन लागिहै ?

कुपथ, कुचाल, कुमति, कुमनोरथ, कुटिल कपट कब त्यागिहै ?

जानत गरल अमिय विमोहवस, अमिय गनत करि आगि है ॥

उलटी रीति प्रीति अपने की तजि प्रभुपद अनुरागिहै ।

आखर अरथ मंजु मृदु मोदक रामप्रेम-पाग पागि है ॥

ऐसे गुन गाइ रिझाइ स्वामि सों पाइहै जो मुँह माँगिहै ।

तु यहि विधि सुख-सयन सोइहै जिय की जरनि भूरि भागिहै ॥ २२४ ॥

भरोसो और आइहै उर ताके ।

कै कहूँ लहै जो रामहिं सो साहिब, कै अपना बल जाके ।

कै कलिकाल कराल न सूझत मोह-मार-मद-छाके ॥

कै सुनि स्वामि-सुभाउ न रह्यो चित जो हित सब अँग थाके ।

हैं जानत भलि भाँति अपनपौ, प्रभु सो सुन्यो न साके ॥

उपल, भील, खग, मृग, रजनीचर भले भए करतब काके ?

मोको भलो रामनाम सुरतरु सो रामप्रसाद कृपालु कृपा के ।

तुलसी सुखी निसोच राज ज्यों बालक माय बबा के ॥ २२५ ॥

भरोसो जाहि दूसरो सो करो ।

मोको तो राम को नाम कल्पतरु कलि कल्याण फरो ॥

करम, उपासन, ज्ञान बेदमत सो सब भाँति खरो ।

मोहिं तो सावन के अंधहिं ज्यों सूझत रंग हरो ॥

चाटत रह्यो खान पातरि ज्यों कबहुँ न पेट भरो ।

सो हैं सुमिरत नाम सुधारस पेखत परुसि धरो ॥

स्वारथ औ परमारथ हू को नहिं कुंजरो नरो ।

२२३—भानिहौ = भंजन करोगे, नष्ट करोगे ।

२२६—कुंजरो नरो = नरो वा कुंजरो वा; दुबिधा या संदेह ।

मुनियत सेतु पयोधि पषाननि करि कपि कटक तरो ॥
 प्रीति प्रतीति जहाँ जाकी तहँ ताको काज सरो ।
 मेरे तो माय बाप दोउ आखर हैं सिसु-अरनि अरो ॥
 संकर साखि जो राखि कहैं कछु तौ जरि जीह गरो ।
 अपनेो भलो राम नामहिं तैं तुलसिहिं समुझि परो ॥२२६॥

नाम राम रावरोई हित मेरे ।

स्वारथ परमारथ साथिन्ह सों भुज उठाइ कहैं टेरे ॥
 जननी जनक तज्यो जनमि, करम बिनु विधिहु सृज्यो अवडेरै ।
 मोहुँ से कोउ कोउ कहत रामहि को सो प्रसंग केहि करे ?
 फिर्यौ ललात बिनु नाम उदर लागि दुखउ दुखित मोहिं हेरे ।
 नाम-प्रसाद लहत रसाल-फल अब हैं बबुर बहेरे ॥
 साधत साधु लोक परलोकहि, मुनि गुनि जतन घनेरे ।
 तुलसी के अवलंब नाम को एक गाँठि कई फेरे ॥२२७॥

प्रिय रामनाम तैं जाहि न रामो ।

ताको भलो कठिन कलिकालहुँ आदि मध्य परिनामो ॥
 सकुचत समुझि नाम-महिमा मद लोभ मोह कोह कामो ।
 रामनाम-जप-निरत सुजन पर करत छाँह घोर घामो ॥
 नाम प्रभाउ सही जो कहै कोउ सिला सरोरुह जामो ।
 जो मुनि सुमिरि भाग-भाजन भइ सुकृतसील भील-भामो ॥
 बालमीकि अजामिल के कछु हुतो न साधन सामो ।
 उलटे पलटे-नाम-महातम गुंजनि जितो ललामो ॥
 राम तैं अधिक नाम-करतव जेहि किए नगर-गत गामो ।
 भए बजाइ दाहिने जो जपि तुलसिदास से बामो ॥ २२८ ॥

२२७—अवडेरै = चकरदार, वेढव ।

२२८—भीलभामो = भील की स्त्री शवरी भी । सामो = सामग्री ।
 ललामो = रत्नों के आभूषण ।

गरैगी जीह जो कहैं और को हैं ।

जानकी-जीवन ! जनम जनम जग ज्यायो तिहारेहि कौर को हैं ॥
 तीनि लोक तिहुँ काल न देखत सुहृद रावरे जोर को हैं ।
 तुम्हसों कपट करि कलप कलप कृमि हैं नरक घोर को हैं ॥
 कहा भयो जो मन मिलि कलिकालहि कियो भौतुवा भौर को हैं ।
 तुलसिदास सीतल नित यहि वल वड़े ठेकाने ठौर को हैं ॥२२६॥

अकारन को हितु और को है ?

बिरद गरीब-निवाज कौन की भौंह जासु जन जो है ?
 छोटा बड़ा चहत सब स्वारथ जो बिरंवि बिरचो है ।
 काल कुटिल कपि भालु पालिवो कौन कृपालुहि सो है ?
 काको नाम अनख आलस कहें अघ अवगुननि बिछो है ?
 को तुलसी से कुसेवक संग्रहो, सठ सब दिन साईं द्रो है ? ॥२३०॥

और मोहि को है काहि कहिहैं ?

रंकराज ज्यों मन को मनोरथ केहि सुनाइ सुख लहिहैं ?
 जन्म-जातना जोनि-संकट सब सहे दुसह अरु सहिहैं ।
 मोको अगम, सुगम तुम्हको प्रभु ! तउ फल चारिन चहिहैं ॥
 खेलिबे को खग मृग तरु किंकर हैं रावरो राम हैं रहिहैं ।
 यहि नाते नरकहुँ सचु पैहैं, या बिनु परमपदहुँ दुख दहिहैं ॥
 इतनी जिय ललसा, दास के कहत पानही गहिहैं ।
 दीजै बचन कि, हृदय आनिए तुलसी को पन निर्बहिहैं, ॥२३१॥

दीनबंधु दूसरो कहँ पावों ?

को तुम बिनु पर-पीर पाइ है ? केहि दीनता सुनावों ? ॥
 प्रभु अकृपालु, कृपालु अलायक जहँ जहँ चितहिं डोलावों ।

२२६—जोर = जोड़ । भौतुवा = जौ के बराबर एक काला कीड़ा जो नदियों में तैरा करता है; ये नावों के निकट झुंड के झुंड दिखाई देते हैं ।

२३१—पानही = जूता ।

इहै समुक्ति सुनि रहौ मौन ही, कहि भ्रम कहा गँवावों ? ॥
गोपद वृद्धिबे जोग करम करौं बातनि जलधि थहावों ।
अति लालची काम-किंकर मन, मुख रावरो कहावों ॥
तुलसी प्रभु जिय की जानत सब, अपनौ कछुक जनावों ।
सो कीजै जेहि भाँति छाँड़ि छल द्वार परो गुन गावों ॥ २३२ ॥

मनोरथ मन को एकै भाँति ।

चाहत मुनि-मन-अगम सुकृत-फल, मनसा अब न अघाति ॥
करमभूमि कलि जनम कुसंगति मति बिमोह मद माति ।
करत कुजोग कोटि क्यों पैयत परमारथ-पद-साँति ॥
सेइ साधु गुरु, सुनि पुरान सुति ब्रूम्यो राग बाजी ताँति ।
तुलसी प्रभु सुभाउ सुरतरु सो ज्यों दरपन मुखकाँति ॥ २३३ ॥

जनम गयो बादिहिं बर बीति ।

परमारथ पाले न परयो कछु, अनुदिन अधिक अनीति ॥
खेलत खात लरिकपन गो चलि, जौबन जुवतिन लियो जीति ।
रोग-वियोग-सोक-सम-संकुल बड़ि वय वृथहि अतीति ॥
राग-रोष-इरषा-बिमोह बस रुची न साधु-समीति ।
कहे न सुने गुनगन रघुबर के, भइ न रामपद-प्रीति ॥
हृदय दहत पछिताय-अनल अब सुनत दुसह भवभीति ।
तुलसी प्रभु तेँ होइ सो कीजिय समुक्ति विरद की रीति ॥ २३४ ॥

ऐसेहि जन्म-समूह सिराने ।

प्राणनाथ रघुनाथ से प्रभु तजि सेवत चरन बिराने ॥
जे जड़ जीव कुटिल कायर खल केवल कलिमल-साने ।
सूखत वदन प्रसंसत तिन्ह कहँ, हरि तेँ अधिक करि माने ॥
सुख हित कोटि उपाय निरंतर करत न पाँय पिराने ।

२३२-अपनौ = आप भी ।

२३४-अतीति = बीत गई । समीति = समिति, समाज ।

सदा मलीन पंथ के जल ज्यों कबहुँ न हृदय थिराने ॥
 यह दीनता दूर करिबे को अमित जतन उर आने ।
 तुलसी चित चिंता न मिटै बिनु चिंतामनि पहिचाने ॥२३५॥

जो पै जिय जानकीनाथ न जाने ।

तौ सब करम धरम समदायक, ऐसेइ कहत सयाने ॥
 जे सुर, सिद्ध, मुनीस, जोगविद बेद पुरान बखाने ।
 पूजा लेत देत पलटे सुख हानि-लाभ अनुमाने ॥
 काको नाम धोखेहुँ सुमिरत पातक-पुंज सिराने ।
 विप्र, बधिक, गज, गीध कोटि खल कौन के पेट समाने ॥
 मेरु से दोष दूर करि जन के, रेनु से गुन उर आने ।
 तुलसिदास तेहि सकल आस तजि भजहि न अजहुँ अयाने ॥२३६॥

काहे न रसना रामहिं गावहि ?

निसि दिन पर-अपवाद वृथा कत रटि रटि राग बढ़ावहि ॥
 नरमुख सुंदर मंदिर पावन बसि जनि ताहि लजावहि ।
 ससि समीप रहि त्यागि सुधा कत रबिकर-जल कहँ धावहि ?
 काम-कथा कलि-कैरव-चंदिनि सुनत स्रवन दै भावहि ।
 तिनहिं हटक कहि हरि-कल-कीरति करन-कलंक नसावहि ॥
 जातरूप मति जुगुति रुचिर मनि रचि रचि हार बनावहि ।
 सरन-सुखद रबिकुल-सरोज-रवि राम नृपहि पहिरावहि ॥
 बाद-बिबाद-स्वाद तजि भजि हरि सरस चरित चित लावहि ॥
 तुलसिदास भव तरहि, तिहुँ पुर तू पुनीत जस पावहि ॥ २३७ ॥

आपनो हित रावरे सों जो पै सुझै ।

तौ जनु तनु पर अछत सीस सुधि क्यों कबंध ज्यों जूझै ॥
 निज अवगुन, गुन राम रावरे लखि सुनि मति मन रूझै ।
 रहनि कहनि समुझनि तुलसी की को कृपालु बिनु बूझै ? ॥२३८॥

२३८—रूझै = रुद्ध होता है, रुकता है ।

जाको हरि दृढ़ करि अंग करयो ।

सोइ सुसील पुनीत वेदविद विद्या-गुननि-भरयो ॥
 उत्तपति पांडुतनय की करनी सुनि सतपंथ डरयो ।
 ते त्रैलोक्य-पूज्य, पावन जस सुनि सुनि लोक तरयो ॥
 जो निज धर्म वेद-बोधित सो करत न कछु बिसरयो ।
 बिनु अवगुन कृकलास कूप-मज्जित कर गहि उधरयो ॥
 ब्रह्म-विसिख ब्रह्मांड-दहन-छम गर्भ न नृपति जरयो* ।
 अजर अमर कुलिसहुँ नाहिंन बध सो पुनि फेन मरयो† ॥
 बिप्र अजामिल अरु सुरपति तेँ कहा जो नहिं बिगारयो ?
 उनको कियो सहाय बहुत, उर को संताप हरयो ॥
 गनिका अरु कंदर्प तेँ जग महुँ अघ न करत उबरयो ।
 तिनको चरित पवित्र जानि हरि निज हृदि-भवन धरयो ॥
 केहि आचरन भलो मानै प्रभु सो तो न जानि परयो ।
 तुलसिदास रघुनाथ-कृपा को जोवत पंथ खरयो ॥ २३६ ॥

सोइ सुकृती सुचि साँचो जाहि राम तुम रीझे ।

गनिका, गोध, बधिक हरिपुर गए लै करसी प्रयाग कब सीझे ?
 कबहुँ न डग्यो निगम-मग तेँ पग नृग जग जान जिते दुख पाए ।
 गज धौं कौन दिछित जाके सुमिरत लै सुनाभ बाहन तजि धाए ॥
 सुर मुनि बिप्र बिहाय बड़े कुल गोकुल जनम गोपगृह लीन्हो ।
 बायों दियो विभव कुरुपति को, भोजन जाइ बिदुर घर कीन्हो ॥

२३६—अंग करयो = अंगीकार किया । कृकलास = गिरगिट । कूपमज्जित = कूँ में पड़ा हुआ (राजा नृग) । उधर्यो = उद्धार किया । ब्रह्मविसिख = ब्रह्माख । * राजा परीक्षित । † नमुच दैत्य को इंद्र ने समुद्र की फेन से मारा था । खरयो = खड़ा खड़ा ।

२४०—करसी = कंडे की आग । जंगली कंडों की आग में जल कर मरना बड़ा भारी तप माना जाता था । सुनाभ = चक्र । बायों दियो = किनारा खींचा, छोड़ दिया ।

मानत भलहि भलो भगतनि ते , कछुक रीति पारथहिं जनाई ।

तुलसी सहज सनेह राम बस और सबै जल की चिकनाई ॥ २४० ॥

तब तुम मोहूँ से सठनि को हठि गति देते ।

कैसेहुँ नाम लेहि कोउ पामर सुनि सादर आगे हूँ लेते ॥

पाप-खानि जिय जानि अजामिल जमगन तमकि तये ताको भे ते ।

लियो छुड़ाइ, चले कर मीजव, प्रीसत दाँत गए रिसरेते ॥

गोतम-तिय, गज, गंध, बिटप, कपि है नाथहि नीके मालुम जेते ।

तिन्ह के काज साधु-समाज तजि कृपासिंधु तब तब उठि गे ते ॥

अजहुँ अधिक आदर यहि द्वारे, पतित पुनीत होत नहिं केते ?

मेरे पासंगहु न पूजिहैं, हूँ गए, हैं, होने खल जेते ॥

हैं अबलौं करतूति तिहारिय चितवत हुतो न रावरे चेत ।

अब तुलसी पूतरो बाँधिहै सहि न जात मोपै परिहास एते ॥ २४१ ॥

तुम सम दीनबंधु न दीन कोउ मोसम सुनहु नृपति रघुराई !

मोसम कुटिल-मौलिमनि नहिं जग, तुम सम हरि न हरन ! कुटिलाई ॥

हैं मंन बचन कर्म पातक-रत, तुम कृपालु पतितनि-गतिदाई ।

हैं अनाथ प्रभु तुम अनाथहित, चित यह सुरति कबहुँ नहिं जाई ॥

हैं आरत, आरति-नासक तुम, कीरति निगम पुराननि गाई ।

हैं सभीत, तुम हरन सकल भय, कारन कौन कृपा बिसराई ? ॥

तुम सुखधाम राम स्वमभंजन, हैं अति दुखित त्रिविध स्वम पाई ।

यह जिय जानि दासतुलसी कहँ राखहु संरन समुक्ति प्रभुताई ॥ २४२ ॥

यहै जानि चरनन्हि चित लायो ।

नाहिंन नाथ अकारन को हितु तुम समान पुरान स्तुति गायो ॥

जननि, जनक, सुत, दार, बंधुजन भए बहुत जहँ जहँ हैं जायो ।

२४१—भे=भय । गे ते=गए थे । पूतरो बाँधिहै=भाट लोग जिससे कुछ न पाकर अप्रसन्न होते हैं उसके नाम का पुतला बनाकर उसकी निर्दा करतद्वय लिए फिरते हैं ।

सब स्वारथ हित प्रीति कपट चित, काहु नहिं हरिभजन सिखायो ॥
 सुर, मुनि, मनुज, दनुज, अहि, किन्नर मैं तनुधरि सिर काहि न नायो ।
 जरत फिरत त्रयताप-पापबस काहु न हरि ! करि कृपा जुड़ायो ॥
 जतन अनेक किए सुख-कारन हरिपद-बिमुख सदा दुख पायो ।
 अब थाक्यो जलहीन नाव ज्यों देखत बिपतिजाल जग छायां ॥
 मो कहूँ नाथ ! बूझिए यह गति सुख-निधान निज पति बिसरायो ।
 अब तजि रोष करहु करुना हरि तुलसिदास सरनागत आयो ॥२४३॥

याहि तेँ मैं हरि ! ज्ञान गँवायो ।

परिहरि हृदय-कमल-रघुनाथहिं बाहर फिरत बिकल भयो धायो ॥
 ज्यों कुरंग निज अंग रुचिर मद अति मतहीन मरम नहिं पायो ।
 खोजत गिरि, तरु, लता, भूमि, बिल परम सुगंध कहाँ धौँ आयो ॥
 ज्यों सरबिमल बारि परिपूरन ऊपर कछु सिवार टन छायो ।
 जारत हियो ताहि तजिहैं सठ, चाहत यहि विधि वृषा बुझायो ॥
 व्यापत त्रिविध ताप तनु दारुन तापर दुसह दरिद्र सतायो ।
 अपनेहिं धाम नाम-सुरतरु तजि विषय-बबूर-बाग मन लायो ॥
 तुम सम ज्ञाननिधान, मोहि सम मूढ़ न आन पुराननि गायो ।
 तुलसिदास प्रभु यह बिचारि जिय कीजै नाथ उचित मन भायो ॥२४४॥

मोहि मूढ़ मन बहुत बिगोयो ।

याके लिए सुनहु करुनामय मैं जग जनमि जनमि दुख रोयो ॥
 सीतल मधुर पियूष सहज सुख निकटहिं रहत दूरि जनु खोयो ।
 बहु भाँतिन स्नम करत मोहबस बृथहिं मंदमति बारि बिलोयो ॥
 करम-क्रीच जिय जानि सानि चित चाहत कुटिल मलहि मल धोयो ।
 वृषावंत सुरसरि बिहाय सठ फिरि फिरि बिकल अकास निचोयो ॥
 तुलसिदास प्रभु कृपा करहु अब मैं निज दोष कछू नहिं गोयो ।
 डासत ही गई बीति निसा सब, कबहुँ न नाथ ! नोंद भरि सोयो ॥२४५॥

लोक वेदहूँ बिदित बात मुनि समुक्ति
 मोह-मोहित विकल मति श्रिति न लहति ।
 छोटे बड़े, खोटे खरे मोटेऊ दूबरे
 राम ! रावरे निबाहे सबहूँ की निबहति ॥
 होती जो आपने बस रहती एकही रस
 दुनी न हरख सोक सांसति सहति ।
 चहतो जो जोई जोई लहतो सो सोई सोई
 केहू भाँति काहू की न लालसा रहति ॥
 करम काल सुभाव गुन दोष जीव-जग-माया
 तेँ सो सभय भौंह चकित चहति ।
 ईसनि, दिगीसनि, जोगीसनि, मुनीसनिहूँ
 छोड़ति छोड़ाये तेँ, गहाए तेँ गहति ॥
 सतरंज को सो राज, काठ को सबै समाज
 महाराज बाजी रची प्रथम न हति ।
 तुलसी प्रभु के हाथ हारिबो जीतिबो नाथ !
 बहु वेष बहु मुख सारदा कहति ॥ २४६ ॥
 राम जपु, जीह ! जानि, प्रीति सेाँ प्रतीति मानि,
 राम नाम जपे जैहै जिय की जरनि ।
 रामनाम सेाँ रहनि, रामनाम की कहनि,
 कुटिल-कलिमल-सोक-संकट-हरनि ॥
 रामनाम को प्रभाउ पूजियत गनराउ,
 कियो न दुराउ कही आपनी करनि ।
 भवसागर को सेतु, कासी हूँ सुगति हेतु,
 जपति सारद संभु सहित घरनि ॥
 बालमीकि व्याधहूँ अगाध-अपराध-निधि,

मरा मरा जपे पूजे मुनि अमरनि ।
 रोक्यो बिंध्य, सोख्यो सिंधु घटजहुँ नाम-बल,
 हारयो हिय, खारो भयो भूसुर-डरनि ॥
 नाम-महिमा अपार सेष सुक बार बार
 मति-अनुसार बुध वेद हुँ बरनि ।
 नामरति-कामधेनु तुलसी को कामतरु
 रामनाम है बिमोह-तिमिर-तरनि ॥ २४७ ॥
 पाहि पाहि ! राम पाहि ! रामभद्र रामचंद्र
 सुजस श्रवन मुनि आयो हौं सरन ।
 दीनबंधु ! दीनता-दरिद्र-दाह-दोष-दुख
 दारुन-दुसह-दर-दरप-हरन ॥
 जब जब जगजाल-व्याकुल करम काल
 सब खल भूप भए भूतल-भरन ।
 तब तब तनु धरि, भूमि-भार दूरि करि
 थापे मुनि सुर साधु आसुम बरन ॥
 वेद लोक सब साखी, काहू की रती न राखी,
 रावन की बंदि लागे अमर मरन ।
 ओक दै बिसोक किए लोकपति लोकनाथ
 रामराज भयो धरम चारिहु चरन ॥
 सिला, गुह, गीध, कपि, भील, भालु, रातिचर
 ख्याल हो कृपालु कीन्हें तारन-तरन ।
 पील-उद्धरन सीलसिंधु ढील देखियत
 तुलसी पै चाहत गलानि ही गरन ॥ २४८ ॥
 भली भाँति पहिचाने जाने साहिब जहाँ लौं जग
 जूड़े होत थोरे हो थोरे हो गरम ।

प्रीति न प्रवीन, नीतिहीन, रीति के मलीन,
 मायाहीन सब किए कालहू करम ॥
 दानव दनुज बड़े महामूढ़ मूढ़ चढ़े
 जीते लोकनाथ नाथबल निभरम ।
 रीझि रीझि दिए बर खीझि खीझि बाले घर,
 आपने निवाजे की न काहू को सरम ॥
 सेवा-सावधान तू सुजान समरथ साँचो
 सदगुन-धाम राम पावन परम ।
 सुरुख सुमुख एकरस एकरूप तोहि
 विदित विसेषि घटघट के मरम ॥
 तो सो नतपाल न कृपाल, न कँगाल मो सो,
 दया में बसत देव सकल धरम ।
 राम कामतरु-छाँह चाहै रुचि मन माहँ
 तुलसी विकल बलि कलि कुधरम ॥ २४६ ॥
 तौ हौं बारबार प्रभुहिं पुकारिकै खिझावतो न
 जोपै मोको हेतो कहूँ ठाकुर ठहर ।
 आलसी अभागे मोसे तैं कृपालु पाले पोसे
 राजा मेरे राजाराम, अवध सहर ॥
 सेये न दिगीस, न दिनेस, न गनेस गौरी
 हित कै न माने विधि हरिउ न हर ।
 रामनाम ही सो जोग छेम, नेम प्रेम-पन
 सुधा सो भरोसो एहु, दूसरो जहर ॥
 समाचार साथ के अनाथ-नाथ ! कासों कहौं ?
 नाथ ही के हाथ सब चोरऊ पहर ।

२४६—निभरम = निःशंक ।

२५०—जोग छेम = योग्य छेम, प्राप्ति और रक्षा । गहरू = विलंब, देर ।

निज काज, सुरकाज, आरत के काज राज !

बूझिए बिलंब कहा कहूँ न गहर ॥

रीति सुनि रावरी प्रतीति प्रीति रावरे सेँ

डरत हैं देखि कलिकाल को कहर ।

कहेही बनैगी, कै कहाए बलिजाउँ, राम !

‘तुलसी तू मेरो हारिहिये न हहर’ ॥२५०॥

राम रावरो सुभाउ, गुनसील महिमा प्रभाउ

जान्यो हर हनुमान लखन भरत ।

जिन्हके हिये-सुथल राम-प्रेम-सुरतरु

लसत सरस सुख फूलत फरत ॥

आप माने स्वामी कै सखा सुभाय भाइ पति

ते सनेह-सावधान रहत, डरत ।

साहिब-सेवक-रीति प्रीति-परमिति नीति

नेम को निबाह एक टेक न टरत ॥

सुक सनकादि प्रह्लाद नारदादि कहैं

राम की भगति बड़ी बिरति-निरत ।

जाने बिनु भगति न, जानिबो तिहारे हाथ

समुझि सयाने नाथ ! पगनि परत ॥

छ-मत विमत, न पुरान मत, एक मत

नेति नेति नेति नित निगम करत ।

औरनि की कहा चली ? एकै बात भलो भली

रामनाम लिए तुलसी हूँ से तरत ॥२५१॥

बाप आपने करत मेरी घनी घटि गई ।

लालची लबार की सुधारिए बारक, बलि,

२५१—बिरति-निरत = विषयों से विरक्ति में तत्पर होने से । छ-मत = छ दर्शनों के मत । विमत = विरुद्ध मत ।

राबरी भलाई सबहीं की भली भई ॥
 रोगबस तनु, कुमनोरथ मलिनमन,
 पर-अपवाद मिथ्या-वाद बानी हुई ।
 साधन की ऐसी विधि, साधन बिना न सिधि,
 बिगरी बनावै कृपानिधि की कृपा नई ॥
 पतित-पावन, हित आरत अनाथनि को,
 निराधार को आधार दीनबंधु दई ।
 इन्हमें न एकौ भयो, बूझि न जूझयो न जयो,
 ताहि तें त्रिताप तयो लुनियत वई ॥
 खाँग सूधो साधु को, कुचालि कलि तें अधिक,
 परलोक-फीकी मति लोकरंग-रई ।
 बड़े कुसमाज राज आजुलौं जो पाए दिन
 महराज कैहूँ भाँति नाम-ओट लई ॥
 रामनाम को प्रताप जानियत नीके आप,
 मोको गति दूसरी न विधि निरमई ।
 खीझिबे लायक करतब कोटि कोटि कटु,
 रीझिबे लायक तुलसी की निलजई ॥ २५२ ॥
 राम ! राखिए सरन, राखि आए सब दिन ।
 विदित त्रिलोक तिहुं काल न दयालु दूजो,
 आरत-प्रनत-पाल को है प्रभु बिन ? ॥
 लाले पाले पोषे तोषे आलसी अभागी अघी
 नाथ पै अनाथनि सों भए न उरित ।
 स्वामी समरथ ऐसो हैं तिहारो जैसो तैसो,
 काल-चाल हेरि होति हिये घनी धिन ॥
 खीझि रीझि बिहँसि अनख क्यों हूँ एक बार
 'तुलसी तू मेरो', बलि, कहियत किन ?

जाहि मूल निरमूल होहिं सुख अनुकूल,
 महाराज राम रावरी सौं तेहि छिन ॥२५३॥
 राम रावरो नाम मेरो मातु-पितु है ।
 सुजन सनेही गुरु साहब सखा सुद्वद
 रामनाम-प्रेम-पन अविचल बितु है ॥
 सतकोटि चरित अपार दयानिधि ! मधि
 लियो काढ़ि बामदेव नाम-घृतु है ।
 नाम को भरोसो बल, चारिहूँ फल को फल,
 सुमिरिछ छाँड़ि छल, भलो क्रतु है ॥
 स्वारथ-साधक परमारथ-दायक नाम
 रामनाम सारिखो न और हितु है ।
 तुलसी सुभाय कही, साँचियै परैगी सही
 सीतानाथ-नाम चित हूँ को चितु है ॥ २५४ ॥
 राम ! रावरो नाम साधु-सुरतरु है ।
 सुमिरे त्रिविध धाम हरत, पूरत काम
 सकल-सुकृत-सरसिज को सरु है ॥
 लाभहू को लाभ, सुखहू को सुख सरबस,
 पतित-पावन, डरहू को डरु है ।
 नीचे हू को, ऊँचे हू को, रंक हू को, राव-हू को
 सुलभ सुखद आपनो सो घरु है ॥
 वेद हू, पुरान हू, पुरारि हू पुकारि कह्यो
 नाम-प्रेम चारि फलहू को फरु है ।
 ऐसे रामनाम सों न प्रीति न प्रतीति मन
 मेरे जान जानिबो सोइ नर खरु है ॥
 नाम सो न मातु पितु भीत हित बंधु गुरु

साहिब सुधी सुसील-सुधाकर है ।
 नाम सों निबाहु नेहु दीन को दयालु देहु
 दास तुलसी को, बलि, बड़ा बरुहै ॥२५५॥
 कहे बिनु रह्यो न परत, कहे राम ! रस न रहत ।
 तुम से सुसाहिब की ओट जन खेटो खरो
 काल की करम की कुसाँसति सहत ॥
 करत बिचार सार पैयत न कहूँ कछु,
 सकल बड़ाई सब कहाँ तेँ लहत ?
 नाथ की महिमा सुनि समुक्ति, आपनी ओर
 हेरि हारि कै हहरि हृदय दहत ॥
 सखा न, सुसेवक न, सुतिय न, प्रभु, आप,
 माय बाप तुही साँची तुलसी कहत ।
 मेरी तो थोरी ही है, सुधरैगी बिगरियो,
 बलि, राम रावरी सौँ रही रावरी चहत ॥२५६॥
 दीनबंधु दूरि किए दीन को न दूसरी सरन ।
 आपको भलो हैं सब, आपने को कोऊ कहूँ,
 सब को भलो है, राम ! रावरो चरन ॥
 पाहन पसू पतंग कोल भील निसिचर
 काँच तेँ कृपानिधान किए सुबरन ।
 दंडक-पुहुमि पायँ-परस पुनीत भई,
 उकटे बिटप लागे फूलन फरन ॥
 पतित-पावन नाम, वाम हू दाहिनो, देव,
 दुनी न दुसह-दुख-दूषन-दरन ।

२५५—बरु = बल ।

२५६—सखा न, सुसेवक न = सखा कहिए तो...सेवक कहिए तो आप ही
 हैं । सौँ = कसम । रही रावरी चहत = आपकी बात (साख, मर्यादा) रहे
 यही चाहता हूँ ।

सीलसिंधु ! तोसों ऊँची नीचियौ कहत सोभा,
 तोसों तुही तुलसी को आरतिहरन ॥२५७॥
 जानि पहिचानि मैं बिसारे हैं कृपानिधान,
 एतों मान ढीठ हैं उलटि देत खोरि हैं ।
 करत जतन जासों जोरिबे को जोगीजन
 तासों क्योंहुं जुरी, सो अभागो बैठो तोरि हैं ॥
 मोसे दोस-कोस को भुवन-कोस दूसरो न,
 आपनी समुझि सूझि आयो टकटोरि हैं ।
 गाड़ी के खान की नाईँ माया मोह की, बड़ाई
 छिनहिं तजत, छिन भजत बहोरि हैं ॥
 बड़े साँइद्रोही, न बरावरी मेरी को कोऊ,
 नाथ की सपथ किए कहत करोरि हैं ।
 दूरि कीजै द्वार तेँ लबार लालची प्रपंची,
 सुधा सो सलिल सूकरी ज्यों गहडोरि हैं ॥
 राखिए नीके सुधारि, नीच को डारिए मारि,
 दुहूँ ओर की विचारि अब न निहोरि हैं ।
 तुलसी कही है साँची रेख बार बार खाँची,
 ढील किए नाम-महिमा की नाव बोरि हैं ॥२५८॥
 रावरी सुधारी जो बिगारी बिगरैगी मेरी,
 कहौँ, बलि, वेद की न, लोकु कहा कहैगो ।
 प्रभु को उदास-भाव जन को पाप-प्रभाव
 दुहूँ भाँति दीनबंधु ! दीन दुख दहैगो !
 मैं तो दियो छाती पबि, लयो कलिकाल दबि,
 साँसति सहत परबस को न सहैगो ?
 बाँकी बिरदावली बनैगी पाले ही कृपालु !

अंत मेरो हाल हेरि यौं न मन रहैगो ॥
 करमी, धरमी, साधु, सेवक, बिरत, रत
 आपनी भलाई थल कहां कौन लहैगो ?
 तेरे मुहँ फेरे मोसे कायर कपूत कूर
 लटे लट पटेनि को कौन परिगहैगो ? ॥
 काल पाय फिरत दसा दयालु ! सब ही की,
 तोहि बिनु मोहिं कबहुं न कोऊ चहैगो ।
 वचन करम हिये कहौं राम सौंह किए
 तुलसी पै नाथ के निबाहे निबहैगो ॥२५६॥
 साहिब उदास भए दास खास खीस होत,
 मेरी कहा चली ? हैं बजाइ जाइ रह्यो हैं ।
 लोक में न ठाउँ, परलोक को भरोसो कौन ?
 हैं तो बलि जाउँ रामनाम ही ते लख्यो हैं ॥
 करम सुभाव काल काम कोह लोभ मोह
 ग्राह, अति गहनि गरीबी गाढ़े गह्यो हैं ।
 छोरिबे को महाराज, बाँधिबे को कोटि भट,
 पाहि ! प्रभु पाहि ! तिहुँ ताप पाप दह्यो हैं ॥
 रीझि बूझी सबकी, प्रतीति प्रीति एही द्वार,
 दूध को जरयो पियत फूँकि फूँकि मद्यो हैं ।
 रदत रदत लट्यो, जाति पाँति भाँति घट्यो,
 जूठनि को लालची चहैं न दूध नह्यो हैं ॥
 अनत चह्यो न भलो, सुपथ सुचाल चलयो,

२५६—लटे=शिथिल, नीचे गिरे, पतित । लटपटे=गिरते पड़ते ।

२६०—खीस होत=नष्ट होते हैं । जाइ रह्यो हैं=नष्ट हो रहा हूँ ।
 मद्यो=मट्टा । भाँति=मर्यादा, चाल । नह्यो न चहैं=नहाना
 नहीं चाहता ।

नीके जिय जानि इहाँ भलो अनचह्यो हैं ।
तुलसी समुझि समुझायो मन बारबार
अपनो सो नाथ हूँ सोँ कहि निरबह्यो हैं ॥२६०॥

मेरी न बनै बनाए मेरे कोटि कलप लौं
राम ! रावरे बनाए बनै पलपाउ मैं ।
निपट सयाने है कृपानिधान ! कहा कहाँ ?
लिये बेर बदलि अमोल-मनि-आउ मैं ॥

मानस मलीन, करतव कलिमल-पीन,
जीह हू न जप्यों नाम, बक्यो आउ बाउ मैं ।
कुपथ कुचाल चल्यो, भयो न भूलि हूँ भलो,
वाल-दसा हूँ न खेल्यों खेलत सुदाउँ मैं ।
देखा-देखी दंभ ते', कि संग ते' भई भलाई,
प्रगटि जनाई, कियो दुरित दुराउ मैं
राग रोष द्वेष पोषे, गोगन समेत मन,
इनकी भगति कीन्हों इनहीं को भाउ मैं ।
आगिली पाछिली, अबहूँ की अनुमान ही तें
बूझियत गति, कछु कीन्हों तो न काउ मैं ॥

जग कहै राम की प्रतीति प्रीति तुलसी हूँ,
भूठे साँचे आसरो साहिब रघुराउ मैं ॥२६१॥

कह्यो न परत, बिनु कहो न रहे परत,
बड़ो सुख कहत बड़े सोँ, बलि, दीनता ।
प्रभु की बड़ाई बड़ी, आपनी छोटाई छोटी,
प्रभु की पुनीतता आपनी पाप-पीनता ॥
दुहूँ ओर समुझि सकुचि सहमत मन,
सनमुख होत सुनि स्वामी समीचीनता ।

नाथ-गुनगाथ गाए हाथ जोरि माथ नाए
 नीचऊ निवाजे प्रीति रीति की प्रवीनता ॥
 एही दरबार है गरब तें सरब-हानि,
 लाभ जोग छेम को गरीबी मिसकीनता ।
 मोटो दसकंध सो न, दूबरो बिभीषन सो,
 बूझि परी रावरे की प्रेम-पराधोनता ॥
 यहाँ को सयानप अयानप सहस सम,
 सूधौ सत भाय कहे मिटति मलीनता ।
 गोध सिला सवरी की सुधि सब दिन किए
 होइगी न साईं सों सनेह-हित-हीनता ॥
 सकल कामना देत नाम तेरो कामतर,
 सुमिरत होत कलिमल-छल-छीनता ।
 करुनानिधान वरदान तुलसी चहत
 सीतापति-भक्ति-सुरसरि-नीर-मीनता ॥२६२॥
 नाथ नीके कै जानिबी ठीक जन-जीय की ।
 रावरो भरोसो नाह कैसो प्रेमनेम लियो
 रुचिर रहनि रुचि मति गति तीय की ॥
 दुकृत सुकृत बस सबही सों संग परयो
 परखी पराई गति, आपने हूं कीय की ।
 मेरे भले को गोसाईं पोच को न सोच संक
 हैं किए कहैं सौंह साँची सीयपीय की ॥
 ज्ञानहुँ गिरा के स्वामी बाहर-भीतर-जामी
 यहाँ क्यों दुरैगी बात मुख की औ हीय की ।

२६२—मिसकीनता = (अ० मिसकीन) नम्रता ।

२६३—कीय की = किए की, करनी की ।

तुलसी तिहारो, तुमहीं तैं तुलको हित
 राखि कहैं हैं जो पै तो हैं हैं माखीय की ॥२६३॥
 मेरो कह्यौ सुनि पुनि भावै तोहि करि सो ।
 चारिहूँ बिलोचन बिलोकु तू तिलोक मंह
 तेरो तिहूँ काल कहु को है हिनु हरि सो ॥
 नए नए नेह अनुभए देह-गेह वसि
 परखे प्रपंची प्रेम परत उघरि सो ।
 सुहृद-समाज दगावाजि ही को सौदा सूत
 जब जाको काज तब मिलै पाँय परि सो ॥
 बिबुध सयाने पहिचाने कैधैं नाहीं नीके
 देत एकगुन लेत कोटिगुन भरि सो ।
 करम धरम सम-फल रघुबर विनु
 राख को सो होम है, उसर कैसे बरिसो ॥
 आदि अंत बीच भलो, भलो करै सबही को
 जाको जस लोक बेद रह्यो है बगरि सो ।
 सीतापति सारिखे न साहिब सील-निधान
 कैसे कल परै सठ बैठो सो बिसरि सो ॥
 जीव को जीवन-पान, पान को परम हित
 प्रीतम पुनीत कृत नीचन निदरि सो ।
 तुलसी तोको कृपालु जो कियो कोसलपाल
 चित्रकूट को चरित्र चेतु चित करि सो ॥२६४॥
 तन सुचि, मन रुचि, मुख कहैं जन हैं सिय-पी को ।
 केहि अभाग जान्यो नहीं जो न होइ नाथ सेां नातो नेह न नीको ॥
 जल चाहत पावक लहैं, विष होत अमी को ।
 कलि कुचाल संतनि कही सोइ सही, मोहिं कछु फहम न तरनि तमी को ॥
 जानि अंध अंजन कहै बन-बाधिनि-घो को ।

सुनि उपचार बिकार को सुबिचार करौं जब तब बुधि बल हरै ही को ॥
 प्रभु सों कहत सकुचत हैं, परौं जनि फिरि फीको ।
 निकट बोलि बलि बरजिये परिहरै ख्याल
 अब तुलसिदास जड़ जी को ॥ २६५ ॥
 ज्यों ज्यों निकट भयो चहैं कृपालु त्यों त्यों दूरि परयो हैं ।
 तुम चहुँ जुग रस एक राम हैहूँ रावरो जदपि अब अवगुननि भरयो हैं ॥
 बीच पाइ नीच बीच ही छरनि छरयो हैं ।
 हैं सुबरन कुबरन कियो, नृप तेँ भिखारि करि, सुमति तेँ कुमति करयो हैं ॥
 अगनित गिरि कानन फिर्यो, बिनु आगि जरयो हैं ।
 चित्रकूटए गए लखी कलि की कुचाल सब, अब अपडरनि डरयो हैं ॥
 माथ नाइ नाथ सों कहैं हाथ जोरि खरयो हैं ।
 चीन्हें चोर जिय मारिहै तुलसी सो कथा
 सुनि, प्रभु सों गुदरि निबरयो हैं ॥ २६६ ॥
 प्रन करि हैं हठि आजु तेँ राम द्वार परयो हैं ।
 'तू मेरो' यह बिन कहे उठिहैं न जनम भरि, प्रभु की सौँ करि निबरयो हैं ॥
 दै दै धक्का जमभट थके, टारे न टरयो हैं ।
 उदर दुसह सांसति सही बहु बार जनमि जग नरक निदरि निकरयो हैं ॥
 हैं मचला लै छाँड़िहैं जेहि लागि अरयो हैं ।
 तुम दयालु बनिहै दिए बलि, बिलंब न कीजिए जात गलानि गरयो हैं ॥
 प्रगट कहत जो सकुचिए, अपराध भरयो हैं ।
 तौ मन में अपनाइए तुलसिहि कृपा करि, कलि बिलोकि हहरयो हैं ॥ २६७ ॥
 तुम अपनायो तब जानिहैं जब मन फिरि परिहै ।
 जेहि सुभाव विषयनि लग्यो तेहि सहज नाथ सों नेह छाँड़ि छल करिहै ॥
 सुत की प्रीति, प्रतीति मीत की नृप ज्यों डर डरि है ।

२६५—तरनि=सूर्य । तमी=रात्रि ।

२६७—मचला=मचलनेवाला हठी ।

अपनो सो खारथ स्वामी सों चहुँ बिधि चातक ज्यों एक टेक ते नहिं ढरिहै ॥

हरषिहै न अति आदरे, निदरे न जरि मरिहै ।

हानि लाभ दुख सुख सबै सम चित हित अनहित कलिकुचाल परिहरिहै ॥

प्रभु-गुन सुनि मन हरषिहै, नीर नयननि ढरिहै ।

तुलसिदास भयो राम को बिस्वास प्रेम

लखि आनंद उमगि डर भरिहै ॥ २६८ ॥

राम कबहुँ प्रिय लागिहै जैसे नीर मीन को ।

सुख जीवन ज्यों जीव को, मनि ज्यों फनि को, हित ज्यों धन लोभ-लोन को ॥

ज्यों सुभाय प्रिय लगति नागरी नागर नवीन को ।

त्यों मेरे मन लालसा करिए करुनाकर पावन प्रेम पीन को ॥

मनसा को दाता कहैं सुति प्रभु प्रवीन को ।

तुलसिदास को भावतो, बलि जाउँ, दयानिधि दीजै दान दीन को ॥ २६९ ॥

कबहुँ कृपा करि रघुबीर मोहूँ चितैहो ।

भलो बुरो जन आपनो जिय जानि दयानिधि ! अबगुन अमित बितैहो ॥

जनम जनम हैं मन जित्यो, अब मोहिं जितैहो ।

हैं सनाथ हैं सही, तुमहूँ अनाथपति, जो लघुतहि न भितैहो ॥

बिनय करौं अपभयहुँ ते तुम्ह परम हितै है ।

तुलसिदास कासों कहै तुमहीं सब मेरे प्रभु गुरु मातु पितै है ॥ २७० ॥

जैसो हैं तैसो हैं राम ! रावरो जन जनि परिहरिए ।

कृपासिंधु कोसलधनी सरनागत-पालक, ढरनि आपनी ढरिए ॥

हैं तो बिगरायल ओर को, बिगरो न बिगरिए ।

तुम सुधारि आए सदा सबकी सब बिधि, अब मेरीयो सुधारिए ।

जग हँसिहै मेरे संग्रहे, कत एहि डर डरिए ?

कपि केवट कीन्हें सखा जेहि सील सरल चित तेहि सुभाव अनुसरिए ॥

२७०—भितैहो = डारोगे । अपभयहुँ ते = अपने ही डर से ।

२७१—ओर को = हृदय-दरजे का । बिगरिए = बिगाड़िए । सुधारिए = सुधारिए ।

अपराधी तब आपनो तुलसी न बिसरिए ।
 दूटियो बाँह गये परै, फूटेहूँ बिलोचन पीर होति हित करिए ॥२७१॥
 तुम जनि मन मैलो करो लोचन जनि फेरो ।
 सुनहु राम ! बिनु रावरे लोकहुँ परलोकहुँ कोउ न कहूँ हित मेरो ॥
 अगुन अलायक आलसी जानि अधम अनेरो ।
 स्वारथ के साधिन तज्यो तिजरा कोसो टोटक, औचट उलटि न हेरो ॥
 भगतिहीन, बेद-बाहिरो लखि कलिमल-घेरो ।
 देवनि हूँ देव परिहरयो, अन्याव न तिनको हूँ अपराधी सब केरो ॥
 नाम की ओट लै पेट भरत हूँ पै कहावत चेरो ।
 जगत-बिदित बात है परी समुझिए धौं अपने, लोक कि बेद बढेरो ॥
 हैहै जब तब तुम्हहिं तेँ तुलसी को भलेरो ।
 देव ! दिनहूँ दिन बिगरिहै बलि जाँउ, बिलंब किए अपनाइए सबेरो ॥२७२॥
 तुम तजि हैं कासों कहौं, और को हितु मेरे ?
 दीनबंधु सेवक-सखा, आरत अनाथ पर सहज छोहु कोहि करे ?
 बहुत पतित भवनिधि तरे बिनु तरि बिनु बेरे ।
 कृपा, कोप, सति भाय हूँ धोखहुँ, तिरछेहुँ राम तिहारेहि हेरे ॥
 जौं चितवनि सौंधी लगै चितइए सबेरे ।
 तुलसिदास अपनाइए कीजै न ठील अब जीवन-अवधि अति नेरे ॥२७३॥
 जाउँ कहाँ, ठैर है कहाँ देव ! दुखित दीन को ?
 को कृपालु स्वामी सारिखो, राखै सरनागत सब अंग बल-बिहीन को ?
 गनिहिं गुनिहिं साहिब लहै सेवा समीचीन को ।
 अधन, अगुन, आलसिन को पालिबो फबि आयो रघुनायक नबीन को ॥
 मुख कै कहा ? कहौं बिदित है जी की प्रभु प्रबीन को ।
 तिहूँ काल, तिहूँ लोक में, एक टेक रावरी तुलसी से मनमलीन को ॥२७४॥

२७२—अनेरो = व्यर्थ का, निकम्मा ।

२७३—सौंधी = रुचिकर, अच्छी ।

द्वार द्वार दीनता कही काढ़ि रद, परि पाहूँ ।
 हैं दयालु दुनि दस दिसा दुख-दोष-दलन छम, कियो न संभाषन काहूँ ॥
 तनु-जन्यो कुटिल कीट ज्यों तज्यो मातु पिता हूँ ।
 काहे को रोस दोस काहि धौं मेरे ही अभाग मोसों सकुचत छुइ सब छाहूँ ॥
 दुखित देखि संतन कह्यो सोचै जनि मन माहूँ ।
 तोसे पसु पाँवर पातकी परिहरे न सरन गए रघुवर ओर-निबाहूँ ॥
 तुलसी तिहारो भए भयो सुखी प्रीति प्रतीति बिना हूँ ।
 नाम की महिमा सील नाथ को मेरो भलो
 विलोकि अब ते' सकुचाहु सिहाहूँ ॥ २७५ ॥
 कहा न कियो, कहाँ न गयो, सीस काहि न नायो ?
 राम रावरे बिन भए जन जनमि जनमि जग दुख दसहूँ दिसि पायो ॥
 आस-बिबस खास दास हूँ नीच प्रभुनि जनायो ।
 हाहा करि दीनता कही द्वार द्वार बार बार, परी न छारमुँह बायो ॥
 असन बसन बिन बावरो जहूँ तहूँ उठि धायो ।
 महिमा मान प्रियप्रान ते तजि खेलि खलनि आगे खिनु खिनु पेट खलायो ॥
 नाथ हाथ कछु नाहिँ लग्यो लालच ललचायो ।
 साँच कहौं नाच कौन सो जो न मोहिँ लोभ लघु निलज नचायो ॥
 स्रवन नयन मन मग लगे सब थलपति तायो ।
 भूढ़ मारि हिय हारि कै हित हेरि हहरि अब चरन-सरन तकि आयो ॥
 दसरथ के समरथ तुही त्रिभुवन जस गायो ।
 तुलसी नमत अवलोकिए बलि बाँह-बोल दै बिरदावली बुलायो ॥ २७६ ॥
 रामराय बिनु रावरे मेरे को हितु साँचो !
 स्वामि सहित सब सों कहौं सुनि गुनि बिसेषि कोउ रेख दूसरी खाँचो ॥
 देह-जीव-जोग के सखा मृषा टाँचन टाँचो ।

२७५—दुनि = दुनियाँ । ओर-निबाहूँ = अंत तक निर्वाह करनेवाला ।

२७६—थलपति = राजा । तायो = जाँचा ।

किए बिचार सार कदली ज्यों मनि कनक संग लघु लसत बीच विच काँचो ॥

बिनयपत्रिका दीन की, बापु ! आपु ही बाँचो ।

हिये हेरि तुलसी लिखी सो सुभाय सही करि वहुनि पूछिए पाँचो ॥२७७॥

पवन-सुवन, रिपुदवन, भरत लाल, लखन दीन की ।

निज निज अवसर सुधि किए बलि जाँउ, दासआस पूजि है खास खीन की ॥

राजद्वार भली सब कहैं साधु समीचीन की ।

सुकृत सुजस साहिब कृपा स्वारथ परमारथ गति भए गति-बिहीन की ॥

समय सँभारि सुधारिबी तुलसी मलीन की ।

प्रीति रीति समुझाईबी नतपाल कृपालुहिं परमिति पराधीन की ॥२७८॥

मारुतिमनरुचि भरत की लखि लखन कही है ।

कलि-कालहुँ नाथ नाम सों प्रतीति प्रीति एक किंकर की निबही है ॥

सकल सभा सुनि लै उठी जानी रीति रही है ।

कृपा गरीबनिवाज की, देखत गरीब को साहब बाँह गही है ॥

बिहँसि राम कह्यो सत्य है सुधि मैंहुँ लही है ।

मुदित माथ नावत बनी तुलसी अनाथ की, परी रघुनाथ सही है ॥२७९॥

२७७—टाँचन = टाँको या डोभों से । टाँचो = टँके हुए ।

२७९—लै उठी = वही बात कहने लगी ।



LM 7/